


Āo, Ḳhud Dekh Lo

Yūhannā kī Injīl kā Chaunkā
Dene Walā Paīghām



Āo, Ḳhud Dekh Lo

āo, khud dekh lo
Come, See for Yourself

by Bakhtullah

(Urdu—Roman script)

© 2025 www.chashmamedia.org

published and printed by

Good Word, New Delhi

The title cover is a collage including
OpenClipart-Vectors <https://pixabay.com/images/id-2026191/>.

Bible quotations are from UGV.


for enquiries or to request more copies:
askandanswer786@gmail.com

Fahrist

Fazal par Fazal	1
Rūhānī Shifā	10
Āo, K̄hud Dekh Lo	18
Ilāhī Sharbat	26
Sachchā Maqdis	33
Jo Nae Sire Se Paidā Huā Ho	40
Dūlhe kā Dost	48
Zindagī kā Pānī	54
Phaltā-Phūltā Īmān	64
Kyā Tū Tandurust Honā Chāhtā Hai?	71
Īsā Masīh par Bharosā: Chār Ṭhos Gawāh	79
Bādshāhī ke Chār Usūl	87
Zindagī kī Roṭī	96
Īsā Masīh ko Pānā	109
Jo Piyāsā Ho	120
Pakarā Gayā	128
Sacchā Shāgird	135
Nūr yā Andherā? Andhe kī Shafā	147
Charwāhe kī Āwāz	162
Sachchī Qurbāngāh	173
Abadī Zindagī Kaise Pāūn?	183

Ḳhushbū yā Badbū? Saphal Zindagī kā Raz	198
Zamīn meñ Dānā. Pīchche Ho Lene kā Matlab	208
Al-Masīh Par Īmān: Yih Kyā Hai?	221
Shaitānī Tāqaton se Kaise Bachūñ?	231
Al-Masīh kī Nāī Birādārī	244
Mat Ghabrāo. Abadī Manzil kī Rāh	250
Fatahmand Zindagī. Rūhul-quds kā Kām	258
Main Angūr kī Bel Hūñ. Phal Lāne kā Rāz	269
Dushman ke Rūbarū Mazbūtī	280
Fatah! Janm Lene Wālī Birādārī kī Ḳhushī	291
Sachche Shāgird ke Anmiṭ Nishān	302
Sachchāī kā Bādshāh. Al-Masīh kī Peshī	314
Kām Mukammal Ho Gayā Hai. Masīh kī Maut	331
Main ne Ḳhudāwand ko Dekhā Hai	345
Kyā Tū Mujhe Pyār Kartā Hai? Barkat Pāne kā Rāz	358
Taswīrī Huqūq	371

Fazal par Fazal



Kalām ne Sab Kuchh Paidā Kiyā

Yūhannā kī Injīl kī pahli bāt hameñ chaunkā detī hai. Likhā hai,

Ibtidā meñ Kalām thā. Kalām Allāh ke sāth thā
aur Kalām Allāh thā. (Yūhannā 1:1)

- *Jab ham Ḳhudā kā Kalām kahte haiñ to ham kyā kahnā chāhte haiñ?*

Har wuh bāt jo Ḳhudā farmātā hai.

Lekin yahāñ yih buniyādī bāt ek aur khyāl se juṛ gaī hai. Ek khyāl jo inqalābī hai. Kalām ek hastī hai. Ek hastī jis kā Ḳhudā se tālluq qarībtarīn hai. Hastī kā nām Īsā Masīh hai.

- *Yih Kalām jo Īsā Masīh hai kab se hai?*

Wuh ibtidā hī se hai. Azl se.

- *Yih Kalām kahāñ thā?*

Ḳhudā ke sāth.

- *Kalām kyā thā?*

Ḳhudā thā.

- *Is kā kyā matlab hai?*

Ḳhudā jab kuchh farmātā hai to apne Kalām ke wasile se.
Tab hī wuh paidā ho jātā hai.

Ġhaur karen: Yih nahīñ likhā hai ki Allāh Kalām hai balki yih ki Kalām, Allāh hai. Kalām Ḳhudā kī zāt meñ sharīk hai magar Ḳhudā kī pūrī zāt Kalām kī zāt par mahdūd nahīñ hai. Ḳhudā Bāp hai aur Ḳhudā Farzand hai, magar Bāp Farzand nahīñ hai.

- *Lekin Yūhannā yih bāt kyon kartā hai? Kyā yih sirf kisī philosopher kā khyālī pulāw hai? Jis kā hamāre sāth koī khās tālluq nahīñ hai?*

Nahīn. Is kā tālluq ham sab ke sāth hai. Mujh se aur āpse bhī. Pahlī bāt, Yūhannā farmātā hai ki

Sab kuchh Kalām ke wasīle se paidā huā. Maḥlūqāt kī ek bhī chīz us ke baḡhair paidā nahīn huī. (Yūhannā 1:3)

Ḳhudā ne farmāyā to sab kuchh paidā huā. Us ke Kalām se sab kuchh paidā huā. Yahī Īsā Masīh kā pahlā kām hai.

Kalām Zindā Kartā Hai

Lekin Kalām kā kām us waqt na rukā. Us waqt se us kā kām jāri rahtā hai. Likhā hai,

Us meñ zindagī thī, aur yih zindagī insānoñ kā nūr thī. (Yūhannā 1:4)

Ham light bulb banā sakte haiñ. Lekin wuh us waqt jalegā jab bijlī mile. Bijlī band karen to light bhī band. Duniyā bhī apnī tāqat se zindā nahīn rah saktī. Ḳhudā kā Kalām wuh bijlī hai jo har lamhe use zindā rakhtī hai. Agar yih zindagī na hotī to duniyā ekdam ḡhatm ho jātī.

Ham sabhoñ kā dam ek din nikal jāegā. Magar Īsā Masīh hameñ ek aur qism kī zindagī de saktā hai: abadī zindagī. Wuh zindagī jo hameñ jannat meñ rahne ke qābil banā detī hai.

► *Kyā āp ko yih abadī zindagī hāsīl hai?*

Kalām Raushan Kartā Hai

Īsā Masīh na sirf abadī zindagī detā hai. Wuh hameñ nūr bhī pahuñchātā hai.

► *Is kā kyā matlab hai?*

Us kī zindagī bijlī jaisī hai jabki nūr bulb kī raushnī jaisā hai. Bijlī milte hī bulb raushan ho jātā hai. Lekin nūr raushnī se farq hotā hai. Yih wuh rūhānī raushnī hai jo insān ke dil ko raushan kar detā hai. Islie aglī āyat meñ likhā hai:

Yih nūr tārīkī meñ chamaktā hai, aur tārīkī
ne us par qābū na pāyā. (Yūhannā 1:5)

Andhere meñ battī jalāī to kamrā ekdam raushan ho jātā hai. Tab insān kone kone tak sab kuchh dekh saktā hai. Wuh qarīne se sajī huī mez ko bhī dekh saktā hai aur dīwār se chipke hue tilchaṭṭe ko bhī. Magar tilchaṭṭā tez raushnī pasand nahīn kartā. Use dekhte hī wuh bhāgkar kisī andherī jagah meñ chhip jātā hai.

Nūr kā yahī asar hai. Insān kā dil raushan ho jāe to bahut kuchh zāhir ho jātā hai.

► *Kyā āp kī ānkheñ is nūr se raushan ho gaī hain?*

Nūr ke sāmne nāpāk chīzeñ bhāg jātī hain. Nūr zāhir kartā hai ki insān nāpāk hai. Ki wuh apnī tāqat se pāk-sāf nahīn ho saktā. Use samajh ātī hai ki is manzil tak pahuñchne ke lie zarūrī hai ki main pāk ho jāūñ. Ki merī zindagī meñ gunāh ke tilchaṭṭe dūr ho jāeñ. Main yon gunāhoñ meñ uljhā huā jannat meñ dākhil nahīn ho saktā. Mujhe Masīh ke tez nūr kī zarūrat hai jo mujhe is gandī hālat se āzād kare.

Kalām ke Ṭhos Gawāh

► *Lekin yih nūr kis tarah zāhir huā?*

Yūhannā farmātā hai,

Ek din Allāh ne apnā paighambar bhej diyā,
ek ādmī jis kā nām Yahyā thā. Wuh nūr
kī gawāhī dene ke lie āyā. Maqsad yih thā
ki log us kī gawāhī kī binā par imān lāeñ.
(Yūhannā 1:6)

► *Ḳhudā ne apne paighambar Yahyā ko bhej diyā. Kyon bhej
diyā?*

Use nūr kī gawāhī denī thī.

Is se mālūm hotā hai ki Injīl kā farmān ṭhos hai.

► *Kyon?*

Injil islie thos hai ki us ke lātādād gawāh haiñ. Yahyā Nabī is kā ek thos gawāh thā. Use bhej diyā gayā tāki wuh nūr ke āne se pahle pahle gawāhī de ki jis nūr kī peshgoī bār bār kī gai hai wuh jald hī āne ko hai. Ab Īsā Masīh āne ko hai. Nūr kī āmad ke bād bhī sainkaṛoñ log us kī bātoñ aur kāmoñ ke gawāh hue, aur pahle gawāhoñ ne yih gawāhiyāñ Injil kī sūrat meñ qalamband kiñ.

Kalām Hameñ Ḳhudā ke Farzand Banā Detā Hai

Īsā Masīh Kalām hai jis ke wasile se duniyā paidā huī. Wuh hameñ zindagī aur nūr pahunchā detā hai.

► *Kyā yih ḡhushī kī bāt nahīñ hai?*

Zarūr. Lekin afsos, sab ne use qabūl na kiyā. Lekin kuchh is nūr se raushan hue. Likhā hai,

Kuchh use qabūl karke us ke nām par imān lāe. Unheñ us ne Allāh ke farzand banane kā haq baḡhsh diyā. (Yūhannā 1:12)

Yih ek rāz hai ki bahut-sāre log us par imān nahīñ lāte. Lekin jinheñ wuh imān lāne kī tauḡīq baḡhsh detā hai wuh nūr se raushan ho jāte haiñ. Unheñ abadī zindagī milti hai. Na sirf yih balki wuh Ḳhudā ke farzand bhī ban jāte haiñ. Us ke ḡhāndān ke bhāī-bahneñ.

► *Kis tarah?*

Likhā hai ki wuh aise farzand haiñ

jo na fitrī taur par, na kisī insān yā mard ke mansūbe se paidā hue balki Allāh se. (Yūhannā 1:13)

Matlab hai is meñ na insān kā hāth hai, na us kī marzī. Yih Ḳhudā kī taraf se ek rūhānī kām hai. Zāhir hai ki Ḳhudā ke sāth rishtā kabhī fitrī yā insān ke hāth se qāym nahīñ ho saktā. Ḡharz Ḳhudā hī hameñ apne farzand banā detā hai, aur yih ek rūhānī rishtā hai.

Kalām Hamāre Wāste Insān Ban Gayā

- *Lekin yih rishtā kis tarah qāym ho jātā hai?*

Yūhannā farmātā hai,

Kalām insān bankar hamāre darmiyān rihāishpazīr huā aur ham ne us ke jalāl kā mushāhadā kiyā. Wuh fazal aur sachchāī se māmūr thā aur us kā jalāl Bāp ke iklaute Farzand kā-sā thā. (Yūhannā 1:14)

Īsā Masīh azl se Ḳhudā Bāp kā iklautā Farzand hai. Us se sab kuchh paidā huā, aur wuh duniyā kī zindagī aur nūr hai. Us ne duniyā kī ḳharāb hālat dekhī to ranjīdā huā. Har taraf dhokā hī dhokā. Har taraf lūṭ-ḳhasoṭ. Insān Ḳhudā se dūr, bahut dūr ho gayā thā.

- *Ab wuh kyā kare?*

Wuh ham sab ko ḳhatm kar saktā thā. Lekin us ne aisā na kiyā. Use ham par rahm āyā, aur us ne kuchh aur kiyā.

- *Kyā kiyā?*

Wuh insān bankar hamāre darmiyān ā basā. Wuh pūrī tarah insān ban gayā. Us kā gosht aur ḳhūn thā. Wuh dard aur dukh mahsūs kar saktā thā. Go wuh Kalām thā to bhī us ne insān kī fitrat apnā lī. Jo be-gunāh thā wuh insān ban gayā. Us ne hamāre wāste apnī jān dī tāki ham Ḳhudā ke farzand ban jāen.

Jis kā tarjumā rihāishpazīr se huā hai us kā lafzī tarjumā tambū lagānā hai: Kalām ne hamāre darmiyān tambū lagāyā.

- *Yūhannā yih kyon farmātā hai?*

Sadiyon pahle Ḳhudā ne Sīnā Pahār par Mūsā par shariāt nāzil kī thī. Jab Mūsā pahār se utrā to us waqt us kī jild shariāt ke jalāl se chamak rahī thī. Yih dekhkar log ḍar gae. Mūsā ko apne chehre par niqāb ḍālnā parā. Us ne pahār ke dāman mein ek tañbū lagāyā jis kā nām us ne mulāqāt kā ḳhaimā rakhā. Jab kabhī wuh us mein jākar

Ḳhudā ke farmān suntā to niqāb utārtā. Lekin nikalte waqt wuh dubārā muñh par niqāb ḡhānp detā tāki Isrāīlī us kā chamaktā muñh dekhkar ḡar na jāēñ (Ḳhurūj 33:7-11; 34:29-35).

► *Yih jalāl Mūsā ke chehre se kyon chamakne lagā?*

Yih shariāt ke jalāl kā asar thā.

Isrāīlī shariāt kā yih jalāl bardāshat nahīn kar sakte the jo Mūsā ke chehre se chamak rahā thā. Īsā Masīh jab insān ban gayā to us ne bhī mulāqāt kā ḡhaimā lagāyā. Us ke zariye hamārī Ḳhudā se mulāqāt mumkin ho gai hai. Jo nāmumkin thā wuh Masīh meñ mumkin ho gayā. Quddūs Ḳhudā se mulāqāt. Quddūs Ḳhudā se rishtā.

Shariāt Yā Masīh kā Fazal?

Yahī wajah hai ki Yūhannā farmātā hai ki

Us kī kasrat se ham sab ne fazal par fazal pāyā. Kyonki shariāt Mūsā kī mārifat dī gai, lekin Allāh kā fazal aur sachchāi Īsā Masīh ke wasīle se qāym huī. (Yūhannā 1:16-17)

Sīnā Pahāḡ par shariāt Mūsā par nāzil huī, magar jo kuchh Īsā Masīh se milā hai wuh shariāt se kahīn behtar hai.

► *Kyon?*

Shariāt hamēñ batātī hai ki hamēñ kyā karnā hai. Lekin ham sab ke sab fail haiñ. Ham meñ se koī bhī shariāt ko pūrā nahīn kar pātā. Us ke jalāl ke sāmne ham Isrāīliyon kī tarah ḡarkar bhāḡ jāte haiñ. Bār bār ham shariāt ke taqāze pūre karne se mahrūm rahte haiñ. Jo sachchāi aur wafādārī Ḳhudā ham meñ dekhna chāhtā hai wuh bahut mānd paḡi rahtī hai. Yahī wajah hai ki Īsā Masīh kī zarūrat hai.

Wuhī Ḳhudā kā Kalām hai.

Wuhī hamēñ zindagī detā hai.

Wuhī hamēñ apne nūr se raushan kartā hai.

Wuhī apne fazal se ham meñ wuh sachchāi qāym kartā hai jo hameñ jannat meñ dākhl hone lāyq banā detī hai.

► *Kyā āp ko yih fazal hāsīl huā hai?*

Injīl, Yūhannā 1:1-18

Ibtidā meñ Kalām thā. Kalām Allāh ke sāth thā aur Kalām Allāh thā. Yahī ibtidā meñ Allāh ke sāth thā. Sab kuchh Kalām ke wasīle se paidā huā. Maḥlūqāt kī ek bhī chīz us ke baḡhair paidā nahīn huī. Us meñ zindagī thī, aur yih zindagī insānoñ kā nūr thī. Yih nūr tārīkī meñ chamaktā hai, aur tārīkī ne us par qābū na pāyā.

Ek dīn Allāh ne apnā paīghambar bhej diyā, ek ādmī jis kā nām Yahyā thā. Wuh nūr kī gawāhī dene ke lie āyā. Maqsad yih thā ki log us kī gawāhī kī binā par īmān lāen. Wuh ḡhud to nūr na thā balki use sirf nūr kī gawāhī denī thī. Haqīqī nūr jo har shaḡhs ko raushan kartā hai duniyā meñ āne ko thā.

Go Kalām duniyā meñ thā aur duniyā us ke wasīle se paidā huī to bhī duniyā ne use na pahchānā. Wuh us meñ āyā jo us kā apnā thā, lekin us ke apnoñ ne use qabūl na kiyā. To bhī kuchh use qabūl karke us ke nām par īmān lāe. Unheñ us ne Allāh ke farzand banane kā haq baḡhsh diyā, aise farzand jo na fitrī taur par, na kisī insān yā mard ke mansūbe se paidā hue balki Allāh se. Kalām insān bankar hamāre darmiyān rihāishpazīr huā aur ham ne us ke jalāl kā mushāhadā kiyā. Wuh fazal aur sachchāi se māmūr thā aur us kā jalāl Bāp ke iklaute Farzand kā-sā thā.

Yahyā us ke bāre meñ gawāhī dekar pukār uṭhā, “Yih wuhī hai jis ke bāre meñ maiñne kahā, ‘Ek mere bād āne wālā hai jo mujh se baḡā hai, kyonki wuh mujh se pahle thā.’”

Us kī kasrat se ham sab ne fazal par fazal pāyā. Kyoñki shariyat Mūsā kī mārifat dī gaī, lekin Allāh kā fazal aur sachchāī Īsā Masīh ke wasīle se qāym huī. Kisī ne kabhī bhī Allāh ko nahīn dekhā. Lekin iklautā Farzand jo Allāh kī god meñ hai usī ne Allāh ko ham par zāhir kiyā hai.

Rūhānī Shifā



► *Yahyā kaun thā?*

Wuh paighambar thā. ẖhudā se bhejā gayā nabī.

► *Us meñ kyā jādū thā ki wuh baṛī bhīroñ se gherā rahtā thā?*

Wuh to rough-sā ādmī thā. Us kā kapṛā ūñtoñ ke bāloñ se banā huā thā. Khāne ke lie wuh bayābān kī ṭiḍḍiyon aur janglī shahd par guzārā kartā thā. Wuh shahron se dūr Dariyā-e-Yardan ke kināre rahtā thā. Ek-do mīl is taraf yā us taraf jāo to registān shurū hotā thā.

Yih mard ajīb thā. Us kā paighām bhī ajīb thā.

► *Paighām kyā thā?*

Us kā sādā-sā paighām thā: Taslīm karo ki tum gunāhgār ho. Phir yih dikhāne ke lie pānī kā baptismā lo. Yānī pānī meñ ghotā lo.

► *Gunāhoñ kā iqrār itnā ahm kyon thā? Is kā maqsad kyā thā?*

Maqsad yih thā ki

Hameñ Rūhānī Shafā Mil Jāe

Yahyā kā pūrā dhyān hamārī rūhānī shafā thī. Aur rūhānī shafā kā pahlā qadam yih hai ki ham mān leñ ki ham se gunāh hue haiñ.

Ajīb bāt yih hai ki sainkaṛon log shahron se nikalkar us ke pās āe tāki baptismā leñ.

► *Kyon? Is paighām meñ kyā ẖhās bāt thī?*

Log to jānte the ki al-Masīh āne wālā hai. Aur al-Masīh unhīñ ko mañzūr karegā jinhoñ ne apne gunāhoñ kā iqrār kiyā ho. Gunāhgāron ko wuh miṭā ḍālegā.

Jab hujūm Yahyā Nabī ko gherne lage to Yarūshalam ke mazhabī leaderon ke kān khare ho gae. Kyā yih ādmī logon ko warghlākar garbaṛ karegā? Yih mālūm karne ke lie

unhoñ ne apne numāinde Yahyā ke pās bhej die. Dariyā par pahuñchkar unhoñ ne sīdhe pūchhā, “Āp kaun haiñ?”

► *Kyā wuh nahīñ jānte the ki wuh Yahyā hai?*

Be-shak. Wuh to us kā nām nahīñ jānanā chāhte the balki yih ki tumhārā yih karne kā kyā ikhtiyār hai? Kis ne tumheñ bhej diyā hai? Yih to wuh kām hai jo al-Masīh kī āmad par kiyā jāegā. Kyā tum samajhte ho ki tum hī Masīh ho?

Yih sunkar Yahyā Nabī ne sāf jawāb diyā, “Main Masīh nahīñ hūñ.”

Unhoñ ne pūchhā, “To phir āp kaun haiñ? Kyā āp Ilyās haiñ?”

► *Unhoñ ne yih kyon pūchhā?*

Malākī Nabī ne farmāyā thā ki al-Masīh ke āne se pahle pahle Ilyās wāpas āegā tāki logon ko Masīh ke lie taiyār kar rakhe,

Rab ke us azīm aur haulnāk dīn se pahle main tumhāre pās Ilyās Nabī ko bhejūngā.”
(Malākī 4:5)

Bād meñ Īsā Masīh ne farmāyā ki Yahyā hī Ilyās thā. Lekin is waqt Yahyā khud ne inkār kiyā, “Nahīñ, main Ilyās nahīñ hūñ.” Wuh to jāntā thā ki log Ilyās ke bāre meñ ḡhalat soch rakhte haiñ. Jis nāte se wuh Ilyās hai yih bāt log kabhī nahīñ samjheñge. Wuh kabhī nahīñ samjheñge ki us kī bas ek hī khidmat hai, yih ki un kī rūhānī shafā ho jāe.

Tab pūchh-gachh karne wālon ne sawāl kiyā, “Kyā āp āne wālā nabī haiñ?”

► *Kaun-sā nabī?*

Mūsā ne farmāyā thā ki

Rab terā Khudā tere wāste tere bhāiyoñ meñ se mujh jaise nabī ko barpā karegā. Us kī sunanā. (Tauret, Istisnā 18:15)

Lekin Yahyā Nabī ne kahā, “Nahīñ.”

“To phir āp kaun haiñ?”

Yahyā ne farmāyā, “Main registān meñ wuh āwāz hūñ jo pukār rahī hai, Rab kā rāstā sīdhā banāo.”

► *Is se wuh kyā kahnā chāhtā thā?*

Sadiyoñ pahle Yasāyāh Nabī ne peshgoī kī thī ki al-Masīh kī āmad par ek āwāz pukāregī ki

Registān meñ Rab kī rāh taiyār karo!
Bayābān meñ hamāre Ẹhudā kā rāstā sīdhā
banāo. (Yasāyāh 40:3)

► *Yahyā paighambar ne yih kyon kahā ki main wuh āwāz hūñ?*

Al-Masīh āne wālā thā, islie us kā rāstā taiyār karnā thā.

► *Masīh kā rāstā kis tarah taiyār karnā thā? Pakkā road banāne se? Yā jalsā-julūs nikālne se?*

Yahyā ko aisī bātoñ kī parwāh nahīñ thī. Us kā wāhid maqsad rūhānī shafā thā. Aur is rūhānī shafā kā pahlā qadam yih thā ki log apne gunāhoñ ko taslīm karen, ki wuh dil se Ẹhudā ke lie taiyār ho jāen.

► *Kyā āp Ẹhudā ke lie taiyār haiñ?*

Kuchh aur numāindoñ ne pūchhā, “Agar āp na Masīh haiñ, na Ilyās yā āne wālā nabī to phir āp baptismā kyon de rahe haiñ?”

Matlab hai, ākhir yih sārā tamāshā kyon ho rahā hai? Kaun tum se yih karwā rahā hai?

Yahyā ne jawāb diyā, “Main to pānī se baptismā detā hūñ, lekin tumhāre darmiyān hī ek kharā hai jis ko tum nahīñ jānte. Wuhī mere bād āne wālā hai aur main us ke jūtoñ ke tasme bhī kholne ke lāyq nahīñ.”

Matlab hai merā bas ek hī kām hai. Yih ki tumhāre dil al-Masīh ke lie taiyār ho jāen. Us ke lie taiyār ho jāen jo tumhāre darmiyān ā chukā hai.

Pūchh-gachh karne wāle khālī hāth Yarūshalam wāpas lauṭe.

Hamāre Gunāhoñ ko Miṭāyā Jāe

Agle din Īsā Masīh ꣳhud Yahyā ke pās āyā. Us kī ꣳhidmat ab shurū hone wālā thā. Use dekhte hī Yahyā phulā na samāyā. Wuh pukār uṭhā, “Dekho, yih Allāh kā lelā hai jo duniyā kā gunāh uṭhā le jātā hai.”

► *Is kā kyā matlab thā?*

Us zamāne meñ kuchh guroh samajhte the ki Masīh ākar tāqatwar lele jaisā hogā jo gunāhgāroñ kī adālat karke rāstbāzoñ ko najāt degā.

Lekin lelā ek aur bāt kī taraf bhī ishārā hai. Sadiyoñ pahle jab Isrāīlī ab Misr meñ ġhulām the to ꣳhudā ne farmāyā thā ki Isrāīlī ek lele kā ꣳhūn darwāze ke chaukhaṭoñ par lagāeñ. Jis ne aisā kiyā us ke sab ghar wāle zindā rahe. Jis ne aisā na kiyā us kā pahlauṭhā mar gayā. Rāt ke waqt Misriyoñ meñ baṛā shor mach gayā, kyonki jail ke qaidī se lekar Firaun tak un ke tamām pahlauṭhe mar gae the. Tab Misr kā bādshāh Isrāīliyoñ ko chhoṛne par majbūr huā.

Ek lele ke ꣳhūn ne unheñ ꣳhudā ke ġhazab se bachāyā.

Ek lelā najāt kā bāis ban gayā.

Īsā Masīh hī yih lelā hai jo insān ke gunāhoñ ko apne ūpar uṭhākar dūr karegā.

Wuh na sirf gunāhoñ ko māf karegā balki unheñ dūr bhī karegā.

► *Māfī aur dūr karne meñ kyā farq hai?*

Jab main kisi ke gunāhoñ ko māf karūñ to wuh dūr nahīñ hote, unheñ miṭāyā nahīñ jātā. Wuh qāym rahte haiñ. Lekin Masīh ne na sirf hamāre gunāhoñ ko māf kar diyā balki unheñ uṭhā le gayā. Unheñ miṭā diyā. Yih ek bahut baṛā farq hai.

Rūhul-Quds Hamāre Dīl meñ Ā Base

Tab Yahyā ne ek chaunkā dene wālī bāt kahī. “Mainne dekhā ki Rūhul-quds kabūtar kī tarah āsmān par se utarkar us par

ṭhahr gayā. Main to use nahīn jāntā thā, lekin jab Allāh ne mujhe baptismā dene ke lie bhejā to us ne mujhe batāyā, ‘Tū dekhegā ki Rūhul-quds utarkar kisī par ṭhahr jāegā. Yih wuhī hogā jo Rūhul-quds se baptismā degā.’ Ab mainne dekhā hai aur gawāhī detā hūn ki yih Allāh kā Farzand hai.”

► *Rūhul-quds ke utarne kā kyā matlab thā?*

Yasāyāh Nabī ne sadiyon pahle farmāyā thā ki Rūhul-quds Masīh par ṭhahregā:

Rab kā Rūh us par ṭhahregā yānī hikmat aur samajh kā Rūh, mashwarat aur quwwat kā Rūh, irfān aur Rab ke ḵhauf kā Rūh.
(Yasāyāh 11:2)

Lekin Rūhul-quds na sirf Īsā Masīh par ṭhahregā. Īsā Masīh ke wasīle se hamen bhī Rūhul-quds hāsil hogā.

► *Kyā matlab?*

Yahyā kā baptismā taiyārī kā baptismā thā. Rūhānī shafā kā pahlā qadam. Lekin insān apnī tāqat se apne gunāhoṅ par ḡhālib nahīn ā saktā. Isliē zarūrī hai ki Rūhul-quds us ke dil meṅ baskar use tabdīl kare, use mahfūz rakhe, us meṅ rūhānī zindagī ḍāltā rahe.

Bāp, Farzand aur Rūhul-Quds kī Jhalak

Āḵhir meṅ Yahyā farmātā hai ki ab mainne dekhā hai aur gawāhī detā hūn ki yih Allāh kā Farzand hai.

Yon is wāqiye meṅ taslīs kī jhalak nazar ātī hai. Īsā Masīh Ḵhudā kā Farzand hai jo apnī ḵhidmat ke āḡhāz par Yahyā kā baptismā letā hai. Isliē nahīn ki apne gunāhoṅ kā iqrār kare. Us se to kabhī bhī gunāh nahīn huā hai. Lekin jis tarah wuh apne āp ko past karke insān ban gayā usī tarah use Yahyā kā baptismā bhī lenā thā. Yih insān ke gunāhoṅ ko uṭhā le jāne kā pahlā qadam thā.

Tab hī Rūhul-quds us par ṭhahr gayā.

Ḳhudā Bāp, Ḳhudā Farzand aur Ḳhudā Rūh. Bāp Ḳhudā hai, Farzand Ḳhudā hai aur Rūh Ḳhudā hai, lekin Bāp Farzand nahīn hai, Farzand Rūh nahīn hai.

Ḳhudā Bāp ne Farzand ko is duniyā meñ bhej diyā tāki wuh hamāre gunāhoñ ko uṭhā le jāe. Us ne Rūhul-quds ko bhej diyā tāki us kī rūhānī zindagī hamāre andar ā base aur hameñ tabdīl kartī rahe.

Yoñ hī hamārī rūhānī shafā ho jātī hai. Koī aur rāstā hai nahīn. Sirf yih rāstā hai ki ham apne gunāhoñ kā iqrār karke apne hāth Īsā Masīh kī taraf phailāeñ. Tab hī wuh hamāre gunāhoñ ko uṭhā le jāegā aur Rūhul-quds hamāre dil meñ ākar basegā. Tab hī us kī rūhānī zindagī hamāre andar phailegī aur hameñ āsmānī manzil tak le jāegī.

Injil, Yūhannā 1:19-34

Yih Yahyā kī gawāhī hai jab Yarūshalam ke Yahūdīyon ne imāmoñ aur Lāwīyon ko us ke pās bhejkar pūchhā, “Āp kaun haiñ?”

Us ne inkār na kiyā balki sāf taslīm kiyā, “Maiñ Masīh nahīn hūñ.”

Unhoñ ne pūchhā, “To phir āp kaun haiñ? Kyā āp Ilyās haiñ?”

Us ne jawāb diyā, “Nahīn, maiñ wuh nahīn hūñ.”

Unhoñ ne sawāl kiyā, “Kyā āp āne wālā nabī haiñ?”

Us ne kahā, “Nahīn.”

“To phir hameñ batāeñ ki āp kaun haiñ? Jinhoñ ne hameñ bhejā hai unheñ hameñ koī na koī jawāb denā hai. Āp Ḳhud apne bāre meñ kyā kahte haiñ?”

Yahyā ne Yasāyāh Nabī kā hawālā dekar jawāb diyā, “Maiñ registān meñ wuh āwāz hūñ jo pukār rahī hai, Rab kā rāstā sīdhā banāo.”

Bheje gae log Farīsī firqe se tālluq rakhte the. Unhoñ ne pūchhā, “Agar āp na Masīh haiñ, na Ilyās yā āne wālā nabī to phir āp baptismā kyon de rahe haiñ?”

Yahyā ne jawāb diyā, “Main to pānī se baptismā detā hūñ, lekin tumhare darmiyān hī ek kharā hai jis ko tum nahīñ jānte. Wuhī mere bād āne wālā hai aur main us ke jūtoñ ke tasme bhī kholne ke lāyq nahīñ.”

Yih Yardan ke pār Bait-aniyāh mein huā jahāñ Yahyā baptismā de rahā thā.

Agle dīn Yahyā ne Īsā ko apne pās āte dekhā. Us ne kahā, “Dekho, yih Allāh kā lelā hai jo duniyā kā gunāh uṭhā le jātā hai. Yih wuhī hai jis ke bāre mein mainne kahā, ‘Ek mere bād āne wālā hai jo mujh se barā hai, kyonki wuh mujh se pahle thā.’ Main to use nahīñ jāntā thā, lekin main islie ākar pānī se baptismā dene lagā tāki wuh Isrāil par zāhir ho jāe.”

Aur Yahyā ne yih gawāhī dī, “Mainne dekhā ki Rūhul-quds kabūtar kī tarah āsmān par se utarkar us par ṭhahr gayā. Main to use nahīñ jāntā thā, lekin jab Allāh ne mujhe baptismā dene ke lie bhejā to us ne mujhe batāyā, ‘Tū dekhegā ki Rūhul-quds utarkar kisī par ṭhahr jāegā. Yih wuhī hogā jo Rūhul-quds se baptismā degā.’ Ab mainne dekhā hai aur gawāhī detā hūñ ki yih Allāh kā Farzand hai.”

Āo, Ḳhud Dekh Lo



Ek din kâ zikr hai ki ek nâsamajh laṛkâ nahr meñ nahâte hue phisal gayâ aur ḍubne lagâ. Us ke sâthiyon ke dekhte dekhte wuh shor machâte hue pânî kî gahrâiyon meñ ojhal ho gayâ. Lekin ek dost se rahâ na gayâ. Us ne pânî meñ chhalâng lagâyâ. Aur sachmuch thoṛî der bād wuh dost ko pakarkar nikāl lāyâ.

Be-chārâ laṛkâ! Wuh be-his-o-harkat kināre par paṛâ rahâ. Kyâ us kâ dam nikal chukâ thâ? Us ke yâr-dost pareshân hâlat meñ us ke gird ikaṭṭhe hue. Tab ek ne kahâ, “Ṭhahro, pahle ham phephaṛon se pânî nikâlte haiñ phir nabz dekhte haiñ.” Wuh jhukkar kâfî der tibbî imdād dene meñ lagâ rahâ. Phir uṭh kharâ huâ aur kahâ, “Bahut hî kamzor hai. Lekin zindâ hai. Halkî halkî sâñs le rahâ hai.” Hâlânki bilkul be-jân lag rahâ thâ. Na ṭhîk taur se marâ huâ thâ, na zindâ.

Kitne logon kî yahî hâlat hotî hai. Dhyân se dekho tab hî patâ chaltâ hai ki zindâ haiñ. Lag rahâ hai ki wuh nahr ke kināre adhmue paṛe haiñ. Be-his-o-harkat. Wuh bas guzārâ kar rahe haiñ. Un kî zindagî kâ koî maqsad, koî mazâ nahîn rahâ. Dekhne meñ zindâ hote haiñ magar haiñ hî murde.

► *Āp kî zindagî kaisî hai? Kyâ wuh bharpûr aur bâmaqsad hai? Agar nahîn to ham kyâ kar sakte haiñ ki hamārî jân meñ dubārâ jân âe?*

Bharpûr zindagî pāne ke lie hameñ kuchh sawāl pūchhne chāhien. Pahlâ sawāl:

Kyâ Mainne Ḳhud Ākar Dekh Liyâ Hai?

Ek wāhid hastî hai jis se hamārî jân meñ jân â saktî hai—wuh jo Īsâ Masîh kahlâtâ hai.

Ek din Īsā Masīh Yahyā Nabī ke pās āyā. Yahyā Nabī ne use dekhte hī apne shāgirdon ko batāyā ki yih Masīh hai. Yih wuhī hai jo duniyā ke gunāhoṅ ko uṭhā le jāegā.

- *Kyā yih sunkar shāgirdon ko samajh āī ki Īsā Masīh kaun hai? Nahīn. Lekin itnā wuh samajh gae ki yih ek khās aur azīm ādmī hai.*

Andhere meṅ parwānā āg se khiñchā jātā hai. Wuh majbūr ho jātā hai chāhe wuh us meṅ jal bhī jāe. Shāgird parwānon kī tarah Īsā Masīh ke pīchhe pīchhe khichte gae.

Us ne murkar un se pūchhā, “Tum kyā chāhte ho?”

- *Āj Īsā Masīh yih kuchh mujh se aur āpse bhī pūchhtā hai: Tum kyā chāhte ho?*

- *Āp kyā jawāb denge?*

Āp bare hoṅ yā chhoṭe, mard hoṅ yā aurat, wuh har ek se yih sawāl pūchhtā hai. Kyā āp kahaṅge ki “Mujhe chhor do. Paighambar ho na ho magar merā āpse kyā wāstā. Merī to alag party hai.”

- *Apne āp ko dhokā mat denā. Roz-e-mahshar par āp kyā kahaṅge jab āp ko takht-e-adālat ke sāmne lāyā jāegā?*

Shāgirdon ne aisī koī bāt na kī. Unhoṅ ne sāf pūchhā, “Ustād, āp kahān ṭhahre hue haiṅ?”

“Ustād.” Un ko itnā hī patā thā: Masīh hamārā ustād hai. Wuh ustād jis se hamārī jān meṅ jān āegī aur āsmān kā rāstā khul jāegā. Isī lie ham wahān jānā chāhte haiṅ jahān wuh ṭhahrā huā hai.

Īsā Masīh ne jawāb diyā, “Āo, khud dekh lo.”

Kitnī khūbsūrat dāwat! Wuh majbūr nahīn kartā. Khulī dāwat hai ki āo aur khud patā kar lo. Tab tum jān loge ki main kaun hūn.

Donoṅ shāgird Masīh ke hān pahuñche. Shām ke chār baj gae the. Unhoṅ ne kyā kyā dekh liyā hogā? Kyā wuh pūrī rāt bāteṅ karte rahe? Ho saktā hai ki ustād kā muhabbat-bharā

chehrā hī kāfī thā. Jo bhī huā, yih shāgird ekdam Īsā Masīh se lipaṭ gae. Ab se wuh us ke hān ṭhahre rahe.

Īsā Masīh ke pīchhe ho lene kā matlab yahī hai: Āo, ṭhud dekh lo. Aur is se zyādā: Mere sāth ṭhahro. Matlab yih nahīn ki ham us kī party ke member banen. Use siyāsī bāton se saṅht nafrat hai. Nahīn, wuh chāhtā hai ki ham us ke ghar wāle ban jāen. Ki jahān wuh hai wahān ham bhī hon. Ki wuh hamārā āqā ho. Ham us kī āwāz sunen aur us kā hāth thāme hue chal parēn. Yon hī hamen bharpūr zindagī miltī rahegī. Isli merī aur āp kī zindagī kā sab se ahm sawāl yih hai:

Kyā Main Us ke pīchhe Ho Liyā Hūn?

Jab zabardast chaṭṭān samundar meṅ gir jāe to baṛī baṛī lahren uchhalkar chāron taraf phail jātī haiṅ. Jo bhī rāste meṅ hai use wuh apne sāth le jātī haiṅ. Īsā Masīh ke pās ṭhahrne se yahī kuchh huā. Wuh Masīh kī muhabbat-bharī lahr meṅ ākar itne josh meṅ āe ki un se rahā na gayā. Un ko dūsron ko yih ṭhushṭhabrī batānā hī thā.

Donon meṅ se ek kā nām Andriyās thā. Us kā dil ustād kī bāton se chhalak uṭhā to wuh sīdhe apne bhāī Patras ke pās jā pahunchā. Kahā, “Hameṅ Masīh mil gayā hai.” Wuh jo hameṅ bachāegā. Yih kahte hī Andriyās apne bhāī ko ghasīṭkar Īsā Masīh ke pās le gayā. Bhāī bhī ekdam Masīh ke jādū meṅ ā gayā.

Lahren abhī tak zoron par thiṅ. Ab Īsā Masīh ek ādmī banām Filippus se milā. Us ne kahā, “Mere pīchhe ho le.”

► *Kyā main us ke pīchhe ho liyā hūn?*

Tīsrā sawāl:

Kyā Main Us kā Ghar Wālā Ban Gayā Hūn?

Filippus na sirf rāzī huā. Wuh itne josh meṅ ā gayā ki sīdhe apne jānane wāle Natanel ke pās pahunchā. Kahne lagā, “Hameṅ wuh mil gayā jis kā zikr Mūsā aur nabiyon ne kiyā hai. Wuh Nāsarat kā rahne wālā hai.”

Natanel kī hañsī chhūṭ gaī, “Nāsarāt!? Kyā Nāsarāt se koī achchhī chīz nikāl saktī hai?” Nāsarāt mein kam ābādī thī, aur use haqīr jānā jātā thā. Al-Masīh aīsī jagah se kis tarah ā saktā thā?

Filippus ne jāwāb diyā, “Ā aur khud dekh le.”

Filippus yih bāt samajh gayā thā ki āne aur khud dekh lene se hī sab kuchh mālūm ho jātā hai. Koī aur rāstā nahīn. Ghar kā rishtā bāndhnā hai. Yih to koī falsafā nahīn hai jo wuh kitāb paṛhkar mān saktā hai. Na kisī party ke office mein jākar apnā nām register karwānā hai. Ghar kā rishtā ghar ke andar hī bāndhā jātā hai. Ghar wālon ke āmne-sāmne.

► *Kyā main us kā ghar wālā hūn?*

Chauthā sawāl:

Kyā Masīh Merā Bādshāh Hai?

Īsā Masīh Natanel ko āte dekhkar pukār uṭhā, “Lo, yih sachchā Isrāīlī hai jis mein makr nahīn.”

Natanel hakkā-bakkā rah gayā. “Āp mujhe kahān se jānte haiñ?”

Īsā Masīh ne jāwāb diyā, “Is se pahle ki Filippus ne tujhe bulāyā mainne tujhe dekhā. Tū anjīr ke daraḡht ke sāy mein thā.”

Kyā bāt hai! Is se pahle ki ham use dekhen Īsā Masīh hamen pukārkar farmātā hai ki “Āo aur khud dekh lo.”

Natanel bhī Masīh kī muhabbat-bharī lahr mein ā gayā. Us mein dūbe hue wuh pukār uṭhā, “Ustād, āp Allāh ke Farzand haiñ, āp Isrāīl ke bādshāh haiñ.”

Īsā Masīh ne farmāyā, “Achchhā, merī yih bāt sunkar ki mainne tujhe anjīr ke daraḡht ke sāy mein dekhā tū imān lāyā hai? Tū is se kahīn baṛī bāteñ dekhegā. Main tum ko sach batātā hūn ki tum āsmān ko khulā aur Allāh ke farishton ko ūpar chaṛhte aur Ibn-e-Ādam par utarte dekhoge.”

► *Ham yih mushkil bāt kis tarah samajh sakte haiñ?*

Qadīm zamāne meñ Isrāīl ke buzurg Yāqūb ne ẓhāb meñ ek sīṛhī dekhī thī jo zamīn se āsmān tak pahuñchī thī. Farishte us par chaṛhte aur utarte nazar āte the. Rab us ke upar khaṛā thā. Likhā hai,

Tab Yāqūb jāg uṭhā. Us ne kahā, “Yaqīnan Rab yahāñ hāzīr hai, aur mujhe mālūm nahīñ thā.” Wuh ḍar gayā aur kahā, “Yih kitnā ẓhaufnāk maqām hai. Yih to Allāh hī kā ghar aur āsmān kā darwāzā hai.”

(Taurāt, Paidāish 28:16-17)

Īsā Masīh apne shāgirdon ko batānā chāhtā hai ki ab tum bhī mere wasīle se dekhoge ki āsmān kā darwāzā insān ke lie khul jāegā.

Ek aur bāt. Īsā Masīh ne apne āp ko Ibn-e-Ādam kahā.

► *Kyon?*

Dāniyāl Nabī ne sadiyon pahle al-Masīh ke बारे में ek royā dekhī thī. Us meñ us ne dekhā thā ki

Āsmān ke bādalon ke sāth sāth koī ā rahā hai jo Ibn-e-Ādam-sā lag rahā hai. Jab Qadīmūl-aiyām ke qarīb pahuñchā to us ke huzūr lāyā gayā. Use saltanat, izzat aur bādshāhī dī gai, aur har qaum, ummat aur zabān ke afrād ne us kī parastish kī. Us kī hukūmat abadī hai aur kabhī ẓhatm nahīñ hogī. Us kī bādshāhī kabhī tabāh nahīñ hogī. (Dāniyāl 9:13-14)

Īsā Masīh yahī Ibn-e-Ādam hai jo ek din duniyā kī adālat karne āegā. Us kī bādshāhī kabhī tabāh nahīñ hogī. Wuhī har insān kā ẖhudāwand hai chāhe wuh yih bāt māne yā na māne.

Yon Īsā Masīh kī khidmat shurū huī. Aur yih khidmat āj tak jāri rahī hai. Āj tak wuh bār bār pukārtā rahtā hai: Āo, khud dekh lo! Āo, khud dekh lo!

► *Rahā yih sawāl: Kyā main ne us ke huzūr ākar khud dekh liyā hai?*

Injil, Yūhannā 1:35-51

Agle din Yahyā dubārā wahīn kharā thā. Us ke do shāgird sāth the. Us ne Īsā ko wahān se guzarte hue dekhā to kahā, “Dekho, yih Allāh kā lelə hai!”

Us kī yih bāt sunkar us ke do shāgird Īsā ke pīchhe ho lie. Īsā ne muḥkar dekhā ki yih mere pīchhe chal rahe haiñ to us ne pūchhā, “Tum kyā chāhte ho?”

Unhoñ ne kahā, “Ustād, āp kahān ṭhahre hue haiñ?”

Us ne jawāb diyā, “Āo, khud dekh lo.” Chunāñche wuh us ke sāth gae. Unhoñ ne wuh jagah dekhī jahān wuh ṭhahrā huā thā aur dīn ke bāqī waqt us ke pās rahe. Shām ke taqrīban chār baj gae the.

Shamāūn Patras kā bhāī Andriyās un do shāgirdoñ meñ se ek thā jo Yahyā kī bāt sunkar Īsā ke pīchhe ho lie the. Ab us kī pahli mulāqāt us ke apne bhāī Shamāūn se huī. Us ne use batāyā, “Hameñ Masīh mil gayā hai.” (Masīh kā matlab ‘masah kiyā huā shaḥs’ hai.) Phir wuh use Īsā ke pās le gayā.

Use dekhkar Īsā ne kahā, “Tū Yūhannā kā beṭā Shamāūn hai. Tū Kaifā kahlāegā.” (Iskā Yūnānī tarjumā Patras yānī patthar hai.)

Agle din Īsā ne Galīl jāne kā irādā kiyā. Filippus se milā to us se kahā, “Mere pīchhe ho le.” Andriyās aur Patras kī tarah Filippus kā watanī shahr Bait-saidā thā.

Filippus Natanel se milā, aur us ne us se kahā, “Hameñ wuhī shaḥs mil gayā jis kā zikr Mūsā ne Tauret aur

nabiyon ne apne sahifon mein kiyā hai. Us kā nām Īsā bin Yūsuf hai aur wuh Nāsarat kā rahne wālā hai.”

Natanel ne kahā, “Nāsarat? Kyā Nāsarat se koī achchhī chīz nikal saktī hai?”

Filippus ne jawāb diyā, “Ā aur khud dekh le.”

Jab Īsā ne Natanel ko āte dekhā to us ne kahā, “Lo, yih sachchā Isrāīlī hai jis mein makr nahīn.”

Natanel ne pūchhā, “Āp mujhe kahān se jānte haiñ?”

Īsā ne jawāb diyā, “Is se pahle ki Filippus ne tujhe bulāyā mainne tujhe dekhā. Tū anjir ke daraḡht ke sāy mein thā.”

Natanel ne kahā, “Ustād, āp Allāh ke Farzand haiñ, āp Isrāīl ke bādshāh haiñ.”

Īsā ne us se pūchhā, “Achchhā, merī yih bāt sunkar ki mainne tujhe anjir ke daraḡht ke sāy mein dekhā tū imān lāyā hai? Tū is se kahīñ baṛī bāteñ dekhegā.” Us ne bāt jāri rakhī, “Main tum ko sach batātā hūñ ki tum āsmān ko khulā aur Allāh ke farishton ko ūpar chaḡhte aur Ibn-e-Ādam par utarte dekhoge.”

Ilāhī Sharbat



Ek din ek shādī huī. Gāñw kā nām Qānā thā. Īsā Masīh kī māñ wahāñ gaī, aur ustād ko bhī shāgirdoñ samet dāwat dī gaī. Us zamāne meñ shādī ām taur par 7 din manāī jāti thī. Zāhir hai ki is ke lie khāne-pīne kā bahut māl darkār thā. Achānak Mariyam Bibī Īsā Masīh ke pās āī. Wuh ghabrāī huī thī. Us ne kahā, “Un ke pās mai nahīñ rahī.” Kyā? Mai khatm hai? Hāy, hāy! Khāne-pīne kī chīzoñ kī kamī ho to shādī karāne wāloñ kā muñh kālā ho jāegā. Aise māmaloñ ke bāis talāq tak dī gaī hai.

Mai: Al-Masīh kā Nishān

► *Lekin mai hai kyā?*

Mai ko Hindī meñ hālā aur English meñ wine kahā jātā hai. Angūr kā ras galte galte mai meñ badal jātā hai. Is tarīqe se angūr kā ras derpā ho jātā hai. Tab wuh kharāb nahīñ ho jātā. Īsā Masīh ke zamāne meñ mai rozānā khāne ke sāth hī pī jāti thī, hālāñki use pānī se milāyā jātā thā. Jo mai kahī jāti thī us meñ haqīqat meñ sirf ek chauthāī yā zyādā se zyādā ek tihāī mai huā karti thī. Matlab hai ki nashe meñ āne ke lie bahut zyādā pīnā partā thā.

Dīn-e-Islām meñ sharāb manā hai jabki Tauret aur Injīl insān kī apnī zimmedārī par zor detī hai, ki wuh aql se kām le. Hāñ, Kalām meñ bār bār farmāyā gayā hai ki insān na nashe meñ paṛ jāe na nashābāz ban jāe. Yoñ aql hameñ batātī hai ki ham har qism kī sharāb se katraēñ. Jo sharāb ke ādī ban jāe wuh na sirf apne lie balki dūsroñ ke lie bhī khatre kā bāis ban jātā hai. Kitne lātādād ghar sharāb kī wajah se barbād ho gae haiñ. Kitne anginat log sharāb ke bāis traffic ke hādasoñ meñ ulajhkar mar gae haiñ.

► *To yih kis tarah mumkin hai ki Kalām hamen is jagah par mai pīne par ubhārnā chāhtā hai?*

Yih nāmumkin hai!

► *To phir mai kā yih wāqiyā kyon pesh kiyā gayā hai? Kalām hamen kyā sikhānā chāhtā hai?*

Yih samajhne ke lie hamen Kalām kī gahrāiyon mein jānā paregā. Bahut sadiyon pahle ẖudā ke paighambaron ne peshgoi kī thī ki ek waqt āegā jab ẖudā na sirf Isrāil balki pūrī duniyā ko najāt degā. Yih zamānā al-Masīh kī āmad se shurū ho jāegā. Tab wuh ek ziyāfat karegā jis mein behtarīn mai aur lazīhtarīn khāne kī kasrat hogī. Yon Yasāyāh Nabī farmātā hai,

Yihīn Koh-e-Siyyūn par Rabbul-afwāj tamām aqwām kī zabardast ziyāfat karegā. Behtarīn qism kī qadīm aur sāf-shaffāf mai pī jāegī, umdā aur lazīhtarīn khānā khāyā jāegā.

Isī pahār par wuh tamām ummaton par kā niqāb utāregā aur tamām aqwām par kā pardā haṭā degā.

Maut ilāhī fath kā luqmā hokar abad tak nest-o-nābūd rahegī.

Tab Rab Qādir-e-mutlaq har chehre ke ānsū poñchhkar tamām duniyā mein se apnī qaum kī ruswāī dūr karegā. Rab hī ne yih sab kuchh farmāyā hai.

Us din log kaheñge, “Yahī hamārā ẖudā hai jis kī najāt ke intazār mein ham rahe. Yahī hai Rab jis se ham ummīd rakhte rahe. Āo, ham shādiyānā bajākar us kī najāt kī ẖushī manāen.” (Yasāyāh 25:6-9)

Mai: Bahālī aur Rishte kā Nishān

Tamām qaumeñ yih pīkar ẖushī manāengī. Kyonki wuh ẖudā ke farzand bankar najāt pāengī. Jo pardā insān aur

Ḳhudā ke darmiyān paṛā hai wuh haṭā diyā jāegā. Aur yih rishtā sab ko zāhir ho jāegā.

► *Kis tarah?*

Is meñ ki Ḳhudā un kī zabardast ziyāfat karegā. Wahāñ sab mai kā mazā lūṭenge, magar nashā nahīñ chaṛhegā. Kisī ko nuqsān nahīñ pahuñchegā.

► *Kyon?*

Us waqt duniyā kī ṭūṭe-phūṭī hālat bahāl ho jāegī. Insān-o-haiwān meñ jo nuqs hai wuh us waqt kahīñ nahīñ pāyā jāegā. Mai bhī insān ko nuqsān nahīñ pahuñchāegī.

Mariyam Bibī kā Maqsad

Mariyam Bibī jab kahtī hai ki mai nahīñ hai to wuh is taraf ishārā kar rahī hai. Wuh samajhtī hai ki ab achchhā mauqā hai ki log mojizā dekhkar māñ jāen ki āp al-Masīh haiñ. Wuhī jis se najāt kā yih zamānā shurū ho jāegā.

Lekin Īsā Masīh kuchh saḡhtī se farmātā hai, “Ai ḡhātūn, merā āpse kyā wāstā? Merā waqt abhī nahīñ āyā.”

► *Is kā kyā matlab hai ki merā waqt abhī nahīñ āyā?*

Īsā Masīh zarūr zāhir karegā ki wuh al-Masīh hai. Lekin ab nahīñ. Pahle use bahut kuchh karnā hai. Āḡhir meñ wuh hamārī sazā apne ūpar uṭhākar mar jāegā aur tisre dīn jī uṭhegā.

Jo Kuchh Wuh Tum ko Batāe

► *Kyā Mariyam Bibī nārāz ho jātī hai? Kyā wuh māyūs ho jātī hai?*

Nahīñ. Wuh naukaroñ ko batātī hai, “Jo kuchh wuh tum ko batāe wuh karo.” Wuh unheñ nahīñ batātī ki kyā karnā hai. Wuh kahtī hai ki jo kuchh wuhī tum ko batāe. Wuh māñ jātī hai ki merā Īsā Masīh par koī iḡhtiyār, koī qabzā nahīñ hai. Usī kī marzī pūrī ho jāe. Jo bhī wuh chāhe ho jāe. Sāth sāth wuh jāntī hai ki Īsā Masīh hameshā hamārī suntā hai. Shāyad wuh wuh kuchh nahīñ karegā

jo ham chāhte haiñ. Lekin wuh kuchh karegā zarūr. Islie Mariyam Bībī naukaron se bāt kartī hai.

Wahāñ pānī ke 6 baṛe baṛe maṭke paṛe the. Yih pānī wuzū ke lie istemāl hotā thā. Patthar ke yih maṭke kāfī baṛe the. Har ek meñ taqriban 100 liter kī gunjāish thī. Ab Īsā Masīh ne farmāyā, “Maṭkon ko pānī se bhar do.” Naukaron ne aisā hī karke unheñ labālab bhar diyā.

Phir Masīh ne farmāyā, “Ab kuchh nikālkar ziyāfat kā intazām chalāne wāle ke pās le jāo.”

► *Kyā? Pānī nikālkar intazām chalāne wāle ke pās le jānā? Kyon? Kyā wuh unheñ pāgal nahīñ ṭhahragā?*

Zarūr. Lekin Īsā Masīh se ek aisā iḡhtiyār ṭapak rahā thā ki wuh mān gae. Wuh pānī nikālkar ziyāfat chalāne wāle ke pās le gae.

► *Ab kyā huā?*

Pānī ko chakhte hī wuh khīj gayā. Bolā, “Har mezbān pahle achchhī qism kī mai pīne ke lie pesh kartā hai. Phir jab logoñ ko nashā chaṛhne lage to wuh do number kī mai pilāne lagtā hai. Lekin āpne achchhī mai ab tak rakh chhoṛī hai.”

Pānī behtarīn mai meñ badal gayā thā.

Ham kah chuke the ki mai pānī se milāī jāti thī. Islie shādī manāne wāle itnī jaldī se nashe meñ nahīñ ā sakte the. Intazām chalāne wāle kā matlab yih nahīñ thā ki sab log nashe meñ dhut haiñ. Wuh kahnā chāhtā hai ki log jī bharkar khā-pī chuke haiñ, aur is waqt behtarīn mai pesh karnā be-kār hai.

Shariyat kā Pānī Yā Masīh kī Ilāhī Sharbat?

► *Pānī ke yih baṛe maṭke kis kām ke lie istemāl hote the?*
Yih dīnī ḡhusl yānī wuzū ke lie istemāl hote the.

► *Is se Kalām hamen kyā batānā chāhtā hai?*

Wuzū Tauret kā ek nishān hai. Is pānī se insān apne āp ko Ḳhudā kī nazar meñ mañzūr karne kī koshish kartā

hai. Magar ab yih pānī badal gayā thā. Wuh ek ḡhushī aur tāqat dilāne wālī sharbat meñ badal gayā thā. Yih us āb-e-hayāt kī taraf ishārā hai jo sirf al-Masīh se miltā hai. Jise pīkar insān abadī zindagī pātā hai.

Yahī hai sharīat aur Injīl meñ farq.

Insān pānī yānī apnī koshishoñ se mañzūr nahīn ho saktā. Jitnī bhī jidd-o-jahd wuh kare wuh apne gunāhoñ ko chhoṛ nahīn saktā. Sirf ek use mañzūr karā saktā hai yānī al-Masīh. Is kā nishān yih ilāhī sharbat hai. Jo is kā mazā le wuh āḡhirī ziyāfat meñ shāmil hogā, wuh Ḳhudā kā farzand kahlāegā. Sharīat ḡharāb nahīn hai. Wuh insān ko batātī hai ki use kyā karnā aur kyā chhoṛnā hai. Ki kis tarah rāh-e-mustaḡīm par chalnā hai. Wuh gunāh karne kī sazāeñ bhī farmātī hai. Sharīat se ham ko patā chaltā hai ki Ḳhudā kī kyā marzī hai. Aur us par amal karne se Ḳhudā hamēñ barkat detā hai. Sharīat to achchhī hai. Maslā sharīat nahīn hai balki insān. Insān apne gunāhoñ meñ jakṛā rahtā hai aur apnī koshishoñ se āzād ho hī nahīn saktā. Yahī wajah hai ki al-Masīh āyā. Tāki hamēñ gunāhoñ se āzādī dilāe. Yoñ Ḳhudā Hizqiyel Nabī ke wasīle se farmātā hai,

Tab main tumheñ nayā dil baḡshshkar tum meñ naī rūh ḡāl dūngā. Main tumhārā sangīn dil nikālkar tumheñ gosht-post kā narm dil atā karūngā. Kyonki main apnā hī rūh tum meñ ḡālkar tumheñ is qābil banā dūngā ki tum merī hidāyāt kī pairawī aur mere ahkām par dhyān se amal kar sako. (Hizqiyel 36:26-27)

Jab Masīh insān ke dil meñ bastā hai to us kā pathrīlā dil narm ho jātā hai aur wuh tabdil hone lagtā hai. Tab wuh is duniyā meñ rahte hue bhī ilāhī sharbat kā mazā le lekar ḡhushiyāñ manāne lagtā hai.

► *Kyā āp ḡhushī aur tāqat dilāne wālī is sharbat kā mazā le chuke haiñ?*

Injil, Yūhannā 2:1-12

Tīsre din Galīl ke gānw Qānā meñ ek shādī huī. Īsā kī māñ wahāñ thī aur Īsā aur us ke shāgirdoñ ko bhī dāwat dī gaī thī. Mai khatm ho gaī to Īsā kī māñ ne us se kahā, “Un ke pās mai nahīñ rahī.”

Īsā ne jawāb diyā, “Ai khatūn, merā āpse kyā wāstā? Merā waqt abhī nahīñ āyā.”

Lekin us kī māñ ne naukaroñ ko batāyā, “Jo kuchh wuh tum ko batāe wuh karo.” Wahāñ patthar ke chhih maṭke paṛe the jinheñ Yahūdī dīnī ghushl ke lie istemāl karte the. Har ek meñ taqriban 100 liter kī gunjāish thī. Īsā ne naukaroñ se kahā, “Maṭkoñ ko pānī se bhar do.” Chunāñche unhoñ ne unheñ labālab bhar diyā. Phir us ne kahā, “Ab kuchh nikālkar ziyāfat kā intazām chalāne wāle ke pās le jāo.” Unhoñ ne aisā hī kiyā. Jyoñ hī ziyāfat kā intazām chalāne wāle ne wuh pānī chakhā jo mai meñ badal gayā thā to us ne dūlhe ko bulāyā. (Use mālūm na thā ki yih kahāñ se āī hai, agarche un naukaroñ ko patā thā jo use nikālkar lāe the.) Us ne kahā, “Har mezbān pahle achchhī qism kī mai pīne ke lie pesh kartā hai. Phir jab logoñ ko nashā chaṛhne lage to wuh nisbatan ghaṭiyā qism kī mai pilāne lagtā hai. Lekin āpne achchhī mai ab tak rakh chhoṛī hai.”

Yon Īsā ne Galīl ke Qānā meñ yih pahlā ilāhī nishān dikhākar apne jalāl kā izhār kiyā. Yih dekhkar us ke shāgird us par imān lāe.

Is ke bād wuh apnī māñ, apne bhāiyon aur apne shāgirdoñ ke sāth Kafarnahūm ko chalā gayā. Wahāñ wuh thoṛe din rahe.

Sachchā Maqdis



Fasah kī Īd qarīb ā gai. Yih ek bahut ahm īd thī.

► *Is īd par Yahūdī kyā manāte the?*

Yih ki Ḳhudā ne Isrāīliyon ko Misr kī ḡhulāmī se chhurāyā.

Us waqt Ḳhudā ne farmāyā thā ki Isrāīlī ek lele kā ḡhūn darwāze ke chaukhaṭoṅ par lagāeṅ. Jis ne aisā kiyā us ke sab ghar wāle zindā rahe. Jis ne aisā na kiyā us kā pahlauṭhā mar gayā. Rāt ke waqt Misriyon meṅ baṛā hallā mach gayā, kyonki jail ke qaidī se lekar Firaun tak un ke tamām pahlauṭhe mar gae the. Tab Misr kā bādshāh Isrāīliyon ko chhoṛne par majbūr huā.

Lele ke Ḳhūn se Najāt

Ek lele ke ḡhūn ne unheṅ Ḳhudā ke ḡhazab se bachāyā.

Ek lelā najāt kā bāis ban gayā.

Yih lelā sirf Yarūshalam ke maqdis meṅ zabah kiyā jā saktā thā. Is mauqe par Īsā Masīh apne shāgirdoṅ ke sāth Yarūshalam pahuṅch gayā.

► *Jāne kā kyā maqsad thā? Wuh wahān kyā sikhānā chāhtā thā?*

Maqdis meṅ Mandī

Jab wuh Baitul-muqaddas pahuṅche to kyā dekhte haiṅ, bairūnī sahn meṅ baṛī mandī lagī huī hai. Us meṅ lātādād gāy-bail, bhereṅ aur kabūtar bik rahe haiṅ. Ek taraf mezon kī qatār lagī huī hai. Wahān sarrāf baiṭhe ām sikke ḡhās sikkoṅ meṅ badal rahe haiṅ. Māmūl ke sikke manā the, islie jo ātā thā use apne sikke in ḡhās sikkoṅ meṅ badalnā thā.

Har taraf ḡakārte gāy-bail, mimiyātī bheṛ-bakriyāṅ, ḡhūn ḡhūn karte kabūtar, mol-tol meṅ lage saudāgaroṅ kī chīḡh-pukār.

Yih kuchh dekhte hī Īsā Masih āpe se bāhar huā. Wuh rassiyoṅ kâ koṛā banākar sab par tūt parā. Us ne bheṛoṅ aur gāy-bailoṅ ko bāhar hānk diyā, paise badalne wāloṅ ke sikke bikher die aur un kī mezeṅ ulaṭ dīn. Kabūtar bechne wāloṅ ko us ne kahā, “Ise le jāo. Mere Bāp ke ghar ko manḍī meṅ mat badlo.”

Maqdis: Pāk Maqām

► *Wuh kyoṅ itne ḡhusse huā?*

Baitul-muqaddas wuh muqaddas jagah thā jahān insān Ḳhudā ke huzūr ākar us kī parastish kar saktā thā. Us Ḳhudā kī jo na sirf azīm hai balki jo pāk bhī hai. Jis ke sāmne gunāhgār insān qāym nahīn rah saktā. Use manḍī meṅ badalnā saḡht gunāh thā.

Is duniyā meṅ har taraf dīnī manḍiyān lagī rahtī haiṅ. Jahān log pūjā aur parastish karte haiṅ wahān paise kamānā āsān hai. Jo ām bāzār meṅ paisā gin ginkar saudā mol letā hai wuh dīn ke māmaloṅ meṅ andhā-dhund detā hai.

► *Ḳyoṅ?*

Zāhir hai, kaun apne dewatā yā Ḳhudā ko nārāz karnā chāhtā hai? Is binā par mazhab ko peshā banā diyā gayā hai.

Maqdis: Ḳhudā ke Huzūr Āne kâ Maqām

Yahān Īsā Masih ne na Baitul-muqaddas kahā na maqdis.

► *Us ne kyā kahā?*

Mere Bāp kâ ghar.

► *Kyā Ḳhudā wahān bastā thā?*

Nahīn. Jis ne sab kuchh ḡhalaq kiyā wuh na Baitul-muqaddas na kisī aur jagah rahtā hai. Magar yih ghar us kâ nishān thā, wuh maqām jis se zāhir hotā thā ki wuh apnī qaum ke sāth hai. Jahān us ke imām use qurbāniyān pesh karte the. Islie imāndār baṛī idoṅ par jahān mumkin thā wahān āyā karte the.

Maqdis: Bāp kā Maqām

► *Mere Bāp kā ghar. Mere Bāp kahkar wuh kyā kahnā chāhtā hai?*

Merā Ḳhudā Bāp se ḳhās rishtā hai, Farzand kā pāk rishtā. Yahī wajah hai ki wuh itne ḡhusse huā.

Bāp kā ghar merā ghar bhī hai. Aur isī ko tum ne mandī meñ badal ḍālā hai. Parastish aur duā kī jagah mol-tol kī mandī ban gāī hai. Ḳhudā is kā markaz nahīn rahā. Us kī tauhīn ho rahī hai.

Masīh Sachchī Parastish Qāym Karegā

Nabiyon ne bār bār is tauhīn kā zikr kiyā thā. Yoñ Yarmiyāh Nabī ne farmāyā thā,

Kyā tumhāre nazdik yih makān jis par mere hī nām kā ṭhappā lagā hai ḍākuon kā aḍḍā ban gayā hai? Ḳhabrdār! Yih sab kuchh mujhe bhī nazar ātā hai. (Yarmiyāh 7:11)

Nabiyon ne is se baḥkar sāf batāyā thā ki insān apnī koshishon se sachchī parastish kar hī nahīn saktā. Isliē ek waqt āegā jab Ḳhudā ḳhud, al-Masīh ke zariye yih sachchī parastish qāym karegā. Yoñ Zakariyāh Nabī sadiyon pahle peshgoī kartā hai ki us waqt saudābāzī ḳhatm ho jāegī.

Us din se Rabbul-afwāj ke ghar meñ koī bhī saudāgar pāyā nahīn jāegā. (Zakariyāh 14:21)

Yasāyāh Nabī ne bhī is Masīhānā zamāne kī peshgoī kī thī,

Merā ghar tamām qaumon ke lie duā kā ghar kahlāegā. (Yasāyāh 56:7)

Ḡharz, Īsā Masīh apne amal aur Kalām se zāhir kar rahā hai ki wuh al-Masīh hai jo sachchī parastish kā yih zamānā shurū karne āyā hai.

Apnī Ġhalatī ke lie Andhe

- *Dūsre log yih dekhkar kyā karte haiñ?*

Wuh pūchhte haiñ ki “Āp hameñ kyā ilāhī nishān dikhā sakte haiñ tāki hameñ yaqīn āe ki āp ko yih karne kā iḡhtiyār hai?”

- *Kyā āpne kuchh mahsūs kiyā?*

Unhoñ ne sochā tak nahīñ ki yih kām ġhalat hai. Wuh samajhte haiñ ki jo zyādā tāqat dikhāe wuhī haq meñ hai.

- *Kyā wuh Kalām se wāqif nahīñ the? Kyā un ko nahīñ patā thā ki mañḍī kā yih intazām ġhalat hai?*

Zarūr. Wuh pāk nawishtoñ se wāqif the. Lekin is duniyā meñ kaun pūchhtā hai ki kyā ġhalat aur kyā sahī hai? Har ek apne nafā aur fāyde ke pīchhe lagā rahtā hai. Aise log kisī kī bāt sirf is sūrat meñ mānte haiñ ki wuh un se zyādā zabardast ho.

Isī lie wuh iḡhtiyār kā sawāl chheṛte haiñ. Kahte haiñ ki koī ilāhī nishān dikhāo jis se patā chale ki tum zyādā tāqatwar aur zabardast ho.

Insān Maqdis ko Pāk Nahīñ Rakh Saktā

- *Īsā Masīh kyā jawāb detā hai? Kyā wuh koī shāndār mojizā dikhātā hai?*

Nahīñ. Wuh ek pahelī pesh kartā hai: “Is maqdis ko ḍhā do to maiñ ise tīn din ke andar dubārā tāmīr kar dūṅgā.”

Pūchhne wāle chaunk uṭhe. Wuh bole, “Baitul-muqaddas ko tāmīr karne meñ 46 sāl lag gae the aur āp ise tīn din meñ tāmīr karnā chāhte haiñ?”

Baitul-muqaddas itnī mehnat se taiyār ho gayā hai, aur ab bhī tāmīr kā kām jāri hai. Yih kis tarah ho saktā hai ki āp use tīn din meñ tāmīr kar sakeñ?

Lekin Īsā Masīh kuchh aur kahnā chāhtā hai. Pahle, insān maqdis kā yih intazām pāk rakhne meñ fail hai. Yih is mañḍī se zāhir ho rahā hai. Islie jald hī ek waqt āegā jab use ḍhā

diyā jāegā. Aur kuchh sālon bād aisā hī huā. Romiyon ne is shāndār maqām kā satyānās kiya.

Is se Ḳhudā zāhir karegā ki insān use pāk nahīn rakh saktā. Insān apnī koshishon se Ḳhudā tak nahīn pahuñch saktā. Is ke lie yih duniyāwī maqdis kāfī nahīn hai.

Lekin Yahūdī ek aur maqdis bhī ḍhā deñge: al-Masīh ko jo Ḳhudā tak kā sachchā rāstā hai. Wuh use rad karke salīb par chaṛhāeñge.

Masīh hī Sachchā Maqdis aur Lelā Hai

Lekin yih dūsrā maqdis qabr meñ nahīn rahegā balki jī uṭhegā. Aur yih ilāhī maqdis insān kā apne sāth rishtā qāym karegā. Jis kām meñ insān Ḳhud fail thā use wuh Ḳhud saranjām degā. Wuhī jo sachchā maqdis hai. Jo qurbānī kā sachchā lelā hai. Jo hamārī ḳhātir muā aur jī uṭhā. Jis se hameñ apne gunāhon se najāt mili hai.

Baitul-muqaddas ko ḍhā diyā gayā aur āj tak nae sire se tāmīr nahīn huā. Lekin Masīh jī uṭhā. Wuh ek pāk aur abadī maqdis hai jis ke wasīle se ham Ḳhudā ke huzūr ā sakte haiñ. Jis se ham us ke farzand ban sakte haiñ. Aur yih maqdis kisī maqām par mahdūd nahīn rahtā. Ham har jagah is maqdis ke zariye Ḳhudā se rābtā kar sakte haiñ. Har jagah ham Ḳhudā kī pāk parastish kar sakte haiñ.

► *Āp kā kyā maqdis hai? Ḳhudā tak pahuñchne kā āp kā kyā pāk rāstā hai? Kyā āp duniyā kī kisī dīnī mañḍī meñ uljhe hue haiñ? Yā Masīh āp kā sachchā maqdis hai?*

Injīl, Yūhannā 2:13-22

Jab Yahūdī Īd-e-Fasah qarīb ā gai to Īsā Yarūshalam chalā gayā. Baitul-muqaddas meñ jākar us ne dekhā ki kaī log us meñ gāy-bail, bheṛeñ aur kabūtar bech rahe haiñ. Dūsre mez par baiṭhe ḡhairmulkī sikke Baitul-muqaddas ke sikkon meñ badal rahe haiñ.

Phir Īsā ne rassiyon kā koṛā banākar sab ko Baitul-muqaddas se nikāl diyā. Us ne bheṛon aur gāy-bailon ko bāhar hānk diyā, paise badalne wālon ke sikke bikher die aur un kī mezeñ ulaṭ dīñ. Kabūtar bechne wālon ko us ne kahā, “Ise le jāo. Mere Bāp ke ghar ko manḍī meñ mat badlo.”

Yih dekhkar Īsā ke shāgirdon ko Kalām-e-muqaddas kā yih hawālā yād āyā ki “Tere ghar kī ḡhairat mujhe khā jāegī.”

Yahūdiyon ne jawāb meñ pūchhā, “Āp hameñ kyā ilāhī nishān dikhā sakte haiñ tāki hameñ yaqīn āe ki āp ko yih karne kā iḡhtiyār hai?”

Īsā ne jawāb diyā, “is maqdis ko ḍhā do to main isē tīn dīn ke andar dubārā tāmīr kar dūngā.”

Yahūdiyon ne kahā, “Baitul-muqaddas ko tāmīr karne meñ 46 sāl lag gae the aur āp isē tīn dīn meñ tāmīr karnā chāhte haiñ?”

Lekin jab Īsā ne “Is maqdis” ke alfāz istemāl kie to is kā matlab us kā apnā badan thā. Us ke murdon meñ se jī uṭhne ke bād us ke shāgirdon ko us kī yih bāt yād āī. Phir wuh Kalām-e-muqaddas aur un bāton par imān lāe jo Īsā ne kī thīñ.

Jo Nae Sire Se Paidā Huā Ho



Falastīn meñ ek izzatdār ādmī banām Nīkudemus rahtā thā. Ek rāt wuh Īsā Masīh ke pās āyā. Us ne kahā, “Ustād, ham jānte haiñ ki āp aise ustād haiñ jo Allāh kī taraf se āe haiñ.”

Sachchāi Jānane kī Pyās

Nīkudemus ek dilchasp ādmī hai. Wuh ek baṛā ālim hai. Wuh jāntā hai ki al-Masīh āne wālā hai. Aur wuh use dekhne ke lie taṛap rahā hai. Ab Īsā al-Masīh sāmne āyā hai. Us kī bāteñ aur kām zāhir karte haiñ ki wuh Ḳhudā kī taraf se hai. Parwānā battī se khinch jātā hai. Isī tarah jis ke andar sachchāi jānane kī pyās hai wuh Īsā Masīh se khinch jātā hai. Yahī Nīkudemus kā hāl hai. Koī chīz Masīh meñ hai jo use khīñch rahī hai. Islie Nīkudemus us ke pās pahuñchtā hai.

► *Kyā āp ke andar sachchāi jānane kī pyās hai?*

Jo Nae Sire se Paidā Huā Ho

► *Īsā Masīh jawāb meñ kyā kahtā hai?*

Wuh ek chaunkā dene wālī bāt farmātā hai. “Main tujhe sach batātā hūñ, sirf wuh shaḳhs Allāh kī bādshāhī ko dekh saktā hai jo nae sire se paidā huā ho.”

► *Kyā āpne kuchh note kiyā?*

Nīkudemus, Īsā Masīh kī baṛī tārif kartā hai. Jawāb meñ Masīh ek bilkul alag bāt chheṛtā hai.

► *Kyon?*

Use Nīkudemus kā pyāsā dil sāf nazar ātā hai. Wuh jāntā hai ki kyā chīz is pyās ko bujhā saktī hai. Aur yih chīz nae sire se paidā hone kā amal hai.

Tairūngā Yā Dūb Jāūngā?

Nīkudemus pāk nawishton kī gahrī gahrī bāteñ jāntā hai. Ab wuh soch rahā hai ki yih ādmī kaun hai jo Īsā kahlātā hai.

Wuh na sirf ek barā ālim hai. Us se barē mojize bhī ho rahe haiñ. Kyā yih wuh najāt dene wālā hai jis ke intazār meñ ham haiñ? Nīkudemus uljhan meñ parā hai. Ab wuh rāt ke waqt ā gayā hai tāki sukūn se Īsā Masīh kī bāteñ sun le. Wuh mahsūs kar rahā hai ki main nahr ke kināre par kharā hūñ. Ab sawāl hai ki kyā main ghotā lagāūñ yā nahīñ? Agar lagāyā to kyā hogā? Tairūngā yā dūb jāūngā?

► *Jo bhī Īsā Masīh ke huzūr ātā hai use is sawāl kā sāmnā karnā partā hai: Tairūngā yā dūb jāūngā?*

Hamārī Manzil: Āsmān kī Bādshāhī

Masīh us kī pareshānī dūr nahīn kartā balki use mazīd uljhan meñ dāl detā hai: Tujhe nae sire se paidā honā hai agar tū āsmān kī bādshāhī dekhnā chāhtā hai.

► *Yih āsmān kī bādshāhī kyā chīz hai?*

Pāk nawishte batā chuke the ki āsmān kī bādshāhī āne wālī hai. Matlab hai Ḳhudā kī bādshāhī āne wālī hai. Us waqt us kā duniyā par pūrā rāj hogā. Tab na sirf gunāhgāroñ balki gunāh ko khatm kiyā jāegā. Yih ek naī duniyā hogī jis meñ na gunāh hogā, na jang aur na maut. Yahūdī is bādshāhī ke intazār meñ the. Nīkudemus bhī yih bādshāhī dekhne kā pyāsā hai. Magar Masīh farmā rahā hai ki tum is bādshāhī ko sirf is sūrat meñ dekh sakte ho ki tum nae sire se paidā hue ho.

► *Yih kitnī ajīb bāt hai. Nae sire se paidā hone kā kyā matlab hai?*

Barē ālim Nikudemus ko samajh nahīn ātī bāt. Wuh Masīh ko uksāne ke lie pūchhtā hai, “Kyā matlab? Būrhā ādmī kis tarah nae sire se paidā ho saktā hai? Kyā wuh dubārā apnī māñ ke peṭ meñ jākar paidā ho saktā hai?”

Hamārā Wasilā: Pānī aur Rūh

Īsā Masīh jawāb detā hai, “Main tujhe sach batātā hūñ, sirf wuh shaḳhs Allāh kī bādshāhī meñ dāḳhil ho saktā hai jo pānī aur Rūh se paidā huā ho.”

Pānī aur Rūh? Nikudemus ko samajh nahīn ātī ki Masīh kyā kahnā chāhtā hai.

► *Kyā āp ko patā hai?*

Ḳhudā ne Hizqiyel Nabī se sadiyon pahle farmāyā thā ki

Main tum par sāf pānī chhiṛkūngā to tum pāk-sāf ho jāoge. Hāñ, main tumheñ tamām nāpākiyon aur buton se pāk-sāf kar dūngā.

Tab main tumheñ nayā dil baḳhshkar tum meñ naī rūh ḍāl dūngā. Main tumhārā sangīn dil nikālkar tumheñ gosht-post kā narm dil atā karūngā. Kyonki main apnā hī Rūh tum meñ ḍālkar tumheñ is qābil banā dūngā ki tum merī hidāyāt kī pairawī aur mere ahkām par dhyān se amal kar sako. (Hizqiyel 36:25-27)

Matlab sāf hai: Pahle, Ḳhudā al-Masīh ke wasīle se apne logon ko pānī se pāk-sāf karegā. Dūsre, wuh un ke saḳht dilon meñ naī rūh ḍāl degā. Pānī pāk ho jāne kā nishān hai jabki Rūh ilāhī zindagī kā nishān hai jis se insān Ḳhudā kī rāhon par chal saktā hai.

Ek hī kām ke do pahlū haiñ: Jab ham Īsā Masīh par imān lāte haiñ tab wuh hameñ pāk bhī kartā hai aur hamāre andar apnā Rūh ḍāl detā hai jo hameñ tabdīl kar detā hai.

► *To phir naī paidāish kā kyā matlab hai?*

Pānī aur Rūh aisā ilāhī kām hai jis se insān pūre taur par badal jātā hai.

► *Is kī kyā zarūrat hai?*

Insān apnī gunāhgār hālat kī wajah se Ḳhudā ke huzūr nahīn ā saktā na jannat meñ dāḳhil ho saktā hai. Sirf wuh dāḳhil ho saktā hai jo pūre taur par pāk-sāf ho jātā hai, jis kā dil ekdam badal gayā hai.

Rûh kâ Andekhâ Kâm

- *Lekin yih naî paidâish kis tarah zâhir hotî hai?*

Īsâ Masîh hawâ kî misâl detâ hai: Ham hawâ ko na dekh sakte na use control kar sakte haiñ. Wuh apnî marzî se chaltî hai. Tab ham use mahsûs karte haiñ. Peṛoñ ke patte hilte haiñ. Paudhe hawâ meñ lahlahâte haiñ. ẖudâ kâ Rûh bhî isî tarah hai. Wuh apnî marzî se kisî ke dil meñ âkar use tabdîl kartâ hai. Use dekhâ nahîñ jâtâ lekin us ke kâm se insân ẖudâ kî qurbat meñ chalne lagtâ hai.

Hamârî Râh: Maslûb Masîh

- *Ham yih naî zindagî kis tarah pâ sakte haiñ?*

Īsâ Masîh khanbe par laṭke sâñp kî misâl pesh kartâ hai: Jab Isrâîlî abhî registân meñ phir rahe the to ek jagah par wuh buṛbuṛâne lage. Natîjatan bahutoñ ko zahrile sâñpoñ se ḍasâ gayâ. Jab Mûsâ ne un kî sifârish kî to ẖudâ ne farmâyâ ki “Ek sâñp banâkar use khanbe se laṭkâ de. Jo bhî ḍasâ gayâ ho wuh use dekhkar bach jâegâ.”

Jis ne khanbe par laṭke sâñp par nazar kî wuh bach gayâ. Masîh ko bhî khanbe se laṭkâ diyâ gayâ. Jo us par nazar kare wuh abadî maut se bach jâegâ.

Tab Īsâ Masîh ek bāt sunâtâ hai jo ek jumle meñ Injil kî pûrî ẖushẖabârî pesh kartî hai:

Kyonki Allâh ne duniyâ se itnî muhabbat rakhî ki us ne apne iklaute Farzand ko baḡhsh diyâ, tâki jo bhî us par îmân lâe halâk na ho balki abadî zindagî pâe. Kyonki Allâh ne apne Farzand ko islie duniyâ meñ nahîñ bhejâ ki wuh duniyâ ko mujrim ṭahrâe balki islie ki wuh use najât de. (Yûhannâ 3:16)

Nūr ke pās Āo

- *To jo khushī kā yih paighām qabūl nahīn kartā us kā kyā banegā?*

Īsā Masīh farmātā hai: Allāh kā nūr is duniyā meñ āyā. [...] Jo sachchā kām kartā hai wuh nūr ke pās ātā hai.

Īsā Masīh Allāh kā nūr hai. Jo us ke pās ātā hai us meñ yih nūr chamakne lagtā hai. Aur yih nūr us ke achchhe kāmōñ se zāhir ho jātā hai. Lekin jo andhere meñ rahnā pasand kartā hai wuh burā kām kartā hai. Us ke apne kām use mujrim ṭhahrāte haiñ. Is hālat meñ wuh āsmān kī bādshāhī meñ dākhl nahīn ho saktā.

Jo nae sire se paidā huā ho us meñ pāk Rūh bastā hai aur wuh Masīh ko taktā rahtā hai. Us kā dil us ke nūr se bharā rahtā hai. Wuh is duniyā meñ rahte hue abadī zindagī pātā hai.

- *Kyā mujhe naī paidāish mil chukī hai? Kyā us kā Rūh mujh meñ bastā hai aur main Masīh ko taktā rahtā hūñ? Kyā us kā nūr merī zindagī meñ chamak-damak rahā hai?*

Injil, Yūhannā 3:1-21

Farīsī firqe kā ek ādmī banām Nīkudemus thā jo Yahūdī adālat-e-āliyā kā rukn thā. Wuh rāt ke waqt Īsā ke pās āyā aur kahā, “Ustād, ham jānte haiñ ki āp aise ustād haiñ jo Allāh kī taraf se āe haiñ, kyonki jo ilāhī nishān āp dikhāte haiñ wuh sirf aisā shaḵhs hī dikhā saktā hai jis ke sāth Allāh ho.”

Īsā ne jawāb diyā, “Main tujhe sach batātā hūñ, sirf wuh shaḵhs Allāh kī bādshāhī ko dekh saktā hai jo nae sire se paidā huā ho.”

Nīkudemus ne etarāz kiyā, “Kyā matlab? Būṛhā ādmī kis tarah nae sire se paidā ho saktā hai? Kyā wuh dubārā apnī mān ke peṭ meñ jākar paidā ho saktā hai?”

Īsā ne jawāb diyā, “Maiñ tujhe sach batātā hūñ, sirf wuh shaḡhs Allāh kī bādshāhī meñ dāḡhil ho saktā hai jo pānī aur Rūh se paidā huā ho. Jo kuchh jism se paidā hotā hai wuh jismānī hai, lekin jo Rūh se paidā hotā hai wuh rūhānī hai. Islie tū tājjub na kar ki maiñ kahtā hūñ, ‘Tumheñ nae sire se paidā honā zarūr hai.’ Hawā jahāñ chāhe chaltī hai. Tū us kī āwāz to suntā hai, lekin yih nahīñ jāntā ki kahāñ se ātī aur kahāñ ko jātī hai. Yahī hālat har us shaḡhs kī hai jo Rūh se paidā huā hai.”

Nīkudemus ne pūchhā, “Yih kis tarah ho saktā hai?”

Īsā ne jawāb diyā, “Tū to Isrāīl kā ustād hai. Kyā is ke bāwujūd bhī yih bāteñ nahīñ samajhtā? Maiñ tujh ko sach batātā hūñ, ham wuh kuchh bayān karte haiñ jo ham jānte haiñ aur us kī gawāhī dete haiñ jo ham ne ḡhud dekhā hai. To bhī tum log hamārī gawāhī qabūl nahīñ karte. Maiñne tum ko duniyāwī bāteñ sunāī haiñ aur tum un par īmān nahīñ rakhte. To phir tum kyonkar īmān lāoge agar tumheñ āsmānī bāteñ ke bāre meñ batāūñ? Āsmān par koī nahīñ chaḡhā siwāe Ibn-e-Ādam ke, jo āsmān se utrā hai.

Aur jis tarah Mūsā ne registān meñ sāñp ko lakaḡī par laṡkākar ūñchā kar diyā usī tarah zarūr hai ki Ibn-e-Ādam ko bhī ūñche par chaḡhāyā jāe, tāki har ek ko jo us par īmān lāegā abadī zindagī mil jāe. Kyonki Allāh ne duniyā se itnī muhabbat rakhī ki us ne apne iklaute Farzand ko baḡhsh diyā, tāki jo bhī us par īmān lāe halāk na ho balki abadī zindagī pāe. Kyonki Allāh ne apne Farzand ko islie duniyā meñ nahīñ bhejā ki wuh duniyā ko mujrim ṡahrāe balki islie ki wuh use najāt de.

Jo bhī us par īmān lāyā hai use mujrim nahīñ qarār diyā jāegā, lekin jo īmān nahīñ rakhtā use mujrim ṡahrāyā jā chukā hai. Wajah yih hai ki wuh Allāh ke iklaute

Farzand ke nām par īmān nahīn lāyā. Aur logoñ ko mujrim ṭhahrāne kā sabab yih hai ki go Allāh kā nūr is duniyā meñ āyā, lekin logoñ ne nūr kī nisbat andhere ko zyādā pyār kiyā, kyonki un ke kām bure the. Jo bhī ḡhalat kām kartā hai wuh nūr se dushmanī rakhtā hai aur us ke qarīb nahīn ātā tāki us ke bure kāmōñ kā pol na khul jāe. Lekin jo sachchā kām kartā hai wuh nūr ke pās ātā hai tāki zāhir ho jāe ki us ke kām Allāh ke wasīle se hue haiñ.”

Dūlhe kā Dost



Ek din Yahyā Nabī ke shāgird be-chainī se apne ustād ke pās āe. Kahne lage, “Ustād, jis ke bāre mein āpne gawāhī dī ki wuh Masīh hai, wuh bhī logoñ ko baptismā de rahā hai. Ab sab log usī ke pās jā rahe haiñ.”

► *Jab Yahyā baptismā detā thā to wuh kyā kartā thā?*

Wuh unheñ pānī mein ḍubo detā thā.

► *Baptisme kā kyā maqsad thā?*

Baptismā lene wālā is se taslīm kartā thā ki main gunāhgār hūñ. Ab se main bure khyāloñ aur kāmoñ se dūr rahkar āne wāle Masīh ke lie taiyār rahnā chāhtā hūñ.

► *Yahyā Nabī ke shāgird kyon itne pareshān haiñ?*

Zyādā log Īsā Masīh ke pās jā rahe haiñ. Yih kaisī bāt hai? Is kā kyā matlab hai? Kyā wuh hamārā muqābalā karnā chāhtā hai? Kyā wuh hamārī k̄hidmat k̄hatm karnā chāhtā hai? Aur phir hamāre ustād kā kyā banegā?

Ḳhudā se hī Sab Kuchh Miltā Hai

► *Kyā Yahyā Nabī nārāz huā? Kyā wuh māyūs huā?*

Nahīñ. Us ne baṛī halīmī se jawāb diyā: “Har ek ko sirf wuh kuchh miltā hai jo use āsmān se diyā jātā hai.”

Kitnā dilchasp jawāb.

► *Yahyā Nabī kyā kahnā chāhtā hai?*

Sab kuchh Allāh Ta’ālā ke hāth se miltā hai. Wuhī sab kuchh detā hai. Phir mujhe be-chain hone kī kyā zarūrat hai.

► *Kyā Yahyā yih kahte hue k̄hush yā dukhī hai?*

Wuh k̄hush hai.

Ham bhī bahut mauqoñ par kahte haiñ ki ūpar wāle kī marzī.

► *Aksar auqāt jab ham yih kahte haiñ to kyā ham k̄hush yā dukhī hote haiñ?*

Aksar jab ham yih kahte haiñ to ḡhush nahīñ hote. Ham māyūs hote haiñ ki ḡhudā ne wuh hone nahīñ diyā jo ham chāhte haiñ. Kahne kā matlab hai, chalo, maiñ majbūr hūñ. ḡhush nahīñ hūñ magar kyā karūñ?

Lekin Yahyā māyūs nahīñ hai. Wuh kandhe uchkākar nahīñ kahtā ki chalo ḡhudā kī marzī. bilkul nahīñ. Wuh ḡhush hai.

Merī ḡhidmat Bas Taiyārī Hai

ḡhushī kī lahr Yahyā kī har bāt se chhalaktī hai: Mainne to kahā thā ki maiñ Masīh nahīñ hūñ. Mujhe to sirf us ke āge āge bhejā gayā hai. Maiñ sirf us kī rāh ko taiyār karne āyā hūñ. Jis tarah Yasāyāh Nabī ne peshgoī kī thī,

Registān meñ Rab kī rāh taiyār karo! Bayābān meñ hamāre ḡhudā kā rāstā sīdhā banāo. [...] Tab Allāh kā jalāl zāhir ho jāegā, aur tamām insān milkar use dekheñge. (Yasāyāh 43:3)

Merā bas ek hī kām hai: Is rāh ko taiyār karnā. Jab ḡhudā kā jalāl Masīh meñ zāhir ho gayā hai to mujhe māyūs hone kī kyā zarūrat hai? Jo ḡhidmat mujhe dī gāī hai wuh mukammal ho gayā hai. Mainne rāstā taiyār kar rakhā hai aur bas. Merī taraf se koi kamī nahīñ rahī.

Masīh kā pairokār hameshā aisā hī sochegā. Asl ustād aur bādshāh wuhī hai. Merā kām bas us kī rāh kī taiyārī karnī hai. Asl kām wuhī kartā hai. Wuhī dilon ke qilon ko toṛkar apnā rāj qāym kartā hai. Ham insānon kā is meñ koi hāth nahīñ hai.

Dūlhe kā Dost

Tab Yahyā Nabī ek chaunkā dene wālī misāl pesh kartā hai: Dūlhā hī dulhan se shādī kartā hai, aur dulhan usī kī hai. Dost to dost hī hai chāhe kitnā achchhā dost kyon na ho. Hāñ, dost zarūr dūlhe kī ḡhushī meñ sharik hotā hai. Dūlhe kī āwāz sun sunkar us kī ḡhushī kī intahā nahīñ hotī. Maiñ bhī aisā hī dost hūñ.

► *Dūlhe kī misāl se wuh kyā kahnā chāhtā hai?*

Wuh yih kahnā chāhtā hai ki Masīh dūlhā hai jabki main dūlhe kā dost hūn.

► *Dost se kyā murād hai?*

Us zamāne mein shādī kā pūrā intazām dūlhe ke qarībī doston ke hāth mein thā. Aksar do aise dost the. Un kī zimmedārī yih bhī thī ki dūlhe aur dulhan ko salāmatī se dūlhe ke ghar pahuñchāen. Un kī bahut ahmiyat thī. To bhī wuh shādī kā markaz aur maqsad nahīn the balki dūlhā aur dulhan. Shādī khatm huī to dūlhe ke yih dost khamoshī se chale jāte the.

► *Yahyā ke nazdik dūlhā kaun hai?*

Dūlhā Īsā Masīh hai.

► *Is se wuh kyā kahnā chāhtā hai?*

Markazī bāt dūlhā hai. Main sirf us kā dost hūn jo shādī kī taiyāriyon mein lagā rahtā hūn. Mujhe to dulhan se shādī nahīn karnī hai. Merā bas yih farz hai ki shādī ke intazām par dhyān dūn. Dūlhe kī āwāz sunkar hī merī khushī kī intahā nahīn hotī. Aur shādī kī takmīl par merā kām bhī khatm ho jāegā.

► *To phir dulhan kaun hai?*

Is ke lie hamen thorī gahrāī mein jāne kī zarūrat hai. Nabiyon ne sadiyon pahle farmāyā thā ki ek masīhānā waqt āegā jab Kḥudā apnī qaum ko yon qabūl karegā jis tarah dūlhā apnī dulhan ko. Yasāyāh us waqt ke bāre mein farmātā hai,

Jis tarah dūlhā dulhan ke bāis khushī manātā hai usī tarah terā Kḥudā tere sabab se khushī manāegā. (Yasāyāh 62:5)

Yahyā Nabī yih kah rahā hai ki ab yih waqt ā gayā hai. Al-Masīh ā gayā hai. Wuhī dūlhā hai. Aur us kī dulhan us kī qaum hai, wuh jo us par imān rakhte haiñ. Masīh apnī qaum ko bulāne āyā hai, aur yih baṛī khushī kī bāt hai. Ab

tak main dūlhe kī taiyāriyon meñ lagā hūñ kyonki main us kā dost hūñ. Lekin intazām karwāne kā merā kām khatm hone wālā hai aur main baṛā khush hūñ. Main kis tarah gham khā saktā hūñ?

Wuh Baṛhtā Jāe

Tab Yahyā Nabī ek gahrī rūhānī haqīqat bayān kartā hai: Lāzim hai ki wuh baṛhtā jāe jabki main ghaṭṭā jāūñ.

► *Is se wuh kyā kahnā chāhtā hai?*

Ahm bāt Masīh hai. Merī k̄hidmat us kī nisbat sifar hai. Jab wuh ā maujūd huā hai to merā kām khatm hone wālā hai. Us kī tārif ho. Bas yih bāt ahm hai ki use jalāl mile, wuhī baṛhtā jāe. Dūlhe ko dekh dekhkar merī khushī pūri ho gaī hai.

Ek bār Masīh ne farmāyā, “Jo awwal honā chāhtā hai wuh sab se āk̄hir meñ āe aur sab kā k̄hādim ho” (Marqus 9:35). Yahyā meñ yahī k̄hādimānā rūh thī. Wuh sab kī k̄hidmat karne ko taiyār thā. Bas, dūlhe ko khush rakhnā hai.

Kuchh dinoñ bād Yahyā Nabī shahīd huā.

► *Kyā us kī k̄hidmat be-fāydā thī?*

Bilkul nahīñ. Jo kām use diyā gayā thā wuh mukammal huā thā. Masīh kī rāh taiyār hui thī. Dūlhā ā gayā thā.

Injil, Yūhannā 3:22-30


Is ke bād Īsā apne shāgirdon ke sāth Yahūdiyā ke ilāqe meñ gayā. Wahāñ wuh kuchh der ke lie un ke sāth ṭhahrā aur logon ko baptismā dene lagā. Us waqt Yahyā bhī Shālem ke qarīb wāqe maqām Ainon meñ baptismā de rahā thā, kyonki wahāñ pānī bahut thā. Us jagah par log baptismā lene ke lie āte rahe. (Yahyā ko ab tak jail meñ nahīñ ḍālā gayā thā.)

Ek din Yahyā ke shāgirdon kā kisī Yahūdī ke sāth mubāhasā chhiṛ gayā. Zer-e-ghaur mazmūn dīnī ghusl

thā. Wuh Yahyā ke pās āe aur kahne lage, “Ustād, jis ādmī se āp kī Dariyā-e-Yardan ke pār mulāqāt huī aur jis ke bāre meñ āpne gawāhī dī ki wuh Masīh hai, wuh bhī logon ko baptismā de rahā hai. Ab sab log usī ke pās jā rahe haiñ.”

Yahyā ne jawāb diyā, “Har ek ko sirf wuh kuchh miltā hai jo use āsmān se diyā jātā hai. Tum khud is ke gawāh ho ki mainne kahā, ‘Main Masīh nahīn hūn balki mujhe us ke āge āge bhejā gayā hai.’ Dūlhā hī dulhan se shādī kartā hai, aur dulhan usī kī hai. Us kā dost sirf sāth kharā hotā hai. Aur dūlhe kī āwāz sun sunkar dost kī khushī kī intahā nahīn hotī. Main bhī aisā hī dost hūn jis kī khushī pūrī ho gaī hai. Lāzim hai ki wuh barhtā jae jabki main ghaṭtā jāūñ.

Zindagī kā Pānī



Ek din Īsā Masīh apne shāgirdon ke sāth Sāmārī ilāqe meñ se guzar rihā thā. Sāmārī Yahūdiyon ke dushman the. Wuh ek ābādī banām Sūkhār ke bāhar ruke. Īsā Masīh lanbe safr se chaknāchūr ho gayā thā. Wuh wahāñ paṛe ek kueñ par baiṭh gayā. Us ke shāgird shahr meñ gae tāki kuchh khānā kharīd lāeñ.

Dopahar ke bārah baj gae the.

Tab ek Sāmārī aurat pāñī bharne āī.

► *Sāmārī kaun the?*

Sāmārī Yahūdiyon se milte-julte the. Wuh bhī Kḥudā kī parastish karte the, lekin Yahūdiyon se alag. Donon qaumon ke darmiyān saḡht nafrat thī.

Bhūle-Bhaṭke kā Pyāsā

Ām taur par log subh-sawere aur shām ko pāñī bharne āte the. Lekin yih aurat bārah baje kueñ par āī.

► *Kyon?*

Yih aurat badnām thī. Yih gunāh meñ uljhī huī aurat thī. To bhī Īsā Masīh ne us se bāt kī.

► *Kyā use patā nahīñ thā ki yih gunāhgār aurat hai?*

Zarūr. Use kḥūb mālūm thā.

► *To us ne aurat se bāt kyon kī?*

Wuh har insān se muhabbat kartā hai chāhe wuh kitnā hī gunāhgār kyon na ho. Wuh to har insān kī talāsh meñ rahtā hai. Wuh chāhtā hai ki har ek paṭarī par wāpas āe. Ki har ek Kḥudā kā farzand bane. Ki har ek jannat meñ dākḥil ho jāe.

► *Us ne kyā farmāyā? Kyā us ne use jhīrkī dī?*

Nahīñ. Us ne kahā, “Mujhe zarā pāñī pilā.”

Kaisī bāt! Dushman kī gunāhgār aurat se aisī bāt!

Aurat chaunk paṛī. Kahne lagī, “Āp to Yahūdī haiñ, aur maiñ Sāmārī aurat hūñ. Āp kis tarah mujh se pānī pilāne kī darḡhāst kar sakte haiñ?”

Ham bhī yih sawāl pūchhte haiñ. Magar Īsā Masīh ham jaisā nahīñ sochtā. Wuh aurat ke dil tak pahuñchnā chāhtā thā, aur wuh jāntā thā ki is sawāl se wuh use apnī taraf khīnchegā.

► *Pānī māṅgne kā kyā maqsad thā?*

Agar wuh ḡhāmosh rahtā to aurat se bāt na chhiṛtī. Agar wuh jhiṛkī detā to aurat kī nafrat baṛh jātī. Pānī māṅgne se us ne apne āp ko aurat ke barābar kar diyā. Kitnī halīmī!

► *Itnī halīmī kyon?*

Islie ki wuh bhūle-bhaṭke kā pyāsā hai. Wuh chāhtā hai ki har ek ko najāt mile.

Āp ko bhī. Mujh ko bhī.

Zindagī kā Pānī

Magar pānī māṅgne kā ek aur maqsad bhī hai. Wuh ek bāt chheṛnā chāhtā hai jis se aurat ko rūhānī zindagī mile.

Aurat ke sawāl se shak ṭapak rahā hai: Āp to Yahūdī haiñ. Āp kis tarah pānī māṅg sakte haiñ? Dāl meñ kuchh kālā hai.

Phir bhī Īsā Masīh kā maqsad pūrā ho gayā hai. Aurat us kī bāteñ sunane ke lie taiyār ho gai hai. Ab wuh use sīdhā asl bāt tak le jātā hai. Wuh farmātā hai, “Agar tū us baḡhshish se wāqif hotī jo Allāh tujh ko denā chāhtā hai aur tū use jāntī jo tujh se pānī māṅg rahā hai to tū us se māṅgtī aur wuh tujhe zindagī kā pānī detā.”

Matlab hai, mere pās ek ḡhushḡhabrī hai. Dhyān se sun le! Ḳhudā tujhe ek chīz denā chāhtā hai. Ise māṅg le to tujhe yih milegī zarūr.

► *Kyā chīz?*

Zindagī kā pānī.

Ab aurat maze se sunane lagī hai. Wuh kuchh mazāq meñ kahtī hai, “Ḳhudāwand, āp ke pās to bālṭī nahīn hai aur yih kuāñ gahrā hai. Āp ko zindagī kā yih pānī kahān se milā? Kyā āp hamāre bāp Yāqūb se baṛe haiñ jis ne hameñ yih kuāñ diyā?”

Āp ḳhud pānī māñg rahe haiñ kyonki kuāñ gahrā hai. Aur āp ke pās bālṭī bhī nahīn hai. To āp kis tarah is se behtar pānī de sakte haiñ? Kueñ kā yih intazām hazār sāloñ se zyādā chaltā ā rahā hai, aur ham bhī is kā pānī istemāl karte haiñ. Āp is se behtar intazām kis tarah muhaiyā kar sakte haiñ?

Īsā Masīh is halke mazāq ke jawāb meñ asl bāt par ā jātā hai: “Jo bhī is pānī meñ se pie use dubārā pyās lagegī. Lekin jise main pānī pilā dūñ use bād meñ kabhī bhī pyās nahīn lagegī. Balki jo pānī main use dūngā wuh us meñ ek chashmā ban jāegā jis se pānī phūṭkar abadī zindagī muhaiyā karegā.”

Jo pānī tujhe Yāqūb se milā hai wuh terī rūh kī pyās nahīn bujhā saktā. Magar jo pānī main tujhe detā hūñ us se rūh kī yih pyās bujh jāegī. Itnī kasrat se pānī milegā ki tujh meñ chashmā ban jāegā. Aisā chashmā jis kā pānī abadī zindagī muhaiyā karegā.

► *Yih abadī zindagī kyā chīz hai?*

Kueñ kā pānī jism kī pyās bujhā saktā hai. Magar Masīh kā pānī rūh kī pyās bujhātā hai. Kueñ kā pānī bār bār pīnā paṛtā hai, aur to bhī āḳhir meñ jism ḳhatm ho jātā hai. Masīh kā pānī ek bār pī liyā to rūh kī pyās bujh jātī hai aur insān ko abadī zindagī miltī hai. Yih pānī dil meñ chashmā bankar insān ko maut ke bād bhī zindagī dilātā hai.

► *Wāh! Kyā ham sab ko aise pānī kī zarūrat nahīn?*

Ab tak aurat ko samajh nahīn ātī. Wuh kahtī hai, “Ḳhudāwand, mujhe yih pānī pilā deñ. Phir mujhe kabhī bhī pyās nahīn lagegī aur mujhe bār bār yahān ākar pānī bharnā nahīn paṛegā.”

Zaḥm kâ Ilāj

Lagtā hai ki aurat ab tak mutma'in nahīn hai. Lagtā hai wuh Īsā Masīh ko lalkār rahī hai ki pahle wuh kuchh kar dikhāo jo tum kah rahe ho.

Shāyad wuh yih bhī soch rahī hai ki kyā yih ādmī pīr hai?

► *Kyā Īsā Masīh sirf pīr hai? Jādūgar qism kâ ādmī?*

Nahīn. Wuh rūhānī doctor hai jo us kâ ilāj karnā chāhtā hai. Wuh kahtā hai, “Jā, apne ḡhāwand ko bulā lā.”

Aurat bāt ṭalkar kahtī hai, “Merā koī ḡhāwand nahīn hai.”

Īsā Masīh farmātā hai, “Tūne sahī kahā ki merā ḡhāwand nahīn hai, kyonki terī shādī pānch mardoñ se ho chukī hai aur jis ādmī ke sāth tū ab rah rahī hai wuh terā shauhar nahīn hai. Terī bāt bilkul durust hai.”

Īsā Masīh kitnī mahārat se apnī rūhānī nashtar se pīp se bhare zaḥm ko khol detā hai.

► *Kyon?*

Wuh jāntā hai ki aurat ko ilāj kī zarūrat hai. Zindagī kâ yih pānī sirf is sūrat meñ mil saktā hai ki wuh apne gunāhoñ ko taslīm kare. Ki wuh taubā kare. Gunāh kâ iqrār shafā kâ pahlā qadam hai. Tab hī zaḥm bharegā. Tab hī zindagī kâ pānī dil meñ ā saktā hai.

Ab mazāq kī koī bāt nahīn rahī. Aurat ko sadmā ātā hai. Hāy, is ajnabī ko sab kuchh mālūm hai! Wuh kahtī hai, “Ḥudāwand, main dekhtī hūñ ki āp nabī haiñ.”

► *Kyon?*

Yih ajnabī use us ke dil kī bāteñ kholkar batātā hai.

► *Kaun yih kar saktā hai?*

Sirf wuh jo nabī hai.

Yarūshalam Yā Garizīm?

Lekin Sāmariyoñ ke nazdīk Yahūdī kāfir haiñ. Yih ajnabī kis tarah nabī ho saktā hai? Isli aurat āge pūchhti hai, “Hamāre bāpdādā to isī pahār par ibādat karte the jabki āp Yahūdī log

isrār karte haiñ ki Yarūshalam wuh markaz hai jahāñ hameñ ibādat karnī hai.”

Sāmari Baitul-muqaddas ko nahīñ mānte the. Wuh qarīb ke pahār Garizīm par ibādat karte the.

► *Kyā Īsā Masīh farmāegā ki wuh apnī qaum ko chhor Yarūshalam meñ ibādat kare?*

Ek bār phir wuh aurat ko chaunkā detā hai. “Ai ḳhātūn, yaqīn jān ki wuh waqt āegā jab tum na to is pahār par Bāp kī ibādat karoge, na Yarūshalam meñ.”

Īsā Masīh kitnī mahārat se aurat kā rūhānī ilāj kar rahā hai. Pahle wuh use zindagī kā pānī pīne kī dāwat detā hai. Phir wuh apnī rūhānī nashtar se us ke gunāhoñ kā zaḳhm khol detā hai tāki wuh sahī bhar sake. Ab wuh us kī āñkheñ ek naī rūhānī haqīqat ke lie khol detā hai: Ḳhudā kī rūhānī parastish ke lie.

Rūh aur Sachchāi se Parastish

► *Agar na Yarūshalam aur na Garizīm pahār par parastish karnī hai to kahāñ karnī hai?*

Īsā Masīh farmātā hai, “Wuh waqt ā rahā hai balki pahuñch chukā hai jab haqīqī parastār Rūh aur sachchāi se Bāp kī parastish karenge.”

► *Kyā is parastish ke lie kisī ḳhās jagah kī zarūrat hai?*
Nahīñ.

► *Kyon nahīñ?*

Islie ki yih parastish rūhānī hogī. Rūhānī ibādat har jagah ho saktī hai.

► *Haqīqī parastār kis kī parastish karenge?*

Ḳhudā Bāp kī parastish. Ḳhudā se rishte kī zarūrat hai. Bāp-beṭe kā rishtā.

► *To ham kis tarah haqīqī parastish karenge?*

Rūh aur sachchāi se. Wafādārī ke is rishte meñ jhūṭh kī koī jagah nahīñ rahegī.

► *Kyā jhūṭh āp kī zindagī se nikal chukā hai?*

Main hi Masih Hun

Aurat kā dil uchhal paṛtā hai. Kyā yih wuh hai jis ke intazār meñ sab haiñ?

Us kī taṛaptī rūh kahtī hai, “Mujhe mālūm hai ki Masih ā rahā hai. Jab wuh āegā to hamen sab kuchh batā degā.”

Ab Īsā Masih sidhā use batātā hai, “Main hi Masih hun jo tere sāth bāt kar rahā hun.”

Najātdahindā Yahī Hai

► *Aurat kā kyā jawāb hai?*

Us meñ itnā jazbā ātā hai ki wuh ghaṛā wahāñ chhoṛ shahr meñ chalī jāti hai. Ab wuh kisī se nahīñ katrāti balki har milne wāle se kahtī hai ki “Āo, ek ādmī ko dekho jis ne mujhe sab kuchh batā diyā hai jo mainne kiyā hai. Wuh Masih to nahīñ hai?”

Log shahr se nikalkar Īsā Masih ke pās āte haiñ. Na sirf yih balki un meñ se bahut log us par imān bhī lāte haiñ. Wuh aurat se kahte haiñ, “Ab ham terī bātoñ kī binā par imān nahīñ rakhte balki islie ki ham ne khud sun aur jān liyā hai ki wāqai duniyā kā najātdahindā yahī hai.”

► *Wuh kyā jān lete haiñ?*

Ki Īsā Masih duniyā kā najātdahindā hai. Wuh jo zindagi kā abadī pānī detā hai. Jo gunāhoñ kā ilāj kartā hai. Jis se insān kā Khudā se rishtā bahāl ho jātā hai aur wuh Rūh aur sachchāi se us kī parastish kartā hai.

Injil, Yūhannā 4:3-30,39-42

Īsā Masih [...] Yahūdiyā ko chhoṛkar Glīl ko wāpas chalā gayā. Wahāñ pahuñchne ke lie use sāmariyā meñ se guzarnā thā.

Chalte chalte wuh ek shahr ke pās pahuñch gayā jis kā nām Sūkhār thā. Yih us zamīn ke qarīb thā jo Yāqūb ne apne beṭe Yūsuf ko dī thī. Wahāñ Yāqūb kā kuāñ thā.

Īsā safr se thak gayā thā, islie wuh kueñ par baiṭh gayā. Dopahar ke taqrīban bārah baj gae the.

Ek Sāmārī aurat pānī bharne āī. Īsā ne us se kahā, “Mujhe zarā pānī pilā.” (Us ke shāgird khānā kharīdne ke lie shahr gae hue the.)

Sāmārī aurat ne tājjub kiyā, kyoñki Yahūdī Sāmariyon ke sāth tālluq rakhne se inkār karte haiñ. Us ne kahā, “Āp to Yahūdī haiñ, aur main Sāmārī aurat hūñ. Āp kis tarah mujh se pānī pilāne kī darḡhāst kar sakte haiñ?”

Īsā ne jawāb diyā, “Agar tū us baḡhshish se wāqif hotī jo Allāh tujh ko denā chāhtā hai aur tū use jāntī jo tujh se pānī māñg rahā hai to tū us se māñgtī aur wuh tujhe zindagī kā pānī detā.”

Ḳhātūn ne kahā, “Ḳhudāwand, āp ke pās to bālṭī nahīñ hai aur yih kuāñ gahrā hai. Āp ko zindagī kā yih pānī kahān se milā? Kyā āp hamāre bāp Yāqūb se baṛe haiñ jis ne hameñ yih kuāñ diyā aur jo ḡhud bhī apne beṭon aur rewaṛon samet us ke pānī se lutfandoz huā?”

Īsā ne jawāb diyā, “Jo bhī is pānī meñ se pie use dubārā pyās lagegī. Lekin jise main pānī pilā dūñ use bād meñ kabhī bhī pyās nahīñ lagegī. Balki jo pānī main use dūñgā wuh us meñ ek chashmā ban jāegā jis se pānī phūṭkar abadī zindagī muhaiyā karegā.”

Aurat ne us se kahā, “Ḳhudāwand, mujhe yih pānī pilā deñ. Phir mujhe kabhī bhī pyās nahīñ lagegī aur mujhe bār bār yahāñ ākar pānī bharnā nahīñ paṛegā.”

Īsā ne kahā, “Jā, apne ḡhāwand ko bulā lā.”

Aurat ne jawāb diyā, “Merā koī ḡhāwand nahīñ hai.”

Īsā ne kahā, “Tūne sahī kahā ki merā ḡhāwand nahīñ hai, kyoñki terī shādī pāñch mardoñ se ho chukī hai aur jis ādmī ke sāth tū ab rah rahī hai wuh terā shauhar nahīñ hai. Terī bāt bilkul durust hai.”

Aurat ne kahā, “Ḳhudāwand, main̄ dekhti hūn ki āp nabī haiñ. Hamāre bāpdādā to isī pahār par ibādat karte the jabki āp Yahūdī log isrār karte haiñ ki Yarūshalam wuh markaz hai jahān hameñ ibādat karnī hai.”

Īsā ne jawāb diyā, “Ai ḵhātūn, yaqīn jān ki wuh waqt āegā jab tum na to is pahār par Bāp kī ibādat karoge, na Yarūshalam meñ. Tum Sāmari us kī parastish karte ho jise nahīn jānte. Is ke muqābale meñ ham us kī parastish karte haiñ jise jānte haiñ, kyonki najāt Yahūdiyon meñ se hai. Lekin wuh waqt ā rahā hai balki pahuñch chukā hai jab haqīqī parastār Rūh aur sachchāi se Bāp kī parastish karenge, kyonki Bāp aise hī parastār chāhtā hai. Allāh Rūh hai, islie lāzim hai ki us ke parastār Rūh aur sachchāi se us kī parastish karen.”

Aurat ne us se kahā, “Mujhe mālūm hai ki Masīh yānī masah kiyā huā shaḵhs ā rahā hai. Jab wuh āegā to hameñ sab kuchh batā degā.”

Is par Īsā ne use batāyā, “Main̄ hī Masīh hūn jo tere sāth bāt kar rahā hūn.”

Usī lamhe shāgird pahuñch gae. Unhon ne jab dekhā ki Īsā ek aurat se bāt kar rahā hai to tājjub kiyā. Lekin kisī ne pūchhne kī jurrat na kī ki “Āp kyā chāhte haiñ?” Yā “Āp is aurat se kyon bāteñ kar rahe haiñ?”

Aurat apnā gharā chhoṛkar shahr meñ chalī gaī aur wahān logoñ se kahne lagī, “Āo, ek ādmī ko dekho jis ne mujhe sab kuchh batā diyā hai jo mainne kiyā hai. Wuh Masīh to nahīn hai?” Chunāñche wuh shahr se nikalkar Īsā ke pās āe.

[...]

Us shahr ke bahut-se Sāmari Īsā par imān lāe. Wajah yih thī ki us aurat ne us ke bāre meñ yih gawāhī dī thī, “Us ne mujhe sab kuchh batā diyā jo mainne kiyā hai.” Jab

wuh us ke pās āe to unhoñ ne minnat kī, “Hamāre pās ṭhahreñ.” Chunāñche wuh do din wahāñ rahā.
Aur us kī bāteñ sunkar mazīd bahut-se log īmān lāe.
Unhoñ ne aurat se kahā, “Ab ham terī bātoñ kī binā par īmān nahīñ rakhte balki islie ki ham ne ḵhud sun aur jān liyā hai ki wāqā duniyā kā najātdahindā yahī hai.”

Phaltā-Phūltā Īmān



Īsā Masīh Sāmariyon ke ilāqe se hokar dubārā Galil meñ pahuñch gayā. Sāmari Yahūdiyon ke dushman the. To bhī rāste meñ kai ek Sāmari us par imān lāe the.

Siyāsī Yā Rūhānī Imān?

Use dekhkar Galili khush hue.

► *Kyon khush hue?*

Bahut-sāre log Fasah kī Īd manāne Yarūshalam gae the. Wahāñ unhoñ ne us ke azīm kām aur bāteñ dekh lī thīñ. Unhoñ ne baṛe josh se use khushāmdīd kahā.

Magar Īsā Masīh ne un ke josh se dhokā na khāyā. Wuh to khūb jāntā thā ki nabī kī us ke apne watan meñ izzat nahīñ hotī. Maqāmī logoñ kā josh jald hī ṭhandā par jāegā. Jald hī un kī khushī kāfūr ho jāegī.

► *Kyon?*

Islie ki wuh us par imān nahīñ rakhte the. Wuh sirf apnā kām us se karwānā chāhte the. Un kā maqsad rūhānī nahīñ thī balki siyāsī.

► *To phir Īsā Masīh logoñ meñ kyā dekhnā chāhtā thā? Kyā yih ki wuh use pīr bābā mān leñ?*

Hargiz nahīñ!

► *To phir wuh kyā chāhtā thā?*

Wuh chāhtā thā ki wuh us par imān lāeñ.

► *Us par imān lāne kā kyā matlab thā?*

Yih ki wuh mān leñ ki Īsā Masīh merā Khudāwand hai. Wuh mujhe najāt de saktā hai. Wuh mere gunāhoñ ko miṭā saktā hai. Wuh mujhe jannat meñ dākhil hone ke lāyq banā saktā hai. Hāñ, wuh merī zindagī tabdīl kar saktā hai.

Jin Sāmariyoñ se us kā pālā paṛā thā unhoñ ne yih bāt māl lī thī. Sāmariyoñ ne iqrār kiyā thā, “Ham ne ḵhud sun aur jān liyā hai ki wāqai duniyā kā najātdahindā yahī hai.”

Chalte chalte Īsā Masīh apne shāgirdoñ ke sāth Qānā pahuñch gayā. Pichhli bār Qānā meñ ek mojizā huā thā. Ek shādī par pānī mai meñ badal gayā thā.

Is dafā shādī nahīn thī. Ek ādmī thā. Ek ādmī jo saḵht pareshān thā. Yih ādmī shāhī officer thā. Ain usī waqt us kā beṭā Kafarnahūm shahr meñ saḵht bīmār paṛ gayā thā. Kafarnahūm taqriban 30 kilometer dūr thā. Qānā pahārī par thā jabki Kafarnahūm kāfī nīche thā. Wuh jhīl ke kināre paṛā thā. Wahāñ jāne ke lie 500 meter utarnā paṛtā thā. Ek din meñ pahuñchnā mushkil hī thā.

Kachche Īmān kā Bīj

Jab is officer ko ittalā milī ki ustād Galīl pahuñch gayā hai to wuh bhāgkar us ke pās āyā. Us ne thartharāte hue minnat kī, “Zarā mere ghar āeñ jo nīche Kafarnahūm meñ hai tāki mere beṭe ko shafā mile. Is waqt wuh marne ko hai.”

Ham kah sakte haiñ ki yih officer Masīh ke bāre meñ dūsre Galīliyoñ ke-sī soch rakhtā thā. Wuh siyāsī soch rakhtā thā. Lekin ab us kā beṭā marne ko thā. Jis tarah log madad ke lie pīr ke pās jāte haiñ usī tarah wuh ghabrāe hue Ḳhudāwand ke pās bhāg āyā. Jo Īmān Īsā Masīh har ek meñ dekhñā chāhtā hai wuh us meñ kam thā. Kah leñ ki Īmān kā bīj hī thā. Phir bhī bāp kā dil apne beṭe ke lie dhaṛak rahā thā. Jab beṭā marne ko hai to māñ-bāp use bachāne ke lie kyā kuchh nahīn karte.

► *Īsā Masīh ne kyā jawāb diyā?*

Us ne ek ajīb-sā jawāb diyā. Kāī bār Īsā Masīh aise jawāb detā hai jin se hamēñ sadmā pahuñchtā hai. Us ne farmāyā, “Jab tak tum log ilāhī nishān aur mojize nahīn dekhte Īmān nahīn lāte.”

- *Kyā? Yih kaisā jawāb hai? Aisī guzārish aur yih jawāb! Yih kyon?*

Plastic ke saste khilaune ko thorā istemāl karen to tūt jātā hai. Kyā officer kā imān bhī isī tarah tūt jāegā? Yā kyā imān ke bij se mazbūt paudhā ug āegā?

Lekin Īsā Masīh yih bāt na sirf shāhī officer balki sab sunane wālon se kar rahā thā. Īsā Masīh logon ko sachche imān kī taraf lānā chāhtā hai. Ki un kā imān siyāsī na rahe balki rūhānī ho jāe.

Imān ke Bij se Nāzūk Paudhā

Masīh kī bāt sunkar shāhī officer kā munh utar gayā. Apne beṭe kī wajah se wuh tarap rahā thā. Ghighiyāne lagā, “Ḳhudāwand āen to sahī, is se pahle ki merā laṛkā mar jāe.”

- *Officer ne Īsā Masīh ko kyā kahā?*

Ḳhudāwand.

Mān-bāp jab bachche ko kuchh ho jāe to apnī jān dene ko bhī taiyār ho jāte haiñ. Ab bāp ke andar imān ke chhoṭe bij se nanhā-sā paudhā ug āyā. Isī lie us ne Ḳhudāwand kahā. Ab tak wuh apne hāth us kī taraf phailāe kharā hai. Ḳhudāwand kī taraf. Pakkā imān to nahīñ hai lekin ek nāzūk paudhā ug āyā hai. Kyā wuh aur mazbūt ho jāegā yā murjhā jāegā?

Īsā Masīh imān baṛhāne kā māhir doctor hai. Hamārā imān hameshā kamzor rahtā hai islie wuh mahārat se use mazbūt karne ke muḳhtalif tariqe istemāl kartā hai. Phir bhī wuh hameshā hamārā dukh-dard mahsūs kartā hai. Use officer par tars āyā. Us ne farmāyā, “Jā, terā beṭā zindā rahegā.”

Imān kī Āzmāish

- *Kyā Īsā Masīh ne farmāyā ki chalo main sāth ātā hūñ?*
Nahīñ. Na sirf yih balki officer ko ek hukm bhī milā. Use karegā to beṭā zindā rahegā.

- *Wuh kyā thā?*

Jā. Mere baḡhair apne ghar jā.

- *Kyon?*

Wuh officer kâ imān āzmānā chāhtā thā. Āzmāte waqt naqlī imān ukhar jātā hai jabki sachchā imān aur mazbūt ho jātā hai.

- *Kyā officer yih sunkar zid karne lagā ki āp ke baḡhair main nahīn jāūngā?*

Nahīn, wuh chup-chāp chalā gayā. Dhyān deñ ki us kâ imān kis tarah baḡh gayā thā. Pahle Īsā Masīh ko sāth ānā thā. Ab wuh mān gayā ki yih bhī zarūrī nahīn. Kām ho jāegā. Wuh apne ghar chalā gayā.

Dopahar ek baj gae the jab wuh chalne lagā. Chalthe chalte use rāste meñ kahīn rāt guzārñā paṛā. Agle dīn wuh abhī rāste meñ thā ki us ke naukar us se mile. Lekin yih kyā thā? Wuh ḡhushī se nāch rahe the. Jab qarīb pahuñche to pukār uṭhe, “Āp kâ beṭā zindā hai. Wuh ṭhīk ho gayā hai!”

Bāp hairānī se uchhal paṛā. Kyā sach?! Merā beṭā! Zindā! Merā lāḍlā! Merī āñkhoñ kâ tārā!

Us ne pūchhā, “Us kī tabīyat kab sañbhal gaī?”

Naukar bole, “Buḡhār kal dopahar ek baje utar gayā.”

Yih to kamāl hai! Ain us waqt jab Masīh ne kahā thā ki terā beṭā zindā rahegā.

Īmān kâ Phal

Ham dekh chuke haiñ ki aksar Galīliyoñ kâ Masīh par naqlī imān thā. Wuh us se fāyda uṭhāñā chāhte the. Lekin wuh yih mānane ke lie taiyār nahīn the ki wuh Ḳhudāwand hai. Ki wuh duniyā ko najāt dene wālā hai.

Is ke muqābale meñ shāhī officer ke imān ko dekho. Pahle wuh bhī itnā hī samajhtā thā ki Īsā Masīh pīr jaisā hai jo mere beṭe ko shafā de saktā hai. Īmān kâ bīj. Phir Īsā Masīh ne use challenge diyā ki tum sirf mojize dekhne āe ho. Is bāt ne use Masīh se dūr na kiyā balki imān ke bīj se ek nāzuk paudhā ug āyā. Wuh zor-shor karne lagā: Ḳhudāwand, āeñ to sahī, is se pahle ki merā laḡkā mar jāe. Īsā Masīh ne us ke sāth jāne

se inkār kiyā phir bhī wuh māyūs na huā. Us kā īmān aur mazbūt ho gayā.

Jab beṭe ko shafā milī to shāhī officer kā īmān bilkul pakkā ho chukā thā. Īsā Masīh na sirf us kā pīr ban gayā jo us kī madad kar sake. Wuh us kā Ḳhudāwand ban gayā. Wuh najāt dene wālā jo is lāyq hai ki main apnī pūrī zindagī use waqf karūn. Shāhī officer kā īmān dekhkar us ke tamām ghar wāle bhī īmān lāe.

► *Rahā ek sawāl: Āp kā īmān kaisā hai?*

Injil, Yūhannā 4:43-54

Wahān do dīn guzārne ke bād Īsā Galīl ko chalā gayā. Us ne ḳhud gawāhī dekar kahā thā ki nabī kī us ke apne watan meñ izzat nahīn hotī. Ab jab wuh Galīl pahuñchā to maqāmī logoñ ne use ḳhushāmdīd kahā, kyonki wuh Fasah kī Īd manāne ke lie Yarūshalam āe the aur unhoñ ne sab kuchh dekhā jo Īsā ne wahān kiyā thā.

Phir wuh dubārā Qānā meñ āyā jahān us ne pānī ko mai meñ badal diyā thā. Us ilāqe meñ ek shāhī officer thā jis kā beṭā Kafarnahūm meñ bīmār paṛā thā. Jab use ittalā milī ki Īsā Yahūdiyā se Galīl pahuñch gayā hai to wuh us ke pās gayā aur guzārish kī, “Qānā se mere pās utar āeñ aur mere beṭe ko shafā deñ. Kyonki wuh marne ko hai.” Īsā ne us se kahā, “Jab tak tum log ilāhī nishān aur mojize nahīn dekhte īmān nahīn lāte.”

Shāhī officer ne kahā, “Ḳhudāwand āeñ, is se pahle ki merā laṛkā mar jāe.”

Īsā ne jawāb diyā, “Jā, terā beṭā zindā rahegā.”

Ādmī Īsā kī bāt par īmān lāyā aur apne ghar chalā gayā. Wuh abhī utar rahā thā ki us ke naukar us se mile. Unhoñ ne use ittalā dī ki beṭā zindā hai.

Us ne un se pūchh-gachh kī ki us kī tabīyat kis waqt se behtar hone lagī thī. Unhon ne jawāb diyā, “Buḡhār kal dopahar ek baje utar gayā.” Phir bāp ne jān liyā ki usī waqt Īsā ne use batāyā thā, “Tumhārā beṭā zindā rahegā.” Aur wuh apne pūre gharāne samet us par imān lāyā.

Yon Īsā ne apnā dūsrā ilāhī nishān us waqt dikhāyā jab wuh Yahūdiyā se Galīl meñ āyā thā.

Kyā Tū Tandurust Honā Chāhtā Hai?



Yarūshalam mein ek mashhūr hauz banām Bait-hasdā thā. Is hauz ke khaṇḍarāt āj tak dekhe jā sakte haiñ. Hauz pāñch baṛe barāmdoñ se ghīrā huā thā. Un mein be-shumār andhe, langaṛe aur maflūj paṛe rahte the.

► *Itne mazīr log wahāñ kyon jamā rahte the?*

Kabhī-kabhār hauz kā pānī thoṛī der ke lie hīlne lagtā thā.

Us waqt jo bhī pahle pānī mein jātā use shafā miltī thī.

Ek din Īsā Masīh wahāñ se guzrā. Us ne ek ādmī ko farsh par paṛā dekhā jo 38 sāl se mazīr thā.

Ab soch leñ: Wahāñ to bhīṛ hī bhīṛ thī. Phir bhī Īsā Masīh ne ek hī ādmī par nigāh ḍālī aur usī par rahm kiyā.

► *Kyon? Us ne dūsroñ ko shafā kyon na dī?*

Wuh jāntā thā ki yih ādmī bahut sāloñ se mazīr hai. Phir bhī yih ek rāz hai ki Ḳhudā ek ko shafā detā hai aur dūsre ko nahīñ. Masih ne pūchhā,

Kyā Tū Tandurust Honā Chāhtā Hai?

► *Yih kaisā sawāl hai? Kaun tandurust nahīñ honā chāhtā? Īsā Masīh yih kyon pūchhtā hai?*

Īsā Masīh kabhī zabardastī nahīñ kartā. Zarūrī hai ki ham us kī madad qabūl karen. Ki ham use apnī zindagī mein āne deñ. Ham inkār to kar sakte haiñ.

► *Āj Īsā Masīh ham sab se pūchh rahā hai ki kyā tū tandurust honā chāhtā hai? Ham kyā jawāb denge? Kyā ham apnā muñh pherkar andhere mein rahnā pasand karenge? Yā ham us ke nūr mein ākar tandurust ho jāenge?*

Wuh ādmī bolā, “Ḳhudāwand, yih mushkil hai. Merā koī sāthī nahīñ jo mujhe uṭhākar pānī mein jab use hīlāyā jātā hai le jāe. Islie mere wahāñ pahuñchne mein itnī der lag jātī hai ki koī aur mujh se pahle pānī mein utar jātā hai.”

Īsā Masīh ne kahā, “Uṭh, apnā bistar uṭhākar chal-phir!”
Wuh ādmī ekdam ṭhīk ho gayā. Us ne apnā bistar uṭhāyā aur
chalne-phirne lagā.
Jo hukm Īsā Masīh detā hai wuh hameshā pūrā ho jātā hai.

Nuktāchīnī kā Mazā

Kuchh logoñ ne dekhā ki yih ādmī phir rahā hai to saḡht
nārāz hue. Kahne lage, “Āj Sabat kā din hai. Āj bistar uṭhānā
manā hai.”

Sabat, Hafte kā din thā. Ḳhudā ne Mūsā Nabī ko farmāyā thā
ki Sabat ke din kām-kāj mat karnā. Maqsad yih thā ki logoñ
ko is din naukarī se chhuṭṭī mile. Magar bād meñ Yahūdī
ustādoñ ne be-shumār aur pābandiyāñ lagāi thīñ. Bistar
uṭhākar ghar le jānā bhī manā thā. Ab yih be-chārā kyā kare?
Use to ghar pahuñchnā hī pahuñchnā thā.

► *Kyā in logoñ ko māsūr kī fikr thī?*

In logoñ ko parwāh hī nahīñ thī ki is ādmī ko shafā mili
hai, ki itnā baṛā mojizā huā hai. Kitnā afsos! Yih kaṭṭar
log mazhab ke nām meñ bahut saḡht ho gae the. Mazhab
kā kyā fāyda agar ham Ḳhudā se dūr hoñ? Agar ek dūsre
se muhabbat na ho?

► *Kyā āp aise logoñ se wāqif haiñ?*

Ādmī ghabrā gayā. Wuh bolā, “Ek ādmī ne mujhe shafā dī.
Usī ne mujhe batāyā, ‘Apnā bistar uṭhākar chal-phir.’”
Unhoñ ne sawāl kiyā, “Wuh kaun hai jis ne tujhe yih kuchh
batāyā?” Lekin us ādmī ko mālūm na thā, kyonki Īsā Masīh
hujūm meñ ḡhāyb ho gayā thā.

Phir Gunāh na Karnā

Bād meñ Īsā Masīh use Baitul-muqaddas meñ milā. Us ne
kahā, “Ab tū bahāl ho gayā hai. Phir gunāh na karnā, aisā na
ho ki terā hāl pahle se bhī badtar ho jāe.”

Kamāl hai. Māsūr kī hālat to ṭhīk ho gayā thā. Lekin Īsā
Masīh insān ke dil meñ dekhtā hai. Use mālūm thā ki bīmārī

kī zahrilī jaṛ bāqī rah gaī thī. Yih jaṛ ab tak khatm nahīn hui thī.

► *Jaṛ kyā thī?*

Gunāh. Ham nahīn jānte ki us ne kyā gunāh kiyā thā. Magar Masīh ko mālūm thā. Har bīmārī to kisī kḥās gunāh kī wajah se nahīn hotī. Lekin Masīh jāntā thā ki is marz ke pīchhe ek sanjīdā gunāh hai.

► *So Īsā Masīh kā kḥās dhyān kis chīz par thā?*

Gunāh par. Ādmī kī rūhānī hālat par.

Īsā Masīh chāhtā hai ki hamārī andarūnī hālat bahāl ho jāe. Is duniyā meñ rahte hue hamārī hālat nāzūk rahtī hai. Ham bīmār hoñ na hoñ, baṛī bāt yih hai ki ham phir gunāh na kareñ. Ki ham Īsā Masīh ke qadamoñ meñ baiṭhe raheñ. Us kī bāteñ sunte raheñ. Us ke pīchhe chalte raheñ. Tab hī ham andar se bahāl ho jāenge.

► *Āp kā kyā kḥyāl hai ki us ādmī ne jawāb meñ kyā kiyā?*

Wuh kambakht sīdhe Yahūdī buzurgoñ ke pās gayā aur unheñ ittālā dī, “Īsā ne mujhe shafā dī.” Yih sunkar wuh Īsā Masīh ko satāne lage.

Īsā Masīh ne us ādmī ko na sirf shafā dī thī. Us ne use apne gunāhoñ se bahāl hone kā mauqā bhī diyā thā.

► *Phir bhī us ne kyā kiyā?*

Us ne us ke rahm ko haqīr jānā.

► *Jab Īsā Masīh ham se hamkalām hotā hai to merā kyā jawāb hai? Āp kā kyā jawāb hai?*

Bāp kī Marzī Sab Kuchh Hai

► *Jab buzurg Īsā Masīh ko satāne lage to us ne jawāb meñ kyā kahā?*

Us ne farmāyā, “Merā Bāp āj tak kām kartā āyā hai, aur main bhī aisā kartā hūñ.”

► *Is se wuh kyā kahnā chāhtā hai?*

Ḳhudā Bāp har waqt kām kartā hai. Lamhā balamhā wuh duniyā kī har chīz qāym rakhtā hai warnā ham sab ekdam

ḳhatm ho jāte. Yoñ us kā kām Sabat ke din bhī jāri rahtā hai. Īsā Masīh farmātā hai ki isī lie merā kām Sabat ke din bhī jāri rahtā hai. Maiñ Ḳhudā kā Farzand hūñ islie zāhir hai ki maiñ rozānā us kī marzī pūri kartā hūñ.

Yahūdī buzurg aur zyādā biphar gae.

► *Kyon?*

Un ke nazdik us ne Allāh ko apnā Bāp kahkar apne āp ko Allāh ke barābar ṭhahrāyā thā.

► *Kaise?*

Us ne farmāyā thā, jis tarah Ḳhudā Bāp Sabat ke din kām kartā hai usī tarah maiñ bhī kartā hūñ.

Lekin Īsā Masīh ek aur bāt kahnā chāhtā hai. Yih ki maiñ pūre taur se Bāp kī marzī kartā hūñ. Maiñ apnī marzī se kuchh nahīñ kartā. Usī kī marzī thī ki maiñ Sabat ke din us ādmī ko shafā dūñ. Islie maiñne use shafā di. Apnī marzī se nahīñ. Usī kī marzī se.

► *Hamārā is se kyā wāstā hai?*

Ḳhudāwand Hamēñ Abadī Zindagī Detā Hai

Masīh ne buzurgoñ se kahā,

Jis tarah Bāp murdoñ ko zindā kartā hai usī tarah Farzand bhī jinheñ chāhtā hai zindā kar detā hai. (Injil, Yūhannā 5:21)

Aur yih zindagī isī duniyā meñ mil saktī hai.

Masīh kī yih zindagī anāj ke ek dāne kī tarah hai. Yih dānā dekhne meñ māmūlī-sā lagtā hai.

► *Ise zamīn meñ dabā diyā to kyā hotā hai?*

Bij gal jātā hai.

► *Kyā gal jāne se us kī tāqat aur zindagī ḳhatm ho jātī hai?*

Nahīñ. Ek din zamīn se paudhā ug ātā hai jo barhtā barhtā phal lātā hai.

► *Maiñ is se kyā kahnā chāhtā hūñ?*

Us māmūlī se bīj meñ paudhe kī pūrī tāqat aur zindagī samāī huī hai. Bīj gal jātā hai magar us kī yih tāqat aur zindagī khatm nahīn hotī. Us zindagī se ek shāndār paudhā paidā ho jātā hai. Bilkul isī tarah wuh zindagī hai jo Masīh hameñ detā hai. Jab ham īmān lāte haiñ to hamāre andar abadī zindagī kā bīj boyā jātā hai. Ek din hamārā jism to gal jāegā. Magar ham k̄hud k̄hatm nahīn hoñge. Hamāre andar kī yih abadī zindagī hameñ K̄hudā kī nazar meñ mañzūr karāegī. Tab hameñ ek nayā jism milegā jo is duniyāwī jism se kahīn behtar hogā. Aise shakhs ke bāre meñ Īsā Masīh farmātā hai,

Use mujrim nahīn ṭahrāyā jāegā balki wuh maut kī girift se nikalkar zindagī meñ dāk̄hil ho gayā hai. (Injīl, Yūhannā 5:24)

► *Kyā āp ke andar abadī zindagī kā yih bīj hai?*

Injīl, Yūhannā 5:1-29

Kuchh der ke bād Īsā kisī Yahūdī īd ke mauqe par Yarūshalam gayā. Shahr meñ ek hauz thā jis kā nām Arāmī zabān meñ Bait-hasdā thā. Us ke pāñch baṛe barāmdē the aur wuh shahr ke us darwāze ke qarīb thā jis kā nām ‘Bheṛoñ kā Darwāzā’ hai. In barāmdoñ meñ be-shumār mazīr log paṛe rahte the. Yih andhe, langaṛe aur maflūj pānī ke hilne ke intazār meñ rahte the. [Kyonki gāhe bagāhe Rab kā farishtā utarkar pānī ko hilā detā thā. Jo bhī us waqt us meñ pahle dāk̄hil ho jātā use shafā mil jātī thī k̄hāh us kī bīmārī koī bhī kyon na hotī.] Marīzoñ meñ se ek ādmī 38 sāl se mazīr thā. Jab Īsā ne use wahāñ paṛā dekhā aur use mālūm huā ki yih itnī der se is hālat meñ hai to us ne pūchhā, “Kyā tū tandurust honā chāhtā hai?”

Us ne jawāb diyā, “Ḳhudāwand, yih mushkil hai. Merā koī sāthī nahīn jo mujhe uṭhākar pānī meñ jab use hilāyā jātā hai le jāe. Islie mere wahāñ pahuñchne meñ itnī der lag jātī hai ki koī aur mujh se pahle pānī meñ utar jātā hai.”

Īsā ne kahā, “Uṭh, apnā bistar uṭhākar chal-phir!” Wuh ādmī fauran bahāl ho gayā. Us ne apnā bistar uṭhāyā aur chal-ne-phir-ne lagā.

Yih wāqiyā Sabat ke din huā. Islie Yahūdiyoñ ne shafāyāb ādmī ko batāyā, “Āj Sabat kā din hai. Āj bistar uṭhānā manā hai.”

Lekin us ne jawāb diyā, “Jis ādmī ne mujhe shafā dī us ne mujhe batāyā, ‘Apnā bistar uṭhākar chal-phir.’”

Unhoñ ne sawāl kiyā, “Wuh kaun hai jis ne tujhe yih kuchh batāyā?” Lekin shafāyāb ādmī ko mālūm na thā, kyonki Īsā hujūm ke sabab se chupke se wahāñ se chalā gayā thā.

Bād meñ Īsā use Baitul-muqaddas meñ milā. Us ne kahā, “Ab tū bahāl ho gayā hai. Phir gunāh na karnā, aisā na ho ki terā hāl pahle se bhī badtar ho jāe.”

Us ādmī ne use chhoṛkar Yahūdiyoñ ko ittalā dī, “Īsā ne mujhe shafā dī.” Is par Yahūdī us ko satāne lage, kyonki us ne us ādmī ko Sabat ke din bahāl kiyā thā. Lekin Īsā ne unheñ jawāb diyā, “Merā Bāp āj tak kām kartā āyā hai, aur main bhī aisā kartā hūñ.”

Yih sunkar Yahūdī use qatl karne kī mazīd koshish karne lage, kyonki us ne na sirf Sabat ke din ko mansūkh qarār diyā thā balki Allāh ko apnā Bāp kahkar apne āp ko Allāh ke barābar ṭhahrāyā thā.


Īsā ne unheñ jawāb diyā, “Main tum ko sach batātā hūñ ki Farzand apnī marzī se kuchh nahīn kar saktā. Wuh sirf wuh kuchh kartā hai jo wuh Bāp ko karte dekhtā

hai. Jo kuchh Bāp kartā hai wuhī Farzand bhī kartā hai, kyonki Bāp Farzand ko pyār kartā aur use sab kuchh dikhātā hai jo wuh khud kartā hai. Hāñ, wuh Farzand ko in se bhī azīm kām dikhāegā. Phir tum aur bhī zyādā hairatzadā hoge. Kyonki jis tarah Bāp murdoñ ko zindā kartā hai usī tarah Farzand bhī jinheñ chāhtā hai zindā kar detā hai. Aur Bāp kisī kī bhī adālat nahīn kartā balki us ne adālat kā pūrā intazām Farzand ke supurd kar diyā hai tāki sab usī tarah Farzand kī izzat karen jī tarah wuh Bāp kī izzat karte haiñ. Jo Farzand kī izzat nahīn kartā wuh Bāp kī bhī izzat nahīn kartā jis ne use bhejā hai.

Main tum ko sach batātā hūñ, jo bhī merī bāt sunkar us par imān lātā hai jis ne mujhe bhejā hai abadi zindagī us kī hai. Use mujrim nahīn thahrāyā jāegā balki wuh maut kī girift se nikalkar zindagī meñ dākhil ho gayā hai. Main tum ko sach batātā hūñ kī ek waqt āne wālā hai balki ā chukā hai jab murde Allāh ke Farzand kī āwāz suneñge. Aur jitne suneñge wuh zindā ho jāeñge. Kyonki jis tarah Bāp zindagī kā mañbā hai usī tarah us ne apne Farzand ko zindagī kā mañbā banā diyā hai. Sāth sāth us ne use adālat karne kā iḡhtiyār bhī de diyā hai, kyonki wuh Ibn-e-Ādam hai. Yih sunkar tājjub na karo kyonki ek waqt ā rahā hai jab tamām murde us kī āwāz sunkar qabroñ meñ se nikal āeñge. Jinhoñ ne nek kām kiyā wuh jī uṭhkar zindagī pāeñge jabki jinhoñ ne burā kām kiyā wuh jī to uṭheñge lekin un kī adālat kī jāegī.

Īsā Masīh par Bharosā

Chār Ṭhos Gawāh



Īsā Masīh kī tālīm anokhī thī. Yih aisī bāteñ thīñ jo sirf aur sirf al-Masīh kar saktā thā. Sunane wāloñ ne sochā, yih to baṛī baṛī bāteñ haiñ.

► *Lekin ham kis tarah jān sakte haiñ ki us kī yih bāteñ sach haiñ? Ki wuh sachmuch al-Masīh hai?*

Yih hamāre lie bhī ek ahm sawāl hai.

► *Ham kis tarah us kī bātoñ par bharosā kar sakte haiñ?*

Īsā Masīh logoñ kā yih sawāl jāntā thā. Ek mauqe par us ne is kā jawāb bhī diyā.

► *Jawāb kyā thā?*

Jawāb meñ us ne farmāyā ki mere chār gawāh haiñ. Aise ṭhos aur pakke gawāh jo koī bhī jhūṭhe nahīñ ṭhahrā saktā.

Pahlā Gawāh: Yahyā Nabī

Pahlā gawāh Yahyā Nabī hai. Jab Yahyā Dariyā-e-Yardan par logoñ ko baptismā dene lagā to buzurg us ke pās āe. Wuh jānanā chāhte the ki yih apne bāre meñ kyā kahtā hai. Kyā yih Masīh to nahīñ hai? Yahyā ne sāf jawāb diyā ki main Masīh nahīñ hūñ. Lekin ek din jab Īsā Masīh hāzīr huā to Yahyā ne farmāyā ki yahī āne wālā Masīh hai:

Mainne dekhā ki Rūhul-quds kabūtar kī tarah āsmān par se utarkar us par ṭahr gayā. Main to use nahīñ jāntā thā, lekin jab Allāh ne mujhe baptismā dene ke lie bhejā to us ne mujhe batāyā, ‘Tū dekhegā ki Rūhul-quds utarkar kisī par ṭahr jāegā. Yih wuhī hogā jo Rūhul-quds se baptismā degā.’ Ab mainne dekhā hai aur gawāhī detā hūñ ki yih Allāh kā Farzand hai.
(Yūhannā 1:32-34)

Yon Yahyā Nabī ne sāf farmāyā ki Īsā, al-Masīh hai, wuh jo najāt dene ke lie duniyā meñ bhejā gayā hai. Islie Īsā Masīh ne Yahyā ke bāre meñ farmāyā,

Yahyā ek jaltā huā charāgh thā jo raushnī detā thā. (Yūhannā 5:35)

► *Yahyā kyon charāgh thā?*

Charāgh andhere ko raushan karke hameñ rāstā dikhātā hai. Yahyā Nabī ne rūhānī andhere ko raushan karke Masīh kā rāstā dikhāyā.

Dūsra Gawāh: Īsā Masīh ke Kām

Yahyā kī gawāhī ahm thī, lekin wuh insān kī gawāhī thī. Do aur gawāh zyādā ahm haiñ.

► *Kyon?*

Islie ki wuh insānī gawāh nahīñ haiñ. Masīh ne farmāyā,

Mere pās ek aur gawāh hai jo Yahyā kī nisbat zyādā ahm hai—wuh kām jo Bāp ne mujhe mukammal karne ke lie de diyā. (Yūhannā 5:36)

► *Yih kis qism ke kām the jo Masīh ke gawāh the?*

Īsā Masīh kī pāk zindagī, us ke mojize aur us kā Kalām. Yih sab sāf sāf us kī gawāhī dete the.

Tisra Gawāh: Ẹhudā Bāp

Tisra gawāh Ẹhudā Bāp hai. Īsā Masīh ne farmāyā,

Is ke alāwā Bāp ne Ẹhud jis ne mujhe bhejā hai mere bāre meñ gawāhī dī hai. (Yūhannā 1:37)

► *Ẹhudā Bāp ne kis tarah gawāhī dī?*

Jab Yahyā Nabī Īsā Masīh ko baptismā de rahā thā to likhā hai ki

Jab wuh duā kar rahā thā to āsmān khul gayā aur Rūhul-quds jismānī sūrat meñ kabūtar kī tarah us par utar āyā. Sāth sāth āsmān se ek āwāz sunāi dī, “Tū merā pyārā Farzand hai, tujh se main̄ khush hūñ.”
(Lūqā 3:21-22)

Kisī aur din Īsā Masīh tīn shāgirdon̄ ke sāth ek ūnche pahār par chaṛh gayā ki achānak Mūsā aur Ilyās zāhir hokar us se bāteñ karne lage. Achānak

Ek chamakdār bādal ākar un par chhā gayā aur bādal meñ se ek āwāz sunāi dī, “Yih merā pyārā Farzand hai, jis se main̄ khush hūñ. Is kī suno.” Yih sunkar shāgird dahshat khākar aundhe muñh gir gae.
(Mattī 17:5-6)

Lekin shāyad Masīh zyādā yih wāqiyāt yād nahīn kar rahā thā. Kyoñki is bāt ke ain bād us ne ek qism kī paheli pesh kī. Us ne farmāyā,

Afsos, tum ne kabhī us kī āwāz nahīn sunī, na us kī shakl-o-sūrat dekhī, aur us kā Kalām tumhāre andar nahīn rahtā, kyoñki tum us par imān nahīn rakhte jise us ne bhejā hai.
(Yūhannā 5:37-38)

- *Kyā koī insān sīdhe Ḳhudā kī āwāz sun saktā hai?*
Hargiz nahīn!
- *Kyā koī insān us kī shakl-o-sūrat dekh saktā hai?*
Hargiz nahīn!
- *To phir Īsā Masīh kā kyā matlab hai?*
Ham paheli kā hal tīn sawālon̄ se kar sakte haiñ.
- *Yahūdī buzurgoñ ne Ḳhudā Bāp kī āwāz kyon̄ na sunī?*
Īsā Masīh un ke darmiyān thā aur unheñ Ḳhudā Bāp kī āwāz sunātā thā. Wuh yih Kalām sunte to the magar us

kī āwāz un ke dilon tak nahīn pahuñchti thī. Wuh rūhānī bahre the.

- *Yahūdī buzurgoñ ne Ẹhudā Bāp kī shakl-o-sūrat kyon na dekhī?*

Īsā Masīh Ẹhudā Bāp ko un par zāhir kartā thā magar wuh us meñ Ẹhudā kī shakl-o-sūrat nahīn pahchān sakte the. Wuh rūhānī andhe the.

- *Ẹhudā Bāp kā Kalām Yahūdī buzurgoñ ke dilon meñ kyon nahīn bastā thā?*

Īsā Masīh Ẹhudā kā Kalām thā, aur wuh un ke darmiyān thā. Lekin wuh us par imān nahīn rakhte the, islie un ke dilon meñ nahīn bastā thā.

Ġharz chūñki Īsā Masīh Ẹhudā kā Kalām hai islie wuh Ẹhudā Bāp kī āwāz sunātā aur us kī shakl-o-sūrat zāhir kartā thā. To bhī aksar Yahūdī buzurgoñ ne use qabūl na kiyā. Unhoñ ne yih gawāhī apne dilon meñ basne na dī. Jis tarah Yūhannā rasūl farmātā hai ki

Allāh kī gawāhī yih hai ki us ne apne Farzand kī tasdīq kī hai. Jo Allāh ke Farzand par imān rakhtā hai us ke dil meñ yih gawāhī hai.
(1 Yūhannā 5:9-10)

- *Kyā Ẹhudā kī gawāhī āp ke dil meñ bastā hai?*

Chauthā Gawāh: Pāk Nawishte

Pāk nawishte bār bār Masīh kī peshgoī karte haiñ. Islie Īsā Masīh ne Yahūdī buzurgoñ par afsos kiyā,

Tum apne sahīfoñ meñ ḡhūñḡte rahte ho kyonki samajhte ho ki un se tumheñ abadī zindagī hāsil hai. Lekin yahī mere bāre meñ gawāhī dete haiñ! To bhī tum zindagī pāne ke lie mere pās ānā nahīn chāhte. (Yūhannā 5:39-40)

Kitnī alamnāk bāt. In buzurgoñ ko mālūm thā ki pāk nawishton se abadī zindagī miltī hai. Wuh us meñ ḡhūñḡte

rahte the magar be-fāydā. Ḍhūṇḍne meṇ kāmyābī us waqt hotī hai jab Rūhul-quḍs hamārī rūhānī āṅkhoṇ ko khol detā hai. Tab hī hamēṇ samajh ātī hai ki pāk nawishte Īsā Masīh kī ṭhos gawāhī dete haiṇ. Tab hī wuh hamāre dil meṇ basne lagtā hai, rag rag meṇ dhaṛakne lagtā hai. Masīh kī muhabbat, us kī zindagī, us kā rahm, hāṇ us kā pūrā wujūd ham meṇ basne lagtā hai.

Insān kī Izzat Yā Ḳhudā kī?

- *Jab Īsā Masīh ke itne ṭhos gawāh haiṇ to Yahūdī buzurg kyon us par imān nahīṇ lā sakte the?*

Īsā Masīh ne Ḳhud is kā jawāb diyā,

Koī ajab nahīṇ ki tum imān nahīṇ lā sakte. Kyonki tum ek dūsre kī izzat chāhte ho jabki tum wuh izzat pāne kī koshish hī nahīṇ karte jo wāhid Ḳhudā se milti hai.
(Yūhannā 5:44)

Īsā Masīh imān na rakhne kī zahrilī jaṛ zāhir kartā hai.

- *Wuh kyā hai?*

Buzurg itne zor se apnī izzat ke pichhe paṛe rahte the ki wuh us izzat ke lie andhe the jo Ḳhudā detā hai. Jo bhī dhūmdhām se un kī izzat kartā thā us se wuh lipaṭ jāte the. Is ke muqābale meṇ Masīh sirf aur sirf Ḳhudā Bāp se izzat pānā chāhtā thā. Use buzurgoṇ se izzat milne kī parwāh hī nahīṇ thī. Us kā pūrā dhyān Ḳhudā Bāp kī marzī pūrī karne par thā. Wuh Ḳhūb jāntā hai ki dūsroṇ kī taraf se milī izzat par bharosā nahīṇ kiyā jā saktā.

- *Kyā āp sachmuch sirf Ḳhudā se izzat milnā chāhte haiṇ?*

Agar nahīṇ to āp buzurgoṇ kī tarah andhe haiṇ. Tab wuh bāt āp par bhī sādiq āegī jo Masīh ne buzurgoṇ ke bāre meṇ farmāyā,

Yih na samjho ki main Bāp ke sāmne tum par ilzām lagāūngā. Ek aur hai jo tum par ilzām lagā rahā hai—Mūsā. (Yūhannā 5:45)

► *Mūsā Nabī kyon un par ilzām lagā rahā hai?*

Islie ki un kā pūrā dhyān us izzat par thā jo insān kī taraf se hai. Islie wuh shariāt ke rūhānī usūlon ke lie andhe ho gae the. Agar wuh sachmuch Mūsā Nabī kī bāton yānī shariāt par imān rakhte aur amal karte to wuh Īsā Masih par bhī imān lāte.

Gharz, Īsā Masih ke chār ṭhos gawāh haiñ. To bhī buzurg apnī izzat ke bāis us par imān nahīn lā sakte the.

Yih ek ahm bāt hai.

► *Kyā āp apnī izzat bachāne yā baṛhāne kī koshish mein Īsā Masih par imān nahīn lā sakte?*

Yād rakho ki us ke chār ṭhos gawāh haiñ: Yahyā Nabī, us ke kām, Ḳhudā Bāp aur pāk nawishte.

Injil, Yūhannā 5:30-47

Main apnī marzī se kuchh nahīn kar saktā balki jo kuchh Bāp se suntā hūñ us ke mutābiq adālat kartā hūñ. Aur merī adālat rāst hai kyonki main apnī marzī karne kī koshish nahīn kartā balki usī kī jis ne mujhe bhejā hai.

Agar main ḳhud apne bāre mein gawāhī detā to merī gawāhī motabar na hotī. Lekin ek aur hai jo mere bāre mein gawāhī de rahā hai aur main jāntā hūñ ki mere bāre mein us kī gawāhī sachchī aur motabar hai. Tum ne patā karne ke lie apne logoñ ko Yahyā ke pās bhejā hai aur us ne haqīqat kī tasdīq kī hai. Be-shak mujhe kisī insānī gawāh kī zarūrat nahīn hai, lekin main yih islie batā rahā hūñ tāki tum ko najāt mil jāe. Yahyā ek

jaltā huā charāgh thā jo raushnī detā thā, aur kuchh der ke lie tum ne us kī raushnī meñ k̄hushī manānā pasand kiyā.

Lekin mere pās ek aur gawāh hai jo Yahyā kī nisbat zyādā ahm hai—wuh kām jo Bāp ne mujhe mukammal karne ke lie de diyā. Yahī kām jo main kar rahā hūn mere bāre meñ gawāhī detā hai ki Bāp ne mujhe bhejā hai.

Is ke alāwā Bāp ne k̄hud jis ne mujhe bhejā hai mere bāre meñ gawāhī dī hai. Afsos, tum ne kabhī us kī āwāz nahīn sunī, na us kī shakl-o-sūrat dekhī, aur us kā Kalām tumhāre andar nahīn rahtā, kyonki tum us par imān nahīn rakhte jise us ne bhejā hai.

Tum apne sahīfoñ meñ q̄hūnḍte rahte ho kyonki samajhte ho ki un se tumheñ abadī zindagī hāsil hai. Lekin yahī mere bāre meñ gawāhī dete haiñ! To bhī tum zindagī pāne ke lie mere pās ānā nahīn chāhte.

Main insānoñ se izzat nahīn chāhtā, lekin main tum ko jāntā hūn ki tum meñ Allāh kī muhabbat nahīn. Agarche main apne Bāp ke nām meñ āyā hūn to bhī tum mujhe qabūl nahīn karte. Is ke muqābale meñ agar koī apne nām meñ āegā to tum use qabūl karoge. Koī ajab nahīn ki tum imān nahīn lā sakte. Kyonki tum ek dūsre se izzat chāhte ho jabki tum wuh izzat pāne kī koshish hī nahīn karte jo wāhid K̄hudā se miltī hai. Lekin yih na samjho ki main Bāp ke sāmne tum par ilzām lagāūngā. Ek aur hai jo tum par ilzām lagā rahā hai—Mūsā, jis se tum ummīd rakhte ho. Agar tum wāqāī Mūsā par imān rakhte to zarūr mujh par bhī imān rakhte, kyonki us ne mere hī bāre meñ likhā. Lekin chūñki tum wuh kuchh nahīn mānte jo us ne likhā hai to merī bāteñ kyonkar mān sakte ho!

Bādshāhī ke Chār Usūl



Jab Īsā Masīh ḵhushḵhabrī sunāne lagā to wuh hameshā anginat logoñ se ghirā rahtā thā. Aur kyā aḵab. Us kī bāteñ anokhī thīñ, us ke mojize dekhkar log hakkā-bakkā rah jāte the.

- *Jald hī sawāl uṭhā ki kyā yih wuh nahīñ hai jo āne wālā hai?
Kyā yih wuh nahīñ hai jo dushman ko mulk se nikālegā?*

Īsā Masīh un kī soch-bichār jāntā thā. Be-shak wuh bādshāh thā. Lekin us kī bādshāhī is duniyā kī nahīñ thī. Use siyāsī bātoñ se saḵht nafrat thī.

- *Lekin agar use siyāsī bāteñ pasand nahīñ thīñ to wuh kis qism kī bādshāhī lānā chāhtā thā?*

Is kā jawāb jald hī patā chalegā.

Ek din Īsā Masīh apne shāgirdoñ ke sāth kashtī meñ baiṭh gayā. Us ne unheñ hidāyat dī ki jhīl ko pār karo. Kyoñki ḵhidmat karte karte sab ko ārām kī saḵht zarūrat thī. Kināre par pahuñchkar wuh qarīb ke pahār par chaḥ gae.

Shāgirdoñ ne sukūn kī sāñs lī. Wāh! Itne shor-sharābā ke bād yih kitnī pursukūn jagah thī! Koī ābādī nahīñ thī, bilkul wirān jagah thī. Koī nahīñ thā jo unheñ apne sawāloñ aur minnatoñ se tang kare.

Magar yih kyā thā? Achānak do-chār log dūr se āte hue dikhāie die. Chalo, koī bāt nahīñ. Ek yā do logoñ ko patā chalā hogā ki ham yahāñ āe haiñ. Yih sochkar shāgirdoñ ko kuchh tasallī huī. Lekin phir wuh chaunk uṭhe. Pūre kā pūrā sailāb un par ṭuṭ parā. Jald hī jagah kī shānti kāfūr ho gāi.

- *Kyā huā thā?*

Logoñ ne andāzā lagāyā thā ki kashtī kis taraf chal rahī hai. Tab wuh paidal se jhīl ke kināre chalte hue un ke pīchhe ho lie the. Ab wuh pahuñch gae.

- *Kyā Īsā Masīh ne unheñ bhagāyā? Yā kyā wuh dubārā kashtī meñ baiṭhkar chalā gayā?*

Nahīñ. Wuh baiṭhkar unheñ Ḳhudā kā Kalām sikhāne lagā.

- *Kyon?*

Use un par tars āyā. Īsā Masīh ko hameshā ham par tars ātā hai. Use patā hai ki ham us ke baḡhair āwārā bheṛen haiñ. Ki hameñ achchhe charwāhe kī saḡht zarūrat hai.

Hote hote 5000 mard pahuñch gae. Sirf mardoñ kā zikr hai. Un ke bāl-bachche bhī kāfī tādād meñ sāth āe hoñge. Ho saktā hai ki mil-milākar bīs hazār tak the.

Jald hī ek maslā mālūm huā. Log itne josh se Īsā Masīh ke pīchhe bhāḡ āe the ki un ke pās khānā nahīñ thā.

Īsā Masīh har ek kī fikr kartā hai. Un kī thakī-hārī hālat dekhkar us ne apne shāgird Filippus se pūchhā, “Ham kahān se khānā ḡharīdeñ tāki unheñ khilāeñ?”

Us ko mālūm thā ki kyā karegā. To bhī us ne pūchhā.

- *Kyon?*

Wuh shāgirdoñ ko apnī bādshāhī ke bāre meñ kuchh sikhānā chāhtā thā.

- *Kyā sikhānā chāhtā thā?*

Yīh ki is bādshāhī ke kuchh anmiṭ usūl hote haiñ. Pahlā usūl,

Bhāichārā

- *Kyā Īsā Masīh ne Filippus se islie bāt kī ki wuh khāne kā intazām karwāe?*

Nahīñ. Wuh chāhtā thā ki Filippus ḡhud soch le ki kyā karnā hai. Ki khānā kahān se āegā. Jagah to wīrān thī. Ābādī thī hī nahīñ jahān se khānā mile.

Bhāichārā is se shurū hotā hai ki ham dūsroñ kī fikr karen. Īsā Masīh chāhtā hai ki ham ek dūsre kī is tarah fikr karen jis tarah wuh kartā hai.

Ab Filippus sachmuch fikr karne lagā. Us ne logoñ kī tādād ginkar jawāb diyā, “Agar har ek ko sirf thoṛā-sā mile to bhī chāndī ke 200 sikke kāfī nahīn hoñge.”

Mazdūr ko dīn meñ chāndī kā ek sikkā miltā thā. 200 dīn meñ wuh itne paise kamā saktā thā ki in logoñ ko thoṛā-bahut mil jāe.

Ab dūsre shāgird bhī fikrmand hue. Wuh patā karne lage ki kyā kisī ke pās khānā hai? Magar kisī ke pās khānā na thā. Āḡhirkār ek shāgird banām Andriyās āyā aur kahā, “Yahān ek laṛkā hai jis ke pās jau kī pāñch roṭiyāñ aur do machhliyāñ haiñ. Magar itne logoñ meñ yih kyā haiñ!”

Bhāichāre kī jhalak.

Āsmān kī bādshāhī kā dūsrā usūl,

Kamī se Kasrat

Īsā Masīh kā pūchhne kā maqsad pūrā ho gayā thā. Shāgirdoñ meñ fikrmandī kī rūh ā gai thī. Ab Īsā Masīh ek aur bāt sikhānā chāhtā hai.

► *Wuh kyā hai?*

Yih ki āsmān kī bādshāhī meñ kamī kasrat meñ badal jāti hai. Aisī kasrat jo sab ke lie kāfī ho.

Us ne farmāyā, “Logoñ ko biṭhā do.”

Sab ko biṭhā diyā gayā to Īsā Masīh ne shukrguzārī kī duā kī. Phir us ne roṭī aur machhliyoñ ke ṭukṛe ṭukṛe karke unheñ shāgirdoñ ke supurd kie. Shāgird yih ṭukṛe bāñṭne meñ juṭ gae. Lekin yih kyā thā? Shāgird taqsīm karte gae magar khānā ḡhatm na huā. Log na sirf jī bharkar khā sake balki khānā bach bhī gayā. Bache hue khāne ke 12 ṭokre bhar gae—har shāgird ke lie ek.

Jis laṛke ne khānā diyā thā us ke pās thoṛā hī thā. Lekin Īsā Masīh ne yih lekar kasrat kā khānā muhaiyā kiyā. Jo thoṛā-bahut hamāre pās hai Īsā Masīh use itnā baṛhā saktā hai ki sab ser ho jāeñ.

Laṛkā yih bhī kah saktā thā ki mujhe chhoṛ do. Yih bas mere lie kāfī hai. Main apnā khānā ḳhud khāūngā. Lekin jab us ne apnī nemat Īsā Masīh ke supurd kī to be-shumār logoñ ko barkat mili.

Āsmān kī bādshāhī meñ jab ham apnā thoṛā-bahut māl Īsā Masīh ko sauñp deñ to sab ko barkat milti hai. Tab kamī kasrat meñ badal jāti hai.

► *Kyā āp chāhte haiñ ki Īsā Masīh āp kī kamī ko kasrat meñ badal de?*

Phir use Īsā Masīh ke supurd karen.

Āsmān kī bādshāhī kā tīsrā usūl,

Siyāsāt Band

Jahān āsmān kī bādshāhī hotī hai wahān siyāsāt band ho jāti hai.

Jab logoñ ne yih mojizā dekhā to wuh ek dūsre se phusphusāne lage.

► *Kyā phusphusāne lage?*

Yih ki “Yaqīnan yih wuhī nabī hai jise duniyā meñ ānā thā.”

► *Kyā matlab? Kaun-sā nabī?*

Mūsā Nabī ne peshgoī kī thī ki ek waqt āegā jab

Rab terā Ḳhudā tere wāste tere bhāiyoñ meñ se mujh jaise nabī ko barpā karegā.
(Tauret, Istisnā 18:15)

Log samajh gae ki Īsā Masīh yahī nabī hai. Ki wuh āne wālā al-Masīh hai. Ki yih hamārā bādshāh banegā. Mojize ko dekhkar wuh itne josh meñ āe ki wahīñ ke wahīñ use bādshāh banānā chāhte the. Āp ḳhud andāzā lagāen: 5000 mard kyā kuchh nahīñ kar pāte jab wuh milkar kām karen. Sāth aisā bādshāh ho.

Lekin Īsā Masīh ko mālūm huā ki wuh ākar use zabardastī bādshāh banānā chāhte haiñ.

► *Kyā us ne un kī izzat-o-ehṭarām qabūl kī?*

Nahīn. Us ko un kī is soch se nafrat thī. Log bas siyāsī soch rakhte the. Wuh us se duniyāwī fāydā uṭhānā chāhte the. Lekin Īsā Masīh is duniyā kī ām bādshāhī qāym karne nahīn āyā thā. Wuh āsmān kī bādshāhī lāne ko āyā thā.

► *Āsmān kī yih bādshāhī kyā hai?*

Yih ek rūhānī, ek andarūnī bādshāhī hai. Yih bādshāhī dilon meñ rāj kartī hai. Yih saḡht aur siyāsī dilon ko narm karnā chāhti hai—Ḳhudā kī bāton ke lie narm, ek dūsre ke lie narm. Yih hamēñ āsmān ke shahrī banānā chāhti hai.

► *Īsā Masīh ne kyā kiyā jab log yon sochne lage?*

Wuh ekdam un se alag hokar akelā hī pahār par chaḡh gayā.

Āj bhī bahut-se log Īsā Masīh ko apne kāmon ke lie istemāl karnā chāhte haiñ. Wuh use apnā bādshāh banākar duniyāwī fāydā uṭhānā chāhte haiñ. Yon wuh bādshāh ko ḡhulām banānā chāhte haiñ. Lekin yaqīn karo: Jab log Īsā Masīh ko apne maqsadoñ ke lie istemāl karnā chāhte haiñ tab wuh ojhal ho jātā hai. Wuh sirf us waqt hāzir hotā hai jab hamāre dil us ke rūhānī kām ke lie khule hoñ. Jab ham mān jāēñ ki wuh āsmān kā bādshāh hai.

► *Shāgirdon ke sāth kyā huā?*

Īsā Masīh ne unheñ ekdam kashtī meñ biṭhākar jhīl ke pār bhej diyā.

► *Kyon?*

Islie ki wuh bhī siyāsī bāton meñ ulajh na jāēñ.

Āsmān kī bādshāhī kā chauthā usūl,

Tūfān meñ Hifāzat

Andherā chhā gayā aur Īsā Masīh ab tak pahār par thā. Ekdam tez hawā kashtī par ṭuṭ parī. Baḡī baḡī lahreñ kashtī se ṭakrāne lagīñ. Kashtī chhoṭe khilaune kī tarah idhar-udhar ḡagmagāne lagī. Yih dekhkar shāgird kashtī ko jald-az-jald

agle kināre tak le jāne meñ juṭ gae. Kashtī ko khete khete wuh chār yā pāñch kilometer kā safr tay kar chuke the ki achānak chiḡh uṭhe. Andhere meñ ek shakl pānī par chalti huī nazar āī.

► *Kyā yih koī bhūt thā jo un ko barbād karne ā rahā thā?*

Wuh dahshat se pānī pānī ho gae.

Tab Īsā Masīh kī āwāz sunāī dī, “Main hī hūñ. Kḡhauf na karo.”

► *Kyā ho rahā thā?*

Wuh pānī par chalte hue un ke pās ā rahā thā. Wuh pānī par yon chal rahā thā jis tarah ham ṭhos zamīn par chalte haiñ. Kabhī wuh pānī ke pahāron par chaṛhtā nazar ātā kabhī pānī kī wādiyon meñ oḡhal ho jātā thā. Āḡhirkār wuh kashtī ke pās pahuñch gayā. Shāgird use kashtī meñ biṭhāne ko the ki kashtī us jagah pahuñch gaī jahān wuh jānā chāhte the.

Yih kaisī bāt hai. Log Īsā Masīh ko bādshāh banānā chāhte the jabki use pānī aur hawā par pūrā iḡhtiyār thā. Isliē āo, ham us par imān rakheñ tāki rozmarā kī zindagī meñ us kī hifāzat pāeñ. Jab tūfān ham par ṭuṭ paṛe to ham madad ke lie use pukāreñ. Jab pānī ke pahār ham se ṭakrāeñ to us kī qurbat meñ mahfūz raheñ.

► *Yon shāgirdon ne ek hī dīn meñ bahut kuchh sīkh liyā thā:*

Bhāichārā. Āsmān kī bādshāhī meñ ham sab bhāi-bahn haiñ. Jis tarah Īsā Masīh hamārī fikr kartā hai usī tarah hameñ ek dūsre kī fikr karnī hai.

Kamī se Kasrat. Is bādshāhī meñ jo thoṛā-bahut mere pās hai wuh sab ke lie barkat kā bāis ban jātā hai.

Siyāsāt Band. Jahān āsmān kī bādshāhī hai wahān siyāsāt band ho jātī hai.

Tūfān meñ Hifāzat. Hamāre āqā ko hawā aur pānī par iḡhtiyār hai. Isliē jab zindagī ke tūfān hameñ jhakjhorthe haiñ to hameñ usī ke qadamon meñ hifāzat miltī hai.

Injil, Yūhannā 6:1-21

Is ke bād Īsā ne Galil kī jhīl ko pār kiyā. (Jhīl kā dūsrā nām Tibariyās thā.) Ek baṛā hujūm us ke pīchhe lag gayā thā, kyonki us ne ilāhī nishān dikhākar marizon ko shafā dī thī aur logoṅ ne is kā mushāhadā kiyā thā. Phir Īsā pahār par chaṛhkar apne shāgirdoṅ ke sāth baiṭh gayā. (Yahūdī Īd-e-Fasah qarīb ā gai thī.) Wahān baiṭhe Īsā ne apnī nazar uṭhāi to dekhā ki ek baṛā hujūm pahuṅch rahā hai. Us ne Filippus se pūchhā, “Ham kahān se khānā kharidēn tāki unheṅ khilāen?” (Yih us ne Filippus ko āzmāne ke lie kahā. Kḥud to wuh jāntā thā ki kyā karegā.)

Filippus ne jawāb diyā, “Agar har ek ko sirf thoṛā-sā mile to bhī chāndī ke 200 sikke kāfī nahīn hoṅge.”

Phir Shamāūn Patras kā bhāi Andriyās bol uṭhā, “Yahān ek laṛkā hai jis ke pās jau kī pānch roṭiyān aur do machhliyān haiṅ. Magar itne logoṅ meṅ yih kyā haiṅ!” Īsā ne kahā, “Logoṅ ko biṭhā do.” Us jagah bahut ghās thī. Chunāṅche sab baiṭh gae. (Sirf mardoṅ kī tādād 5,000 thī.) Īsā ne roṭiyān lekar shukrguzārī kī duā kī aur unheṅ baiṭhe hue logoṅ meṅ taqsim karwāyā. Yahī kuchh us ne machhliyoṅ ke sāth bhī kiyā. Aur sab ne jī bharkar roṭī khāi. Jab sab ser ho gae to Īsā ne shāgirdoṅ ko batāyā, “Ab bache hue ṭukre jamā karo tāki kuchh zāyā na ho jāe.” Jab unhoṅ ne bachā huā khānā ikaṭṭhā kiyā to jau kī pānch roṭiyōṅ ke ṭukroṅ se bārah ṭokre bhar gae.

Jab logoṅ ne Īsā ko yih ilāhī nishān dikhāte dekhā to unhoṅ ne kahā, “Yaqīnan yih wuhī nabī hai jise duniyā meṅ ānā thā.” Īsā ko mālūm huā ki wuh ākar use zabardasti bādshāh banānā chāhte haiṅ, islie wuh

dubārā un se alag hokar akelā hī kisī pahāṛ par chaṛh gayā.

Shām ko shāgird jhīl ke pās gae aur kashtī par sawār hokar jhīl ke pār shahr Kafarnahūm ke lie rawānā hue. Andherā ho chukā thā aur Īsā ab tak un ke pās wāpas nahīn āyā thā. Tez hawā ke bāis jhīl meñ lahreñ uṭhne lagīñ. Kashtī ko khete khete shāgird chār yā pāñch kilometer kā safr tay kar chuke the ki achānak Īsā nazar āyā. Wuh pānī par chaltā huā kashtī kī taraf baṛh rahā thā. Shāgird dahshatzadā ho gae. Lekin us ne un se kahā, “Main hī hūñ. Ḳhauf na karo.” Wuh use kashtī meñ biṭhāne par āmādā hue. Aur kashtī usī lamhe us jagah pahuñch gaī jahāñ wuh jānā chāhte the.

Zindagī kī Roṭī



Īsā Masīh mojizon kā mālik hai. Ek din us ne pāñch roṭiyāñ aur do machhliyāñ lekar un se 5000 mardoñ ko bāl-bachchoñ samet khānā khilāyā. Log hakkā-bakkā rah gae. Tab wuh ek dūsre se kahne lage, yih to hamārā bādshāh honā chāhie. Agar yih hamāre āge āge chale to ham kyā kuchh nahīñ kar pāenge.

Lekin Īsā Masīh ko siyāsāt se nafrat hai. Aisi bāteñ buland hone lagīñ to us ne apne qarībī shāgirdoñ ko ekdam kashtī meñ biṭhākar jhīl ke pār bhej diyā. Kḥud wuh akele kisī pahār par chaṛh gayā. Andherā chhā gayā to wuh tūfānī lahoñ par chalte hue shāgirdoñ ke pās āyā. Tab wuh milkar Kafarnahūm chale gae.

Jo log pīchhe rah gae the wuh agle din jāg uṭhe. Apnī āñkhoñ ko mal malkar wuh ustād ko talāsh karne lage to kahīñ na pāe. Kāfī der ke bād patā chalā ki wuh jhīl ke pār Kafarnahūm shahr meñ hai. Tab wuh bhī rawānā hue. Kafarnahūm pahuñchne par unhoñ ne pūchhā, “Ustād, āp kis tarah yahāñ pahuñch gae?”

► *Īsā Masīh ne kyā jawāb diyā?*

Pahli bāt,

Zindagī kī Roṭī Pāo

Wuh sīdhe asl bāt par ā gayā. Farmāyā,

Tum mujhe islie nahīñ qhūñḍ rahe ki ilāhī nishān dekhe haiñ balki islie ki tum ne jī bharkar roṭī khāi hai. (Yūhannā 6:26)

► *Wuh kyā kahnā chāhtā thā?*

Tum log sirf duniyāwī soch rakhte ho. Maiñne tum sab ko khānā khilāyā. Lekin tum ne yih dekhkar rūhānī

natijā na nikālā. Tum ne sirf yih natijā nikālā ki is bande ko hamārā bādshāh bananā hai, yahī hamārī duniyāwī zarūriyāt pūrī kare. Lekin mere mojizoñ kā maqsad aur hai. Wuh ilāhī nishān haiñ.

► *Nishān kyon?*

Yih zāhir karte haiñ ki Īsā Masīh ko ilāhī iḡhtiyār hai. Ki use āsmān kī bādshāhī lāne kā iḡhtiyār hai. Lekin yih bādshāhī duniyāwī nahīñ hai. Yih rūhānī hai. Yih logoñ ke diloñ ko tabdīl karegī. Unheñ aglī duniyā ke lie taiyār karegī. Logoñ ko is rūhānī bādshāhī meñ dāḡhil hone kī koshish karnī chāhie.

Us ne farmāyā,

Aisī ḡhurāk ke lie jidd-o-jahd na karo jo saḡ-gal jāti hai, balki aisī ke lie jo abadī zindagī tak qāym rahti hai aur jo Ibn-e-Ādam tum ko degā.
(Yūhannā 6:27)

► *Log us roṭī ke lie jidd-o-jahd kyon na karen jo saḡ-gal jāe?*

Ām roṭī khākar insān ko abadī zindagī nahīñ miltī.

► *To phir log kis roṭī ke lie jidd-o-jahd karen?*

Us roṭī ke lie jo abad tak qāym rahti hai.

► *Kyon?*

Use khākar insān abad tak zindā rahegā.

Lekin yih roṭī sirf ek hī de saktā hai.

► *Wuh kaun?*

Ibn-e-Ādam.

► *Ibn-e-Ādam kaun hai?*

Ibn-e-Ādam Īsā Masīh kā dūsrā nām hai. Dūsrī bāt,

Mujh par Īmān Lāo

Ab log soch-bichār meñ paḡ gae. Ustād ṡhīk hī kah rahe haiñ. Lekin ham kyā karen tāki zindagī kī roṭī pāen? Kyā kām karen jo Ḳhudā ko pasand āe aur hameñ yih roṭī mil jāe?

- *Kisī waqt har insān ke dil meñ yih sawāl ubhar ātā hai ki main kyā karūñ tāki abadī zindagī pāūñ?*

In logoñ ne bhī yih sawāl pūchhā, “Hameñ kyā karnā chāhie tāki Allāh kā matlūbā kām karen?”

Īsā Masīh ne jawāb diyā,

Allāh kā kām yih hai ki tum us par imān lāo jise us ne bhejā hai. (Yūhannā 6:29)

- *Yih kyā kām hai jo dekhkar Ḳhudā hameñ abadī zindagī kī roṭī degā?*

Īsā Masīh par imān.

- *Kyā ḡhalat kām chhoṛnā kāfī nahīñ? Kyā nek kām kāfī nahīñ? Kyā shariāt par amal karnā kāfī nahīñ?*

Kabhī nahīñ. Īsā Masīh farmātā hai ki us par imān lāo jise Ḳhudā ne bhejā hai. Yāñ mujh par. Ek hī wasīlā hai jis se zindagī kī yih roṭī mil jāe: Īsā Masīh par imān. Abadī roṭī pāne ke lie na nek kām kāfī haiñ na shariāt par amal. Ek hī rāstā hai: Īsā Masīh par imān.

- *Īsā Masīh kyon farmātā hai ki mujh par imān lāo?*

Wuh jāntā hai ki hamāre nek kām kabhī kāfī nahīñ hoñge.

- *Kyon?*

Hamārī fitrat itnī ḵharāb hai ki hamāre nek kām hameñ Ḳhudā ke sāmne mañzūr nahīñ karā sakte. Hamārī fitrat ek galī-saṛī machhlī jaisī hai.

- *Kyā pakāne se yih khāne lāyq ho jāegī?*

Kabhī nahīñ!

- *Kyā ham ise kisī aur tariqe se khāne lāyq banā sakte haiñ?*

Kabhī nahīñ. Hamārī insānī fitrat hamārī apñī koshishoñ se bahāl nahīñ ho saktī. Isī lie al-Masīh is duniyā meñ nāzil huā tāki ḵhud hī hameñ bahāl kare. Isī lie us par imān lānā zarūrī hai. Kyonki us par imān lāne se wuh hameñ yih abadī zindagī de saktā hai. Tisrī bāt,

Main hī Zindagī kī Roṭī Hūn

- *Kyā log yih sunkar us par imān lāe?*

Nahīn. Wuh shak meñ paṛkar kahne lage, “To phir āp kyā ilāhī nishān dikhāenge jise dekhkar ham āp par imān lāen? Āp kyā kām saranjām denge? Hamāre bāpdādā ne to registān meñ man khāyā. Chunānche Kalām-e-muqaddas meñ likhā hai ki Mūsā ne unheñ āsmān se roṭī khilāi.”

- *Wuh Īsā Masīh se kyā māng rahe the?*

Ek ilāhī nishān.

- *Ilāhī nishān kyon?*

Wuh koī mojizā kar dikhāe jo sābit kare ki use ilāhī iḡhtiyār hai.

- *Kyā Īsā Masīh ne abhī abhī ek nishān nahīn dikhāyā thā?*

Zarūr. Us ne 5000 mardoñ ko bāl-bachchoñ samet khānā khilāyā thā.

- *To phir log kyon ilāhī nishān māng rahe the?*

Yahān wuh ek aur bāt māng rahe the. Islie unhoñ ne kahā ki Mūsā ne hamāre bāpdādā ko man khilāyā. Wuh sīdhe māng rahe the ki Īsā Masīh bhī āsmān se man barasne de.

- *Man kā yih kyā mojizā thā jo Mūsā ke zamāne meñ huā thā?*

Jab Isrāīlī registān meñ safr kar rahe the to Ḳhudā ne unheñ man khilāyā thā.

- *Man kyā thā?*

Yih dāne the jo āsmān se girte the aur jo dhaniye kī mānind safed the. Khāne meñ wuh shahd se bane cake kī mānind thā (Tauret, Ḳhurūj 16:31).

- *Log Īsā Masīh se is qism kā mojizā māng rahe the. Kyon?*

Yahūdī riwāyat ke mutābiq al-Masīh kī āmad par man āsmān se dubārā giregā. Matlab hai, log chāhte the ki Īsā Masīh man barsākar sābit kare ki wuh āne wālā Masīh hai.

Īsā Masīh ne jawāb diyā,

Ḳhud Mūsā ne tum ko āsmān se roṭī nahīn khilāi balki mere Bāp ne. Wuhī tum ko āsmān se haqīqī roṭī detā hai. Kyonki Allāh kī roṭī wuh shaḵhs hai jo āsmān par se utarkar duniyā ko zindagī baḵhshtā hai. (Yūhannā 6:32-33)

► *Kyā Mūsā ne man khilāyā thā?*

Nahīn, Ḳhudā Bāp ne. Yih pahli bāt hai. Lekin ab Ḳhudā Bāp ek aur qism kī roṭī detā hai.

► *Kis qism kī roṭī?*

Haqīqī roṭī.

► *Man aur is roṭī meñ kyā farq hai?*

Man galne wālī roṭī hai jabki yih roṭī ek shaḵhs hai. Ek shaḵhs jo abadī zindagī baḵhshtā hai.

► *Kaun-sā shaḵhs?*

Īsā Masīh. Wuhī abadī zindagī kī roṭī hai. Haqīqī man kā mojizā usī meñ ho chukā hai.

Ab tak sunane wālon ko bāt samajh na āi. Unhon ne kahā, “Ḳhudāwand, hameñ yih roṭī har waqt diyā karen.” Tab Īsā Masīh ne sāf farmāyā,

Main hī zindagī kī roṭī hūn. Jo mere pās āe use phir kabhī bhūk nahīn lagegī. Aur jo mujh par imān lāe use phir kabhī pyās nahīn lagegī. (Yūhannā 6:35)

Sirf aur sirf Īsā Masīh zindagī kī roṭī hai. Usī se abadī zindagī milti hai. Koī aur roṭī yih nahīn dilā saktī. Yih hameñ ek chauthī bāt kī taraf le jātī hai,

Najāt Pakkī Hai

Yih roṭī khāne se najāt yaqīnī hai, pakkī hai.

► *Kyā āp ko yaqīn hai ki āp adālat ke din bacheñge?*

Koī aur roṭī hameñ qiyāmat ke din zindā nahīn karegī. Koī aur roṭī hameñ adālat ke din mahfūz nahīn rakhegī. Īsā Masīh ne farmāyā,

Jitne bhī Bāp ne mujhe die haiñ wuh mere pās āēnge aur jo bhī mere pās āegā use maiñ hargiz nikāl na dūngā. (Yūhannā 6:37)

Yahān Īsā Masīh ke kirdār kā ek ṭhos pahlū nazar ātā hai.

► *Wuh kyā?*

Charwāhe kā kirdār. Wuh achchhā charwāhā hai jo apnī har bheṛ kī fikr kartā hai. Jis ko bhī Ḳhudā Bāp ne us ke supurd kiya hai use wuh halāk nahīñ hone degā. Kitnī tasallī kī bāt hai. Is ko aur pakkā banākar us ne farmāyā,

Sirf wuh shaḳhs mere pās ā saktā hai jise Bāp ... mere pās khīñch lāyā hai.
(Yūhannā 6:44)

Ham apnī hī koshishoñ se najāt nahīñ pā sakte. Ḳhudā Bāp ḳhud hamēñ khīñch lātā hai. Jab ham Īsā Masīh par imān lāte haiñ to yahī bāt hamēñ dilāsā detī hai. Kyoñki yih najāt hamārī kamzor koshishoñ par mabnī nahīñ hotī balki Ḳhudā Bāp ke pakke wāde par. Tab hamēñ pūrī tasallī hai ki ham adālat ke dīn bhī mahfūz raheñge. Pāñchwiñ bāt,

Khāte-Pīte Raho

Tab Īsā Masīh ne ek hairatangez bāt farmāī,

Maiñ hī zindagī kī wuh roṭī hūñ jo āsmān se utar āī hai. Jo is roṭī se khāe wuh abad tak zindā rahegā. Aur yih roṭī merā gosht hai jo maiñ duniyā ko zindagī muhaiyā karne kī ḳhātir pesh karūñgā. (Yūhannā 6:51)

Man khāne se Isrāīliyoñ ko abadī zindagī na milī.

► *Kyā abadī zindagī kī yih roṭī bhī isī tarah hai?*

Nahīñ. Jo bhī zindagī kī yih naī roṭī khāe use abadī zindagī hāsīl hai.

Sāth sāth Īsā Masīh ne ek aur bāt farmāi. Yih ki yih roṭī merā gosht hai.

► *Kyon?*

Jab Isrāīlī registān meñ the to wuh na sirf roṭī balki gosht ke lie bhī tars rahe the (Ḳhurūj 16:3). Aur Ḳhudā ne un kī sunī. Usī shām baṭeron ke ḡhol āe jo pūrī ḡhaimāḡāh par chhā gae. Tab Isrāīliyon ne jī bharkar gosht khāyā. Ab Īsā Masīh farmātā hai ki maiñ zindagī kī roṭī bhī hūñ aur gosht bhī. Man aur gosht ke mojize mujh meñ hue haiñ. Lekin ab Īsā Masīh ne ek zyādā chaunkā dene wālī bāt kahī,

Merā gosht haqīqī ḡhurāk aur merā ḡhūn haqīqī pīne kī chīz hai. Jo merā gosht khātā aur merā ḡhūn pītā hai wuh mujh meñ qāym rahtā hai aur maiñ us meñ. (Yūhannā 6:55-56)

► *Wuh is se kyā kahnā chāhtā thā?*

Gosht khāne aur ḡhūn pīne kā ḡhyāl to ḡhinaunā-sā lagtā hai.

► *Ham kis tarah us kā gosht aur ḡhūn khā-pī sakte haiñ?*

Īsā Masīh apnī salībī maut kī taraf ishārā kar rahā thā. Thoṛe dinoñ ke bād use apnī jāñ hamārī ḡhātīr denī thī yāñ use apnā gosht aur ḡhūn qurbān karnā thā.

► *Kyon?*

Use hamāre ḡnāhoñ kī sazā uṭhāñī thī tāki hamēñ najāt mil jāe. Aur yih sazā saḡht thī. Sazā-e-maut thī.

► *Lekin gosht khāne aur ḡhūn pīne par itnā zor dene se wuh kyā kahnā chāhtā thā?*

Yih bahut zarūrī hai ki ham har lamhā us kī is qurbāñī se abadī zindagī pāte raheñ. Lāzim hai ki ham har lamhā us kī qurbat meñ raheñ, har lamhā us se lipṭe raheñ, har lamhā use takte raheñ, har lamhā us kī bāteñ jazb karte raheñ. Tab yih abadī zindagī hamārī ragoñ meñ dauṛtī rahegī. Tab ham Īsā Masīh jaise bante jāenge. Chāhe

hamārī zindagī kitnī dukhī kyoñ na ho hamāre andar us
kā sukūn aur us kī tasallī rahegī. Tab us kā nūr hamārī
zindagī meñ chamaktī-damaktī rahegī.

Jab bulb meñ bijlī ho to wuh jaltā hai. Bijlī band ho to
light nahīn jaltī. Isī tarah agar hamārī Īsā Masīh ke sāth
rifāqat āhistā āhistā band ho jāe to ham is bharpūr zindagī
se mahrūm rah jāenge. Tab hamārī zindagī dubārā gunāh se
bhar jāegī. Tab hamārā dil andherā ho jāegā.

Ek ākhīrī bāt,

Pahle Īmān Phir Pahchān

Īsā Masīh kī yih bāteñ bahut-se logoñ ko nā-gawār lagīñ.

► *Kyoñ?*

Wuh yih qabūl karne ke lie taiyār nahīn the ki Īsā Masīh
zindagī kī roṭī hai. Ki us par imān lāne se abadī zindagī
milti hai. Ki wuh na sirf ām qism kā gurū hai balki āsmān
kī haqīqī roṭī. Wuh roṭī jis se is duniyā aur aglī duniyā
meñ bharpūr zindagī mil jāegī.

Ab bahut-se logoñ ne Īsā Masīh ko chhoṛ diyā. Tab us ne apne
qarībī shāgirdoñ se pūchhā ki kyā tum bhī mujhe chhoṛnā
chāhte ho?

Shamāūn Patras ne jawāb diyā,

Ḳhudāwand, ham kis ke pās jāeñ? Abadī
zindagī kī bāteñ to āp hī ke pās haiñ. Aur ham
ne imān lākar jān liyā hai ki āp Allāh ke quddūs
haiñ. (Yūhannā 6:68-69)

Patras aur dūsre qarībī shāgird ustād kī kaī bāteñ samajh
nahīn sakte the. Lekin baṛī bāt sāf thī: Hamāre āqā ke pās
abadī zindagī kī bāteñ haiñ. Wuhī Allāh kā quddūs hai.

► *Ham kis tarah jān sakte haiñ ki Īsā Masīh sachmuch abadī
zindagī kī roṭī hai?*

Patras is kā jawāb detā hai. Yih jānane ke lie aql kāfī
nahīn hai. Is ke lie imān zarūrī hai. Pahle imān lāo, tab

hī jān loge. Ham Īsā Masīh kā kirdār apnī aql se mālūm nahīn kar sakte. Pahle īmān zarūrī hai. Tab hī ham jān leṅge ki wuh Allāh kā quddūs hai. Ki wuh abadī zindagī kī haqīqī roṭī hai.

► *Ġharz, zindagī kī roṭī ke bāre meṅ 6 sachchāiyān apnānī chāhien:*

- Zindagī kī roṭī pāo.
- Mujh par īmān lāo.
- Maiṅ hī zindagī kī roṭī hūn.
- Najāt yaqīnī hai.
- Khāte-pīte raho.
- Pahle īmān phir pahchān.

Injīl, Yūhannā 6:22-70

Hujūm to jhīl ke pār rah gayā thā. Agle din logoṅ ko patā chalā ki shāgird ek hī kashtī lekar chale gae haiṅ aur ki us waqt Īsā kashtī meṅ nahīn thā. Phir kuchh kashtiyān Tibariyās se us maqām ke qarīb pahuṅchīn jahān Īsā Masīh ne roṭī ke lie shukrguzārī kī duā karke use logoṅ ko khilāyā thā. Jab logoṅ ne dekhā ki na Īsā aur na us ke shāgird wahān haiṅ to wuh kashtiyōṅ par sawār hokar Īsā ko ḍhūṇḍte ḍhūṇḍte Kafarnahūm pahuṅche.

Jab unhoṅ ne use jhīl ke pār pāyā to pūchhā, “Ustād, āp kis tarah yahān pahuṅch gae?”

Īsā ne jawāb diyā, “Maiṅ tum ko sach batātā hūn, tum mujhe islie nahīn ḍhūṇḍ rahe ki ilāhī nishān dekhe haiṅ balki islie ki tum ne jī bharkar roṭī khāī hai. Aisī kḥurāk ke lie jidd-o-jahd na karo jo saṛ-gal jātī hai, balki aisī ke lie jo abadī zindagī tak qāym rahtī hai aur jo Ibn-e-Ādam tum ko degā, kyoṅki Kḥudā Bāp ne us par apnī tasdīq kī mohr lagāī hai.”

Is par unhoñ ne pūchhā, “Hameñ kyā karnā chāhie tāki Allāh kā matlūbā kām kareñ?”

Īsā ne jawāb diyā, “Allāh kā kām yih hai ki tum us par imān lāo jise us ne bhejā hai.”

Unhoñ ne kahā, “To phir āp kyā ilāhī nishān dikhāenge jise dekhkar ham āp par imān lāen? Āp kyā kām saranjām deñge? Hamāre bāpdādā ne to registān meñ man khāyā. Chunāñche Kalām-e-muqaddas meñ likhā hai ki Mūsā ne unheñ āsmān se roṭī khilāi.”

Īsā ne jawāb diyā, “Main tum ko sach batātā hūñ ki ḳhud Mūsā ne tum ko āsmān se roṭī nahīn khilāi balki mere Bāp ne. Wuhī tum ko āsmān se haqīqī roṭī detā hai. Kyoñki Allāh kī roṭī wuh shaḳhs hai jo āsmān par se utarkar duniyā ko zindagī baḳhshtā hai.”

Unhoñ ne kahā, “Ḳhudāwand, hameñ yih roṭī har waqt diyā kareñ.”

Jawāb meñ Īsā ne kahā, “Main hī zindagī kī roṭī hūñ. Jo mere pās āe use phir kabhī bhūk nahīn lagegī. Aur jo mujh par imān lāe use phir kabhī pyās nahīn lagegī. Lekin jis tarah main tum ko batā chukā hūñ, tum ne mujhe dekhā aur phir bhī imān nahīn lāe. Jitne bhī Bāp ne mujhe die haiñ wuh mere pās āenge aur jo bhī mere pās āegā use main hargiz nikāl na dūngā. Kyoñki main apnī marzī pūrī karne ke lie āsmān se nahīn utrā balki us kī jis ne mujhe bhejā hai. Aur jis ne mujhe bhejā us kī marzī yih hai ki jitne bhī us ne mujhe die haiñ un meñ se main ek ko bhī kho na dūñ balki sab ko qiyāmat ke din murdoñ meñ se phir zindā karūñ. Kyoñki mere Bāp kī marzī yahī hai ki jo bhī Farzand ko dekhkar us par imān lāe use abadī zindagī hāsil ho. Aise shaḳhs ko main qiyāmat ke din murdoñ meñ se phir zindā karūngā.”

Yih sunkar Yahūdī islie burburāne lage ki us ne kahā thā, “Main hī wuh roṭī hūn jo āsmān par se utar āi hai.” Unhoñ ne etarāz kiyā, “Kyā yih Īsā bin Yūsuf nahīn, jis ke bāp aur mān se ham wāqif haiñ? Wuh kyonkar kah saktā hai ki ‘Main āsmān se utrā hūn?’”

Īsā ne jawāb meñ kahā, “Āpas meñ mat burburāo. Sirf wuh shaḡhs mere pās ā saktā hai jise Bāp jis ne mujhe bhejā hai mere pās khīnch lāyā hai. Aise shaḡhs ko main qiyāmat ke din murdoñ meñ se phir zindā karūngā. Nabiyoñ ke sahīfoñ meñ likhā hai, ‘Sab Allāh se tālīm pāenge.’ Jo bhī Allāh kī sunkar us se sikhṭā hai wuh mere pās ā jātā hai. Is kā matlab yih nahīn ki kisī ne kabhī Bāp ko dekhā. Sirf ek hī ne Bāp ko dekhā hai, wuhī jo Allāh kī taraf se hai. Main tum ko sach batātā hūn ki jo imān rakhtā hai use abadī zindagī hāsil hai. Zindagī kī roṭī main hūn. Tumhāre bāpdādā registān meñ man khāte rahe, to bhī wuh mar gae. Lekin yahān āsmān se utarne wālī aisi roṭī hai jise khākar insān nahīn martā. Main hī zindagī kī wuh roṭī hūn jo āsmān se utar āi hai. Jo is roṭī se khāe wuh abad tak zindā rahegā. Aur yih roṭī merā gosht hai jo main duniyā ko zindagī muhaiyā karne kī ḡhātir pesh karūngā.”

Yahūdī baṛī sargarmī se ek dūse se bahs karne lage, “Yih ādmī hamēñ kis tarah apnā gosht khilā saktā hai?”

Īsā ne un se kahā, “Main tum ko sach batātā hūn ki sirf Ibn-e-Ādam kā gosht khāne aur us kā ḡhūn pīne hī se tum meñ zindagī hogī. Jo merā gosht khāe aur merā ḡhūn pīe abadī zindagī us kī hai aur main use qiyāmat ke din murdoñ meñ se phir zindā karūngā. Kyonki merā gosht haqīqī ḡhurāk aur merā ḡhūn haqīqī pīne kī chīz hai. Jo merā gosht khātā aur merā ḡhūn pītā hai wuh mujh meñ qāym rahtā hai aur main us meñ. Main us

zindā Bāp kī wajah se zindā hūn jis ne mujhe bhejā. Isī tarah jo mujhe khātā hai wuh merī hī wajah se zindā rahegā. Yahī wuh roṭī hai jo āsmān se utrī hai. Tumhāre bāpdādā man khāne ke bāwujūd mar gae, lekin jo yih roṭī khāegā wuh abad tak zindā rahegā.”

Īsā ne yih bāteñ us waqt kiñ jab wuh Kafarnahūm meñ Yahūdī ibādatkhāne meñ tālīm de rahā thā.

Yih sunkar us ke bahut-se shāgirdoñ ne kahā, “Yih bāteñ nā-gawār haiñ. Kaun inheñ sun saktā hai!”


Īsā ko mālūm thā ki mere shāgird mere bāre meñ buṛbuṛā rahe haiñ, islie us ne kahā, “Kyā tum ko in bātoñ se ṭhes lagī hai? To phir tum kyā sochoge jab Ibn-e-Ādam ko ūpar jāte dekhoge jahān wuh pahle thā? Allāh kā Rūh hī zindā kartā hai jabki jismānī tāqat kā koī fāyda nahīn hotā. Jo bāteñ mainne tum ko batāī haiñ wuh Rūh aur zindagī haiñ. Lekin tum meñ se kuchh haiñ jo īmān nahīn rakhte.” (Īsā to shurū se hī jāntā thā ki kaun kaun īmān nahīn rakhte aur kaun mujhe dushman ke hawāle karegā.) Phir us ne kahā, “Islie mainne tum ko batāyā ki sirf wuh shaḡhs mere pās ā saktā hai jise Bāp kī taraf se yih tawfīq mile.”

Us waqt se us ke bahut-se shāgird ulte pāñw phir gae aur āindā ko us ke sāth na chale. Tab Īsā ne bārah shāgirdoñ se pūchhā, “Kyā tum bhī chale jānā chāhte ho?”

Shamāūn Patras ne jawāb diyā, “Ḳhudāwand, ham kis ke pās jāeñ? Abadī zindagī kī bāteñ to āp hī ke pās haiñ. Aur ham ne īmān lākar jān liyā hai ki āp Allāh ke quddūs haiñ.”

Jawāb meñ Īsā ne kahā, “Kyā mainne tum bārah ko nahīn chunā? To bhī tum meñ se ek shaḡhs shaitān hai.” (Wuh Shamāūn Iskariyotī ke beṭe Yahūdāh kī taraf ishārā kar rahā thā jo bārah shāgirdoñ meñ se ek thā aur jis ne bād meñ use dushman ke hawāle kar diyā.)

Īsā Masīh ko Pānā



- *Ham Īsā Masīh ko kis tarah pā sakte haiñ?*

Ham Muğhal bādshāh Akbar ke bāre meñ bahut kuchh paṛh sakte haiñ. To bhī ham use kabhī nahīn pā sakte.

- *Kyon?*

Wuh to gayā-guzarā hai. Isī tarah ham Īsā Masīh ke bāre meñ bahut kuchh paṛh sakte haiñ.

- *Lekin kyā ham use pā bhī sakte haiñ?*

Injīl sharīf farmātī hai ki ham use pā bhī sakte haiñ. Use pāne se hī hameñ najāt miltī hai.

- *To sawāl yih hai, kyā mainne use pā liyā hai? Kyā wuh mere dil meñ bastā hai? Kyā merā us ke sāth shaḡhsī tālluq hai? Agar nahīn to main use kis tarah pāūñ?*

Ab ham is sawāl par dhyān deñge.

Īsā Masīh kā kirdār anokhā thā. Us kī tālīm sunkar log hakkā-bakkā rah jāte the. Us se qism qism ke marīzoñ ko shafā bhī miltī thī. Kyā aḡab ki wuh bhīroñ se ghirā rahtā thā. Lekin kuchh log us kī tālīm aur mojize bardāsht nahīn kar sakte the. Ḳhāskar Yarūshalam ke mazhabī rāhnumā us se jalte the. Jald hī wuh use pakaṛne kī sāzisheñ karne lage. Īsā Masīh yih jāntā thā. Islie wuh kāfī der tak Yarūshalam se dūr Galīl meñ ḡhidmat kartā rahā.

Tab Jhoñpaṛiyōñ kī baṛī Īd qarīb āī. Īsā Masīh ke ghar wāloñ ne kahā, “Yih jagah chhoṛkar Yahūdīyā chalā jā tāki tere pairokār bhī wuh mojize dekh leñ jo tū kartā hai. Jo shaḡhs chāhtā hai ki awām use jāne wuh poshīdagī meñ kāam nahīn kartā. Agar tū is qism kā mojizānā kāam kartā hai to apne āp ko duniyā par zāhir kar.”

- *Yih log kyā chāhte the?*

Yahūdiyā meñ Yarūshalam thā. Wuh ḵhush nahīn the ki Īsā Masīh Yarūshalam se dūr ḵhidmat kar rahā hai.

► *Kyon?*

Yarūshalam Yahūdī imān kā markaz thā. Wuh chāhte the ki Īsā Masīh apne mojize wahīn kar dikhāe jahān sab baṛe log id ke mauqe par jamā hoṅge.

► *Kyā un kī yih soch ṭhik nahīn thī?*

Nahīn. Un kī soch siyāsī thī. Unhoñ ne Masīh ke mojize dekhkar ḡhalat natijā nikālā thā. Wuh samajhte the ki ab waqt ā gayā hai ki Īsā Masīh mojize dikhākar Isrāīl kā duniyāwī bādshāh ban jāe. Aur is ke lie zarūrī thā ki wuh Yarūshalam meñ hī apne mojize dikhāe. Wuh poshīdagī meñ yānī Yarūshalam se dūr kām na kare.

► *Kyā wuh sachmuch poshīdagī meñ kām kar rahā thā?*

Bilkul nahīn. Galīl meñ us ke mojizoñ aur tālīm se bahut logoñ kī zindagī badal rahī thī. Unheñ jismānī aur rūhānī taraqqī mil rahī thī. Aisī poshīdagī to ṭhik hī hai. Is kā duniyāwī hukūmat se kyā wāstā? Lekin us ke ghar wāle yih bāteñ nahīn samajhte the. Wuh us se sirf duniyāwī fāyda uṭhānā chāhte the.

Īsā Masīh ke jawāb se ham bahut kuchh sīkh sakte haiñ. Pahlī bāt,

Duniyā kī Soch Chhoṛ Do

Īsā Masīh ne unheñ batāyā,

Abhī wuh waqt nahīn āyā jo mere lie mauzūñ hai. (Yūhannā 7:6)

► *Mauzūñ waqt kā kyā matlab hai?*

Īsā Masīh hameshā Ḵhudā Bāp kī marzī ke mutābiq chaltā thā. Us waqt Ḵhudā Bāp nahīn chāhtā thā ki wuh jāe.

Us ne farmāyā,

Lekin tum jā sakte ho, tumhāre lie har waqt mauzūn hai. Duniyā tum se dushmanī nahīn rakh saktī. Lekin mujh se wuh dushmanī rakhtī hai. (Yūhannā 7:6-7)

Us ke ghar wāle duniyāwī soch rakhte the. Wuh khyāl hī nahīn karte the ki ẖhudā kī marzī kyā hai. Islie un ke lie har waqt mauzūn thā. Islie duniyā un se dushmanī nahīn rakhtī thī. Wuh Īsā Masīh se dushmanī rakhtī thī kyonki us kī soch farq thī.

► *Kyā āp Īsā Masīh ko pānā chāhte hai?*

Duniyāwī soch chhoṛ do. Dūsri bāt,

ẖhudā Bāp kī Marzī Karo

Ghar wāle id manāne Yarūshalam chale gae. Lekin kuchh der bād Īsā Masīh ko ẖhudā Bāp se hidāyat mili ki wuh id par jāe. Tab wuh chupke se rawānā huā.

Yarūshalam meñ Yahūdī rāhnumā pahle se us kī tāk meñ baiṭhe the. Buṛbuṛā rahe the, “Wuh ādmī kahān hai?” Ām log bhī āpas meñ phusphusā rahe the. Kuchh us ke haq meñ the, kuchh us ke ẖhilāf. Lekin koī khulkar bāt nahīn kar rahā thā kyonki sab Yahūdī rāhnumāon se ḍarte the.

Id kā ādhā hissā guzar chukā thā to Īsā Masīh Baitul-muqaddas meñ jākar tālīm dene lagā. Use sunkar log hairatzadā hue.

► *Kyon?*

Unhoñ ne kahā, “Yih ādmī kis tarah itnā ilm rakhtā hai hālāñki is ne kahīn se bhī tālīm hāsil nahīn kī!”

► *Īsā Masīh ne jawāb meñ kyā kahā?*

Jo tālīm main detā hūñ wuh merī apnī nahīn balki us kī hai jis ne mujhe bhejā.
(Yūhannā 7:16)

► *Kis ne use bhejā thā?*

Ḳhudā Bāp ne use bhejā thā. Yih kitāboñ se raṭī-raṭāī tālīm nahīñ thī. Yih to sīdhe Ḳhudā Bāp se milī tālīm thī. Īsā Masīh sirf wuh kuchh farmātā aur kartā hai jo Ḳhudā Bāp kī marzī hai.

Ab us ne ek aur chaunkā dene wālī bāt farmāī,

Jo us kī marzī pūrī karne ke lie taiyār hai wuh jān legā ki merī tālīm Allāh kī taraf se hai.
(Yūhannā 7:17)

Īsā Masīh kī tālīm Ḳhudā kī taraf se hai.

► *Ham yih kis tarah jān sakte haiñ?*

Ḳhudā kī marzī karne se. Jo Ḳhudā kī marzī karne ke lie taiyār rahtā hai wuh ekdam jān letā hai ki Īsā Masīh kī tālīm Ḳhudā kī taraf se hai. Yih dushman Ḳhudā kī marzī karne ko taiyār nahīñ the islie wuh rūhānī taur se andhe the. Wuh bas apnī izzat ke pīchhe paṛe rahte the. Islie Īsā Masīh ne farmāyā,

Jo apnī taraf se boltā hai wuh apnī hī izzat chāhtā hai. Lekin jo apne bhejne wāle kī izzat-o-jalāl baṛhāne kī koshish kartā hai wuh sachchā hai aur us meñ nārāstī nahīñ hai. (Yūhannā 7:18)

► *Kyā āp Ḳhudā kī marzī karne ko taiyār rahte haiñ? Kyā āp apnī zindagī se us kī izzat kar rahe haiñ?*

Tab hī āp Īsā Masīh ko pā sakte haiñ. Tīsī bāt,

Jān Lo Kī Masīh Shariāt se Bartar Hai

► *To yih dushman kis nāte se Ḳhudā kī marzī karne ko taiyār nahīñ the?*

Ab Īsā Masīh ne is kā jawāb diyā. Us ne farmāyā,

Kyā Mūsā ne tum ko shariāt nahīñ dī? To phīr tum mujhe qatl karne kī koshish kyon kar rahe ho? (Yūhannā 7:19)

► *Kyā shariāt qatl karne kī ijāzat detī hai?*

Hargiz nahīn. To bhī dushman use qatl karne kī koshish kar rahe the. Wuh Ḳhudā kī marzī nahīn kar rahe the. Isliye wuh sachche nahīn the. Isliye wuh pahchān nahīn sakte the ki Īsā, al-Masīh hai. Sirf sachchā dil use pahchān saktā hai.

Sunane wālon ne kahā, “Tum kisī badrūh kī girift meñ ho. Kaun tumheñ qatl karne kī koshish kar rahā hai?” Hālāñki kam-se-kam rāhnumā zarūr use qatl karne kī koshish kar rahe the.

► *Wuh kyon use qatl karnā chāhte the?*

Kuchh mahīnon pahle us ne Yarūshalam meñ ek mazīr ādmī ko Sabat ke din shafā dī thī. Yahūdī rāhnumā jalkar use qatl karne kī sāzisheñ karne lage the. Īsā Masīh ne farmāyā,

Mainne Sabat ke din ek hī mojizā kiyā aur tum sab hairatzadā hue. Lekin tum bhī Sabat ke din kām karte ho. Tum us din apne bachchoñ kā ḡhatnā karwāte ho. Aur yih rasm Mūsā kī shariāt ke mutābiq hī hai ... Kyonki shariāt ke mutābiq lāzim hai ki bachche kā ḡhatnā āthweñ din karwāyā jāe, aur agar yih din Sabat ho to tum phir bhī apne bachche kā ḡhatnā karwāte ho tāki shariāt ki ḡhilāfwarzī na ho jāe. To phir tum mujh se kyon nārāz ho ki maiñne Sabat ke din ek ādmī ke pūre jism ko shafā dī? (Yūhannā 7:21-23)

Yahūdī ustād ḡhud kahte the ki kuchh kām Sabat ke din kie jā sakte haiñ. ḡhatnā ek aisā kām thā.

Ab ḡhatnā ek chhoṭā-sā kām hai, aur us se insān bahāl nahīn hotā. Is kī nisbat Īsā Masīh ne mazīr insān ko rūhānī aur jismānī taur par bahāl kiyā thā. ḡhatnā insān ko bahāl nahīn kar saktā magar Īsā Masīh yih kar saktā hai. Shariāt insān ko

batātī hai ki use kyā karnā hai. Lekin wuh use bahāl nahīn kar saktī. Isī lie Īsā Masīh duniyā meñ āyā.

► *Kyā āp use pānā chāhte haiñ?*

Jān lo ki wuh shariāt se bartar hai. Chauthī bāt,

Jān Lo Ki Masīh Ḳhudā kā Bhejā Huā Hai

Māzūr kī shafā kā zikr sunte hī Yarūshalām ke kuchh rahne wāle kahne lage, “Kyā yih wuh ādmī nahīn hai jise log qatl karne kī koshish kar rahe haiñ? Tāham wuh yahān khulkar bāt kar rahā hai aur koī bhī use rokne kī koshish nahīn kar rahā. Kyā hamāre rāhnumāon ne haqīqat meñ jān liyā hai ki yih Masīh hai?”

Lekin phir unhoñ ne ḳhud hī yih ḳhyāl rad kiyā: “Jab Masīh āegā to kisī ko bhī mālūm nahīn hogā ki wuh kahān se hai. Yih ādmī farq hai. Ham to jānte haiñ ki yih kahān se hai.”

► *Wuh kyon sochte the ki jab Masīh āegā to kisī ko bhī mālūm nahīn hogā ki wuh kahān se hai?*

Yahūdiyon meñ yih ḳhyāl phail gayā thā ki al-Masīh poshīdagī meñ āegā aur sirf qaum ko chhurāte waqt zāhir ho jāegā. Is binā par log kah rahe the ki ham is bande ko jānte haiñ. Wuh to Galīl se hai. Lihāzā yih al-Masīh ho hī nahīn saktā. Ab dekho ki un se kitnī baṛī ḡhalatī ho rahī thī. Na wuh Īsā Masīh ko jānte the, na yih ki wuh haqīqat meñ kahān se āyā hai. Īsā Masīh ne farmāyā,

Tum mujhe jānte ho aur yih bhī jānte ho ki main kahān se hūñ. Lekin main apnī taraf se nahīn āyā. Jis ne mujhe bhejā hai wuh sachchā hai aur use tum nahīn jānte. Lekin main use jāntā hūñ, kyonki main us kī taraf se hūñ aur us ne mujhe bhejā hai.

(Yūhannā 7:28-29)

► *Īsā Masīh apne bāre meñ kyā kah rahā thā?*

Achchhā, tum jānte ho ki main kahān se hūn? Haqīqat meñ tum mujhe nahīn jānte. Kyonki mujhe ẖudā Bāp se bhejā gayā hai jo tum nahīn jānte.

Yih log is par faḡhr karte the ki hameñ Mūsā se shariāt mili hai aur islie ham sachche ẖudā ko jānte haiñ. Lekin is meñ un se ḡhalatī ho rahī thī. Wuh andhe the. Wuh nahīn jānte the ki Īsā Masīh najāt dene āyā hai. Kitne afsos kī bāt.

► *Mere dost, kyā āp ẖudā kī qurbat ke lie taraste haiñ? Kyā āp us kī nazar meñ manzūr honā chāhte haiñ?*

Phir us par imān lāo jise ẖudā Bāp ne bhejā hai. Īsā Masīh par. Āḡhiri bāt,

Tab hī Masīh ko Pāoge

Jab rāhnumāon ne dekhā ki hujūm meñ aisī bāteñ ho rahī haiñ to unhoñ ne Baitul-muqaddas ke pahredār Īsā Masīh ko pakaḡne ke lie bheje.

Lekin Īsā Masīh ne kahā,

Main sirf thoḡī der aur tumhāre sāth rahūngā, phir main us ke pās wāpas chalā jāūngā jis ne mujhe bhejā hai. Us waqt tum mujhe ḡhūḡoge magar nahīn pāoge, kyonki jahān main hūn wahān tum nahīn ā sakte. (Yūhannā 7:33-34)

► *Wuh kyā kahnā chāhtā hai?*

Thoḡī der bād main ẖudā Bāp ke pās wāpas lauṡūngā. Tab tum mujhe ḡhūḡoge magar nahīn pāoge.

► *Kyon?*

- Wuh duniyā kī soch rakhte the.
- Wuh ẖudā Bāp kī marzī nahīn karte the.
- Wuh nahīn pahchānte the ki Masīh meñ ek āyā hai jo shariāt se bartar hai.
- Wuh nahīn pahchānte the ki Masīh ẖudā kā bhejā huā hai.

► *Kyā āpne use pā liyā hai?*

Injil, Yūhannā 7:1-36

Is ke bād Īsā ne Galīl ke ilāqe meñ idhar-udhar safr kiyā. Wuh Yahūdīyā meñ phirnā nahīn chāhtā thā kyonki wahān ke Yahūdī use qatl karne kā mauqā dhūnd̥ rahe the. Lekin jab Yahūdī id banām Jhoñparīyon ki Īd qarīb āi to us ke bhāiyon ne us se kahā, “Yih jagah chhoṛkar Yahūdīyā chalā jā tāki tere pairokār bhī wuh mojize dekh leñ jo tū kartā hai. Jo shaḅhs chāhtā hai ki awām use jāne wuh poshidagī meñ kām nahīn kartā. Agar tū is qism kā mojiẓānā kām kartā hai to apne āp ko duniyā par zāhir kar.” (Asl meñ Īsā ke bhāi bhī us par imān nahīn rakhte the.)

Īsā ne unheñ batāyā, “Abhī wuh waqt nahīn āyā jo mere lie mauzūn hai. Lekin tum jā sakte ho, tumhāre lie har waqt mauzūn hai. Duniyā tum se dushmanī nahīn rakh saktī. Lekin mujh se wuh dushmanī rakhti hai, kyonki main us ke bāre meñ yih gawāhī detā hūn ki us ke kām bure haiñ. Tum ḅhud id par jāo. Main nahīn jāūngā, kyonki abhī wuh waqt nahīn āyā jo mere lie mauzūn hai.” Yih kahkar wuh Galīl meñ ṭhahrā rahā.

Lekin bād meñ, jab us ke bhāi id par jā chuke the to wuh bhī gayā, agarche alāniyā nahīn balki ḅhufiyā taur par. Yahūdī id ke mauqe par use talāsh kar rahe the. Wuh pūchhte rahe, “Wuh ādmī kahān hai?”

Hujūm meñ se kāi log Īsā ke bāre meñ buṛbuṛā rahe the. Bāz ne kahā, “Wuh achchhā bandā hai.” Lekin dūsron ne etarāz kiyā, “Nahīn, wuh awām ko bahkātā hai.” Lekin kisī ne bhī us ke bāre meñ khulkar bāt na kī, kyonki wuh Yahūdīyon se ḅarte the.

Īd kā ādhā hissā guzar chukā thā jab Īsā Baitul-muqaddas meñ jākar tālīm dene lagā. Use sunkar

Yahūdī hairatzadā hue aur kahā, “Yih ādmī kis tarah itnā ilm rakhtā hai hālānki is ne kahīn se bhī tālim hāsīl nahīn kī!”

Īsā ne jawāb diyā, “Jo tālim main detā hūn wuh merī apnī nahīn balki us kī hai jis ne mujhe bhejā. Jo us kī marzī pūrī karne ke lie taiyār hai wuh jān legā ki merī tālim Allāh kī taraf se hai yā ki merī apnī taraf se. Jo apnī taraf se boltā hai wuh apnī hī izzat chāhtā hai. Lekin jo apne bhejne wāle kī izzat-o-jalāl baḥhāne kī koshish kartā hai wuh sachchā hai aur us meñ nārāstī nahīn hai. Kyā Mūsā ne tum ko shariāt nahīn dī? To phir tum mujhe qatl karne kī koshish kyon kar rahe ho?”

Hujūm ne jawāb diyā, “Tum kisī badrūh kī girift meñ ho. Kaun tumheñ qatl karne kī koshish kar rahā hai?”

Īsā ne un se kahā, “Mainne Sabat ke din ek hī mojizā kiyā aur tum sab hairatzadā hue. Lekin tum bhī Sabat ke din kām karte ho. Tum us din apne bachchoñ kā ḵhatnā karwāte ho. Aur yih rasm Mūsā kī shariāt ke mutābiq hī hai, agarche yih Mūsā se nahīn balki hamāre bāpdādā Ibrāhīm, Is’hāq aur Yāqūb se shurū huī. Kyonki shariāt ke mutābiq lāzim hai ki bachche kā ḵhatnā āṭhweñ din karwāyā jāe, aur agar yih din Sabat ho to tum phir bhī apne bachche kā ḵhatnā karwāte ho tāki shariāt kī ḵhilāfwarzī na ho jāe. To phir tum mujh se kyon nārāz ho ki mainne Sabat ke din ek ādmī ke pūre jism ko shafā dī? Zāhirī sūrat kī binā par faislā na karo balki bātini hālat pahchānkar muñsifānā faislā karo.”

Us waqt Yarūshalam ke kuchh rahne wāle kahne lage, “Kyā yih wuh ādmī nahīn hai jise log qatl karne kī koshish kar rahe haiñ? Tāham wuh yahān khulkar bāt kar rahā hai aur koī bhī use rokne kī koshish nahīn kar rahā. Kyā hamāre rāhnumāoñ ne haqīqat meñ jān liyā

hai ki yih Masīh hai? Lekin jab Masīh āegā to kisī ko bhī mālūm nahīn hogā ki wuh kahān se hai. Yih ādmī farq hai. Ham to jānte haiñ ki yih kahān se hai.”

Īsā Baitul-muqaddas meñ tālīm de rahā thā. Ab wuh pukār uthā, “Tum mujhe jānte ho aur yih bhī jānte ho ki maiñ kahān se hūñ. Lekin maiñ apnī taraf se nahīn āyā. Jis ne mujhe bhejā hai wuh sachchā hai aur use tum nahīn jānte. Lekin maiñ use jāntā hūñ, kyonki maiñ us kī taraf se hūñ aur us ne mujhe bhejā hai.”

Tab unhoñ ne use giriftār karne kī koshish kī. Lekin koī bhī us ko hāth na lagā sakā, kyonki abhī us kā waqt nahīn āyā thā. To bhī hujūm ke kā log us par imān lāe, kyonki unhoñ ne kahā, “Jab Masīh āegā to kyā wuh is ādmī se zyādā ilāhī nishān dikhāegā?”

Farīsiyoñ ne dekhā ki hujūm meñ is qism kī bāteñ dhīmī dhīmī āwāz ke sāth phail rahī haiñ. Chunāñche unhoñ ne rāhnumā imāmoñ ke sāth milkar Baitul-muqaddas ke pahredār Īsā ko giriftār karne ke lie bheje. Lekin Īsā ne kahā, “Maiñ sirf thoṛī der aur tumhāre sāth rahūngā, phir maiñ us ke pās wāpas chalā jāūngā jis ne mujhe bhejā hai. Us waqt tum mujhe ḡhūṇḡoge, magar nahīn pāoge, kyonki jahān maiñ hūñ wahān tum nahīn ā sakte.”

Yahūdī āpas meñ kahne lage, “Yih kahān jānā chāhtā hai jahān ham use nahīn pā sakeñge? Kyā wuh bairūn-e-mulk jānā chāhtā hai, wahān jahān hamāre log Yūnāniyoñ meñ bikhri hālat meñ rahte haiñ? Kyā wuh Yūnāniyoñ ko tālīm denā chāhtā hai? Matlab kyā hai jab wuh kahtā hai, ‘Tum mujhe ḡhūṇḡoge magar nahīn pāoge’ aur ‘Jahān maiñ hūñ wahān tum nahīn ā sakte’.”

Jo Piyāsā Ho



Ek din Īsā Masīh Baitul-muqaddas meñ tālīm de rahā thā. Jhoñpariyoñ kī Īd thī. Is īd par log kachchī jhoñpariyoñ meñ rahte the. Yih īd tālīm dene kā achchhā mauqā thā.

► *Tālīm dene kā achchhā mauqā kyon thā?*

Yih bāt samajhne ke lie zarūrī hai ki ham is īd kā buniyādī maqsad samajh leñ.

► *Maqsad kyā thā?*

Fasloñ kī khushī. Is īd par log khushī manāte the ki fasleñ ug āī haiñ. Ab fasl kā khās tālluq bārish se hai. Bārish kam ho to fasl bhī kam hogī. Islie is īd par log duā bhī karte the ki āne wāle sāl meñ bārishēñ pareñ.

Lekin sāth sāth wuh al-Masīh kī āmad bhī yād karte the.

► *Kyon?*

Al-Masīh ke āne kā ek nishān kasrat kā pānī thā. Sadiyoñ pahle peshgoī kī gāī thī ki us waqt Baitul-muqaddas ke nīche se zindagī kā pānī bah niklegā (Zakariyāh 14:8; Hizqiyel 47:1). Tab tamām qaumeñ Jhoñpariyoñ kī Īd manāne Yarūshalam āyā kareñgī (Zakariyāh 14:16).

Ġharz Jhoñpariyoñ kī Īd par log khāskar do bātoñ kī khushī manāte the. Pahle, is sāl fasloñ ko khūb pānī milā hai. Dūsre, ek din hamēñ zindagī kā pānī bhī milegā—us din jab al-Masīh āegā.

► *Īd ke din log kyā karte the?*

Us din imām chashme se pānī lekar Baitul-muqaddas kī qurbāngāh par uñdel detā thā. Sāth sāth log Masīhānā zamāne ke bāre meñ yih peshgoī duhrāte the ki

Tum shādmānī se najāt ke chashmoñ se pānī bharoge. (Yasāyāh 12:3)

Pānī unḍelne se yih yād kiyā jātā thā ki ẖhudā jo pānī detā rahtā hai ek din zindagī kā pānī bhī degā.
 Ab ham wuh kuchh samajh sakte haiñ jo us id par huā. Id ke ākhiri din Īsā Masīh kharā huā aur ūnchī āwāz se pukār uṭhā,

Jo pyāsā ho wuh mere pās āe,
 aur jo mujh par imān lāe wuh pie.
 Kalām-e-muqaddas ke mutābiq ‘us ke andar
 se zindagī ke pānī kī nahreñ bah nikleñgī.’
 (Yūhannā 7:37-38)

- *Īsā Masīh kyā kahnā chāhtā hai?*

Pahli bāt:

Jo Pyāsā Ho

- *Jo pyāsā hai wuh kis chīz ke lie taraptā hai?*

Pānī ke lie.

- *Kyā wuh ām pānī ke lie taraptā hai?*

Nahīñ. Īsā Masīh ām pānī kī bāt nahīñ kar rahā.

- *Phir kyā?*

Yih wuh pānī hai jis ke intazār meñ log the—al-Masīh kā pānī, zindagī kā pānī jo Baitul-muqaddas se bah niklegā. Yih wuh āsmānī pānī hai jo abadī zindagī dilātā hai.

- *Zindagī kā yih pānī kyā hai?*

Yūhannā ẖhud is kā matlab batātā hai,

‘Zindagī ke pānī’ se wuh Rūhul-quds kī taraf ishārā kar rahā thā jo un ko hāsil hotā hai jo Īsā par imān lāte haiñ. Lekin wuh us waqt tak nāzil nahīñ huā thā, kyonki Īsā ab tak apne jalāl ko na pahuñchā thā.
 (Yūhannā 7:39)

- *Yūhannā ke mutābiq zindagī kā pānī kyā hai?*

Yih ām pānī nahīñ hai. Yih pānī Rūhul-quds hai.

- *Lekin Rūhul-quds kyā hai?*

Agle āyāt meñ ham Rūhul-quds ke bāre meñ aur sīkheñge. Yahāñ yih jānanā kāfī hai ki Rūhul-quds zindagī kā yih pānī hai. Rūhul-quds us waqt nāzil nahīñ huā thā. Jab Īsā Masīh ko āsmān par uṭhā liyā gayā tab hī Rūhul-quds nāzil huā.

Rūhul-quds farishtā nahīñ hai. Wuh taslīs meñ shāmil hai. Taslīs kā matlab yih nahīñ ki tīn Ḳhudā haiñ. Ek hī Ḳhudā hai. Bāp Ḳhudā hai, Farzand Ḳhudā hai aur Rūhul-quds Ḳhudā hai. Lekin Ḳhudā meñ yih tīnoñ alag haiñ. Jab ham Īsā Masīh par imān lāte haiñ tab Rūhul-quds hamāre dilon meñ ākar basne lagtā hai. Aur chūñki ek hī Ḳhudā hai islie Rūhul-quds ke āne se Bāp aur Farzand bhī dil meñ ā baste haiñ.

Rūhul-quds se ham Ḳhudā kī maujūdagī se ser ho jāte haiñ. Tab hī hamāre dil us kī muhabbat aur tasallī se bhar jāte hai.

- *Kyā āp pyāse haiñ? Kyā āp us ilāhī serī ke lie tarāpte haiñ jo sirf aur sirf Īsā Masīh Rūhul-quds ke zariye de saktā hai?*
Wuhī hamārī abadī zindagī kī gārāñṭī hai. Dūsarī bāt,

Wuh Mere pās Āe

- *Pyāse ko kyā karnā hai tākī wuh pānī pī sake?*
Īsā Masīh farmātā hai,

Jo pyāsā ho wuh mere pās āe. (Yūhannā 7:39)

America ke kisī registān meñ pānī kā achchhā chashmā wāqe hai. Ek din mālūm huā ki qarīb hī kisī aurat kī sūkhī huī lāsh paṛī hai. Us ke pās ek kāghaz thā. Us par likhā thā, “Hāy! Pānī chāhie, pānī! Main pyās se mar rahī hūñ.” Afsos, do mīl āge chashmā thā jis meñ pānī ubal rahā thā. Kitnī alamnāk bāt. Wuh pānī ke qarīb hī mar gaī thī.

- *Mere dost, kyā āp pyāse haiñ?*
Chashme ke pās āo. Wuh qarīb hī hai. Registān meñ mat rahnā. Zindagī kā pānī dastyāb hai. Yih wuh pānī hai

jo ẖhudā kī taraf se nikaltā hai. Yih wuh pānī hai jis se hameñ hameshā kī zindagī miltī hai.

Kitne log duniyā meñ rahte hue murde haiñ.

► *Kis tarah?*

Yon ki wuh zindagī ke pānī ke pās nahīñ āe haiñ. Shāyad un ke pās daulat ho. Lekin na ẖhudā kī muhabbat, na us kī bharpūr ẖhushī yā tasallī un ke dilon meñ bastī hai. Islie wuh zindā hālat meñ murde haiñ.

► *Kyā āp zindagī ke pānī ke pyāse haiñ?*

Us ke pās āo. Tīsri bāt,

Jo Īmān Lāe

Pyāsā honā zarūrī hai. Lekin jo chashme ke pās na āe wuh pyāsā rahtā hai. Aur jo us ke pās āe us ke lie zarūrī hai ki wuh Īmān lāe.

Unnīsīwīn sadī meñ ek jahāz banām Royal Charter, Australia se rawānā hokar England ke qarīb pahuñchā. ẖhabr āī to musāfiron ke azīz bandargāh meñ jahāz kā intazār karne lage. Lekin wuh kabhī na pahuñchā. Thoṛī dūrī par wuh tūfān meñ tabāh huā. Taqrīban 450 musāfir ḍūb gae. Jab kisī kī bīwī ko batāyā gayā ki shauhar nahīñ bachā to wuh chīkh uṭhī, “Hāy, ghar ke itne qarīb aur phir bhī tabāh!”

Mere azīz, jo al-Masīh ke qarīb ātā hai lekin Īmān nahīñ lātā wuh us murde kī mānind hai. Us ke bāre meñ kahā jā saktā hai, “Ghar ke itne qarīb aur phir bhī tabāh!”

Do-chār musāfir tairte tairte sāhil par pahuñch gae. Kuchh musāfiron ne Australia meñ sonā hāsīl kiyā thā, aur unhon ne yih sonā jism se bāndhkar bachne kī koshish kī. Lekin afsos—sonā itnā bhārī thā ki wuh tair na sake aur ḍūb mare. Jab āp al-Masīh ke pās āte haiñ to use kuchh nahīñ dikhā sakte. Āp ẖhālī apne āp ko us ke supurd kar sakte haiñ. Na sonā na koī nek kām āp ko bachāegā. Īmān kā yahī matlab hai ki ham ẖhālī apne āp ko us ke supurd karen aur use batāen, “Ai mere āqā, main ā gayā hūñ. Mere pās kuchh

nahīn hai jo mujhe mañzūr karā sake. Na daulat na achchhā kirdār na nek kām. Lekin terā hī fazal kāfī hai. Najāt kā wuh kām kāfī hai jo tūne merī khatir kiyā hai. Tū hī mujhe qabūl kar. Mujhe apne pānī se ser kar.”

Chauthī bāt,

Wuh Pie

Ab hamen pyās mahsūs huī hai. Ham khalī hāth us ke pās āe haiñ. Ham us par imān lāe haiñ.

► *Ab kyā?*

Ab ham pī sakte haiñ.

► *Kyā pī sakte haiñ?*

Zindagī kā pānī. Tab Rūhul-quds hamāre andar basegā aur ham ser ho jāenge.

Gharz, chār chizen darkār haiñ: pyās, us ke pās ānā, imān lānā aur pīnā.

Tab Pānī kī Nahren Bah Nikleñgī

Īsā Masīh farmātā hai ki pāk nawishton ke mutābiq us ke andar se pānī kī nahren bah nikleñgī.

► *Is kā kyā matlab hai?*

Nabiyon ne peshgoī kī thī ki al-Masīh ke āne par Yarūshalam se pānī kī nahren bah nikleñgī. Aur yih kḥās pānī hogā. Yih zindagī kā pānī hogā. Abadī zindagī baḥshshne wālā pānī. Ab Īsā Masīh farmā rahā hai ki mujh se hī pānī kī yih nahren bah nikleñgī. Maiñ hī zindagī kā sarchashmā hūñ. Yahī wajah hai ki pyāse us ke pās āte haiñ. Us par imān lāte haiñ. Us kā pānī pīte haiñ. Aur jab ham kḥūb pānī pīte haiñ to ham se bhī pānī nikaltā hai.

► *Kis tarah?*

Jab ham Rūhul-quds se ser ho jāte haiñ to wuh hamāre andar se bahne lagtā hai.

► *Is kā kyā matlab hai?*

- Jab Rūhul-quds kā pānī hamen sīnchtā hai to hamāre maile dil dhoe jāte haiñ.

- Jab Rūhul-quds kā pānī hameñ sīnchtā hai to ham us kī pākīzagī se bhar jāte haiñ.
- Jab Rūhul-quds kā pānī hameñ sīnchtā hai to ham rūhānī phal lāte haiñ.
- Jab Rūhul-quds kā pānī hameñ sīnchtā hai to dūsre hamāre phal se barkat pāte haiñ.
- Jab Rūhul-quds kā pānī hameñ sīnchtā hai to hamārī āsmānī manzil yaqīnī hai.

Mañzūr Yā Mardūd?

► *Jo log yih bāteñ sun rahe the kyā wuh khush hue?*

Nahīñ. Wuh ek bār phir bahs-mubāhasā karne lage ki kyā yih sachmuch al-Masīh hai?

Yon un meñ phūṭ paṛ gaī. Kuchh use pakarṇe kī koshish karne lage. Mazhabī rāhnumāon ne bhī pahredār bhej die the tāki use pakṛeñ. Lekin pahredār us ke kalām se itne muta’assir hue ki khālī hāth wāpas āe.

Īsā Masīh ke bāre meñ hameshā phūṭ paṛtī hai. Kuchh use qabūl karte haiñ aur kuchh use rad karte haiñ.

► *Sawāl yih hai ki ham ne kyā kiyā? Kyā ham ne use qabūl kiyā hai? Kyā ham pyāse hokar us ke pās āe haiñ. Kyā ham ne imān lākar zindagī kā yih pānī pī liyā hai?*

Injil, Yūhannā 7:37-52

Īd ke ākhirī din jo sab se ahm hai Īsā kharā huā aur ūñchī āwāz se pukār uṭhā, “Jo pyāsā ho wuh mere pās āe, aur jo mujh par imān lāe wuh pie. Kalām-e-muqaddas ke mutābiq ‘us ke andar se zindagī ke pānī kī nahreñ bah nikleñgī.’” (“Zindagī ke pānī’ se wuh Rūhul-quds kī taraf ishārā kar rahā thā jo un ko hāsil hotā hai jo Īsā par imān lāte haiñ. Lekin wuh us waqt tak nāzil nahīñ huā thā, kyonki Īsā ab tak apne jalāl ko na pahuñchā thā.)

Īsā kī yih bāteñ sunkar hujūm ke kuchh logoñ ne kahā, “Yih ādmī wāqāi wuh nabī hai jis ke intazār meñ ham haiñ.”

Dūsroñ ne kahā, “Yih Masīh hai.”

Lekin bāz ne etarāz kiyā, “Masīh Galīl se kis tarah ā saktā hai! Pāk Kalām to bayān kartā hai ki Masīh Dāūd ke ḵhāndān aur Bait-laham se āegā, us gāñw se jahān Dāūd bādshāh paidā huā.” Yoñ Īsā kī wajah se logoñ meñ phūṭ paṛ gai. Kuchh to use giriftār karnā chāhte the, lekin koī bhī us ko hāth na lagā sakā.

Itne meñ Baitul-muqaddas ke pahredār rāhnumā imāmoñ aur Farīsiyoñ ke pās wāpas āe. Wuh Īsā ko lekar nahīn āe the, islie rāhnumāoñ ne pūchhā, “Tum use kyoñ nahīn lāe?”

Pahredāroñ ne jawāb diyā, “Kisī ne kabhī is ādmī kī tarah bāt nahīn kī.”

Farīsiyoñ ne tañzan kahā, “Kyā tum ko bhī bahkā diyā gayā hai? Kyā rāhnumāoñ yā Farīsiyoñ meñ koī hai jo us par imān lāyā ho? Koī bhī nahīn! Lekin shariāt se nāwāqif yih hujūm lānatī hai!”

In rāhnumāoñ meñ Nikudemus bhī shāmīl thā jo kuchh der pahle Īsā ke pās gayā thā. Ab wuh bol uṭhā, “Kyā hamārī shariāt kisī par yoñ faislā dene kī ijāzat detī hai? Nahīn, lāzim hai ki use pahle adālat meñ pesh kiyā jāe tāki mālūm ho jāe ki us se kyā kuchh sarzad huā hai.”

Dūsroñ ne etarāz kiyā, “Kyā tum bhī Galīl ke rahne wāle ho? Kalām-e-muqaddas meñ taftīsh karke ḵhud dekh lo ki Galīl se koī nabī nahīn āegā.” Yih kahkar har ek apne apne ghar chalā gayā.

Pakarā Gayā



Ek din Īsā Masīh pau phaṭṭe hī Baitul-muqaddas meñ ā pahuñchā.

► *Baitul-muqaddas kyā thā?*

Baitul-muqaddas Yarūshalam meñ wuh jagah thī jahāñ Yahūdī apnī qurbāniyāñ chaṛhāte the. Kahīñ aur chaṛhāne kī ijāzat nahīñ thī. Wahāñ wuh qurbāniyāñ chaṛhāne pūrī duniyā se āte the. Us zamāne meñ yih shāndār imārat duniyā ke ajūboñ meñ ginī jāti thī. Āj us jagah par masjid al-aqsā kī sunahrī guñbad dhūp meñ chamaktī-damaktī hai.

► *Al-Masīh kā wahāñ āne kā kyā maqsad thā? Kyā wuh qurbāniyāñ chaṛhānā chāhtā thā? Yā mojize dikhāne āyā thā?*

Nahīñ. Wuh baiṭhkar logoñ ko tālīm dene lagā. Us zamāne meñ ustād baiṭhtā thā jabki sunane wāle khare rahte the.

► *Wuh logoñ ko tālīm kyon dene lagā?*

Log khoī huī bheṛoñ jaise the jo bhūle-bhaṭke phir rahe the. Yih dekhkar use un par tars ātā thā. Wuh jo sachchā charwāhā thā wuh unheñ jannat kā rāstā dikhānā chāhtā thā. Māmūl ke mutābiq jyon hī us ne apnā muñh kholā log dauṛkar us ke gird jamā hue aur bare maze se sunane lage.

Bā-iḡhtiyār Kalām

Īsā Masīh school kā ām teacher nahīñ thā. Us kī bāteñ sun sunkar un kī āñkheñ phaṭī kī phaṭī rah jāti thīñ. Wuh raṭī-raṭāi bāteñ nahīñ batātā thā. Wuh bare iḡhtiyār ke sāth bāt kartā thā, kyonki us ke farmān sīdhe Ḳhudā ke farmān the.

Ām ustād tālāb kā bāsī pānī nikālkar apne cheloñ meñ bāñ detā hai. Īsā Masīh farq thā. Wuh Kalām kā āsmānī bij bokar āsmānī chashme ke ubalte pānī se us kī siñchāī kartā thā. Us ke Kalām se rūhānī zindagī ugkar phaltī-phūltī hai. Yih kalām sīdhā dil meñ jā bastā hai jahāñ wuh sunane wāle kī pūrī zindagī ulaṭ-palaṭ kar ḍāltā hai.

Ek Chāl

Achānak khalbalī mach gaī. Sharīat ke kuchh ālim ek aurat ghasīṭkar un ke bīch meñ ā dhamke. Ijāzat māñge baḡhair unhoñ ne aurat ko ustād ko pesh karke kahā, “Ustād, is aurat ko zinā karte waqt pakṛā gayā hai.”

Be-chārī aurat! Wuh thartharātī huī un ke bīch meñ khaṛī rahī. Wuh jāntī thī ki zinā kī sazā maut hai.

► *Lekin ruko, ruko! Ek hī insān se zinā kab se hotī hai?*

Wuh ādmī kahāñ thā jis ne zinā kī thī? Kyā sirf aurat ko pakṛā gayā thā? Sharīat ke mutābiq mard aur aurat donoñ hī sazā-e-maut lāyq haiñ (Tauret, Istisnā 22:22).

► *Aur yih ālim, aurat ko yahāñ kyon lāe? Kyā aise māmaloñ ke lie Yahūdī adālateñ nahīñ thīñ?*

Zarūr. Dāl meñ kuchh kālā thā. Haqīqat yih hai: Aurat kā gunāh sirf bahānā thā. Aslī maqsad ek aur thā. Yih ki ustād ko pakṛā jāe.

► *Wuh use kis tarah phaṅsānā chāhte the?*

Unhoñ ne kahā, “Mūsā ne sharīat meñ hameñ hukm diyā hai ki aise logoñ ko sangsār karnā hai. Āp kyā kahte haiñ?”

► *Sangsār karne kā kyā tarīq-e-kār thā?*

Mujrim ko zamīn par paṭakhkar pattharoñ se mār ḍālā jātā thā. Lāzim thā ki gunāh ke gawāh pahle patthar māreñ (Tauret, Istisnā 17:7).

Bachne kā Rāstā hī Nahīñ

Yih ālim bahut chālāk the. Wuh to jānte the ki Īsā Masīh nihāyat rahmdil hai. Wuh pahle se nārāz the ki wuh

gunāhgāron se milā kartā hai. Hālānki un ke gunāh use bahut taklif dete the. K̄hud to wuh pūrī tarah pāk thā, islie har gunāh use kānte kī tarah chubhtā thā. Lekin use is duniyā meñ bhejā gayā thā ki gunāhgāron ko najāt de. Jis tarah likhā hai,

Allāh ne apne Farzand ko islie duniyā meñ nahīn bhejā ki wuh duniyā ko mujrim ṭahrāe balki islie ki wuh use najāt de. (Yūhannā 3:17)

Ālimon kā andāzā yih thā: Ustād is gunāhgār aurat ko māf karegā. Tab ham use mulzim ṭahrā sakeñge. Ham kah sakeñge ki yih kufr bak rahā hai. Yih kahtā hai ki shariāt kī bāteñ nahīn mānanī haiñ.

Ek aur bāt bhī hai. Wuh jānte the ki agar ustād farmāe ki aurat ko sazā do to bhī phaṅs jāegā. Romiyon kā mulk par qabzā thā, aur wuhī sazā-e-maut dete the. Agar ustād aurat ko sazā-e-maut lāyq ṭahrāe to Romī use pakreñge.

Wuh Pahlā Patthar Māre

Ab dhyān den ki Īsā Masīh ne kyā kiyā. Jise ilāhī iḥtiyār hotā hai wuh har mauqe par bāt nahīn kartā. Kabhī kabhī use k̄hāmosh bhī rahnā paṛtā hai. Is mauqe par Īsā Masīh k̄hāmosh rahā. K̄hāmosh rahnā bhī ek qism kā jawāb hotā hai.

► *Sāth sāth us ne kyā kiyā?*

Jo us ne kiyā wuh kuchh ajīb-sā lag rahā thā. Wuh jhukkar apnī ungli se zamīn par likhne lagā. Ham nahīn jānte ki us ne kyā likhā. Lekin ek bāt sāf hai: Wuh wuhī jawāb dene ko taiyār nahīn thā jo ālim us se māñg rahe the.

Ālim chaunk uṭhe. Is se kām nahīn banegā. Āk̄hir use koī jawāb to denā hī hai! Wuh ḍaṭkar sawāl kā jawāb māñgte rahe.

Tab Īsā Masīh khaṛā hokar bolā, “Tum meñ se jis ne kabhī gunāh nahīn kiyā, wuh pahlā patthar māre.”

Wuh phir jhukkar zamīn par likhne lagā.

Pakṛā Gayā

Kitnā ajīb mañzar! Yih ālim logoñ ko pakṛne meñ bahut māhir the. Pahle unhoñ ne aurat ko pakṛ liyā thā, aur ab wuh Īsā Masīh ko bhī pakṛne par tule hue the. Lekin yahāñ is ke ulaṭ huā: Unhiñ ko pakṛā gayā.

Pahle sab kī āñkheñ aurat aur us ke gunāh par lagī thiñ. Ab achānak har ek ko us ke apne gunāh mahsūs hue.

Pakṛne wāloñ ko ḳhud pakṛā gayā.

Ālimoñ kī soch ham sab kī soch hai. Ham sab pakṛne wāle hote haiñ. Kisī ko pakṛā jāe chāhe us kī ḡhalatī māmūlī-sī kyoñ na ho to ham ekdam baṛā mazā uṭhāte haiñ. Sab ke sab use moṭī moṭī ḡaliyāñ dete haiñ. Magar Īsā Masīh ke huzūr ek buniyādī bāt zāhir ho jāti hai—ham sab ko Ḳhudā se pakṛā gayā hai. Gunāh meñ ham sab barābar hote haiñ. Ham sab ke sab is lāyq nahīñ ki Ḳhudā ke huzūr āeñ.

Kyā Mujhe Sachchī Māfi Milī Hai?

Ab dhīre dhīre ālim ek ek karke wahāñ se khisak gae, pahle buzurg, phir bāqī sab. Aurat ko unhoñ ne wahīñ chhoṛ diyā. Ālimoñ kī chāl jawāb de gai thī.

Ab jo ustād ko pakṛnā chāhte the unhiñ ko pakṛā gayā. Apne gunāhoñ meñ pakṛe gae. Is kalām kī tez raushnī meñ wuh apne gunāhoñ ko mahsūs karte haiñ. Lekin is se pahle ki un ke gunāh khul-e-ām ho jāeñ wuh bhāḡ jāte haiñ.

► *Aur aurat? Us kā kyā huā?*

Īsā Masīh ne khaṛe hokar kahā, “Ai aurat, wuh sab kahāñ gae? Kyā kisī ne tujh par fatwā nahīñ lagāyā?”

Aurat ne jawāb diyā, “Nahīñ Ḳhudāwand.”

Ustād ne kahā, “Main bhī tujh par fatwā nahīñ lagātā. Jā, āindā gunāh na karnā.”

Dekho, ālim aur aurat gunāh meñ barābar the. Yih bhī gunāhgār thī aur wuh bhī. Lekin ek farq thā.

► *Wuh kyā?*

Ālim apne gunāhoñ meñ uljhe rahe jabki aurat ko māfi mili. Ālim apne gunāhoñ ko taslīm nahiñ kar sakte the islie wuh māfi mile baġhair bhāg gae. Aurat ko māfi mili aur us kā dil halkā huā.

Māfi se Tabdili

- *Kyā āp ke khyāl meñ aurat is ke bād dubārā zinā karne meñ juṭ gai?*

Kalām hamēñ is ke bāre meñ kuchh nahiñ batātā. Lekin mujhe yaqīn hai ki ustād ke kalām se wuh tabdil huī aur sahī rāste par ā gai.

- *Kyon?*

Wuh use Ḳhudāwand kahtī hai. Īsā Masīh us kā Ḳhudāwand ban gayā, us kā mālīk. Ab se us kī zindagī us ke hāth meñ thī. Us kī hukūmat ke taht thī. Is hukūmat ke taht wuh pahli bār haqīqī mānoñ meñ āzād thī. Is āzādī kī khushī ke māre use apnī purānī zindagī se ghin āī aur wuh sahī rāh par āī.

Jo Īsā Masīh se tabdil ho jātā hai use apnī purānī zindagī se ghin ātī hai aur wuh rāh-e-mustaqīm par ā jātā hai.

Injil aur Shariāt meñ Farq

Is se Injil aur shariāt meñ farq bhī patā chaltā hai.

Ḳhudā ne shariāt nāzil kī tāki insān ko ḍhāñchā mile, ek qānūn jis se ek dūsre ke sāth tālluqāt mahfūz raheñ. Shariāt kā ek zarūrī hissā sazā bhī hai. Shariāt hī hamēñ batātī hai ki ai insān tujh se gunāh huā hai. Aur shariāt hī hamēñ sazā detī hai jab ham se gunāh hotā hai.

Shariāt insān ko pakaṛkar sazā detī hai jabki Īsā Masīh use māfi dekar gunāh kī ġhulāmī se āzād kar detā hai.

Yahī Injil kī khushkhabrī hai.

Masīh nahiñ chāhtā ki ham gunāh ke ġhulām raheñ. Wuh hamēñ is ġhulāmī se āzād karnā chāhtā hai. Jab hamēñ yih āzādī hāsil ho to hamēñ na sirf māfi miltī hai balki ham gunāh karnā hī nahiñ chāhte. Ham Īsā Masīh ke dāman ko

thāme hue dil kī gahrāiyon se sahī rāste par rahnā chāhte haiñ.

Merā Kyā Jawāb Hai?

- *Ab sawāl yih hai: Kyā ham ālimon kī tarah Īsā Masīh ke huzūr se bhāg jāenge? Yā aurat kī tarah apne gunāhon ko mānkar māfī pāenge? Kyā ham gunāh kī zanjiron meñ jakre raheñge yā Injil kī āzādī ke sāth zindagī guzāreñge?*

Injil, Yūhannā 8:1-11

Īsā khud zaitūn ke pahār par chalā gayā. Agle din pau phatte waqt wuh dubārā Baitul-muqaddas meñ āyā. Wahāñ sab log us ke gird jamā hue aur wuh baiṭhkar unheñ tālīm dene lagā. Is daurān shariāt ke ulamā aur Farīsī ek aurat ko lekar āe jise zinā karte waqt pakṛā gayā thā. Use bich meñ kharā karke unhoñ ne Īsā se kahā, “Ustād, is aurat ko zinā karte waqt pakṛā gayā hai. Mūsā ne shariāt meñ hameñ hukm diyā hai ki aise logon ko sangsār karnā hai. Āp kyā kahte haiñ?”

Is sawāl se wuh use phaṁsānā chāhte the tāki us par ilzām lagāne kā koī bahānā un ke hāth ā jāe. Lekin Īsā jhuk gayā aur apnī unglī se zamīn par likhne lagā.

Jab wuh us se jawāb kā taqāzā karte rahe to wuh kharā hokar un se muḥhātib huā, “Tum meñ se jis ne kabhī gunāh nahīn kiyā, wuh pahlā patthar māre.” Phir wuh dubārā jhukkar zamīn par likhne lagā.


Yih jawāb sunkar ilzām lagāne wāle yake-bād-digare wahāñ se khisak gae, pahle buzurg, phir bāqī sab.

Āḡhirkār Īsā aur darmiyān meñ kharī wuh aurat akele rah gae. Phir us ne kharē hokar kahā, “Ai aurat, wuh sab kahān gae? Kyā kisī ne tujh par fatwā nahīn lagāyā?”

Aurat ne jawāb diyā, “Nahīn Ḳhudāwand.”

Īsā ne kahā, “Main bhī tujh par fatwā nahīn lagātā. Jā, āindā gunāh na karnā.”

Sacchā Shāgird



Jhonpariyon kī Īd thī. Is īd par log faslon kī khushī manāte the, yih kī Ḳhudā ne bārish barsākar fasleñ paidā kī haiñ. Sāth sāth wuh yād karte the ki ek din al-Masīh ākar sab kuchh bahāl karegā. Us waqt Baitul-muqaddas ke nīche se pānī bah niklegā. Islie Īsā Masīh ne isī īd par khare hokar farmāyā thā ki jo pyāsā ho wuh mere pās āe, aur jo mujh par imān lāe wuh pie. Tab us ke andar se zindagī ke pānī kī nahreñ bah nikleñgī. Is se wuh sāf kah rahā thā ki main hī al-Masīh hūñ, aur mujh par imān lākar tumheñ abadī zindagī milegī.

► *Jis ne abadī zindagī kā pānī pī liyā hai wuh kyā hai?*

Wuh Īsā Masīh kā shāgird hai. Lekin shāgird hone kā kyā matlab hai? Īsā Masīh ko jhūṭhe shāgirdon meñ koī dilchaspī nahīn hai. Wuh sachche shāgird chāhtā hai. Yahī wajah hai ki ab us ne sachche shāgird kā mazmūn chheṛā. Pahlī bāt,

Shāgird ko Zindagī kā Nūr Hāsil Hai

Jhonpariyon kī Īd kā ek nishān pānī thā. Dūsrā nishān raushnī thī. Rāt ke waqt Baitul-muqaddas meñ baṛe baṛe charāghdān jalāe jāte the. In kī raushnī meñ Yarūshalam shahr kā konā konā chamaktā-damaktā thā. Īd ke daurān imāndār pūrī rāt Baitul-muqaddas meñ khushī manāte the.

► *Charāghdānon ke pīchhe kyā khyāl thā?*

Raushnī Ḳhudā ke nūr kī taraf ishārā hai. Jo Ḳhudā ke nūr meñ chaltā hai wuh sahī rāh pakaṛ letā hai. Na sirf yih balki pānī kī tarah yih raushnī us nūr kī taraf ishārā thī jo al-Masīh lāegā. Yon Zakariyāh Nabī ne peshgoī kī thī,

Na din hogā aur na rāt balki shām ko bhī
raushnī hogī. (Zakariyāh 14:7)

Matlab hai al-Masīh ke āne par rāt bhī raushan hogī.
Kyonki wuh nūr kā sarchashmā hogā.

Is id par Īsā Masīh kah chukā thā ki main zindagī ke pānī kā
sarchashmā hūn. Ab us ne khare hokar farmāyā,

Duniyā kā nūr main hūn. Jo merī pairawī
kare wuh tārikī meñ nahīn chalegā, kyonki use
zindagī kā nūr hāsil hogā. (Yūhannā 8:12)

► *Kaun duniyā kā nūr hai?*

Īsā Masīh.

► *Īsā Masīh ne is id par yih bāt kyon farmāi?*

Pānī kī tarah nūr al-Masīh kā nishān hai.

► *Duniyā kā yih nūr hameñ kyā dilātā hai?*

- Nūr rāste ko raushan kar detā hai. Tab ham duniyā
kī tārikī meñ nahīn chaleñge. Ham najāt ke rāste par
chaleñge.
- Nūr zindagī dilātā hai. Raushnī ke baǵhair paudhā
murjhā jātā hai. Raushnī ke baǵhair insān bhī āhistā
āhistā khatm ho jātā hai. Isī tarah nūr hameñ rūhānī
zindagī dilātā hai, hameñ thīk manzil tak pahuñchātā
hai, hameñ abadī zindagī dilātā hai.

Ek din kā zikr hai ki ek bij ek sūkhe hue kuen meñ gir gayā.
Jahān girā wahān tak sūraj kī kirneñ nahīn pahuñchtī thīn.
Phir bhī bij se nāzūk-sā paudhā phūṭ niklā jo āhistā āhistā
kuen ke muñh tak baṛhne lagā. Ām taur par is qism kā
paudhā sirf do-chār inch lañbā ho jātā hai. Lekin raushnī
ko ḍhūndṭe ḍhūndṭe yih paudhā sau foot se zyādā lañbā ho
gayā. Ākhirkār wuh kuen ke muñh aur sūraj kī kirnoñ tak
pahuñch gayā.

► *Is paudhe ko pūrī raushnī aur zindagī kyon milī?*

Islie ki wuh raushnī ke pīchhe paṛā rahā. Najāt kā ek hī rāstā hai: us nūr ke pīchhe chalnā jo Īsā Masīh hai.

► *Kyā ham aisī shiddat se nūr ke pīchhe paṛ gae haiñ?*

Īsā Masīh kā yih dāwā sunkar sunane wāle etarāz karne lage, “Āp to apne bāre meñ gawāhī de rahe haiñ. Aisī gawāhī motabar nahīñ hotī.” Yih etarāz pahle bhī kiyā jā chukā thā (dekhie bāb 5). Us waqt Īsā Masīh ne tafsīl se is kā jawāb diyā thā. Is mauqe par us ne yih farmānā kāfī samjhā ki main aur merā Bāp donoñ is ke motabar gawāh haiñ. Maslā main nahīñ hūñ balki tum. Us ne farmāyā,

Main jāntā hūñ ki main kahāñ se āyā hūñ aur kahāñ ko jā rahā hūñ. Lekin tum ko to mālūm nahīñ ki main kahāñ se āyā hūñ aur kahāñ jā rahā hūñ. (Yūhannā 8:14)

► *Maslā kyā thā?*

Jab sūraj kī kirneñ ham par paṛtī haiñ to ham jān lete haiñ ki yih sūraj se niklī huī haiñ. Ham yih bhī jān lete haiñ ki in se zamīn raushan hokar phal lāti hai. Ilāhī sūraj kā nūr duniyā meñ āyā thā magar in muḥhālifoñ ke dil raushan nahīñ hue the na wuh rūhānī phal lāe the. Afsos!

Īsā Masīh unheñ āgāh karnā chāhtā thā, islie us ne farmāyā ki sirf sachche shāgird ko zindagī kā nūr hāsil hai. Dūsre,

Shāgird Apne Gunāhoñ meñ Nahīñ Maregā

Us ne farmāyā,

Main jā rahā hūñ aur tum mujhe ḍhūñḍ ḍhūñḍkar apne gunāh meñ mar jāoge. Jahāñ main jā rahā hūñ wahāñ tum nahīñ pahuñch sakte. (Yūhannā 8:21)

Aksar log shiddat se al-Masīh kā intazār kareñge, magar be-fāyda. Wuh apne gunāhoñ meñ mar jāeñge.

► *Kis chīz meñ mar jāeñge?*

Apne gunāhoñ meñ.

► *Kyon?*

Īsā Masīh ne salīb par apnī jān dī tāki hamāre gunāh miṭ jāēn. Jo us ke pīchhe ho le us ke gunāh miṭ gae haiñ. Lekin jo use qabūl na kare us ke gunāh hameshā tak raheñge. Islie wuh apne gunāhoñ meñ mar jāegā.

► *Jo apne gunāh meñ mar jātā hai kyā use jannat kī ummīd hai?*

Nahīn. Gunāh insān ko Ḳhudā se dūr rakh detā hai. Sirf Īsā Masīh ke pāk nūr meñ rahne se najāt milegī. Usī meñ rahkar hamāre gunāh dūr ho jāte haiñ. Koī aur hal nahīn.

► *Mere dost, kyā āp ko najāt kā yaqīn hai?*

Bahut-sāre log najāt ko ḍhūndte ḍhūndte halāk ho rahe haiñ.

► *Kyon?*

Islie ki wuh Masīh ke nūr meñ nahīn āe haiñ. Aise logon ko Īsā Masīh farmātā hai ki jahān main jā rahā hūñ wahān tum nahīn pahuñch sakte. Sirf sachchā shāgird apne gunāhoñ meñ nahīn maregā. Lekin sachche shāgird kā ek tīsra nishān hai.

Shāgird Jāntā Hai ki Nūr Kahān Se Hai

Sunane wāloñ ne pūchhā ki āp kaun haiñ?

Us ne farmāyā,

Main wuhī hūñ jo main shurū se hī batātā āyā hūñ. (Yūhannā 8:25)

► *Kyā matlab hai?*

Main apne kām aur kalām se tum par zāhir huā hūñ, phir bhī tum imān nahīn lāe. Īsā Masīh jāntā thā ki tū tū main main karne se bāt nahīn banegī. Jo log imān lānā nahīn chāhte unheñ manwānā be-kār hai. Phir us ne ek bāt farmāi jo samajhne meñ mushkil hai,

Jab tum Ibn-e-Ādam ko ūnche par chaṛhāoge
tab hī tum jān loge ki main wuhī hūn.
(Yūhannā 8:28)

- *Ibn-e-Ādam ko ūnche par chaṛhāne kā kyā matlab hai?*
Ibn-e-Ādam se murād Īsā Masīh hai. Us ke muḵhālīf use
ūnche par yānī salīb par chaṛhāenge. Lekin wuh murdoñ
meñ nahīn rahegā. Wuh jī uṭhkar āsmān par uṭhā liyā
jāegā aur ek din duniyā kī adālat karne ke lie lauṭegā. Us
waqt sab jān leñge ki wuh kaun hai.
- *Wuh kyā jān leñge?*
Masīh farmātā hai, wuh jān leñge ki main wuhī hūn.
- *Is kā kyā matlab hai?*
Jab Ḳhudā ne Mūsā Nabī ko hidāyat dī ki wuh Isrāīliyon
ko Misr se Falastīn le jāe to Mūsā ne pūchhā ki main kyā
kahūñ jab wuh kaheñge ki kis ne tujhe bhej diyā hai, us
kā nām kyā hai? Ḳhudā ne jawāb diyā,

Main jo hūñ so main hūñ. Un se kahnā,
'Main hūñ ne mujhe tumhāre pās bhejā hai.'
(Tauret, Ḳhurūj 3:14)

Isī tarah Ḳhudā ne Yasāyāh Nabī ke wasīle se farmāyā
thā,

Ai Isrāīlī qaum, tum hī mere gawāh ho,
tum hī mere ḳhādīm ho jise mainne chun
liyā tāki tum jān lo, mujh par imān lāo aur
pahchān lo ki main hī hūñ. (Yasāyāh 43:10)

- *Isrāīl kyā pahchān le?*
Ki main hī hūñ.
- *Kyon?*
Har maḳhlūq ke pīchhe wuhī hai. Us ke pīchhe yā ūpar
kuchh nahīn hai. Wuh hai isī lie ham haiñ. Ab Īsā Masīh
ne farmāyā ki main hī hūñ.

► *Is se wuh kyā kahnā chāhtā thā?*

Main jo Farzand hūn Ḳhudā Bāp se bhejā gayā hūn, islie main hī hūn. Ḳhudā Bāp sūraj hai, main us kī raushnī hūn. Islie main sirf wuh kuchh kartā hūn jo Ḳhudā Bāp kī marzī hai. Yih ek bahut azīm bāt hai jo ham mein se koī bhī apne bāre mein nahīn kah saktā.

Us ke muḳhālīf soch-bichār mein paṛ gae kī kyā yih kufr nahīn hai? Lekin bahut-se log us par imān lāe. Sachchā shāgird jāntā hai kī nūr kahān se hai. Wuh jāntā hai kī wuh ‘Main Hūn’ hai. Sachche shāgird kā ek chauthā nishān:

Shāgird Gunāh kī Ġhulāmī se Āzād Hai

Us ne farmāyā,

Agar tum merī tālīm ke tābe rahoge tab hī tum mere sachche shāgird hoge. Phir tum sachchāi ko jān loge aur sachchāi tum ko āzād kar degī.
(Yūhannā 8:31-32)

► *Sachchā shāgird kaun hai?*

Wuh jo Masīh kī tālīm ke tābe rahegā.

► *Tābe rahne kā kyā matlab hai?*

Yih kī shāgird us kī hukūmat ke taht ho. Kī nūr kī kirneñ dīl kā konā konā raushan karen.

► *Sachchā shāgird kyā jān legā?*

Sachchāi ko.

► *So sachchāi ko jānane kā pahlā qadam kyā hai?*

Us kā pahlā qadam nūr ke tābe ho jānā hai. Pahle mujhe yih qabūl karnā hai kī Īsā Masīh merā āqā, merā nūr hai. Tab hī main sachchāi ko jān lūngā. Is ke ulaṭ nahīn ho saktā. Pahle nūr merī zindagī ko raushan kare, tab hī main sachchāi ko jān saktā hūn.

► *Sachchāi ko jān lene ke bād kyā natijā niklegā?*

Sachchāi sachche shāgird ko āzād kar degī.

► *Lekin sachchāi kyā hai?*

Sachchāi ꣳhud Īsā Masīh hai jis meñ ꣳhudā Bāp zāhir huā hai. Wuhī hameñ āzād karegā (dekhie Yūhannā 8:36).

- *Sachchāi kis chīz se āzād karegi?*

Ġhulāmī se.

Yahūdiyyoñ ne etarāz kiyā, “Ham to Ibrāhīm kī aulād haiñ, ham kabhī bhī kisī ke Ġhulām nahīñ rahe. Phir āp kis tarah kah sakte haiñ ki ham āzād ho jāenge?” Yahūdī to is par bahut faᳵhr karte the ki ham Ibrāhīm kī āzād aulād haiñ. Go Romī ham par hukūmat karen to bhī hamārī fitrat āzād hai. Lekin yahāñ Īsā Masīh haqīqī āzādī kī bāt kar rahā thā—rūhānī āzādī kī bāt. Us ne farmāyā,

Jo bhī gunāh kartā hai wuh gunāh kā Ġhulām hai. (Yūhannā 8:34)

- *Kaun rūhānī Ġhulām hotā hai?*

Jo bhī gunāh kartā hai. Kyoñki wuh gunāh kā Ġhulām hai.

- *Kyā koī insān hai jo gunāh nahīñ kartā?*

Ek bhī nahīñ. Is duniyā meñ sirf Īsā Masīh be-gunāh thā. Koī bhī insān nahīñ hai jo apnī hī tāqat se gunāh se dūr rah sake. Ham sab gunāhgār haiñ. Islie ham sab ke sab gunāh ke Ġhulām haiñ. Sirf ek hai jo hameñ āzād kar saktā hai: Īsā Masīh. Īsā Masīh duniyā kā nūr hai. Us kī pāk raushnī meñ insān apnī kisī bhī chīz par faᳵhr nahīñ kar saktā. Har chīz jis par ham faᳵhr karte haiñ is raushnī meñ nāqis sābit hotī hai.

- *To phir ham kis tarah gunāh kī Ġhulāmī se āzād ho sakte haiñ?*
Duniyā ke nūr se jo is duniyā meñ nāzil huā tāki insān ko gunāh se āzād kare.

- *Āzād ho jāne ke lie kyā zarūrī hai?*

Zarūrī hai ki us kā kalām hamāre andar base. Us kā nūr hamāre tārik diloñ ko raushan kare. Yahī us ke tābe rahne kā matlab hai. Yoñ hī sachchā shāgird gunāh kī Ġhulāmī se āzād ho jātā hai. Īsā Masīh ke muᳵhālīf

raushan nahīn hue the. Un kā haqīqī bāp Ibrāhīm nahīn balki Iblīs thā jis ne unheñ tārīkī kī zanjīroñ meñ jakar liyā thā.

Sachche shāgird ke bāre meñ ek ākhirī bāt,

Shāgird Abadī Maut Nahīn Dekhegā

Īsā Masīh ne farmāyā,

Jo bhī mere kalām par amal kartā rahe wuh maut ko kabhī nahīn dekhegā. (Yūhannā 8:51)

Us ke muḡhālīf nārāz hue. Unhoñ ne pūchhā ki yih kis tarah ho saktā hai? “Kyā tum hamāre bāp Ibrāhīm se baṛe ho? Wuh mar gayā, aur nabī bhī mar gae. Tum apne āp ko kyā samajhte ho?”

Īsā Masīh ne jawāb diyā,

Tumhāre bāp Ibrāhīm ne ḡhushī manāī jab use mālūm huā ki wuh merī āmad kā dīn dekhegā, aur wuh use dekhkar masrūr huā.
(Yūhannā 8:56)

► *Us ne ḡhushī kyon manāī?*

Ibrāhīm nabī thā. Islie us ne dekhā ki ek āne wālā hai jo mujh se baṛhkar hai. Duniyā kā nūr āne wālā hai jo insān ko gunāh kī ḡhulāmī se najāt degā.

Yahūdīyon ne etarāz kiyā, “Tumhārī umr to abhī pachās sāl bhī nahīn, to phir tum kis tarah kah sakte ho ki tum ne Ibrāhīm ko dekhā hai?”

Īsā Masīh ne farmāyā,

Ibrāhīm kī paidāish se peshtar ‘Main hūñ’.
(Yūhannā 8:58)

Yih bāt Yahūdī bardāsht nahīn kar sakte the. Wuh use sangsār karne ke lie patthar uṭhāne lage.

► *Kyon?*

Ab Īsā Masīh ne apne bāre meñ sāf sāf kahā thā ki ‘Main hūñ.’ Na sirf main Ibrāhīm se pahle thā balki main Ibrāhīm se pahle hūñ. Matlab hai azal se hūñ. Main ilāhī sūraj kā nūr hūñ. Main wuh hūñ jo is duniyā meñ nāzil huā tāki tumheñ gunāh kī ghulāmī se āzād kare. Yih Yahūdiyon kī nazar meñ kufr thā.

Mere azīz, bahut-se log yih rūhānī haqīqat qabūl nahīn kar sakte. Un ke nazdīk Īsā Masīh achchhā insān aur azīm nabī thā. Lekin wuh yih qabūl nahīn kar sakte ki wuh duniyā kā nūr hai, ki wuh ‘Main hūñ’ yānī Khudā kā Farzand hai. Lekin aise logoñ se main ek hī sawāl pūchhnā chāhtā hūñ,

► *Āp kis tarah gunāh kī ghulāmī se āzād ho jāenge?*

Usī ke pās yih ikhtiyār hai, wuhī pūrī tarah pāk hai, wuhī hamāre gunāhoñ ko miṭākar hameñ jannat meñ dākhl hone ke qābil banā saktā hai. Koī aur wasilā nahīn hai.

Injil, Yūhannā 8:12-59

Phir Īsā dubārā logoñ se muḥhātib huā, “Duniyā kā nūr main hūñ. Jo merī pairawī kare wuh tārikī meñ nahīn chalegā, kyonki use zindagī kā nūr hāsil hogā.”

Farīsiyon ne etarāz kiya, “Āp to apne bāre meñ gawāhī de rahe haiñ. Aisī gawāhī motabar nahīn hotī.”

Īsā ne jawāb diyā, “Agarche main apne bāre meñ hī gawāhī de rahā hūñ to bhī wuh motabar hai. Kyonki main jāntā hūñ ki main kahān se āyā hūñ aur kahān ko jā rahā hūñ. Lekin tum ko to mālūm nahīn ki main kahān se āyā hūñ aur kahān jā rahā hūñ. Tum insānī soch ke mutābiq logoñ kā faislā karte ho, lekin main kisī kā bhī faislā nahīn kartā. Aur agar faislā karūn bhī to merā faislā durust hai, kyonki main akelā nahīn hūñ. Bāp jis ne mujhe bhejā hai mere sāth hai. Tumhārī shariāt meñ likhā hai ki do ādmiyon kī gawāhī motabar

hai. Main̄ khud apne bāre meñ gawāhī detā hūñ jabki dūsrā gawāh Bāp hai jis ne mujhe bhejā.”

Unhoñ ne pūchhā, “Āp kā bāp kahāñ hai?” Īsā ne jawāb diyā, “Tum na mujhe jānte ho, na mere Bāp ko. Agar tum mujhe jānte to phir mere Bāp ko bhī jānte.”

Īsā ne yih bāteñ us waqt kīñ jab wuh us jagah ke qarīb tālīm de rahā thā jahāñ log apnā hadiyā dālte the. Lekin kisī ne use giriftār na kiyā kyonki abhī us kā waqt nahīñ āyā thā.

Ek aur bār Īsā un se muḥhātib huā, “Main̄ jā rahā hūñ aur tum mujhe ḍhūṇḍ ḍhūṇḍkar apne gunāh meñ mar jāoge. Jahāñ main̄ jā rahā hūñ wahāñ tum nahīñ pahuñch sakte.”

Yahūdiyoñ ne pūchhā, “Kyā wuh khudkushī karnā chāhtā hai? Kyā wuh isī wajah se kahtā hai, ‘Jahāñ main̄ jā rahā hūñ wahāñ tum nahīñ pahuñch sakte?’”

Īsā ne apnī bāt jāri rakhī, “Tum nīche se ho jabki main̄ ūpar se hūñ. Tum is duniyā ke ho jabki main̄ is duniyā kā nahīñ hūñ. Main̄ tum ko batā chukā hūñ ki tum apne gunāhoñ meñ mar jāoge. Kyonki agar tum imān nahīñ lāte ki main̄ wuhī hūñ to tum yaqīnan apne gunāhoñ meñ mar jāoge.”

Unhoñ ne sawāl kiyā, “Āp kaun haiñ?”

Īsā ne jawāb diyā, “Main̄ wuhī hūñ jo main̄ shurū se hī batātā āyā hūñ. Main̄ tumhāre bāre meñ bahut kuchh kah saktā hūñ. Bahut-sī aisī bāteñ haiñ jin kī binā par main̄ tum ko mujrim ṭhahrā saktā hūñ. Lekin jis ne mujhe bhejā hai wuhī sachchā aur motabar hai aur main̄ duniyā ko sirf wuh kuchh sunātā hūñ jo main̄ne us se sunā hai.”

Sunane wāle na samjhe ki Īsā Bāp kā zikr kar rahā hai. Chunāñche us ne kahā, “Jab tum Ibn-e-Ādam ko ūñche

par chaṛhāoge tab hī tum jān loge ki maiñ wuhī hūñ, ki maiñ apnī taraf se kuchh nahīñ kartā balki sirf wuhī sunātā hūñ jo Bāp ne mujhe sikhāyā hai. Aur jis ne mujhe bhejā hai wuh mere sāth hai. Us ne mujhe akelā nahīñ chhoṛā, kyoñki maiñ har waqt wuhī kuchh kartā hūñ jo use pasand ātā hai.”

Yih bāteñ sunkar bahut-se log us par imān lāe.

Jo Yahūdī us kā yaqīn karte the Īsā ab un se hamkalām huā, “Agar tum merī tālīm ke tābe rahoge tab hī tum mere sachche shāgird hoge. Phir tum sachchāi ko jān loge aur sachchāi tum ko āzād kar degī.”

Unhoñ ne etarāz kiyā, “Ham to Ibrāhīm kī aulād haiñ, ham kabhī bhī kisī ke ġhulām nahīñ rahe. Phir āp kis tarah kah sakte haiñ ki ham āzād ho jāeñge?”

Īsā ne jawāb diyā, “Maiñ tum ko sach batātā hūñ ki jo bhī gunāh kartā hai wuh gunāh kā ġhulām hai. Ġhulām to ārizī taur par ghar meñ rahtā hai, lekin mālik kā beṭā hameshā tak. Islie agar Farzand tum ko āzād kare to tum haqīqatan āzād hoge. Mujhe mālūm hai ki tum Ibrāhīm kī aulād ho. Lekin tum mujhe qatl karne ke darpai ho, kyoñki tumhāre andar mere paighām ke lie gunjāish nahīñ hai. Maiñ tum ko wuhī kuchh batātā hūñ jo maiñne Bāp ke hāñ dekhā hai, jabki tum wuhī kuchh sunāte ho jo tum ne apne bāp se sunā hai.”

Unhoñ ne kahā, “Hamārā bāp Ibrāhīm hai.” Īsā ne jawāb diyā, “Agar tum Ibrāhīm kī aulād hote to tum us ke namūne par chalte. Is ke bajāe tum mujhe qatl karne kī talāsh meñ ho, islie ki maiñne tum ko wuhī sachchāi sunāi hai jo maiñne Allāh ke huzūr sunī hai. Ibrāhīm ne kabhī bhī is qism kā kām na kiyā. Nahīñ, tum apne Bāp kā kām kar rahe ho.”

Nūr yā Andherā?

Andhe kī Shafā



Ek k̥hās id par Īsā Masīh ne farmāyā thā ki main duniyā kā nūr hūn. Is kā kyā matlab hai? Thoṛī der bād kuchh huā jis se matlab sāf patā chalā.

Yon huā: Īsā Masīh apne shāgirdon ke sāth Yarūshalam mein chal rahā thā ki ek bhikshu ko galī ke kināre dekhā. Yih ādmī ām bhikshu nahīn thā. Yih bhikh māngne par majbūr thā. Kyon? Wuh to naujawān thā, us umr mein jab tāqat achchhī-k̥hāsī hotī hai, jab insān k̥hūb paise kamā saktā hai. Lekin us kā ek maslā thā: wuh paidāish se hī andhā thā.

Sab ruk gae. Shāgird us par afsos karne lage. Hāy, is ādmī ne kabhī sūraj kī kirneñ os kī motiyon mein chamaktī-damaktī nahīn dekhī thīn. Us kā dil kabhī rangdār phūlon ke nazāre se labrez nahīn huā thā. Us kī ānkheñ khetoñ kī hariyālī se kabhī tar-o-tāzā nahīn huī thīn. Us ne kabhī nahīn dekhā thā ki pakshī kis tarah āsmān ko pār karte haiñ. Kī hudhud kis tarah phudaktā huā apnī lañbī choñch se zamīn mein se kīre nikāltā hai. Sab se baṛhkar yih kī na us ne kabhī apnī māñ kī pyār-bharī ānkheñ dekhī thīn na apne bāp kā us par lalkārtā faḥhr. Insān to apne chehre se har jazbā zāhir kartā hai. Pyār aur nafrat, ḡhussā aur shānti, hañsī aur ronā—yih sab kuchh hamāre chehron se mālūm hotā hai. Lekin yih sab kuchh us andhe ke lie ek muhrband kitāb thī jo wuh kabhī nahīn paṛhegā.

Lekin Īsā Masīh afsos karne nahīn rukā thā. Wuh to kah chukā thā ki main duniyā kā nūr hūn. Ab wuh shāgirdon ko dikhānā chāhtā thā ki is kā kyā matlab hai. Pahlī bāt,

Nūr Ẹhudā kā Kām Zāhir Kartā Hai

Andhe ko dekhte dekhte shāgirdon ko wuh ẹhyāl āyā jo hameñ bhī jald hī ātā hai: “Ustād, yih ādmī andhā kyon paidā huā? Kyā is kā koī gunāh hai yā is ke wālidain kā?”

Īsā Masīh ne jawāb diyā,

Na is kā koī gunāh hai aur na is ke wālidain kā.
Yih islie huā ki is kī zindagī meñ Allāh kā kām
zāhir ho jāe. (Yūhannā 9:3)

Īsā Masīh gunāh ke natijon ke बारे meñ ek ahm bāt farmātā hai.

► Kaun-sī bāt?

Ham nahīn kah sakte ki har musibat gunāh kā natijā hai. Naujawān gunāh ke bāis andhā nahīn huā thā balki is ke pīchhe Ẹhudā kā ẹhās maqsad thā.

► Maqsad kyā thā?

Yih ki Ẹhudā kā kām naujawān kī zindagī meñ zāhir ho jāe. Īsā Masīh us kī misāl se shāgirdon ko dikhānā chāhtā thā ki nūr kā kyā asar hotā hai. Ham dekheñge ki nūr kā muẓhtalif logon par asar farq farq hotā hai. Nūr kā pahlā asar,

Nūr Āñkheñ Khol Detā Hai

Īsā Masīh ne zamīn par thūkkar miṭṭī sānī aur andhe kī āñkhon par lagā dī. Phir kahā,

Jā, Shiloẓh ke hauz meñ nahā le. (Shiloẓh kā matlab ‘bhejā huā’ hai.) (Yūhannā 9:7)

► Yih kis tarah kā hauz thā?

Is hauz kā pānī surang ke zariye shahr meñ pahunchtā thā.

► Shiloẓh kā kyā matlab hai?

Bhejā huā.

► Masīh ne yih kyon farmāyā?

- Wuh apnī taraf ishārā kar rahā thā jo Ḳhudā Bāp se bhejā gayā thā.
 - Us ne us kī āṅkhoṅ ko ekdam shafā na dī.
- *Kyon?*
Mojize kā awwal maqsad bahālī nahīn balki īmān thā. Īsā Masīh chāhtā thā ki andhā hauz par jākar īmān kā pahlā qadam uṭhāe. Ḳhud amal meṅ āne se us kā īmān thoṛā mazbūt ho jāegā.
- *Is se ham sachche shāgird ke bāre meṅ kyā sikh sakte haiṅ?*
Sachchā shāgird hameshā Ḳhud amal meṅ ātā hai. Āsmān kī bādshāhī meṅ sust aur lā-parwāh shāgirdoṅ ke lie jagah nahīn hai.
- *Kyā andhā hauz ke pās gayā?*
Bilkul, wuh ekdam gayā. Us ne rāste meṅ kyā sochā hogā jab wuh galiyoṅ meṅ ṭaṭol ṭaṭolkar hauz kī taraf jā rahā thā? Us kā dil kitnā ṭarap rahā hogā.
- *Hauz par andhe ne kyā kiyā?*
Us ne nahā liyā. Wuh kām jo ustād ne farmāyā thā.
- *Phir kyā huā?*
Us kī āṅkheṅ bahāl huīn aur wuh dekhne lagā.
- *Kyā us kī shafā hauz ke pānī se huī?*
Nahīn. Wuh duniyā ke nūr se khul gaiṅ. Wāh! Ekdam kitnā mazā! Naujawān pahlī bār hauz kā pānī dhūp meṅ jhilmilātā huā dekh saktā thā. Āsmān kitnā nīlā thā! Jo chhoṭe bādāl nanhī-sī bheṛoṅ kī tarah charte charte us par se guzar rahe the wuh kitne dīlfareb the. Kuchh log hauz ke kināre baiṭhe yā khare dikhāī die. Naujawān phūle na samāyā. Us ne sochā, pahle ghar wāloṅ ko is Ḳhushī meṅ sharīk karūn. Wuh kūdtā-phalāṅgtā huā apne ghar chal diyā. Ab nūr ke dūsre asar par dhyān deṅ:

Nūr Khalbalī Machā Detā Hai

Naujawān ke paṛosī aur jānane wāle dang rah gae. Wuh pūchhne lage, “Kyā yih wuhī nahīn jo baiṭhā bhīkh māṅgā kartā thā?”

Bāz ne kahā, “Hān, wuhī hai.”

Dūsre shak meñ paṛ gae. “Nahīn, yih sirf us kā hamshakl hai.”

Lekin naujawān bolā, “Main wuhī hūn.”

Unhoñ ne us se sawāl kiyā, “Terī ānkheñ kis tarah bahāl huīn?”

Us ne jawāb diyā, “Wuh ādmī jo Īsā kahlātā hai us ne miṭṭī sānkar merī ānkhoñ par lagā dī. Phir us ne mujhe kahā, ‘Shiloḳh ke hauz par jā aur nahā le.’ Main wahāñ gayā aur nahāte hī merī ānkheñ bahāl ho gayīn.”

► *Kyā naujawān ne yih chhipāne kī koshish kī ki mojizā Īsā Masīh se huā hai?*

Nahīn. Us ne sāf iqrār kiyā ki Īsā Masīh ne yih kām kiyā hai. Īmān kā ek aham hissā iqrār hai.

Yih sunkar khalbalī mach gayā. Unhoñ ne pūchhā, “Wuh kahāñ hai?”

Us ne jawāb diyā, “Mujhe nahīn mālūm.” Be-chārā to andhā thā jab Īsā Masīh us ke pās āyā thā. Na us ne use dekhā thā, na yih ki wuh bād meñ kahāñ chalā gayā thā.

Nūr khalbalī machā detā hai. Lekin nūr kā ek tīsrā asar bhī hotā hai:

Nūr Shak meñ Ḍāl Detā Hai

Paṛosī itne jazbe meñ ā gae ki wuh naujawān ko Farīsiyoñ ke pās le gae. Farīsī un ke mazhabī rāhnumā the.

► *Kyā yih rāhnumā khush hue?*

Nahīn. Wuh ekdam shak meñ paṛ gae.

► *Kyon?*

Yih mojizā Sabat yānī Hafte ke dīn huā thā.

► *Yih rāhnumāon ke lie kyon ṭhokar kā bāis thā?*

Shari'at ke mutābiq Sabat ke dīn kām-kāj karnā manā thā. Maqsad yih thā ki logon ko Hafte mein ek dīn āram mile. Lekin bād mein ālimon ne ek sīdhī-sī bāt pechidā banā lī thī. Ab Sabat ke dīn āṭā gūndhnā bhī manā thā. Is nāte se thoṛī-sī gīlī miṭṭī andhe kī ānkhoṅ par lagānā bhī kām ṭaharāyā jā saktā thā.

Buzurgon ne naujawān se pūchh-gachh kī ki us kī ānkhen kis tarah bahāl hūn.

Ādmī ne jawāb diyā, “Us ne merī ānkhoṅ par miṭṭī lagā dī, phir mainne nahā liyā aur ab dekh saktā hūn.”

Buzurgon mein se bāz ne kahā, “Yih ādmī Allāh kī taraf se nahīn hai, kyonki Sabat ke dīn kām kartā hai.”

Dūson ne etarāz kiyā, “Gunāhgār is qism ke ilāhī nishān kis tarah dikhā saktā hai?” Yon un mein phūṭ par gāi.

► *Is phūṭ se ham kyā sīkhte haiṅ?*

Jahān Īsā Masīh kā nūr pahuñchtā hai wahān phūṭ partī hai. Kuchh use qabūl karte haiṅ lekin kuchh us ke ṭhilāf ho jāte haiṅ. Kuchh us nūr mein ā jāte haiṅ lekin kuchh andhere ke sāyon mein khisak jāte haiṅ.

► *Āpne kyā faislā kiyā hai? Kyā āpne use qabūl kiyā yā us ke ṭhilāf ho gae haiṅ?*

Buzurg dubārā naujawān se muḥhātīb hue, “Tū ṭhud is ke bāre mein kyā kahtā hai? Us ne to terī hī ānkhoṅ ko bahāl kiyā hai.”

Naujawān ne jawāb diyā, “Wuh nabī hai.”

► *Kyā āpne kuchh mahsūs kiyā?*

Āhistā āhistā andhe kī Īsā Masīh ke bāre rāy baṛh rahī hai. Ab wuh use nabī ṭaharā rahā hai.

► *Āp kī Īsā Masīh ke bāre mein rāy kyā hai?*

Nūr kā ek chauthā asar bhī hotā hai,

Nūr Ḍāñwāṇḍol Kar Detā Hai

Buzurgon ko yaqīn nahīn ā rahā thā ki naujawān pahle andhā thā. Unhon ne us ke wālidain ko bulāyā. Un se pūchhā, “Kyā

yih tumhārā beṭā hai, wuhī jis ke bāre meñ tum kahte ho ki wuh andhā paidā huā thā? Ab yih kis tarah dekh saktā hai?” Us ke wālidain ne jawāb diyā, “Ham jānte haiñ ki yih hamārā beṭā hai aur ki yih paidā hote waqt andhā thā. Lekin hamen mālūm nahīñ ki ab yih kis tarah dekh saktā hai yā ki kis ne is kī āñkhoñ ko bahāl kiyā hai. Is se ḳhud patā karen, yih bāligh hai. Yih ḳhud apne bāre meñ batā saktā hai.”

Asl meñ wālidain ko ḍar thā islie yoñ kahā. Kyoñki faislā ho chukā thā ki jo bhī Īsā Masih ke haq meñ ho use jamāt se nikāl diyā jāegā.

► *Kyā āp ko aisā koī ḍar hai?*

Māñ-bāp buzurgoñ se ḍarkar gol-mol bāteñ karne lage. Kitne log gol-mol bāteñ karne lagte haiñ jab un se pūchhā jāe ki tum Īsā Masih ke bāre meñ kyā sochte ho. Wuh sāf bāt karne ko taiyār nahīñ hote. Nūr kā pāñchwāñ asar:

Nūr Shari'at kī Qaid se Āzād Kar Detā Hai

Buzurgoñ ne ek bār phir naujawān ko bulāyā, “Allāh ko jalāl de, ham to jānte haiñ ki yih ādmī gunāhgār hai.”

Ādmī ne jawāb diyā, “Mujhe kyā patā hai ki wuh gunāhgār hai yā nahīñ, lekin ek bāt main jāntā hūñ: Pahle main andhā thā, aur ab main dekh saktā hūñ!”

Yih ādmī kitnā chust thā. Us ne apne māñ-bāp kī-sī gol-mol bāteñ na kīñ balki sīdhā wuh bāt kī jo sab kī āñkhoñ ke sāmne thī.

Phir unhoñ ne us se sawāl kiyā, “Us ne tere sāth kyā kiyā? Us ne kis tarah terī āñkhoñ ko bahāl kar diyā?”

Ab naujawān ne apnā āpā kho baiṭhā. Us ne jawāb diyā, “Main pahle bhī āp ko batā chukā hūñ aur āpne sunā nahīñ. Kyā āp bhī us ke shāgird bananā chāhte haiñ?”

Buzurgoñ kā sirf ek maqsad thā. Yih ki bār bār pūchhne se use ḡhalat sābit karen. Islie naujawān ne mazāq meñ kahā ki kyā āp bhī us ke shāgird bananā chāhte haiñ? Wuh to ḳhūb jāntā thā ki wuh shāgird nahīñ bananā chāhte the.

- *Kyā āpne dhyān diyā ki naujawān ne apne bāre mein kyā kahā?*
Apnī bāt se us ne sāf kah diyā ki main us kā shāgird hūn.
Ab tak us ne use dekhā tak nahīn thā. To bhī wuh apne āp
ko us kā pakkā shāgird samajhtā thā.

Buzurg taish mein ā gae. Unhon ne use burā-bhalā kahā, “Tū
hī us kā shāgird hai, ham to Mūsā ke shāgird haiñ. Ham to
jānte haiñ ki Allāh ne Mūsā se bāt kī hai, lekin is ke bāre mein
ham yih bhī nahīn jānte ki wuh kahān se āyā hai.”

Is jagah par naujawān aur buzurgoñ mein phūṭ sāf nazar āti
hai.

- *Kaisī phūṭ?*

Buzurg shariāt par bahut faḡhr karte the. Lekin is faḡhr
ne unheñ al-Masīh ke lie andhā kar diyā jab wuh un ke
sāmne ā maujūd huā. Shariāt aur nabiyoñ ke nawishte to
al-Masīh kī peshgoī karte the. Ghamanḍ insān ko Ḳhudā
se dūr kar detā hai.

Naujawān ne jawāb diyā, “Ajīb bāt hai, us ne merī āñkhoñ ko
shafā dī hai aur phir bhī āp nahīn jānte ki wuh kahān se hai.
Ham jānte haiñ ki Allāh gunāhgāroñ kī nahīn suntā. Wuh
to us kī suntā hai jo us kā ḡhauf māntā aur us kī marzī ke
mutābiq chaltā hai. Ibtidā hī se yih bāt sunane mein nahīn
āī ki kisī ne paidāishī andhe kī āñkhoñ ko bahāl kar diyā ho.
Agar yih ādmī Allāh kī taraf se na hotā to kuchh na kar saktā.”
Naujawān sādā-sā ādmī thā jabki buzurg ālim the. Kitnī ajīb
bāt ki usī ne rūhānī haqīqat ko samajh lī thī jabki buzurg is
ke lie andhe the. Jitnā naujawān nūr kī sachchāī kī taraf baḡh
rahā thā utnā hī buzurg tārikī ke sāyoñ mein gum hote jā rahe
the.

- *Naujawān ne do jawāb die. Wuh kyā the?*

Zāhir hai ki Īsā Masīh Ḳhudā kī taraf se hai. Kyoñki

- Ḳhudā usī kī suntā hai jo gunāh nahīn kartā. Jo us kā
ḡhauf rakhtā aur us kī marzī ke mutābiq chaltā hai.
- Aisā mojizā pahle kabhī nahīn huā hai.

Yih sunkar buzurgoñ ne use gāliyāñ dīñ, “Tū jo gunāhālūdā hālat meñ paidā huā hai kyā tū hamārā ustād bananā chāhtā hai?” Yih kahkar unhoñ ne use jamāt meñ se nikāl diyā.

► *Kyā āpne note kiyā ki unhoñ ne use kyā ṭhahrāyā?*

Unhoñ ne kahā ki tū gunāhālūdā hālat meñ paidā huā hai.

► *Lekin Īsā Masīh ne us ke bāre meñ kyā kahā thā?*

Us ke andhepan kī wajah gunāh nahīñ hai.

► *Īsā Masīh aur buzurgoñ meñ kyā farq nazar ātā hai?*

Buzurg shariāt ko jail samajhte haiñ. Har ek ko zanjiroñ meñ jakaṛkar us meñ ḍālnā hai. Apne āp ko wuh jail ke guard samajhte haiñ. Īsā Masīh kī fitrat bilkul farq hai. Wuh hameñ jail kī zanjiroñ se nikālnā chāhtā hai. Wuh hameñ apne nūr meñ lānā chāhtā hai tāki ham us kī ilāhī dhūp señkeñ. Wuh nahīñ chāhtā ki ham Ḳhudā ke qaidī hoñ. Wuh chāhtā hai ki ham Ḳhudā ke āzād farzand hoñ.

Yahī nūr kī baṛī ḳhushḳhabrī hai.

Shariāt aur Īsā Masīh meñ yahī baṛā farq hai. Shariāt hameñ batātī hai ki kyā karnā hai. Zarūr wuh hameñ gunāh ke ḳhatroñ se mahfūz rakhnā chāhtī hai. Lekin jald hī hameñ patā chaltā hai ki ham Ḳhudā ke ahkām pūre nahīñ kar sakte. Bār bār ham fail ho jāte haiñ. Īsā Masīh isī lie āyā tāki hamārī yih nāqis hālat bahāl kare. Tāki hamāre gunāhoñ ko miṭākar hameñ āzād kare. Nūr kā chhaṭā asar,

Nūr kī Manzil: Parastish

Ab dekho yih azīm bāt: Is naujawān ne Īsā Masīh ko ab tak nahīñ dekhā thā. To bhī us ne mazbūti se buzurgoñ kī dhamkiyoñ kā sāmnā kiyā. Wuh apne yaqīn par qāym rahā ki mainī Īsā Masīh kā shāgird hūñ hālāñki ab tak us kī dubārā mulāqāt us se nahīñ huī thī.

Īsā Masīh ko patā chalā ki use nikāl diyā gayā hai to wuh us ko milā aur pūchhā,

Kyā tū Ibn-e-Ādam par imān rakhtā hai?
(Yūhannā 9:35)

► *Ibn-e-Ādam se kyā murād hai?*

Dāniyāl Nabī ne sadiyon pahle al-Masīh ke bāre mein ek royā dekhī thī. Us mein us ne dekhā thā ki

Āsmān ke bādalon ke sāth sāth koī ā rahā hai jo Ibn-e-Ādam-sā lag rahā hai. Jab Qadīmūl-aiyām ke qarīb pahuñchā to us ke huzūr lāyā gayā. Use saltanat, izzat aur bādshāhī dī gai, aur har qaum, ummat aur zabān ke afrād ne us kī parastish kī. Us kī hukūmat abadī hai aur kabhī khatm nahīn hogī. Us kī bādshāhī kabhī tabāh nahīn hogī. (Dāniyāl 9:13-14)

Naujawān ne kahā, “Ḳhudāwand, wuh kaun hai? Mujhe bataēn tāki main us par imān lāūn.” Naujawān kā Īsā Masīh par itnā bharosā thā ki us kī har farmāish pūrī karne ko taiyār thā.

Īsā Masīh ne jawāb diyā,

Tūne use dekh liyā hai balki wuh tujh se bāt kar rahā hai. (Yūhannā 9:37)

► *Naujawān ne kyā jawāb diyā?*

Us ne kahā, “Ḳhudāwand, main imān rakhtā hūn” aur use sijdā kiyā.

Yon naujawān pūre imān tak pahuñch gayā. Pahle wuh us kā nām hī jāntā thā. Phir us ne iqrār kiyā ki yih nabī hai. Is ke bād jab buzurgoñ ne use dhamkī dī to us ne sāf kahā ki main us kā shāgird hūn. Yon wuh qadam baqadam imān mein taraqqī kartā gayā. Ab jab Īsā Masīh ne farmāyā ki main hī Ibn-e-Ādam yānī al-Masīh hūn to wuh ek pal bhī na jhijkā balki sīdhā use sijdā kiyā. Pahle us kī jismānī ānkhen

raushan huīñ, lekin ab is se baṛhkar huā. Ab us kī rūhānī āñkheñ khul gaīñ aur Īsā Masīh ke nūr se raushan huīñ.

Nūr Yā Andherā?

Tab Īsā Masīh ne kahā,

Main adālat karne ke lie is duniyā meñ āyā hūñ, islie ki andhe dekheñ aur dekhne wāle andhe ho jāeñ. (Yūhannā 9:39)

► *Wuh kis nāte se adālat karne āyā hai?*

Rāt ke waqt jab light andhere ko raushan kare to sharīf log us meñ chalte haiñ. Lekin chor aur ḍākū light se dūr sāyoñ meñ chhipe rahte haiñ. Isī tarah kuchh kī āñkheñ Īsā Masīh ke nūr se raushan ho jātī haiñ. Aise log us kī sachchāī pahchānkar use ḡhushī se qabūl karte haiñ. Lekin afsos, dūsre nūr ko bardāsht nahīñ kar sakte. Aise log nūr se dūr sāyoñ meñ khisak jāte haiñ. Aise log rūhānī andhe rahte haiñ.

Kitnī ajīb bāt! Jo pahle andhā thā wuh na sirf apnī jismānī āñkhoñ se dekhne lagā balki us kī rūhānī āñkheñ bhī raushan huīñ. Buzurgoñ ke sāth is ke ulaṭ huā. Wuh apnī jismānī āñkhoñ se dekh to sakte the magar un kī rūhānī āñkheñ andhī rahīñ.

Mere azīz, kyā āp chāhte haiñ ki āp kī āñkheñ raushan ho jāeñ? Īsā Masīh ke pās āeñ. Wuhī duniyā kā nūr hai. Shariāt aur apne nek kāmōñ par faḡhr mat karnā, apne āp par bharosā mat karnā. Usī nūr se minnat kareñ ki wuh ākar āp ko raushan kare.

Injīl, Yūhannā 9

Chalte chalte Īsā ne ek ādmī ko dekhā jo paidāish kā andhā thā. Us ke shāgirdōñ ne us se pūchhā, “Ustād, yih

ādmī andhā kyon paidā huā? Kyā is kā koī gunāh hai yā is ke wālidain kā?”

Īsā ne jawāb diyā, “Na is kā koī gunāh hai aur na is ke wālidain kā. Yih islie huā ki is kī zindagī meñ Allāh kā kām zāhir ho jāe. Abhī din hai. Lāzim hai ki ham jitnī der tak din hai us kā kām karte raheñ jis ne mujhe bhejā hai. Kyonki rāt āne wālī hai, us waqt koī kām nahīn kar sakegā. Lekin jitnī der tak main duniyā meñ hūn utnī der tak main duniyā kā nūr hūn.”

Yih kahkar us ne zamīn par thūkkar miṭṭī sānī aur us kī āñkhoñ par lagā dī. Us ne us se kahā, “Jā, Shiloḡh ke hauz meñ nahā le.” (Shiloḡh kā matlab ‘bhejā huā’ hai.) Andhe ne jākar nahā liyā. Jab wāpas āyā to wuh dekh saktā thā.

Us ke hamsāye aur wuh jinhoñ ne pahle use bhīkh māṅte dekhā thā pūchhne lage, “Kyā yih wuhī nahīn jo baiṭhā bhīkh māṅgā kartā thā?”

Bāz ne kahā, “Hān, wuhī hai.”

Auroñ ne inkār kiyā, “Nahīn, yih sirf us kā hamshakl hai.”

Lekin ādmī ne ḡhud isrār kiyā, “Main wuhī hūn.”

Unhoñ ne us se sawāl kiyā, “Terī āñkheñ kis tarah bahāl huīñ?”

Us ne jawāb diyā, “Wuh ādmī jo Īsā kahlātā hai us ne miṭṭī sānkar merī āñkhoñ par lagā dī. Phir us ne mujhe kahā, ‘Shiloḡh ke hauz par jā aur nahā le.’ Main wahān gayā aur nahāte hī merī āñkheñ bahāl ho gaīñ.”

Unhoñ ne pūchhā, “Wuh kahāñ hai?”

Us ne jawāb diyā, “Mujhe nahīn mālūm.”

Tab wuh shafāyāb andhe ko Farīsiyoñ ke pās le gae. Jis din Īsā ne miṭṭī sānkar us kī āñkhoñ ko bahāl kiyā thā wuh Sabat kā din thā. Islie Farīsiyoñ ne bhī us se pūchh-

gachh kī ki use kis tarah basārat mil gai. Ādmī ne jawāb diyā, “Us ne merī ānkhon par miṭṭī lagā dī, phir mainne nahā liyā aur ab dekh saktā hūn.”

Farīsiyon meñ se bāz ne kahā, “Yih shaḡhs Allāh kī taraf se nahīn hai, kyonki Sabat ke din kām kartā hai.”

Dūsron ne etarāz kiyā, “Gunāhgār is qism ke ilāhī nishān kis tarah dikhā saktā hai?” Yon un meñ phūṭ par gai.

Phir wuh dubārā us ādmī se muḡhātib hue jo pahle andhā thā, “Tū ḡhud is ke bāre meñ kyā kahtā hai? Us ne to terī hī ānkhon ko bahāl kiyā hai.”

Us ne jawāb diyā, “Wuh nabī hai.”

Yahūdiyon ko yaqīn nahīn ā rahā thā ki wuh wāqai andhā thā aur phir bahāl ho gayā hai. Islie unhon ne us ke wālidain ko bulāyā. Unhon ne un se pūchhā, “Kyā yih tumhārā beṭā hai, wuhī jis ke bāre meñ tum kahte ho ki wuh andhā paidā huā thā? Ab yih kis tarah dekh saktā hai?”

Us ke wālidain ne jawāb diyā, “Ham jānte haiñ ki yih hamārā beṭā hai aur ki yih paidā hote waqt andhā thā. Lekin hameñ mālūm nahīn ki ab yih kis tarah dekh saktā hai yā ki kis ne is kī ānkhon ko bahāl kiyā hai. Is se ḡhud patā karen, yih bāligh hai. Yih ḡhud apne bāre meñ batā saktā hai.” Us ke wālidain ne yih islie kahā ki wuh Yahūdiyon se ḡarte the. Kyonki wuh faislā kar chuke the ki jo bhī Īsā ko Masīh qarār de use Yahūdī jamāt se nikāl diyā jāe. Yahī wajah thī ki us ke wālidain ne kahā thā, “Yih bāligh hai, is se ḡhud pūchh leñ.”

Ek bār phir unhon ne shafāyāb andhe ko bulāyā, “Allāh ko jalāl de, ham to jānte haiñ ki yih ādmī gunāhgār hai.”

Ādmī ne jawāb diyā, “Mujhe kyā patā hai ki wuh gunāhgār hai yā nahīn, lekin ek bāt main jāntā hūn, pahle main andhā thā, aur ab main dekh saktā hūn!”

Phir unhoṅ ne us se sawāl kiyā, “Us ne tere sāth kyā kiyā? Us ne kis tarah terī ānkhon ko bahāl kar diyā?”

Us ne jawāb diyā, “Main pahle bhī āp ko batā chukā hūn aur āpne sunā nahīn. Kyā āp bhī us ke shāgird bananā chāhte haiṅ?”

Is par unhoṅ ne use burā-bhalā kahā, “Tū hī us kā shāgird hai, ham to Mūsā ke shāgird haiṅ. Ham to jānte haiṅ ki Allāh ne Mūsā se bāt kī hai, lekin is ke bāre mein ham yih bhī nahīn jānte ki wuh kahān se āyā hai.”

Ādmī ne jawāb diyā, “Ajīb bāt hai, us ne merī ānkhon ko shafā dī hai aur phir bhī āp nahīn jānte ki wuh kahān se hai. Ham jānte haiṅ ki Allāh gunāhgāron kī nahīn suntā. Wuh to us kī suntā hai jo us kā khauf māntā aur us kī marzī ke mutābiq chaltā hai. Ibtidā hī se yih bāt sunane mein nahīn āī ki kisī ne paidāishī andhe kī ānkhon ko bahāl kar diyā ho. Agar yih ādmī Allāh kī taraf se na hotā to kuchh na kar saktā.”

Jawāb mein unhoṅ ne use batāyā, “Tū jo gunāhālūdā hālat mein paidā huā hai kyā tū hamārā ustād bananā chāhtā hai?” Yih kahkar unhoṅ ne use jamāt mein se nikāl diyā.

Jab Īsā ko patā chalā ki use nikāl diyā gayā hai to wuh us ko milā aur pūchhā, “Kyā tū Ibn-e-Ādam par imān rakhtā hai?”

Us ne kahā, “Ḳhudāwand, wuh kaun hai? Mujhe batāen tāki main us par imān lāūn.”

Īsā ne jawāb diyā, “Tūne use dekh liyā hai balki wuh tujh se bāt kar rahā hai.”

Us ne kahā, “Ḳhudāwand, main īmān rakhtā hūn” aur use sijdā kiyā.

Īsā ne kahā, “Main adālat karne ke lie is duniyā meñ āyā hūn, islie ki andhe dekheñ aur dekhne wāle andhe ho jāeñ.”

Kuchh Farīsī jo sāth khare the yih kuchh sunkar pūchhne lage, “Achchhā, ham bhī andhe haiñ?”

Īsā ne un se kahā, “Agar tum andhe hote to tum qusūrwar na ṭahrte. Lekin ab chūnki tum dāwā karte ho ki ham dekh sakte haiñ islie tumhārā gunāh qāym rahtā hai.

Charwāhe kī Āwāz



Ek din kâ zikr hai ki Īsā Masīh ne ek paidāishī andhe kī āñkhoñ ko bahāl kar diyā. Us waqt na sirf andhe kī jismānī āñkheñ khul gaīñ. Us kī rūhānī āñkheñ bhī raushan huīñ. Duniyā ke nūr ne unheñ raushan kar diyā. Lekin sab kī āñkheñ Īsā Masīh ke nūr se raushan nahīñ hotīñ. Mazhabī buzurgoñ ne yih mojizā dekhā. Phir bhī wuh rūhānī andhe rahe.

► *Yih kis tarah mumkin thā?*

Unhoñ ne apnī āñkhoñ ko is nūr ke lie band kar rakhā. Yoñ wuh rūhānī andhe rahe. Un kā andhāpan dekhkar Īsā Masīh ne sunane wāloñ ko ek tamsīl sunāī. Ek taswīr se wuh unheñ sahī paṭarī par lānā chāhtā thā.

► *Taswīr kyā thī?*

Charwāhe aur bheṛoñ kī taswīr. Us ne farmāyā,

Main tum ko sach batātā hūñ ki jo darwāze se bheṛoñ ke bāre meñ dāḡhil nahīñ hotā balki phalāṅkar andar ghus ātā hai wuh chor aur dāḡkū hai. Lekin jo darwāze se dāḡhil hotā hai wuh bheṛoñ kā charwāhā hai. (Yūhannā 10:1-2)

► *Yih tamsīl kis ke bāre meñ hai?*

Charwāhe aur us kī bheṛoñ ke bāre meñ.

► *Īsā Masīh is se kyā sikhānā chāhtā hai?*

Pahlī bāt,

Achche Charwāhe kī Āwāz Suno

► *Charwāhā kaun hai?*

Achchhā charwāhā Īsā Masīh hai.

► *Bheṛeñ kaun haiñ?*

Bheṛeñ ham sab haiñ.

- *Kyā charwāhe ke alāwā dūsre bhī bāre mein āte haiñ?*
Hāñ, chor aur dākū bhī āte haiñ.
- *Wuh kis tarah āte haiñ?*
Wuh darwāze se nahiñ āte. Wuh diwār ko phalāngkar bāre mein ghus āte haiñ.
- *Chor aur dākū kaun haiñ?*
Yih wuh rāhnumā haiñ jo logon ko ghalat tālīm dete haiñ aur un se ghalat fāydā uṭhāte haiñ. Un se nuqsān hī nuqsān paidā hotā hai.
- *Charwāhe aur in mein kyā farq hai?*
Achchhā charwāhā dākū nahīn hai. Wuh bheṛon kī baṛī fikr kartā hai. Wuh un kī salāmatī chāhtā hai.
- *Yih fikr kaise nazar ātī hai?*
Wuh phalāngkar bāre mein nahīn ātā. Wuh darwāze se dākḥil hotā hai. Lekin yih fikr aur bāton se bhī nazar ātī hai. Īsā Masih ne farmāyā,

Chaukidār us ke lie darwāzā khol detā hai aur bheṛen us kī āwāz suntī haiñ. Wuh apnī har ek bheṛ kā nām lekar unheñ bulātā aur bāhar le jātā hai. (Yūhannā 10:3)

- *Yahāñ yih fikr kaise nazar ātī hai?*
Achchhā charwāhā apnī har bheṛ ko jāntā hai. Wuh har ek kā nām lekar unheñ bulātā aur bāhar le jātā hai.
- *Tab charwāhā kyā kartā hai?*
Īsā Masih ne farmāyā,

Apne pūre galle ko bāhar nikālne ke bād wuh un ke āge āge chalne lagtā hai aur bheṛen us ke pīchhe pīchhe chal partī haiñ, kyonki wuh us kī āwāz pahchāntī haiñ. (Yūhannā 10:4)

- *Charwāhā kyā kartā hai?*

Wuh pūre galle ko bāhar nikālkar un ke āge āge chalne lagtā hai.

► *Tab bherēn kyā kartī haiñ?*

Wuh us ke pīchhe pīchhe partī haiñ.

► *Wuh kyon us ke pīchhe partī haiñ?*

Wuh us kī āwāz pahchāntī haiñ.

► *Kyā charwāhā un ke pīchhe chalkar unheñ hāñktā hai?*

Nahīñ. Wuh un ke āge āge chaltā hai. Falastīn meñ charwāhā hameshā bherōn ke āge āge chaltā hai.

Kāfī sāl pahle kā zikr hai ki kuchh log safr karke Falastīn pahuñche. Wahāñ kisī guide ne unheñ yih bāt batāī ki charwāhā āge āge chaltā hai. Kuchh dinoñ bād un kī mulāqāt ek ādmī se huā jo bherōn ke pīchhe chalkar unheñ hāñk rahā thā. Musāfir dang rah gae. Unhoñ ne ādmī se pūchhā ki kyā Falastīn meñ charwāhā bherōn ke āge āge nahīñ chaltā?

Us ne jawāb diyā, “Jī hāñ, hamāre hāñ aisā hī hotā hai. Lekin bāt yih hai, main charwāhā nahīñ hūñ. Main to qasāī hūñ.”

► *Āge chalne meñ kyā rūhānī sabaq hai?*

- Bherōn kā charwāhe par itnā ṭhos bharosā hai ki unheñ hāñkne kī zarūrat nahīñ hotī. Wuh ḵhud baḵhud us ke pīchhe chaltī haiñ.

- Jahāñ bhī ham chalte haiñ wahāñ hamārā charwāhā pahle se qadam rakh chukā hai. Rāste meñ chāhe dukh ho yā sukh wuh pahle se wahāñ qadam rakh chukā hai. Kyonki wuh hamāre āge āge chaltā hai.

► *Us ne hamāre āge chalkar kyā dukh sahā hai?*

Īsā Masīh ne farmāyā,

Achchhā charwāhā apnī bherōn ke lie apnī jān detā hai. (Yūhannā 10:11)

Us ne hamārī ḵhātir apnī jān dī. Us ne wuh sazā uṭhāī jo hameñ bhugatnī thī. Gunāh hameñ Ḵhudā se judā kar detā hai. Ham meñ se koī bhī jannat meñ dāḵhil hone ke

lāyq nahīn hai kyonki ham sab gunāhgār haiñ. Hamāre gunāhoñ ko miṭāne ke lie Īsā Masīh ne salīb par hamārī jagah sazā bardāsht kī. Ab se jo bheṛ us ke pīchhe chaltī hai use yih sazā sahnī nahīn paṛtī. Salīb par charwāhe kī maut us kī bheṛoñ ke lie zindagī kā bāis ban gaī.

Jab ham musībat kī wādī meñ se guzarte haiñ to yih bāt hamāre lie tasallī kā bāis hai ki us ne hamāre wāste dukh sahā hai. Wuh hamārā dukh samajhtā hai. Har jagah jahān ham chal rahe haiñ wahān wuh pahle hī qadam rakh chukā hai.

► *Hamāre āge chalkar use kyā sukh hāsil huā hai?*

Wuh jī uṭhā aur āsmān par uṭhā liyā gayā. Is wajah se hamārā mustaqbil ṭhos aur purummīd hai. Kyonki jahān wuh hai wahān ham bhī āḡhir meñ pahuñchkar sukh kī sāns leñge.

► *Jo bheṛeñ charwāhe kī nahīn haiñ kyā wuh charwāhe kī suntī haiñ?*

Nahīn.

► *Kyon nahīn?*

Un kā aur mālik hai. Paidāishī andhe kī misāl leñ. Īsā Masīh ne use bulākar bahāl kiya. Tab wuh sīdhā us ke pīchhe chalne lagā hālāñki wuh shurū meñ us ke bāre meñ kuchh nahīn jāntā thā. Yih ek rāz hai ki achchhā charwāhā tamām bheṛoñ ko bulātā hai lekin sab us ke pīchhe chalne nahīn lagtiñ. Sirf wuh jo us kī āwāz suntī haiñ us ke pīchhe ho letī haiñ. Īsā Masīh ke dushman us kī bheṛeñ nahīn the. Na wuh us ke nūr meñ chalte the na us kī āwāz sunte the.

► *Kyā āp us kī āwāz sunte haiñ?*

Ek aur bāt: Charwāhe kī bheṛeñ har kisī ke pīchhe nahīn chaltiñ. Īsā Masīh ne farmāyā,

Lekin wuh kisī ajnabī ke pīchhe nahīn chalēngī balki us se bhāg jāēngī, kyonki wuh us kī āwāz nahīn pahchāntīn. (Yūhannā 10:5)

- *Wuh ajnabī ke pīchhe kyon nahīn chaltīn?*

Wuh us kī āwāz nahīn pahchāntīn.

Kisī ne Falastīn kī ek nadī par tīn charwāhe dekhe jo apne jānwaron ko pānī pilā rahe the. Kuchh der bād ek uṭhā aur apnī bheṛon ko āwāz dekar chal paṛā. Us kī apnī bheṛen ekdam us ke pīchhe ho līn. Is ke bād dūsrā charwāhā apnī bheṛon ko pukārkar chalā gayā. Us ne unheṅ ginane kī taklīf bhī na uṭhāī. Phir bhī pūrā gallā us ke pīchhe ho liyā. Tab musāfir ne tīsre charwāhe se kahā, “Mujhe apnī pagaṛī aur lāṭhī de do to main hī unheṅ bulāūngā.” Charwāhe ne use yih chīzeṅ dīn aur musāfir ne bheṛon ko āwāz dī.

- *Kyā wuh us ke pīchhe ho līn?*

Bilkul nahīn. Ek bhī jānwar apnī jagah se na hilā.

Musāfir ne pūchhā, “Kyā āp kī bheṛen kabhī kisī ajnabī ke pīchhe ho letī hain?”

Charwāhā bolā, “Be-shak. Jab kabhī koī bheṛ bīmār paṛ jāe to ho saktā hai wuh kisī ajnabī ke pīchhe ho le.” Dūsrī bāt,

Sahī Darwāze se Andar Āo

Īsā Masih na sirf achchhā charwāhā hai. Wuh najāt kā darwāzā bhī hai. Us ne farmāyā,

Main hī darwāzā hūn. Jo bhī mere zariye andar āe use najāt milegī. Wuh ātā-jātā aur harī charāgāheṅ pātā rahegā. (Yūhannā 10:9)

- *Jo is darwāze meṅ jāe use kyā milegā?*

Use najāt milegī.

- *Yahān najāt kā asar bayān kiyā gayā hai. Wuh kyā hai?*

Jise najāt milī hai wuh ātā-jātā aur harī charāgāheṅ pātā rahegā.

- *Is kā kyā matlab hai?*

Use abadī zindagī milegī. Is kā matlab na sirf yih hai ki wuh jannat meñ dākḥil hogā. Wuh is duniyā meñ bhī bharpūr zindagī pāegā.

► *Bharpūr zindagī kā kyā matlab hai?*

Charwāhā apnī bheṛoñ ko rāt ke waqt bāre meñ mahfūz karke un kī nigahbānī kartā hai. Subh ko wuh unheñ bāre se nikālkar charāgāhoñ meñ le jātā hai. Use mālūm hai ki kahāñ kahāñ achchhī ghās miltī hai, ki zamīn meñ se chashme kahāñ kahāñ ubalte haiñ. Wuh unheñ zahrīle paudhoñ aur janglī jānwaroñ se mahfūz rakhtā hai. Wuhī jāntā hai ki bheṛ ke lie kyā kyā achchhā hotā hai. Yahī bāteñ ham par bhī sādiq ātī haiñ. Jab achchhā charwāhā hamāre āge chaltā hai to ham usī ke hāth meñ haiñ. Wuhī hamārā muhāfiz hai. Wuhī waqt par har zarūrat muhaiyā kartā hai.

Lekin najāt kā ek hī darwāzā hai—Īsā Masīh jo hamārā achchhā charwāhā hai. Hamen sirf usī darwāze se dākḥil hokar najāt miltī hai. Tisrī bāt,

Ḳhāndānī Rishtā Pāo

Achchhā charwāhā kahāñ tak apnī bheṛoñ kī fikr kartā hai? Īsā Masīh ne is kā sāf jawāb diyā,

Achchhā charwāhā apnī bheṛoñ ke lie apnī jān detā hai. (Yūhannā 10:11)

Agar janglī jānwar āe to achchhā charwāhā apnī jān dene ko taiyār hai. Mazdūr aisā nahīñ hotā. Bheṛiyā āyā to mazdūr ojhal ho gayā. Īsā Masīh aisā nahīñ hai. Wuh na sirf apnī jān dene ko taiyār thā balki us ne sachmuch apnī jān dī.

► *Us ne kyon apnī jān dī?*

Islie ki us kā apnī bheṛoñ se ḳhāndān kā gahrā rishtā hai. Wuh farmātā hai,

Main apnī bheṛoṇ ko jāntā hūn aur wuh mujhe jāntī haiṇ, bilkul usī tarah jis tarah Bāp mujhe jāntā hai aur main Bāp ko jāntā hūn. (Yūhannā 10:14-15)

► *Īsā Masīh apnī bheṛoṇ ko kis tarah jāntā hai?*

Us tarah jis tarah wuh Ḳhudā Bāp ko jāntā hai. Jis tarah Bāp kā Īsā Masīh se gahrā rishtā hai usī tarah Īsā Masīh kā apnī bheṛoṇ se rishtā hai. Isī rishte kī wajah se us ne apnī jān dī.

► *Yih kis tarah kā rishtā hai?*

Yih ḳhāndān kā rishtā hai. Sab bheṛoṇ kā ek hī Bāp hai—Ḳhudā Bāp. Sab bheṛoṇ kā ek hī charwāhā hai—Īsā Masīh jo Ḳhudā Bāp kā Farzand hai. Isliē sab bheṛeṇ bhāi-bahn haiṇ. Chauthī bāt,

Sab ko Dāwat Hai

Īsā Masīh na sirf Yahūdīyoṇ kā charwāhā hai. Us ne farmāyā,

Merī aur bhī bheṛeṇ haiṇ jo is bāre meṇ nahiṇ haiṇ. Lāzim hai ki unheṇ bhī le āūṇ. Wuh bhī merī āwāz suneṅgī. Phir ek hī gallā aur ek hī gallābān hogā. (Yūhannā 10:16)

► *Dūsri bheṛeṇ kaun haiṇ?*

Dūsri bheṛeṇ pūrī duniyā kī qaumeṇ haiṇ. Īsā Masīh sab ko bulā rahā hai ki āo aur mere pīchhe ho lo. Merī bheṛeṇ bano. In meṇ main aur āp bhī shāmil haiṇ.

► *Kyā āp us kī bheṛ haiṇ?*

Īsā Masīh pūre zor se ham ko bulā rahā hai. Yih us kī apnī hī marzī hai. Wuh pakke irāde se is duniyā meṇ nāzil huā tāki hamen najāt de. Use shurū hī se patā thā ki wuh apnī jān degā. Use yih bhī patā thā ki wuh dubārā jī uṭhegā aur āsmān par uṭhā liyā jāegā. Us ne apnī hī marzī se yih rāstā apnāyā. Isliē us ne farmāyā,

Koī merī jān mujh se chhīn nahīn saktā balki main use apnī marzī se de detā hūn. Mujhe use dene kā iḡhtiyār hai aur use wāpas lene kā bhī. (Yūhannā 10:18)

► *Us ne yih rāstā kyon iḡhtiyār kiyā?*

Ek hī wajah hai: Wuh achchhā charwāhā hai. Wuh hamēn pyār kartā hai. Use hamārī fikr hai. Wuh ḡhūb jāntā hai ki ham sab gunāhgār haiñ. Wuh nahīn kahtā ki tū nālāyq hai, dafā ho jā. Nahīn, wuh har ek ko pyār se bulākar farmātā hai ki kyā tū merī bheṛ nahīn honā chāhtā? Mere pīchhe ho le to tujhe harī harī charāgāheñ mileñgī. Jannat kī charāgāheñ. Abadī zindagī ke sarchashme. Wahān tū gunāh, musibat aur maut se āzād hokar sukh kī sāns legā. Āo mere pīchhe. Īsā Masīh kī yih bāteñ sunkar bahutoñ ne kahā ki yih badrūh ke qabze meñ hai. Yih dīwānā hai. Lekin kuchh ne kahā ki badrūh ke qabze meñ ādmī aisī bāteñ aur kām kis tarah kar saktā hai? Us ne to andhe kī āñkheñ bahāl kiñ. Do mumkin rāste haiñ. Āp use qabūl karke us kī bheṛ ban sakte haiñ yā āp use rad karke us kī najāt se mahrūm rah sakte haiñ. Āp kaun-sā rāstā chuneñge?

Injil, Yūhannā 10:1-21

Main tum ko sach batātā hūn ki jo darwāze se bheṛoñ ke bāre meñ dāḡhil nahīn hotā balki phalāñgkar andar ghus ātā hai wuh chor aur ḡākū hai. Lekin jo darwāze se dāḡhil hotā hai wuh bheṛoñ kā charwāhā hai. Chaukidār us ke lie darwāzā khol detā hai aur bheṛeñ us kī āwāz suntī haiñ. Wuh apnī har ek bheṛ kā nām lekar unheñ bulātā aur bāhar le jātā hai. Apne pūre galle ko bāhar nikālne ke bād wuh un ke āge āge chalne lagtā hai aur bheṛeñ us ke pīchhe pīchhe chal paṛtī haiñ, kyonki

wuh us kī āwāz pahchāntī haiñ. Lekin wuh kisī ajnabī ke pīchhe nahīn chaleñgī balki us se bhāg jāeñgī, kyonki wuh us kī āwāz nahīn pahchāntīñ.”

Īsā ne unheñ yih tamsīl pesh kī, lekin wuh na samjhe ki wuh unheñ kyā batānā chāhtā hai.

Islie Īsā dubārā is par bāt karne lagā, “Main tum ko sach batātā hūñ ki bheṛoñ ke lie darwāzā main hūñ. Jitne bhī mujh se pahle āe wuh chor aur ḍākū haiñ. Lekin bheṛoñ ne un kī na sunī. Main hī darwāzā hūñ. Jo bhī mere zariye andar āe use najāt milegī. Wuh ātā-jātā aur harī charāgāheñ pātā rahegā. Chor to sirf chori karne, zabah karne aur tabāh karne ātā hai. Lekin main islie āyā hūñ ki wuh zindagī pāeñ, balki kasrat kī zindagī pāeñ.

Achchhā charwāhā main hūñ. Achchhā charwāhā apnī bheṛoñ ke lie apnī jān detā hai. Mazdūr charwāhe kā kirdār adā nahīn kartā, kyonki bheṛeñ us kī apnī nahīn hotīñ. Islie jyon hī koī bheṛiyā ātā hai to mazdūr use dekhte hī bheṛoñ ko chhoṛkar bhāg jātā hai. Natīje meñ bheṛiyā kuchh bheṛeñ pakaṛ letā aur bāqiyōñ ko muntashir kar detā hai. Wajah yih hai ki wuh mazdūr hī hai aur bheṛoñ kī fikr nahīn kartā. Achchhā charwāhā main hūñ. Main apnī bheṛoñ ko jāntā hūñ aur wuh mujhe jāntī haiñ, bilkul usī tarah jis tarah Bāp mujhe jāntā hai aur main Bāp ko jāntā hūñ. Aur main bheṛoñ ke lie apnī jān detā hūñ. Merī aur bhī bheṛeñ haiñ jo is bāre meñ nahīn haiñ. Lāzim hai ki unheñ bhī le āūñ. Wuh bhī merī āwāz suneñgī. Phir ek hī gallā aur ek hī gallābān hogā. Merā Bāp mujhe islie pyār kartā hai ki main apnī jān detā hūñ tāki use phir le lūñ. Koī merī jān mujh se chhīn nahīn saktā balki main use apnī marzī se de detā hūñ. Mujhe use dene kā iḡhtiyār hai aur use

wāpas lene kā bhī. Yih hukm mujhe apne Bāp kī taraf se milā hai.”

In bātoñ par Yahūdiyoñ meñ dubārā phūṭ paṛ gai. Bahutoñ ne kahā, “Yih badrūh kī girift meñ hai, yih dīwānā hai. Is kī kyoñ suneñ!”

Lekin auroñ ne kahā, “Yih aisī bāteñ nahīn haiñ jo badrūh-giriftā shaḡhs kar sake. Kyā badrūheñ andhoñ kī āñkheñ bahāl kar sakti haiñ?”

Sachchī Qurbāngāh



Sardiyon kâ mausam thâ. Maḥsūsīyat kī Īd ke bāis Baitul-muqaddas aur logon ke ghar be-shumār charāghon se chamak-damak rahe the.

► *Yih kis qism kī īd thī?*

Taqriban do sau sāl pahle ek pardesī bādshāh ne Baitul-muqaddas kī qurbāngāh par but lagākar us kī be-hurmatī kī thī. Yih dekhkar Yahūdiyon ne us par fath pākar qurbāngāh ko nae sire se maḥsūs kiyā thā. Yih īd isī maḥsūsīyat kī ḡhushī meṇ manāī jāti thī. Ham dekheṅge ki is īd kâ Īsā Masīh se gahrā tālluq hai.

Īd ke daurān Īsā Masīh Baitul-muqaddas meṇ āyā. Jab wuh wahān ke ek barāmdē meṇ ṭahal rahā thā to log use gherkar kahne lage, “Āp hameṇ kab tak uljhan meṇ rakheṅge? Agar āp Masīh haiṇ to hameṇ sāf sāf batā deṇ.” Īsā Masīh ne jawāb meṇ kyā kahā? Pahlī bāt,

Merī Najāt Qabūl Karo

► *Kyā Īsā Masīh ne apne kām aur kalām se sābit nahīn kiyā thā ki wuh al-Masīh hai?*

Zarūr.

► *To yih log kyon chāhte the ki wuh sāf sāf batā de ki main Masīh hūṇ?*

Jo kuchh Īsā Masīh ne kiyā thā wuh un ke nazdik nākāfī thā. Un ke ḡhyāl meṇ al-Masīh Romī dushman kâ juā toṛkar Yahūdī qaum ko āzād karegā. Wuh ek duniyāwī hākīm chāhte the, islie un kī āṅkheṇ Īsā Masīh ke aslī kirdār ke lie band rahīṇ. Wuh mānte to the ki āne wālā Masīh shafā degā aur dūsre mojize karegā. Lekin wuh is bāt ke lie andhe the ki Īsā Masīh ke āne kâ awwal maqsad kyā thā.

► *Awwal maqsad kyā thā?*

Awwal maqsad yih thā ki insān ko najāt de—gunāhoñ se najāt.

► *Yih kyoñ us ke āne kā awwal maqsad thā?*

Apne gunāhoñ kī wajah se ham pāk Ḳhudā ke huzūr mañzūr nahīñ ho sakte. Islie zarūrī hai ki ham gunāhoñ se āzād ho jāeñ. Āj bhī aksar log Īsā Masīh ke mojize pasand karte haiñ. Lekin kam hī us kā awwal maqsad qabūl karte haiñ. Kam hī apne gunāhoñ se āzād hokar Ḳhudā ke huzūr mañzūr ho jāte haiñ. Isī lie Īsā Masīh ne jawāb diyā,

Main tum ko batā chukā hūñ, lekin tum ko yaqīn nahīñ āyā. Jo kām main apne Bāp ke nām se kartā hūñ wuh mere gawāh haiñ. Lekin tum imān nahīñ rakhte kyoñki tum merī bhereñ nahīñ ho. (Yūhannā 10:25-27)

► *Jo imān na lāe kyā wuh Īsā Masīh kī bhereñ the?*
Nahīñ.

► *Is se ham imān ke bāre meñ kyā sikhte haiñ?*

Imān achchhe charwāhe ke sāth rishtā hai—bheṛ kā rishtā jis kī āñkheñ hameshā apne āqā kī taraf lagī huī haiñ. Shāgird wuh hai jo us kī āwāz sunkar us ke pīchhe chaltā hai. Sab ne us kā kalām aur us ke kām dekh liyā thā. Lekin sab imān na lāe. Jo imān na lāe un kā achchhe charwāhe se rishtā paidā na huā. Unhīñ ko Īsā Masīh ne kahā ki merī najāt qabūl karo. Lekin unhoñ ne inkār kiyā. Dūsri bāt,

Merī Hifāzat Qabūl Karo

Us ne farmāyā,

Merī bheṛeñ merī āwāz suntī haiñ. Main unheñ jāntā hūñ aur wuh mere pīchhe chaltī haiñ. Main unheñ abadī zindagī detā hūñ, islie wuh kabhi halāk nahīñ hoñgī. Koī unheñ mere hāth se chhīn na legā. (Yūhannā 10:27-28)

- *Yahān Īsā Masīh kaun-sī taswīr istemāl kartā hai?*
Charwāhe aur bheṛoñ kī taswīr. Wuh achchhā charwāhā hai.
- *Us kī bheṛeñ kaun haiñ?*
Us par imān lāne wāle.
- *Yih bheṛeñ kyā kartī haiñ?*
 - Wuh us kī āwāz suntī haiñ.
 - Wuh us ke pīchhe chaltī haiñ.
- *Charwāhā kyā kartā hai?*
 - Wuh unheñ jāntā hai.
 - Wuh unheñ abadī zindagī detā hai.
- *Abadī zindagī kā kyā natījā nikaltā hai?*
 - Us kī bheṛeñ kabhi halāk nahīñ hoñgī.
 - Koī unheñ us ke hāth se chhīn na legā. Us kī bheṛeñ us ke hāth meñ haiñ. Islie wuh mahfūz haiñ.

Īsā Masīh kī najāt pāne se hameñ abadī hifāzat miltī hai. Tīsri bāt,

Ḳhudā Bāp kī Gāranṭī Qabūl Karo

Jab Īsā Masīh hamārā charwāhā hai to hameñ najāt aur hifāzat miltī hai. Lekin ham kis tarah yaqīn rakh sakte haiñ ki yih hifāzat pakki hai? Ab Īsā Masīh is sawāl kā jawāb detā hai,

Kyonki mere Bāp ne unheñ mere supurd kiya hai aur wuhī sab se baṛā hai. Koī unheñ Bāp ke hāth se chhīn nahīñ saktā. Main aur Bāp ek haiñ. (Yūhannā 10:29-30)

- *Kaun hamārī hifāzat kī gāranṭī detā hai?*

Ḳhudā Bāp. Usī ne bheṛēñ apne Farzand ke supurd kī haiñ.

- *Us kī gāranṭī kyoñ ṭhos hai?*

Islie ki wuh sab se baṛā hai.

- *Lekin Ḳhudā Bāp kyoñ bheṛoñ kī gāranṭī detā hai?*

Islie ki Īsā Masīh aur Bāp ek haiñ. Yoñ un kā ek hī irādā aur ek hī kām hai. Yih sunkar log patthar uṭhāne lage tāki use sangsār karen.

- *Wuh Īsā Masīh ko kyoñ qatl karnā chāhte the?*

Īsā Masīh ne bhī yahī sawāl pūchhā,

Maiñne tumheñ Bāp kī taraf se kai ilāhī nishān dikhāe haiñ. Tum mujhe in meñ se kis nishān kī wajah se sangsār kar rahe ho?
(Yūhannā 10:32)

- *Ilāhī nishān se kyā murād hai?*

Īsā Masīh ke mojize ilāhī nishān the, kyoñki yih zāhir karte the ki Īsā Masīh ko Ḳhudā Bāp se bhejā gayā hai. Anginat mojize hue the jo sirf Ḳhudā kī taraf se ho sakte the. Yahī zāhir karte the ki wuh aur Bāp ek haiñ. Ki jo bhī wuh kar rahā hai wuh Ḳhudā Bāp kī taraf se hai.

- *Us ke muḳhālifoñ ne kyā jawāb diyā?*

Unhoñ ne jawāb diyā ki tum ne kufr bakā hai. Tum jo sirf insān ho Allāh hone kā dāwā karte ho. Yih ek sanjīdā ilzām thā islie lāzim hai ki ham us par ḡhaur karen jo Īsā Masīh kahnā chāhtā thā.

- *Ḳhudā Bāp aur Īsā Masīh kis tarah ek haiñ?*

- Īsā Masīh kahnā chāhtā hai ki irāde aur kām meñ ham ek haiñ. Maiñ Ḳhudā Bāp kī marzī ke alāwā aur kuchh nahīñ kartā. Is kā matlab yih nahīñ hai ki maiñ Ḳhudā Bāp hūñ. Ham farq haiñ aur ek bhī haiñ. Wuh Ḳhudā Bāp hai aur maiñ Farzand hūñ. Usī ne mujhe duniyā meñ bhejā tāki insān ko najāt dūñ.

- Īsā Masīh na sirf insān hai. Wuh Ḳhudā kā Farzand hai jis ne insān banane kā rāstā iḵhtiyār kiyā tāki hamen najāt de. Yoñ wuh Ḳhudā kā Farzand bhī hai aur insān bhī. Insān kī haisiyat se us ne hamārī sazā bardāshṭ kī tāki hamāre gunāh miṭ jāen. Farzand kī haisiyat se wuh jī uṭhā aur āsmān par uṭhā liyā gayā. Yoñ jo bhī us kī āwāz sune wuh us ke pīchhe chalkar ek dīn jī uṭhegā. Yahī bāt hamen najāt kī tasallī detī hai. Hamāre nek kām hamen yih tasallī nahīn dilā sakte ki ham jannat meñ dāḵhil ho jāenge. Ḳhudā Bāp hī is kī gārānṭī hai. Wuh farmātā hai ki najāt kā jo kām mainne apne Farzand ke wasīle se kiyā wuh pakkā hai. Main hī us kī gārānṭī detā hūñ.

Īsā Masīh ke muḵhālīf us ke mojize qabūl kar sakte the. Lekin wuh yih qabūl nahīn kar sakte the ki aise mojize sirf Ḳhudā kā Farzand kar saktā hai. Āj tak bahut-se log yih bāt qabūl nahīn kar sakte.

► *Kyā āp yih qabūl kar sakte haiñ?*

Us kī āwāz suno. Ḳhudā Bāp kī gārānṭī qabūl karo. Chauthī bāt,

Allāh ke Farzand ko Qabūl Karo

Phir bhī Īsā Masīh ne muḵhālifoñ ke zahnoñ ko kholne kī koshish kī. Us ne farmāyā,

Kyā yih tumhārī shariāt meñ nahīn likhā hai ki Allāh ne farmāyā, ‘Tum Ḳhudā ho’? Unheñ ‘Ḳhudā’ kahā gayā jin tak Allāh kā yih paighām pahuñchāyā gayā. Aur ham jānte haiñ ki kalām-e-muqaddas ko mansūkh nahīn kiyā jā saktā. To phir tum kufr bakne kī bāt kyon karte ho jab main kahtā hūñ ki main Allāh kā Farzand hūñ? (Yūhannā 10:34-36)

► *Yih kaun-sā hawālā hai jis kā zikr Īsā Masīh ne kiyā?*

Yahāñ us ne ek zabūr kā zikr kiyā. Wahāñ likhā hai,

Be-shak mainne kahā, “Tum Ḳhudā ho, sab Allāh Ta’ālā ke farzand ho. Lekin tum fānī insān kī tarah mar jāoge, tum digar hukmrānoñ kī tarah gir jāoge.” (Zabūr 82:6)

► *Is zabūr kā kyā matlab hai?*

Shariāt ke Yahūdī ustād muttāfiq the ki Ḳhudā ne yih bāt Isrāīlī jamāt se farmāi thī.

► *Isrāīliyon ko kis tarah kahā jā saktā thā ki tum Allāh ke farzand ho?*

Un par shariāt nāzil huī thī isī lie wuh Ḳhudā jaise yānī us ke farzand the. Shariāt ne unheñ yih rob aur waqār dilā diyā thā. Lekin apnī nā-farmānī kī wajah se Yahūdī yih rob aur waqār kho baiṭhe the. Islie zabūr kahtā hai ki tum fānī insān kī tarah mar jāoge.

► *Īsā Masīh yahāñ kyā kahnā chāhtā hai?*

Jab shariāt nāzil huī to tumheñ itnā rob milā ki Allāh Ta’ālā ke farzand kahā gayā. Lekin tum is lāyq na rahe. Isī lie main duniyā meñ āyā. Zarūrī thā ki Ḳhudā kā Farzand nāzil ho jāe tāki tum achchhe charwāhe kī bheṛeñ ban jāo. Lāzim thā ki Ḳhudā kā Farzand nāzil ho jāe tāki tum Ḳhudā ke ḳhāndān meñ shāmil ho jāo. Pāñchwīñ bāt,

Sachchī Qurbāngāh Qabūl Karo

Īsā Masīh kī bāteñ hameshā baṛī gahrāiyon meñ le jātī haiñ. Ab us ne farmāyā,

Āḳhir Bāp ne ḳhud mujhe maḳhsūs karke duniyā meñ bhejā hai. (Yūhannā 10:36)

► *Is ke pīchhe kyā ḳhyāl hai?*

Maḳhsūsiyat kī Īd thī. Us par yih yād kiyā jātā thā ki be-hurmatī ke bād qurbāngāh ko nae sire se maḳhsūs kiyā gayā thā. Ab Īsā Masīh ne farmāyā ki mujhe hī maḳhsūs kiyā gayā hai. Jis qurbāngāh kī maḳhsūsiyat tum manā rahe ho wuh ab be-mānī hai.

► *Kyon?*

Qurbāngāh wuh intazām thā jis se insān kā Ḳhudā se mel-milāp ho jātā thā. Usī par log apnī qurbāniyān pesh karte the tāki Allāh Ta'ālā un ke gunāh māf kare. Lekin Baitul-muqaddas kī qurbāngāh haqīqat kā bas sāyā thā. Sāyā asl kām nahīn kar saktā. Wuh sirf asl kī taraf ishārā kartā hai. Kisī ādmī kā sāyā us ādmī kā kām nahīn kar saktā. Sāye ko dekhkar shāyad hī ham ādmī kī shakl kā andāzā lagā sakein. Na yih sāyā sāns le saktā hai na hāth-pānw hilā saktā hai. Ab Īsā Masīh mein sāye kā asl ā gayā thā. Wuh sachchī qurbāngāh hai. Use maḥsūs karke duniyā mein bhej diyā gayā thā tāki us kī qurbānī Ḳhudā se haqīqī mel-milāp paidā kare.

► *Kyā log yih sunkar ḡhush hue?*

Nahīn. Yih sunkar unhoñ ne use pakaṛne kī koshish kī. Lekin wuh un ke hāth se nikal gayā. Ek āḡhirī bāt,

Kyā Āp ko Yih Najāt Milī Hai?

Yarūshalam mein rahnā mushkil ho gayā thā islie Īsā Masīh apne shāgirdon ke sāth Dariyā-e-Yardan ke pār us jagah chalā gayā jahān Yahyā Nabī shurū mein baptismā diyā kartā thā. Wahān bahut-se log us par imān lāe.

► *Log kyon us par imān lāe?*

Unhoñ ne kahā,

Yahyā ne kabhī koī ilāhī nishān na dikhāyā, lekin jo kuchh us ne is ke bāre mein bayān kiyā, wuh bilkul sahī niklā. (Yūhannā 10:41)

Yih log pahle Allāh ke paighambar Yahyā par imān lāe the, aur ab unhoñ ne dekhā ki har ek bāt jo Yahyā ne Īsā Masīh ke bāre mein farmāi thī sahī niklī hai.

► *In mein aur Īsā Masīh ke muḡhālifoñ mein kyā farq thā?*

Kāfī der se yih log pahchān chuke the ki Allāh, Yahyā Nabī ke wasīle se bāt kar rahā hai. Ab unhoñ ne yahī bāt

Īsā Masīh meñ pāī. Unhoñ ne us kī najāt aur hifāzat qabūl kī. Wuh jānte the ki yih najāt pakkī hai kyonki Ẹhudā Bāp is kī gāranṭī detā hai.

Dūsroñ ne Īsā Masīh kī najāt qabūl na kī. Wuh us kī āwāz nahīn sun sakte the, aur us kī bheṛeñ na bane. Na sirf yih balki wuh us ke saḡht muḡhālīf ban gae.

Ab sawāl yih hai: Kyā āpne najāt pāī hai? Kyā āp achchhe charwāhe ke pichhe chalkar apne āp ko mahfūz samajhte haiñ? Kyā āp ko pūrā yaqīn hai ki Ẹhudā Bāp is najāt kī gāranṭī detā hai? Kyā āpne us ke Farzand kī qurbānī qabūl kī hai?

Injīl, Yūhannā 10:22-42

Sardiyoñ kā mausam thā aur Īsā Baitul-muqaddas kī maḡhsūsiyat kī Īd banām Hanūkā ke daurān Yarūshalam meñ thā. Wuh Baitul-muqaddas ke us barāmdē meñ phir rahā thā jis kā nām Sulemān kā barāmdā thā. Yahūdī use gherkar kahne lage, “Āp hameñ kab tak uljhan meñ rakheñge? Agar āp Masīh haiñ to hameñ sāf sāf batā deñ.”

Īsā ne jawāb diyā, “Maiñ tum ko batā chukā hūñ, lekin tum ko yaqīn nahīn āyā. Jo kām maiñ apne Bāp ke nām se kartā hūñ wuh mere gawāh haiñ. Lekin tum imān nahīn rakhte kyonki tum merī bheṛeñ nahīn ho. Merī bheṛeñ merī āwāz suntī haiñ. Maiñ unheñ jāntā hūñ aur wuh mere pichhe chaltī haiñ. Maiñ unheñ abadī zindagī detā hūñ, islie wuh kabhī halāk nahīn hoñgī. Koī unheñ mere hāth se chhīn na legā, kyonki mere Bāp ne unheñ mere supurd kiya hai aur wuhī sab se baṛā hai. Koī unheñ Bāp ke hāth se chhīn nahīn saktā. Maiñ aur Bāp ek haiñ.”

Yih sunkar Yahūdī dubārā patthar uṭhāne lage tāki Īsā ko sangsār karen. Us ne un se kahā, “Mainne tumhen Bāp kī taraf se kaī ilāhī nishān dikhāe haiñ. Tum mujhe in meñ se kis nishān kī wajah se sangsār kar rahe ho?” Yahūdiyon ne jawāb diyā, “Ham tum ko kisī achchhe kām kī wajah se sangsār nahīn kar rahe balki kufr bakne kī wajah se. Tum jo sirf insān ho Allāh hone kā dāwā karte ho.”

Īsā ne kahā, “Kyā yih tumhārī shariyat meñ nahīn likhā hai ki Allāh ne farmāyā, ‘Tum Ḳhudā ho’? Unheñ ‘Ḳhudā’ kahā gayā jin tak Allāh kā yih paighām pahunchāyā gayā. Aur ham jānte haiñ ki Kalām-e-muqaddas ko mansūkh nahīn kiyā jā saktā. To phir tum kufr bakne kī bāt kyon karte ho jab main kahtā hūñ ki main Allāh kā Farzand hūñ? Āḳhir Bāp ne ḳhud mujhe maḳhsūs karke duniyā meñ bhejā hai. Agar main apne Bāp ke kām na karūñ to merī bāt na māno. Lekin agar us ke kām karūñ to be-shak merī bāt na māno, lekin kam-az-kam un kāmōñ kī gawāhī to māno. Phir tum jān loge aur samajh jāoge ki Bāp mujh meñ hai aur main Bāp meñ hūñ.”

Ek bār phir unhoñ ne use giriftār karne kī koshish kī, lekin wuh un ke hāth se nikal gayā.

Phir Īsā dubārā Dariyā-e-Yardan ke pār us jagah chalā gayā jahāñ Yahyā shurū meñ baptismā diyā kartā thā. Wahāñ wuh kuchh der ṭhahrā. Bahut-se log us ke pās āte rahe. Unhoñ ne kahā, “Yahyā ne kabhī koī ilāhī nishān na dikhāyā, lekin jo kuchh us ne is ke bāre meñ bayān kiyā, wuh bilkul sahī niklā.” Aur wahāñ bahut-se log Īsā par imān lāe.

Abadī Zindagī Kaise Pāūn?



- *Kyā āpne kabhī sochā ki maut ke bād kyā hogā? Kyā main Allāh Ta’ālā ko mañzūr hūngā? Kyā main jannat mein dākhil hone lāyq hūngā?*

Injīl-e-sharīf mein hamen is kā sāf jawāb miltā hai ki ham kis tarah abadī zindagī pā sakte hain.

Yarūshalam ke qarīb ek gānw thā. Us kā nām Bait-aniyāh thā. Gānw mein do bahnen apne bhāi ke sāth rahtī thin. Bahnon ke nām Marthā aur Mariyam the, bhāi kā Lāzar. Tīnon Īsā Masīh ke shāgird the. Wuh use bahut azīz rakhte the. Ek din bhāi bīmār paṛ gayā. Jald hī patā chalā ki yih ām bīmārī nahīn hai, yih mohlak marz hai. Lāzar kī hālat bigaṛtī gāi to bahnen pareshān ho gāin. Ab kyā karen?

Tab bahnon ko Īsā Masīh kā khyāl āyā. Kyā us ke kahne par lātādād marizon ko shafā nahīn milī thī? Kyā wuh madad nahīn karegā? Lekin Īsā Masīh wahān nahīn thā. Wuh dūr, Dariyā-e-Yardan ke pār k̄hidmat anjām de rahā thā. Pahuñchne mein to ek yā do din lagte the. Shāyad Lāzar utne mein kūch kar jāe. K̄hūb kahā gayā hai ki d̄ubte ko tinke kā sahārā. Bahnon ne ummīd kā yih tinkā pakar̄kar phurtī se ittalā bhejī ki “K̄hudāwand, jise āp pyār karte hain wuh bīmār hai.” Donon bahnon ko ek bāt kā pūrā yaqīn thā: Īsā Masīh hamārī suntā hai. Īsā Masīh hamārī fikr kartā hai. Wuh hameshā hamāre dukh aur sukh mein sharik hotā hai. Jab Īsā Masīh ko yih k̄habr milī us waqt wuh k̄hālī hāth to nahīn baiṭhā thā. Hameshā kī tarah wuh apnī k̄hidmat mein masrūf thā. Mariz āte-jāte the aur wuh bhīr se ghīrā rahtā thā.

- *Log kyon us kā pichhā nahīn chhoṛte the?*

Us kã kirdâr aur tâlîm anokhî thî. Log sab kuchh chhoṛkar bhāg âte the. Yih âm âdmî nahîñ thâ. Use kḥâs iḡhtiyâr hâsil thâ.

Jab Îsâ Masîh ko yih kḥabir milî to us ne farmâyâ,

Is bîmârî kã anjâm maut nahîñ hai, balki yih Allâh ke jalâl ke wâste huâ hai, tâki is se Allâh ke Farzand ko jalâl mile. (Yûhannâ 11:4)

- *Is bîmârî kã anjâm maut nahîñ hai: Is se wuh kyâ kahnâ chāhtā thā?*

Wuh jântā thâ ki Lâzar marne wâlâ hai. Thoṛî der bād wuh wafât pāegâ. Lekin wuh maut ke qabze meñ nahîñ rahegâ. Wuh Îsâ Masîh ke kahne par dubārâ zindâ ho jâegâ.

- *Is se kis ko jalâl milegâ?*

Pahle Kḥudâ Bâp ko aur dūsre us ke Farzand Îsâ Masîh ko. Îsâ Masîh Lâzar ko zindâ karegâ magar apne âp ko baṛâ karne ke lie nahîñ. Is kām se Kḥudâ Bâp ko jalâl milegâ. Is se ham ek ahm usûl sîkhte haiñ:

Kḥudâ ko Jalâl Do

- *Jalâl dene kã kyâ matlab hai?*

Jalâl dene kã matlab yih hai ki ham us kî izzat-o-ehtarâm karen. Na sirf apnî bâtoñ se balki apnî zindagî se bhî. Har kām jo Îsâ Masîh kartâ wuh islie kartâ thâ ki Kḥudâ Bâp ko jalâl mile. Aur kyâ aḡab. Jo tâlluq Kḥudâ Bâp, Farzand aur Rûhul-quḡs ke darmiyân hai wuh bahut gahrâ hai. Is yagāngat kî binâ par Îsâ Masîh kã har qadam, har sâñs Kḥudâ Bâp kã jalâl baṛhâne ke lie thâ.

- *Kyâ âp apnî zindagî se Kḥudâ ko jalâl dete haiñ? Yâ kyâ âp kî zindagî ko dekhkar logon ko ghîñ âtî hai?*

Agar âp kã îmân sachchâ ho to âp kî zindagî kḥud baḡhud is kî gawâhî degî.

Shāgird Masīh kī yih bāt samajh na pāe. Wuh mutma'in hue. Unhoñ ne sochā, chalo bandā k̄hud baḡhud ṭhīk ho jāegā. Wuh rawānā na hue balki do aur din wahīñ ṭhahre rahe. Phir Īsā Masīh ne farmāyā, “Āo, ham dubārā Yahūdiyā chale jāeñ.” Shāgird dang rah gae.

► *Wuh kyon̄ dang rah gae?*

Wuh bole, “Ustād, abhī abhī wahāñ ke Yahūdī āp ko sangsār karne kī koshish kar rahe the, phir bhī āp wāpas jānā chāhte haiñ?” Wuh to Yarūshalam shahr se isī lie chale gae the ki wahāñ ke buzurg nārāz the. Buzurg ustād ko pakaṛnā chāhte the kyon̄ki wuh nahīñ mānte the ki wuh āne wālā al-Masīh hai. Sāth sāth unheñ yih ḍar thā ki kahīñ is se hamārī apnī kursī hīl na jāe. Kaisī bāt. Wuh sachchāī ko qabūl nahīñ kar sakte the kyon̄ki un ke lie un kī apnī izzat sab kuchh thī.

Shāgird pareshānī se ustād ko tākne lage. Tab Īsā Masīh ne unheñ ek aur bāt sikhāī. Yih ki

Nūr meñ Chalo

Us ne farmāyā,

Kyā din meñ raushnī ke bārah ghanṭe nahīñ hote? Jo shakhs din ke waqt chaltā-phirtā hai wuh kisī bhī chīz se nahīñ ṭakrāegā, kyon̄ki wuh is duniyā kī raushnī ke zariye dekh saktā hai. Lekin jo rāt ke waqt chaltā hai wuh chīzoñ se ṭakrā jātā hai, kyon̄ki us ke pās raushnī nahīñ hai. (Yūhannā 11:9-10)

► *Jo din ke waqt chaltā hai. Din ke waqt chalne kā kyā matlab hai?*

Ab tak din kā waqt hai. Din ke waqt insān chal-phir saktā hai. Mere bāp ne din kā waqt bhī muqarrar kiyā hai aur rāt kā waqt bhī. Main duniyā kā nūr hūñ. Jab tak main sāth hūñ tumheñ ḍarne kī zarūrat nahīñ hai.

Mere aziz, kyā āpne yih nūr pāyā hai? Jo nūr ke baḡhair chale wuh muḡhtalif chīzon se ṭakrātā rahtā hai. Use choṭ lagti rahti hai.

► *Choṭ kyon lagti hai?*

Islie ki wuh Ḳhudā kā rāstā dekh nahīn saktā. Wuh kabhī bāīn taraf bhaṭaktā hai, kabhī dāīn taraf. Jo rāstā sīdhā abadi ārām tak le jātā hai use wuh nahīn dekhtā.

Ab Īsā Masīh ne ek tisrī bāt sikhāī:

Apne Īmān ko Baḡhne Do

Us ne kahā, “Hamārā dost Lāzar so gayā hai. Lekin main jākar use jagā dūngā.”

Shāgirdon ne kahā, “Ḳhudāwand, agar wuh so rahā hai to bach jāegā.” Agar wuh ārām se so rahā ho to is kā matlab hai bīmārī ghaṭne wālī hai aur wuh ṭhīk ho jāegā. Lekin ustād ne unheñ sāf batā diyā,

Lāzar wafāt pā gayā hai. Aur tumhārī ḡhātir main ḡhush hūn ki main us ke marte waqt wahān nahīn thā, kyonki ab tum īmān lāoge. Āo, ham us ke pās jāeñ. (Yūhannā 11:14-15)

► *Īsā Masīh kyon ḡhush thā?*

Islie ki shāgird īmān lāeñge.

► *Ḳyā wuh īmān nahīn lāe the?*

Zarūr. Dekheñ bāt yih hai: Jab ham īmān lāte haiñ to hamārā īmān bij jaisā chhoṭā hotā hai. Use baḡhāne kī zarūrat hotī hai tāki wuh jaṛ pakṛe, ug āe aur baḡhte baḡhte phal lāe. Ustād ḡhush hai ki Lāzar ke pās jāne se shāgird kā kamzor īmān mazbūt ho jāegā.

Shāyad āp ke dil meñ īmān kā yih bij ḡālā gayā hai. Kyā āp use baḡhne de rahe haiñ? Kyā āp rozānā apnī zindagī meñ us ke nūr aur us kī quwwat kā tajribā kar rahe haiñ? Agar nahīn to use pukāreñ. Minnat kareñ ki mujhe chhū de. Mujh

par apnī muhabbat aur apnī tāqat unḍel de tāki merā kamzor īmān baṛhtā jāe, mazbūt hotā jāe.

► *Kyā shāgird khush the?*

Nahīn, un ke roṅṅte khaṛe ho gae. Lekin itnā unhoñ ne sikh liyā thā ki ustād ke pīchhe chalnā hī hai chāhe khatrā kitnā kyoñ na ho. Tomā bolā, “Chalo, ham bhī wahāñ jākar us ke sāth mar jāeñ.” Tomā yih bāt mazāq meñ nahīn kah rahā thā. Sab jānte the ki Yarūshalam ke qarīb ānā apnī jān hathelī par rakhne ke barābar hai.

Wahāñ pahuñchkar mālūm huā ki Lāzar ko qabr meñ rakhe chār din ho gae haiñ. Yih gāñw Yarūshalam ke qarīb hī thā islie bahut-se Yahūdī Marthā aur Mariyam ko tasallī dene ke lie āe hue the. Is mauqe par īmān kā ek aur pahlū ubhar āyā:

Pūrā Bharosā Rakho

Marthā ko ittalā milī ki ustād pahuñchkar bāhar intazār kar rahā hai to wuh use milne gāī. Lekin Mariyam ghar meñ baiṭhī rahī. Marthā ne kahā, “Ḳhudāwand, agar āp yahāñ hote to merā bhāī na martā. Lekin main jāntī hūñ ki ab bhī Allāh āp ko jo bhī māñgeñge degā.”

► *Ab dhyān deñ. Marthā ne kyā do bāteñ kahīñ?*

- Pahle, agar āp yahāñ hote to merā bhāī na martā.
- Lekin dūsri bāt is se baṛhkar hai. Wuh bolī, main jāntī hūñ ki ab bhī Allāh āp ko jo bhī māñgeñge degā. Marthā kā apne āqā par baṛā īmān hai. Wuh shikāyat nahīn kartī, kyoñki ab bhī Marthā ko us par pūrā bharosā hai.

► *Marthā ko itnā pakkā bharosā kyoñ hai?*

Us ne pahchān liyā hai ki Ḳhudā Bāp use jo māñgegā degā. Īsā Masīh apnī pūrī zindagī se Ḳhudā Bāp ko jalāl de rahā hai islie Ḳhudā Bāp us kī suntā hai.

Īsā Masīh ne farmāyā, “Terā bhāī jī uṭhegā.”

Marthā ne jawāb diyā, “Jī, mujhe mālūm hai ki wuh qiyāmat ke din jī uṭhegā, jab sab jī uṭheñge.”

Tab Īsā Masih ne ek chaunkā dene wālī bāt kahī,

Qiyāmat aur zindagī to main hūn. Jo mujh par
īmān rakhe wuh zindā rahegā, chāhe wuh mar
bhī jāe. Aur jo zindā hai aur mujh par īmān
rakhtā hai wuh kabhī nahīn maregā.

(Yūhannā 11:25-26)

- *Jo īmān rakhe use kyā hāsil hogā?*

Zindagī. Abadī zindagī. Matlab hai ki

Use Qabūl Karo jo Zindagī Hai

- *Qiyāmat aur zindagī to main hūn. Īsā Masih is se kyā kahnā chāhtā hai?*

Abadī zindagī usī ke zariye miltī hai. Yih kisī aur se hāsil nahīn ho saktī. Isī lie ki ham apnī koshishon se jannat meñ dākhil nahīn ho sakte. Hamārī hālat kamzor hai. Ham jo nāpāk haiñ Allāh ke huzūr ā nahīn sakte. Hamārī sifārish karne se kuchh nahīn hotā, kyonki sifārish se ham pāk nahīn ho jāenge. Sifārish se ham wuh rūhānī hālat nahīn pāenge jis se ham mañzūr ho jāenge. Yahī wajah hai ki Īsā Masih ne hamāre wāste apnī jān dī. Us ne apne ūpar wuh sazā lī jo hamen ūṭhānī thī. Na sirf yih balki us ke marne aur jī ūṭhne ke bād us ne Rūhul-quds bhej diyā jo sachche īmāndār ke dil meñ rahkar use tasallī aur hidāyat detā rahtā hai. Yih chīzeñ sifārish se paidā nahīn hotīn.

- *Lekin is kā kyā matlab hai ki jo mujh par īmān rakhe wuh zindā rahegā? Kyā wuh is duniyā meñ nahīn maregā?*

Yahān do sachchāiyāñ ek dūsre ke sāth jurī huī haiñ, ek jismānī aur dūsarī rūhānī. Jo us par īmān rakhe wuh is duniyā meñ rahte hue yih abadī zindagī pātā hai. Kah leñ ki abadī zindagī kā bīj īmāndār ke dil meñ ḍālā jātā hai. Jism kitnā ghaṭṭā aur galtā kyon na jāe lekin yih bīj kabhī nahīn galtā. Yih bīj baṛhtā jātā hai, rūhānī phal lātā rahtā

hai aur ākhir mein jab jism guzar jāe imāndār ko Ḳhudā ke huzūr le jātā hai. Yahī hai hamārī ṭhos ummīd. Yahī wajah hai ki Īsā Masīh farmātā hai ki jo zindā hai aur mujh par imān rakhtā hai wuh kabhī nahīn maregā.

Ustād to māhir doctor hai. Us ne Marthā ke dil mein tez nazar ḍālkar pūchhā, “Marthā, kyā tujhe is bāt kā yaqīn hai?” Use hameshā hamārī rūhānī hālat kī fikr rahtī hai.

Marthā ne jawāb diyā, “Jī Ḳhudāwand, main imān rakhtī hūn ki āp Ḳhudā ke Farzand Masīh haiñ, jise duniyā mein ānā thā.” Be-shak Marthā yih bāteñ pūre taur se nahīn samajhtī, magar dekho us kā imān! Wuh jawāb detī hai ki āp Ḳhudā ke Farzand Masīh haiñ. Āp wuhī haiñ jise hameñ najāt dene ke lie ānā thā. Ab wuh wāpas ghar mein khisak gāī tāki chupke se Mariyam ko bulāe. Ustād ke sāth rifāqat bāqī logoñ se farq thī, gahrī thī. Us ke huzūr har pal qīmatī thā. Islie wuh tarāp rahī thī ki mātām karne wāloñ ke shor-o-ghul se dūr hokar Mariyam ke sāth apne āqā kī dhūp señke. Us ne Mariyam se kahā, ustād ā gae haiñ, wuh tujhe bulā rahe haiñ.

Mariyam ekdam uṭh kharī huī aur phurtī se gāñw se bāhar us jagah gāī jahāñ Īsā Masīh abhī tak thā. Agar koī tasallī de sake to us kā āqā. Agar koī bojh halkā kar pāe to us kā āqā. Dūsre sab log yih dekhkar us ke pīchhe ho lie. Unheñ lag rahā thā ki Mariyam qabr par jā rahī hai. Īsā Masīh ko dekhte hī wuh us ke pāñwoñ mein gir gāī aur bolī, “Ḳhudāwand, agar āp yahāñ hote to merā bhāī na martā.” Wuh phūṭkar rone lagī. Dūsre hamdardī se sāth sāth rone lage.

Hāy, maut kitnī talkh hai. Ek lamhe mein insān is duniyā aur tamām azīzoñ se judā ho jātā hai. Na wuh rupae-paise, na jūte-kapre apne sāth le saktā hai. Tanhā hī wuh kūch kar jātā hai. Tab kyā hogā? Dūsre taraf us ke azīz baiṭhe ro parṭe haiñ. Un kā dil chhid jātā hai. Kaun yih pyārī jāñ wāpas lāegā? Īsā Masīh ko baṛī ranjish huī. Us ne pūchhā, tum ne use kahāñ rakhā hai?

Unhoñ ne jawāb diyā, āeñ, dekh leñ.

Tab Īsā Masīh ro paṛā.

► *Yih hamēñ us ke bāre meñ kyā sikhātā hai?*

Ham insān use itne pyāre haiñ ki wuh hamāre har dukh-sukh meñ sharīk hotā hai. Jab ham ḡhush hoñ to wuh bhī ḡhush, jab ham roeñ to wuh bhī rotā hai.

Log yih dekhkar kāfī muta’assir hue. “Dekho, wuh use kitnā azīz thā,” unhoñ ne kahā. Lekin kuchh ne kahā, “Is ādmī ne andhe ko shafā dī. Kyā yih Lāzar ko marne se nahiñ bachā saktā thā?”

Tab Īsā Masīh dubārā ranjīdā hokar qabr par āyā. Yih ek ḡhās qabr thī. Ek ḡhār jis ke muñh par patthar rakhā gayā thā. Īsā Masīh bolā, “Patthar ko haṭā do.”

Marthā bolī, “Ḳhudāwand, badbū āegī, kyonki use yahāñ paṛe chār dīn ho gae haiñ.”

Yih dekhne meñ āyā hai ki koī sab ke sāmne murdā lage magar kuchh ghanṭoñ ke bād dubārā harkateñ karne lage. Dil dhaṛakne lagtā, sāns chal paṛtī hai. Yahāñ aisī koī bāt nahiñ thī. Chār dīn ke bād Lāzar pakkā murdā thā.

Iskā ek aur pahlū hai: Pahle Marthā to Īsā Masīh kī bāt mān gai thī ki wuh qiyāmat aur zindagī hai, ki wuh abadī zindagī kā sarchashmā hai. Lekin ab qabr kī nazar meñ us kā yih yaqīn mānd paṛ gayā. Kyā Īsā Masīh sachmuch Lāzar ko jilā saktā hai?

Īsā Masīh ne us se kahā, “Kyā maiñne tujhe nahiñ batāyā ki agar tū īmān rakhe to Allāh kā jalāl dekhegi?” Tab unhoñ ne patthar ko muñh se haṭā diyā. Phir Īsā Masīh ne apnī nazar uṭhākar kahā, “Ai bāp, maiñ terā shukr kartā hūñ ki tūne merī sun lī hai. Maiñ to jāntā hūñ ki tū hameshā merī suntā hai. Lekin maiñne yih bāt pās khaṛe logoñ kī ḡhātīr kī, tāki wuh īmān lāeñ ki tūne mujhe bhejā hai.” Phir wuh zor se pukār uṭhā, “Lāzar, nikal ā!”

► *Phir kyā huā?*

Murdā nikal āyā. Abhī tak us ke hāth aur pānw paṭṭiyon se bandhe hue the jabki us kā chehrā kapre meñ liptā huā thā. Īsā Masīh ne un se kahā, “Is ke kafan ko kholkar ise jāne do.”

Lāzar kī bahneñ kitnī khush huī hoṅgī! Un kā bhāī maut kī duniyā se wāpas ā gayā thā!

Is pūre silsile se ham ek markazī bāt sikhte haiñ.

► *Kyā sikhte haiñ?*

Yih ki Īsā Masīh zindagī kā mañbā hai. Wuhī jī uṭhne kā wasilā hai. Shāyad Lāzar būrhā ho gayā. To bhī use dubārā marnā hī thā. Lekin Lāzar ke andar abadī zindagī kā wuh bij thā jo Īsā Masīh ne us meñ dāl diyā thā. Is duniyā se kūch kar jāne ke bād yih bij use uṭhākar us ke āqā ke pās le gayā.

► *Kyā āp ko yih ummīd hai? Kyā yih bij āp ke andar hai? Kyā āp pakke jānte haiñ ki yih bij āp ko marne ke bād Īsā Masīh kī god meñ le jāegā jahāñ āp is duniyā kī tag-o-do se āzād hokar sukūn aur itmīnān se baseṅge?*

Ek ākhiri pahlū hai jis par hameñ dhyān denā hai: Yih kām dekhkar sab khush na hue. Kuchh us ke khilāf hue. Āie ham dekheñ

Inkār Karne Wālon kā Jawāb

Yih mojizā dekhkar bahut-se log Īsā Masīh par imān lāe. Matlab hai wuh mān gae ki yahī najāt dene wālā al-Masīh hai. Koī aur aisā mojizā nahīn kar saktā. Lekin kuchh ne buzurgoñ ke pās jākar unheñ ittalā dī ki kyā huā hai.

► *Kyā buzurg khush hue ki aisā mojizā huā hai?*

Nahīn. Wuh āpas meñ kahne lage, “Ham kyā kar rahe haiñ? Yih ādmī bahut-se ilāhī nishān dikhā rahā hai. Agar ham use khulā chhoṛeñ to ākhirkār sab us par imān le āeṅge. Phir Romī ākar hamāre Baitul-muqaddas aur hamāre mulk ko tabāh kar deṅge.”

► *Yih log kyon khush nahīn the?*

Unheñ koī parwāh nahīn thī ki mojizā huā hai. Unheñ sirf yih fikr thī ki hamārī izzat kam ho jāegī. Wuh to Romī sarkārī officeron ke sāth mile-jule the. Log Īsā Masīh kā iḡhtiyār māneñ to ho saktā hai ki Romī sarkār nārāz hokar Baitul-muqaddas aur mulk ko nest-o-nābūd kareñ. Tab imām-e-āzm bol uṭhā. Us kā nām Kāyfā thā. Us ne kahā, “Āp kuchh nahīn samajhte aur is kā ḡhyāl bhī nahīn karte ki is se pahle ki pūrī qaum halāk ho jāe behtar yih hai ki ek ādmī ummat ke lie mar jāe.”

Us kā matlab thā ki Īsā Masīh ko ḡhatm karnā chāhie, is se pahle ki pūrā mulk ḡhatm ho jāe. Lekin haqīqat meñ Ḳhudā us ke wasīle se peshgoī kar rahā thā. Īsā Masīh un sab ke lie maregā jo us par imān lāenge, Yahūdion ke lie bhī aur dūsron ke lie bhī.

Us dīn se wuh pakke irāde ke sāth Īsā Masīh ko qatl karne kī sāzishen karne lage. Kitnī ajīb bāt! Ek taraf Īsā Masīh ne ek murde ko zindagī dī. Dūsri taraf log yih dekhkar use maut ke ghāṭ utārne kī sāzishen karne lage. Ek taraf abadī zindagī kī khulī dāwat, dūsri taraf qatl-o-ḡhārat kā pakkā irādā. Ek taraf apnī jān dene kī taiyārī, dūsri taraf apnī kursī mazbūt karne kī siyāsat.

► *Sawāl yih hai: Āp Īsā Masīh ke bāre meñ kyā sochte hain?*
Shāyad āp māneñ ki Īsā Masīh achchhā insān hai. Yih kāfī nahīn hai. Is se āp ko abadī zindagī nahīn milegī. Sachche imān kī zarūrat hai. Wuh imān jo apnī zindagī se Ḳhudā ko jalāl dekar nūr meñ chaltā hai. Aisā imān baḡhtā rahtā hai, apne āqā par pūrā bharosā rakhtā hai. Sab se baḡhkar yih ki wuh abadī zindagī kā bīj apne andar pātā hai. Wuh abadī zindagī jo sirf Īsā Masīh de saktā hai.

Injil, Yūhannā 11,1-54

Lāzar kī Maut

Un dinoñ meñ ek ādmī bīmār paṛ gayā jis kā nām Lāzar thā. Wuh apnī bahnoñ Mariyam aur Marthā ke sāth Bait-aniyāh meñ rahtā thā. Yih wuhī Mariyam thī jis ne bād meñ Īsā Masīh par kḥushbū unḍelkar us ke pāñw apne bāloñ se kḥushk kie the. Usī kā bhāī Lāzar bīmār thā. Chunāñche bahnoñ ne Īsā ko ittalā dī, “Kḥudāwand, jise āp pyār karte haiñ wuh bīmār hai.”

Jab Īsā ko yih kḥabr milī to us ne kahā, “Is bīmārī kā anjām maut nahīñ hai, balki yih Allāh ke jalāl ke wāste huā hai, tāki is se Allāh ke Farzand ko jalāl mile.”

Īsā Marthā, Mariyam aur Lāzar se muhabbat rakhtā thā. To bhī wuh Lāzar ke bāre meñ ittalā milne ke bād do din aur wahīñ ṭahrā. Phir us ne apne shāgirdoñ se bāt kī, “Āo, ham dubārā Yahūdīyā chale jāen.”

Shāgirdoñ ne etarāz kiyā, “Ustād, abhī abhī wahāñ ke Yahūdī āp ko sangsār karne kī koshish kar rahe the, phir bhī āp wāpas jānā chāhte haiñ?”

Īsā ne jawāb diyā, “Kyā dīn meñ raushnī ke bārah ghanṭe nahīñ hote? Jo shaḥs dīn ke waqt chaltā-phirtā hai wuh kisī bhī chīz se nahīñ ṭakrāegā, kyonki wuh is duniyā kī raushnī ke zariye dekh saktā hai. Lekin jo rāt ke waqt chaltā hai wuh chīzoñ se ṭakrā jātā hai, kyonki us ke pās raushnī nahīñ hai.” Phir us ne kahā, “Hamārā dost Lāzar so gayā hai. Lekin main jākar use jagā dūngā.”

Shāgirdoñ ne kahā, “Kḥudāwand, agar wuh so rahā hai to wuh bach jāegā.”

Un kā khyāl thā ki Īsā Lāzar kī fitrī nīnd kā zikr kar rahā hai jabki haqīqat meñ wuh us kī maut kī taraf ishārā kar rahā thā. Isle us ne unheñ sāf batā diyā, “Lāzar wafāt pā

gayā hai. Aur tumhārī k̥hātir main̄ k̥hush hūn̄ ki main̄ us ke marte waqt wahān nahīn thā, kyon̄ki ab tum imān lāoge. Āo, ham us ke pās jāeñ.”

Tomā ne jis k̄a laqab jurwān thā apne sāthī shāgirdon̄ se kahā, “Chalo, ham bhī wahān jākar us ke sāth mar jāeñ.”

Īsā Qiyāmat aur Zindagī Hai

Wahān pahuñchkar Īsā ko mālūm huā ki Lāzar ko qabr meñ rakhe chār din ho gae haiñ. Bait-anīyāh k̄a Yarūshalam se fāslā tīn kilometer se kam thā, aur bahut-se Yahūdī Marthā aur Mariyam ko un ke bhāī ke bāre meñ tasallī dene ke lie āe hue the.

Yih sunkar ki Īsā ā rahā hai Marthā use milne gai. Lekin Mariyam ghar meñ baiṭhī rahī. Marthā ne kahā, “K̥hudāwand, agar āp yahān hote to merā bhāī na martā. Lekin main̄ jāntī hūn̄ ki ab bhī Allāh āp ko jo bhī māñgeñge degā.”

Īsā ne use batāyā, “Terā bhāī jī uṭhegā.”

Marthā ne jawāb diyā, “Jī, mujhe mālūm hai ki wuh qiyāmat ke din jī uṭhegā, jab sab jī uṭheñge.”

Īsā ne use batāyā, “Qiyāmat aur zindagī to main̄ hūn̄. Jo mujh par imān rakhe wuh zindā rahegā, chāhe wuh mar bhī jāe. Aur jo zindā hai aur mujh par imān rakhtā hai wuh kabhī nahīn maregā. Marthā, kyā tujhe is bāt k̄a yaqīn hai?”

Marthā ne jawāb diyā, “Jī K̥hudāwand, main̄ imān rakhtī hūn̄ ki āp K̥hudā ke Farzand Masīh haiñ, jise duniyā meñ ānā thā.”

Īsā Rotā Hai

Yih kahkar Marthā wāpas chalī gai aur chupke se Mariyam ko bulāyā, “Ustād ā gae haiñ, wuh tujhe bulā rahe haiñ.” Yih sunte hī Mariyam uṭhkar Īsā ke pās gai. Wuh abhī gāñw ke bāhar usī jagah ṭhahrā thā jahān us kī

mulāqāt Marthā se huī thī. Jo Yahūdī ghar meñ Mariyam ke sāth baiṭhe use tasallī de rahe the, jab unhoñ ne dekhā ki wuh jaldī se uṭhkar nikal gai hai to wuh us ke pīchhe ho lie. Kyonki wuh samajh rahe the ki wuh mātam karne ke lie apne bhāī kī qabr par jā rahī hai.

Mariyam Īsā ke pās pahunch gai. Use dekhte hī wuh us ke pāñwoñ meñ gir gai aur kahne lagī, “Ḳhudāwand, agar āp yahāñ hote to merā bhāī na martā.”

Jab Īsā ne Mariyam aur us ke sāthiyon ko rote dekhā to use baṛī ranjish huī. Muztarib hālat meñ us ne pūchhā, “Tum ne use kahāñ rakhā hai?”

Unhoñ ne jawāb diyā, “Āeñ Ḳhudāwand, aur dekh leñ.” Īsā ro paṛā. Yahūdiyon ne kahā, “Dekho, wuh use kitnā azīz thā.”

Lekin un meñ se bāz ne kahā, “Is ādmī ne andhe ko shafā dī. Kyā yih Lāzar ko marne se nahīñ bachā saktā thā?”

Lāzar ko Zindā Kar Diyā Jātā Hai

Phir Īsā dubārā nihāyat ranjīdā hokar qabr par āyā. Qabr ek ghār thī jis ke muñh par patthar rakhā gayā thā. Īsā ne kahā, “Patthar ko haṭā do.”

Lekin marhūm kī bahn Marthā ne etarāz kiyā, “Ḳhudāwand, badbū āegī, kyonki use yahāñ paṛe chār din ho gae haiñ.”

Īsā ne us se kahā, “Kyā maiñne tujhe nahīñ batāyā ki agar tū imān rakhe to Allāh kā jalāl dekhegi?” Chunāñche unhoñ ne patthar ko haṭā diyā. Phir Īsā ne apnī nazar uṭhākar kahā, “Ai bāp, maiñ terā shukr kartā hūñ ki tūne merī sun lī hai. Maiñ to jāntā hūñ ki tū hameshā merī suntā hai. Lekin maiñne yih bāt pās khaṛe logoñ kī ḵhātir kī, tāki wuh imān lāeñ ki tūne mujhe bhejā hai.” Phir Īsā zor se pukār uṭhā, “Lāzar, nikal ā!” Aur murdā nikal āyā. Abhī tak us ke hāth

aur pānw paṭṭiyon se bandhe hue the jabki us kā chehrā kapre meñ lipṭā huā thā. Īsā ne un se kahā, “Is ke kafan ko kholkar ise jāne do.”

Īsā ke Ḳhilāf Mansūbābandī

Un Yahūdiyon meñ se jo Mariyam ke pās āe the bahut-se Īsā par imān lāe jab unhoñ ne wuh dekhā jo us ne kiyā. Lekin bāz Farīsiyon ke pās gae aur unheñ batāyā ki Īsā ne kyā kiyā hai. Tab rāhnumā imāmon aur Farīsiyon ne Yahūdī adālat-e-āliyā kā ijlās munaqid kiyā. Unhoñ ne ek dūsre se pūchhā, “Ham kyā kar rahe haiñ? Yih ādmī bahut-se ilāhī nishān dikhā rahā hai. Agar ham use khulā chhoṛeñ to āḳhirkār sab us par imān le āenge. Phir Romī ākar hamāre Baitul-muqaddas aur hamāre mulk ko tabāh kar deñge.”

Un meñ se ek Kāyfā thā jo us sāl imām-e-āzm thā. Us ne kahā, “Āp kuchh nahīñ samajhte aur is kā ḳhyāl bhī nahīñ karte ki is se pahle ki pūrī qaum halāk ho jāe behtar yih hai ki ek ādmī ummat ke lie mar jāe.” Us ne yih bāt apnī taraf se nahīñ kī thī. Us sāl ke imām-e-āzm kī haisiyat se hī us ne yih peshgoī kī ki Īsā Yahūdī qaum ke lie maregā. Aur na sirf is ke lie balki Allāh ke bikhre hue farzandon ko jamā karke ek karne ke lie bhī.

Us dīn se unhoñ ne Īsā ko qatl karne kā irādā kar liyā. Islie us ne ab se alāniyā Yahūdiyon ke darmiyān waqt na guzārā, balki us jagah ko chhoṛkar registān ke qarīb ek ilāqe meñ gayā. Wahāñ wuh apne shāgirdon samet ek gānw banām Ifrāīm meñ rahne lagā.

Ḳhushbū yā Badbū?

Saphal Zindagī kā Raz



Har insān ke dil meñ ek gahrī ḳhāhish hotī hai. Ḳhāhish kyā hai? Yih ki merī zindagī saphal ho, merā jīwan kāmyāb nikle. Merī zindagī kis tarah kāmyāb ho saktī hai? Yūhannā 12 meñ is kā ajīb-o-gharīb jawāb miltā hai. Ek jawāb jo ām soch se kahīn dūr hai. Āie ham is par ghaur karen.

Lāzar ko murdoñ meñ se zindā karne ke bād Īsā Masīh Lāzar ke gānw banām Bait-aniyāh se chalā gayā thā.

► *Wuh kyon chalā gayā thā?*

Us ke muḳhālīf yih mojizā dekhkar ḳhush nahīn the. Is ke ulṭ wuh us ke ḳhilāf sāzishēñ karne lage. Īsā Masīh un ke mansūbe jāntā thā islie wuh chalā gayā. Use mālūm to thā ki use pakaṛā jāegā. Lekin wuh yih bhī jāntā thā ki ab tak ḳhidmat ke kuchh dīn bāqī rah gae haiñ.

Yih bāt Zahn meñ rakhkar wuh kuchh der ke lie kahīn aur ḳhidmat karne lagā. Lekin ek dīn wuh dubārā Bait-aniyāh pahuñchā. Yih ḳhabr sūkhe hue jangal meñ āg kī tarah phail gaī. Gānw ke log itne ḳhush hue ki unhoñ ne Īsā Masīh ko dāwat dekar khāne kā ḳhās intazām kiyā.

Ab dhyān deñ: Yih dāwat Lāzar kī taraf se nahīn thī. Kisī aur ne apne ghar meñ yih intazām karwāyā. To bhī Marthā ākar madad karne meñ juṭ gaī. Yih bāt hamēñ ek aham sabaq sikhātī hai. Yih ki

Marthā kā-sā Josh Apnāo

► *Marthā kyon Īsā Masīh kī ḳhidmat karne lagī hālāñki yih ziyāfat us ke apne ghar meñ nahīn thī?*

Jise Īsā Masīh kī muhabbat pakaṛkar shāgird banā letī hai wuh ḳhushī se ḳhidmat kartā hai. Use apnī hī izzat kī fikr nahīn rahtī.

► *To Marthā itne josh se kyon is k̄hidmat meñ lag gaī?*

Islie ki wuh Īsā Masīh ke lie shadīd muhabbat mahsūs kartī thī. Koī bhī kām bojh nahīn lagtā thā.

Ek aurat kā zikr hai jo apne shauhar se nafrat rakhti thī. Wuh har farz adā to kartī thī, magar baṛī mushkil se. Misāl ke taur par bīwī ko rozānā chhih baje subh tak us kā nāshtā taiyār rakhnā thā. Is qism kā kām use hameshā zulm aur zyādātī lagtā thā aur wuh us ke taht kuṛhtī rahti thī.

Ek din shauhar wafāt pā gayā, aur hote hote aurat kī kisī aur se shādī huī. Nayā shauhar halīm thā, aur un kā āpas meñ pyār baṛhtā gayā. Ek din bīwī ko almārī se ek purānī kāpī mili jis meñ purāne shauhar ke tamām hukm darj the. Us meñ yih bhī likhā thā ki bīwī ko har sūrat meñ 6 baje subh tak breakfast taiyār rakhnā hai. Tab aurat ko ek ajīb sī bāt mahsūs huī. Us ne sochā, ab bhī main apne shauhar ke lie subh 6 baje nāshtā banātī hūn. Ab bhī main yih sāre hukm pūre kartī hūn. Lekin mainne kabhī bhī diqqat mahsūs na kī. Ab to main is se zyādā mushkil kām kartī hūn.

► *Ap kā kyā khyāl hai. Us ne kyon kabhī diqqat mahsūs nahīn kī thī?*

Islie ki bīwī apne nae shauhar se shadīd muhabbat rakhti thī. Muhabbat ke bāis koī bhī kām mushkil nahīn lagtā thā.

Dekho, Marthā us aurat kī tarah thī: Wuh apne āqā ko itnī pyār kartī thī ki kisī bhī kām meñ diqqat mahsūs nahīn hoti thī. Ab to wuh yih kām karte waqt baṛī k̄hushī mahsūs kartī thī. Yahān tak ki wuh dūsre ke ghar meñ gaī tāki apne āqā kī k̄hidmat kare.

Yahī Īsā Masīh aur shariāt meñ farq hai: Shariāt hamen batātī rahti hai ki hamen kyā karnā hai. Aur ham jānte bhī hain ki us ke hukm sahī hain. Lekin ham hameshā kuṛhte rahte hain. Is ke muqābale meñ jab Īsā Masīh hamāre dilon

meñ bastā hai to ham yih hukm ḡhushī se saranjām dete haiñ.

► *Kyon?*

Islie ki us kī muhabbat aur huzūrī hamāre andar rahtī hai. Tab ham ḡhud baḡhud yih kām karnā chāhte haiñ, aur ham dukh mahsūs karte haiñ jab kabhī is meñ fail ho jāte haiñ.

► *Kyā āp ke dil meñ yih muhabbat basti hai? Kyā Īsā Masīh āp ke dil meñ bastā hai?*

Jab wuh hamāre dil meñ bastā hai to hameñ sachmuch āzādī hāsīl hai—wuh āzādī jo sirf aur sirf Injīl kī ḡhushḡhabrī se milti hai.

Lāzar bhī khāne meñ sharīk thā. Ab tak wuh logoñ ke dhyān kā markaz rahā thā. Ab tak sab hairān the ki kafan meñ liptā huā yih ādmī kis tarah qabr meñ se niklā thā. Tab ek wāḡiyā huā jo hameñ ek aur sabaḡ sikhātā hai. Yih ki

Mariyam Jaise Dīwānā Ho Jāo

Achānak Lāzar aur Marthā kī bahn Mariyam kamre meñ dāḡhil huī. Wuh be-chain thī. Us ke hāth meñ nihāyat qīmatī itr kā itrdān thā. Us ne sāre mehmānoñ ke sāmne itrdān kā muñh toḡkar pūrā itr ustād par unḡel diyā. Phir pāñwoñ par ṭapakte tel ko apne bāloñ se poñchhkar ḡhushk kiyā.

Mezbān hakkā-bakkā rah gae. Yih kaisī harkat thī? Hāñ, yih thī kaisī harkat? Yahān kī tarah ḡhawātīn apne bāloñ ko khule kabhī nahīñ rakhtī thin. Phir kisī ke pāñwoñ ko apne bāloñ se poñchhnā—aisī harkat koī nahīñ kartā thā. ḡhulām bhī aisī harkat nahīñ karte the. Lekin Mariyam ko koī parwāh nahīñ thī.

► *Mariyam ko parwāh kyon nahīñ thī?*

Aisā kām sirf wuh kartā hai jo kisī ke bāre meñ itnā pāgal hai ki use dūsroñ kī parwāh hī nahīñ rahtī. Ek aur mauḡe par Mariyam Īsā Masīh kī bātoñ se is qadr muta’assir huī

thī ki Marthā ko use jhīrkī denī paṛī. Kyoṅki ustād kī bātoṅ ke jādū meṅ ākar wuh mezbānoṅ kī k̄hidmat karnā bhūl gaī thī. Īsā Masīh kī huzūrī yoṅ us ke dimāgh par baiṭh gaī thī ki wuh hīl bhī nahīn saktī thī.

► *Kyā āp Īsā Masīh ke bāis is tarah pāgal ho gae haiṅ?*

Ek aur bāt Mariyam ke zahn meṅ zarūr thī. Isrāīl meṅ tīn qism ke logoṅ ke sar par tel unḍelā jātā thā—bādshāh par, nabī par aur imām par.

► *Tel kyon un ke sar par unḍelā jātā thā?*

Is se unheṅ apnī k̄hidmat ke lie maḥsūs kiyā jātā thā. Al-Masīh kā matlab hī yih hai yānī wuh jise masah kiyā gayā hai, jis par tel unḍel diyā gayā hai, jo K̄hudā se ek k̄hās kām ke lie maḥsūs kiyā gayā hai.

Mariyam ko yaqīn thā ki Īsā Masīh yih sab kuchh hai: Wuh merā bādshāh, merā nabī, merā imām hai. Use yaqīn thā ki yahī al-Masīh hai, wuh hastī jo mujhe mere gunāhoṅ se rihā karegā. Jo mujhe Firdaus meṅ dākhil hone ke qābil banā degā.

Isī hastī ke sāmne ham kis tarah ṭhanḍe dil khaṛe rah sakte haiṅ? Jab ham Īsā Masīh ke pakke shāgird ho jāte haiṅ tab ham pāgal ho jāte haiṅ. Tab us ke pānwoṅ meṅ jhukkar apne bāloṅ se unheṅ poṅchhnā ajīb yā nāmunaśib nahīn lagtā. Ham is se ek tīsrā sabaq bhī sīkhte haiṅ, yih ki

Apnī Harkatoṅ se K̄hushbū Phailāo

Jab Mariyam ne itr unḍel diyā to k̄hushbū ghar ke kone kone tak pahuṅch gaī. Mariyam kī yih harkat chhipī na rahī. Wuh sab par zāhir huī.

► *Ham is se apne lie kyā sīkh sakte haiṅ?*

Jab ham Īsā Masīh ke bāis pāgal ho jāte haiṅ to is kī k̄hushbū pūrī duniyā meṅ phail jātī hai.

► *Kyā āp is tarah pāgal ho gae haiṅ ki āpse k̄hushbū phail rahī hai? Yā kyā āp kī badbū logoṅ ko bhagā detī hai?*

- *Dūsrā sawāl, kis tarah patā chaltā hai ki ham se khushbū phailtī hai?*

Is se ki ham Masīh ke pānw poñchh dete haiñ. Dhyān deñ ki Mariyam ne sar ko nahīn poñchh diyā balki pānwōñ ko.

- *Mariyam ne kyon sar ko nahīn balki pānwōñ ko poñchh diyā?*
Poñchhne kā yih kām halīmī kā kām hai. Jo yih kām kartā hai wuh apne āp ko sar ko poñchhne ke lāyq nahīn samajhtā.

Kuchh phūl dekhne meñ bahut achchhe lagte haiñ lekin un kī khushbū nahīn hotī. Bahut-se imāndār aise phike hote haiñ. Un se mālūm nahīn hotā ki wuh Īsā Masīh ke shāgird haiñ.

- *Kyon?*

Unhoñ ne kabhī apne bāloñ se us ke pānw nahīn poñchhe. Aise logoñ kā imān be-mānī hai.

- *Pānw poñchhnā itnā mushkil kyon hotā hai?*

Pānw gande rāstoñ par chalte haiñ, islie wuh dhūl aur gand se latpat ho jāte haiñ. Islie qadīm zamāne meñ log kisī ke pānwōñ ko dhokar poñchhne se apnī halīmī zāhir karte the, sāth sāth wuh dūsre kī khās izzat karte the.

- *To āj ham kis tarah Masīh ke pānw poñchh sakte haiñ?*

Āj ham zarūratmāndoñ kī khidmat karne se us ke pānw poñchh sakte haiñ. Dūsroñ par rāj karnā—yih Īsā Masīh kī rāh nahīn hai. Apne āp ko dūsroñ se chhoṭā samajhnā—yahī Īsā Masīh kī rāh hai. Kyā yih ek aisī bāt nahīn hai jo us ke bahut se shāgird bhūl gae haiñ? Kyā ajab jab un kī zindagī phikī aur nākām rah jātī hai?

- *Ab dhyān deñ: Jab Mariyam ne apne bāloñ se apne āqā ke pānw poñchhkar khushk kie to us ke bāloñ ke sāth kyā huā?*

Apne bāloñ se us ke pānw poñchhne se yih khushbū Mariyam ke bāloñ meñ bhī ā gai.

- *Jab ham Īsā Masīh ke pānw poñchhte haiñ to hamāre bāloñ ke sāth kyā ho jātā hai?*

Jab ham us ke pānwōñ ko poñchhte haiñ to us kī ḡhushbū hamāre bāloñ meñ bhī ā jāti hai—wuh ḡhushbū jo hamēñ us kī yād dilāti hai; wuh mahak jo dūsroñ meñ bhī phail jāti hai. Yahī hamārī zindagī kā asl maqsad hai. Kī ham apne āqā kī ḡhushbū dūsroñ meñ phailāēñ.

Ek chauthā sabaq,

Muhabbat se Ḳhālī Soch se Dūr Raho

Itr kī ḡhushbū pūre ghar meñ phail gaī. Sab yih ḡhushbū sūñgh sūñghkar tar-o-tāzā ho gae. Sab ḡhushbū ke jādū meñ ā gae.

► *Kyā sachmuch sab?*

Nahīñ. Ek nāḡhush huā. Īsā Masīh kā shāgird Yahūdāh Iskariyotī ḡhusse huā. Us ne etarāz kiya, “Is itr kī qīmat chāñdī ke 300 sikke thī. Ise kyon nahīñ bechā gayā tāki is ke paise ḡharīboñ ko die jāte?”

► *Kyā yih bāt sach nahīñ thī?*

Zarūr. Kuchh bāteñ sach to hotī haiñ magar phir bhī kuchh mauqoñ par ḡhalat sābit hotī haiñ. Yih ek aisā mauqā thā.

► *Chāñdī ke 300 sikkoñ kī kyā qīmat thī?*

Us zamāne meñ mazdūr dīn meñ ek sikkā kamātā thā. Ḡharz wuh sāl meñ lagbhag 300 sikke kamā saktā thā. Matlab hai yih itr kāfī mahñgā thā. Jo itr Mariyam ne unḡel diyā thā wuh beshqīmat thā.

► *Kyā Yahūdāh ne yih bāt islie chheṛī kī use ḡharīboñ kī fikr thī?*

Nahīñ. Asl meñ wuh chor thā. Jo thoṛe bahut paise shāgirdoñ ko rāste meñ milte the unheñ wuh sañbhāltā thā. Kuchh na kuchh wuh apne lie nikāltā rahtā thā. To bhī kyā us kī bāt durust nahīñ thī? Kyā Mariyam yih itr bechne se ḡharīboñ kī bahut madad nahīñ kar saktī thī?

Īsā Masīh kā jawāb hamēñ chaunkā detā hai. Us ne farmāyā, “Use chhoṛ de! Us ne merī tadfīn kī taiyārī ke lie yih kiya

hai. Ġharīb to hameshā tumhāre pās raheṅge, lekin main hameshā tumhāre pās nahīn rahūṅgā.”

► *Is kā kyā matlab hai?*

Ġharībōṅ kī madad karnā be-shak achchhā hai. Lekin aisā kām kabhī hamāre dhyān kā markaz nahīn honā chāhie. Ḳhud Īsā Masīh hamārī zindagī kā markaz honā chāhie. Usī se hamēn sab kuchh miltā hai, aur usī kī muhabbat sab kuchh hai. Yoṅ Paulus rasūl farmātā hai,

Agar main apnā sārā māl ġharībōṅ meṅ taqīm kar dūn balki apnā badan jalāe jāne ke lie de dūn, lekin merā dil muhabbat se ḳhālī ho to mujhe kuchh fāyda nahīn. (1 Kurinthyōṅ 13:3)

Is meṅ Mariyam ek achchhā namūnā hai. Wuh hamēn dikhātī hai ki hamārī zindagī meṅ sab se ahm bāt kyā hai. Be-shak māzūroṅ aur ġharībōṅ kī madad karnā achchhā hai. Lekin sab se ahm yih hai ki ham muhabbat rakheṅ. Ki ham Īsā Masīh ko dekhkar dīwānā ho jāeṅ. Ki ham use dekhkar itne pāgal ho jāeṅ ki hamārī be-izzatī hone par bhī hamēn parwāh hī na ho. Mariyam ko yih lā-parwāhī hāsīl hai. Wuh mahsūs kartī hai ki merā āqā sab kuchh hai. Wuh merī zindagī kā sarchashmā, markaz aur manzil hai. Islie main us ke lie apnī sab se qīmatī chīz qurbān kartī hūn.

► *Kyā Īsā Masīh sachmuch āp kā āqā hai? Jab āp ko us kā ḳhyāl ātā hai to kyā āp ke dil meṅ Mariyam kā-sā walwalā ubhar ātā hai? Kyā jab us kā ḳhyāl ātā hai to āp dīwānā ho jāte haiṅ?*

Rahī yih sawāl ki

Merā Kyā Jawāb Hai?

Itne meṅ irdgird ke bahut-se logoṅ ko mālūm huā ki Īsā Masīh wahān hai, aur wuh us se milne āe. Is ke alāwā wuh Lāzar se bhī milnā chāhte the. Yih dekhkar rāhnumā imām Lāzar ko bhī qatl karne kā mansūbā banāne lage. Kyoṅki us

kī wajah se bahut-se log un meñ se chale gae aur Īsā Masīh par imān le āe the.

Ab dekho ki kis tarah ke log Īsā Masīh se milne āe. Kuchh na us ke khilāf, na us ke haq meñ the. Wuh bas tamāshā dekhnā chāhte the. Dūsre use dekhkar imān lāe. Lekin aise log bhī the jo us ke dushman the. Zyādātar rāhnumā us ke dushman the. Kyonki wuh yih bardāsht nahīn kar sakte the ki hamāre apne log Īsā Masīh ke pīchhe ho lie haiñ.

Sawāl yih hai ki āp kyā sochte haiñ? Aisā na ho ki āp Yahūdāh kī tarah hoñ. Us kī tarah jo Marthā aur Mariyam kī-sī muhabbat nahīn rakhtā thā. Jo ṭhanḍe dil se andāzā lagātā rahtā thā ki mujhe Ustād se kyā faydā milegā. Lekin shāyad āp un logoñ jaise hoñ jo sirf tamāshā dekhne us ke pās āe haiñ.

Khudā kare ki ham sab Marthā kī tarah hoñ jo apnī muhabbat pūre josh se khidmat karne se dikhātī thī. Ki ham Mariyam jaise dīwānā hoñ, jis kī khidmat se kone kone tak khushbū phail gaī.

Injil, Yūhannā 12:1-11


Fasah kī Īd meñ abhī chhīh din bāqī the ki Īsā Bait-anīyāh pahuñchā. Yih wuh jagah thī jahāñ us Lāzar kā ghar thā jise Īsā ne murdoñ meñ se zindā kiya thā. Wahāñ us ke lie ek khās khānā banāyā gayā. Marthā khāne wāloñ kī khidmat kar rahī thī jabki Lāzar Īsā aur bāqī mehmānoñ ke sāth khāne meñ sharīk thā. Phir Mariyam ne ādhā liter khālis jaṭāmāsī kā nihāyat qīmatī itr lekar Īsā ke pāñwoñ par unḍel diyā aur unheñ apne bāloñ se poñchhkar khushk kiya. Khushbū pūre ghar meñ phail gaī. Lekin Īsā ke shāgird Yahūdāh Iskariyotī ne etarāz kiya (bād meñ usī ne Īsā ko dushman ke hawāle kar diyā). Us ne kahā, “Is itr kī qīmat chāndī

ke 300 sikke thī. Ise kyon nahīn bechā gayā tāki is ke paise gharīboṅ ko die jāte?” Us ne yih bāt islie nahīn kī ki use gharīboṅ kī fikr thī. Asl meṅ wuh chor thā. Wuh shāgirdoṅ kā ḡhazānchī thā aur jamāshudā paison meṅ se baddiyānati kartā rahtā thā.

Lekin Īsā ne kahā, “Use chhoṛ de! Us ne merī tadfīn kī taiyārī ke lie yih kiyā hai. Gharīb to hameshā tumhāre pās raheṅge, lekin main hameshā tumhāre pās nahīn rahūṅgā.”

Itne meṅ Yahūdiyoṅ kī baṛī tādād ko mālūm huā ki Īsā wahān hai. Wuh na sirf Īsā se milne ke lie āe balki Lāzar se bhī jise us ne murdoṅ meṅ se zindā kiyā thā. Islie rāhnumā imāmoṅ ne Lāzar ko bhī qatl karne kā mansūbā banāyā. Kyonki us kī wajah se bahut-se Yahūdī un meṅ se chale gae aur Īsā par imān le āe the.

Zamīn meñ Dānā
Al-Masīh ke Pīchche Ho Lene
kā Matlab



Īsā Masīh Bait-aniyāh meñ ṭaharrā huā thā. Yih gāñw Yarūshalam shahr ke nazdīk thā. Wahāñ us ne Lāzar ko murdoñ meñ se zindā kiyā thā. Wahāñ Lāzar kī bahn Mariyam ne Īsā Masīh par tel unḍelkar apnī muhabbat kā izhār kiyā thā.

Fasah kī baṛī Īd qarīb thī, islie anginat log dūr-darāz mulkoñ se Yarūshalam ā chuke the. Yarūshalam meñ Īsā Masīh ke dushman bhī tāk meñ baiṭhe the. Wahāñ us par qabzā karne ke bahut mauqe the.

Īsā Masīh un kī sāzishen kḥūb jāntā thā. To bhī wuh agle din Yarūshalam ke lie rawānā huā. Ek baṛī bhīṛ sāth chal paṛī. Shahr se bhī ek baṛā hujūm us se milne nikal āyā. Bahutoñ ke hāth meñ khajūr kī ḍālī thī.

► *Khajūr kī ḍālī kyon?*

Khajūr kī ḍālī kḥushī aur fath kā nishān thī. Khajūr kī ḍālīyon se wuh apnī tawaqqo zāhir kar rahe the ki Īsā Masīh Yarūshalam meñ dāḡhil hokar bādshāh banegā. Islie wuh chillākar nāre bhī lagāne lage,

Hoshānā!

Mubāarak hai wuh jo Rab ke nām se ātā hai!

Isrāil kā bādshāh mubāarak hai! (Yūhannā 12:13)

► *Hoshānā kā kyā matlab hai?*

Hoshānā Ibrānī hai. Is kā matlab ‘Mehrbānī karke hamen bachā!’ hai.

► *Yih ām nārā nahīñ hai. Yih nārā pāk kalām kā ek hawālā hai. Kaun-sā hawālā?*

Yih nārā ek zabūr kā hawālā hai jo Fasah kī Īd par gāyā jātā thā (Zabūr 118:25-26). Yih gākar log āne wāle al-Masīh

ko yād karte the. ‘Isrāil kā bādshāh mubāarak hai’ un kī taraf se izāfā thā.

► *Wuh yih kyon chillā rahe the?*

Is se wuh sāf elān kar rahe the ki Īsā āne wālā al-Masīh hai, wuh bādshāh jo dushman ko mulk se haṭā degā.

Ab dhyān deñ ki Īsā Masīh ne jawāb meñ kyā kiyā, kyonki is se ham ek ahm sabaq sikhate haiñ. Yih ki

Masīh kī Halīmī Apnāo

Īsā Masīh ek jawān gadhe par baiṭh gayā.

► *Wuh gadhe par kyon baiṭh gayā?*

Yūhannā is kā jawāb detā hai:

Jis tarah Kalām-e-muqaddas meñ likhā hai,
Ai Siyyūn beṭī, mat ḍar!
Dekh, terā bādshāh gadhe ke bachche par
sawār ā rahā hai.
(Yūhannā 12:15)

► *Yih Kalām-e-muqaddas kā kaun-sā hawālā hai?*

Zakariyāh Nabī ne yih farmāyā thā.

► *Is se Yūhannā kyā kahnā chāhtā hai?*

Ham is kā matlab behtar taur se samjheñge agar ham Zakariyāh kā pūrā hawālā parheñ. Wahāñ likhā hai,

Ai Siyyūn beṭī, shādiyānā bajā! Ai Yarūshalam beṭī, shādmānī ke nāre lagā! Dekh, terā bādshāh tere pās ā rahā hai. Wuh rāstbāz aur fathmand hai, wuh halīm hai aur gadhe par, hāñ gadhī ke bachche par sawār hai. [...] Mau’ūdā bādshāh ke kahne par tamām aqwām meñ salāmatī qāym ho jāegī. Us kī hukūmat ek samundar se dūsre tak aur Dariyā-e-Furāt se duniyā kī intahā tak mānī jāegī.
(Zakariyāh 9:9-10)

- *Is se āne wāle bādshāh al-Masīh ke bāre meñ kyā kyā bāteñ nikaltī haiñ?*
- Wuh halīm hogā. Islie wuh gadhe ke bachche par sawār hogā.
 - Wuh tamām aqwām meñ salāmatī qāym karegā.
 - Us kī hukūmat pūrī duniyā par hogī.
- *Is soch meñ aur Yarūshalam ke logon kī soch meñ kyā farq thī?*
Log ek jangjū bādshāh chāhte the jo dushman se intaqām legā. Is ke muqābale meñ Īsā Masīh gadhe par baiṭhkar ek aur rāstā dikhā rahā thā—halīmī kā rāstā, salāmatī kā rāstā. Be-shak us kī hukūmat bainul-aqwāmī hogī, lekin yih amn-o-amān kī hukūmat hogī. Dūsri qaumeñ bhī is meñ shāmil hoñgī.

Us waqt us ke shāgirdon ko is bāt kī samajh na āī. Lekin Īsā Masīh ke jī uṭhne ke bād unheñ samajh āī.

- *Shāgirdon ko kyā bāt samajh na āī? Kyā hujūm ne pahle se nahīñ pukārā thā ki Īsā Masīh Isrāīl kā bādshāh hai?*
Zarūr. Lekin us waqt kisī ko yih bāt samajh na āī ki Īsā Masīh kī rāh halīmī kī rāh hai, wuh rāh jo salīb tak pahuñchāegī.

Dūsra sabaq jo ham sikhte haiñ,

Masīh se Milo

Kuchh Yūnānī Yarūshalam meñ the. Wuh bhī Īd manāne ke lie āe the.

- *Yih Yūnānī kyon Īd manāne āe the? Yih to Ġhairyahūdī the jo Yūnānī bolte the.*
Yih log Yahūdī mazhab aur shariyat bahut pasand karte the islie un kī ideñ manāte the.

Ab wuh Filippus se milne āe. Unhon ne kahā, “Janāb, ham Īsā se milnā chāhte haiñ.”

- *Yih Ġhairyahūdī kyon Īsā Masīh se milnā chāhte the?*
Injīl kī khushkhabrī Ġhairyahūdiyon meñ bhī phailne lagī thī. Unheñ patā chal gayā thā ki yih ām rāhnumā

nahīn hai. Isliē wuh jānanā chāhte the ki kyā yih al-Masīh hai.

In logoñ ne ek kām ṭhīk kiyā: Wuh Īsā Masīh se milne āe. Jo is duniyā kī tārīkī se najāt pānā chāhtā hai lāzim hai ki wuh Īsā Masīh se milne āe. Yih pahlā qadam hai.

► *Kyā āp Īsā Masīh se milne āe haiñ?*

Yahūdiyoñ kī tarah yih log bhī andāzā lagā rahe the ki Īsā Masīh baṛā bādshāh banegā. Isliē behtar yih hai ki ham pahle se us ke sāthī baneñ. Ab dhyān deñ ki Īsā Masīh ne kyā jawāb diyā, kyonki yih bahut ahm hai. Is se ham tīsrā sabaq sīkh lete haiñ. Yih ki

Zamīn meñ Dānā Bano, Tab Phal Lāoge

Us ne farmāyā,

Ab waqt ā gayā hai ki Ibn-e-Ādam ko jalāl mile. Maiñ tum ko sach batātā hūñ ki jab tak gandum kā dānā zamīn meñ girkar mar na jāe wuh akelā hī rahtā hai. Lekin jab wuh mar jātā hai to bahut-sā phal lātā hai. (Yūhannā 12:23-24)

► *Dāne kī is misāl kā kyā matlab hai?*

Gandum kā dānā agar zamīn meñ ḍālā na jāe to akelā hī rahtā hai. Jab zamīn meñ ḍālā jātā hai to wuh mar jātā hai, tab hī kasrat kā phal lātā hai.

► *Īsā Masīh dāne kī misāl se Yūnāniyoñ ko kyā batānā chāhtā thā?*

Tum log dekhnā chāhte ho ki maiñ Isrāīl kā jangjū bādshāh ban jāūñ. Lekin merī rāh farq hai. Maiñ zarūr jalāl pāūngā, magar is duniyā meñ baṛā banane se nahīn. Merī rāh salīb kī rāh hai—wuh rāh jis se maiñ sachmuch kasrat kā phal lāūngā. Wuh rāh jis se tum sachmuch āzād ho jāoge, sachmuch abadī zindagī pāoge. Jis se sachmuch salāmatī hāsil hogī. Shart yih hai ki tum mujh par imān lāo, mujh par jis ne halīmī kī yih rāh apnāi hai.

Lekin halīmī kī yih rāh na sirf Īsā Masīh kī hai. Yih us ke shāgirdon kī bhī hai. Islie us ne farmāyā,

Jo apnī jān ko pyār kartā hai wuh use kho degā, aur jo is duniyā meñ apnī jān se dushmanī rakhtā hai wuh use abad tak mahfūz rakhegā. Agar koī merī k̄hidmat karnā chāhe to wuh mere pīchhe ho le, kyonki jahān main hūñ wahān merā k̄hādim bhī hogā. Aur jo merī k̄hidmat kare merā bāp us kī izzat karegā. (Yūhannā 12:25-26)

- *Apnī jān se dushmanī rakhne kā kyā matlab hai? Kyā is kā matlab yih hai ki ham yogī ban jāen? Ki ham apne jism ko dabāte raheñ, apne anā ko k̄hatm karne kī koshish kareñ?*

Nahīñ, Īsā Masīh yahān apne pīchhe ho lene kī bāt kar rahā thā: Jo apnī jān ko awwaliyat detā hai us kā āqā Īsā Masīh nahīñ ho saktā. Aisā shaḡhs apnī jān ko kho degā, yāñi wuh najāt nahīñ pāegā. Is ke muqābale meñ apnī jān se dushmanī rakhne kā matlab yih hai ki main Īsā Masīh ko awwaliyat dūñ. Jo aisā kartā hai wuh apnī jān ko abad tak mahfūz rakhegā. Īsā Masīh ke pīchhe ho lene kā matlab yahī hai: ki main us kī k̄hātir apnī jān dene tak taiyār hūñ.

- *Iskā kyā matlab hai ki ‘Jahān main hūñ wahān merā k̄hādim bhī hogā’?*

Īsā Masīh kī rāh halīmī kī rāh hai, aisī halīmī jo salīb tak pahunchtī hai. Jo us kā shāgird hai us kī bhī yahī rāh hai.

- *Halīmī kī yih rāh kaisī hai?*

Barī bāt yih hai ki ham Masīh ko pyār kareñ, use awwaliyat deñ. Tab hamārī jān mahfūz rahegī, chāhe ham us kī k̄hidmat meñ mar bhī jāen. Lekin agar is duniyā kī izzat aur daulat hamārī zindagī meñ awwaliyat rakhe to apnī jān ko abad tak mahfūz rakhne kā chance hī nahīñ rahtā. Yon shāgird kī rāh Īsā Masīh kī rāh hai.

Safdar Ali ek aisā ādmī thā jis ne Īsā Masīh ko awwaliyat dī. Wuh ūnche darje kā maulwī thā. Īsā Masīh ke pīchhe ho lene se use saḡht diqqat huī. Wuh farmātā hai, merī qaum ke logoñ ne mujhe dūdh se makkhī kī mānind dūr phenk diyā. Unhoñ ne muhabbat aur qarābat ke tamām wāste tor ḡāle. Kisī ne hamāre ahl-o-ayāl ko bahkāyā aur bhagāyā. Kisī ne note, kisī ne kitābeñ, kisī ne bahut-se qīmatī kāḡhazon ko churāyā. Bāzoñ ne achchhī tarah se bhārī chalte-chalāte press ko tuṛwāyā. Koī rupae aur kitābeñ lekar bhāḡ gayā. Kisī ne press kī kaī hazār kitāboñ par hamlā karke kauṛiyōñ ke mol bikwāyā. Kisī ne māl-o-asbāb dabāyā. Kisī ne makān hī dabwāyā. Aur isī tarah jis ke jo jī meñ āyā kar guzrā. Ab tak wuh merā pīchhā nahīñ chhoṛte.

Safdar Ali ko patā chalā ki zamīn meñ bīj bone kā kyā matlab hai.

Salīb kī rāh ke bāre meñ ham ek aur sabaq sīkhate haiñ. Yih ki

Apnī Zindagī se Ḳhudā ko Jalāl Do

- *Kyā salīb kī yih rāh Īsā Masīh ke lie āsān thī?*

Nahīñ, wuh had se zyādā pareshān thā. Us ne farmāyā,

Ab merā dil muztarib hai. Main kyā kahūñ? Kyā main kahūñ, ‘Ai bāp, mujhe is waqt se bachāe rakh’? Nahīñ, main to isī lie āyā hūñ. Ai bāp, apne nām ko jalāl de. (Yūhannā 12:27-28)

- *Kyā us ne yih duā kī ki mujhe maut se bachā?*

Nahīñ.

- *Kyōñ nahīñ?*

Wuh to islie āyā thā.

- *Kyōñ āyā thā?*

Tāki apnī maut se hamārī sazā uṭhāe, hameñ gunāh aur maut ke qabze se chhuṛāe.

- *Bachne ke bajāe Īsā Masīh ne kyā duā kī?*

Ai bāp, apne nām ko jalāl de.

- *So hamārī sab se baṛī duā kyā honī chāhie?*

Yih ki Ḳhudā hamārī zindagī se apne nām ko jalāl de.

Tab āsmān se ek āwāz sunāī dī, “Main use jalāl de chukā hūn aur dubārā bhī jalāl dūngā.”

Jo log wahān khare the unhoñ ne yih sunkar kahā, “Bādal garaj rahe haiñ.” Auroñ ne ḳhyāl pesh kiyā, “Koī farishtā us se hamkalām huā hai.”

- *Kyā unheñ samajh āī ki āwāz kyā kah rahī hai?*

Nahīñ. Lekin wuh samajh gae ki yih Ḳhudā kī taraf se jawāb hai. Īsā Masīh ne farmāyā, “Yih āwāz mere wāste nahīñ balki tumhāre wāste thī.” Matlab hai tāki tum samjho ki yih bāt Allāh Ta’ālā kī taraf se hai.

Lekin jo Īsā Masīh kī yih rāh nahīñ apnātā us ke sāth kyā hogā? Use Īsā ne āgāh kiyā ki

Adālat se Bacho

Us ne farmāyā,

Ab duniyā kī adālat karne kā waqt ā gayā hai, ab duniyā ke hukmrān ko nikāl diyā jāegā. Aur main ḳhud zamīn se ūñche par chaṛhāe jāne ke bād sab ko apne pās khīñch lūngā.
(Yūhannā 12:31-33)

- *Salīb kī rāh kis qism kī rāh hai?*

Adālat kī rāh.

- *Kis kī adālat kī jāegī?*

Duniyā kī aur duniyā ke hukmrān kī.

- *Duniyā kā hukmrān kaun hai?*

Iblīs.

- *Us kī adālat kis tarah kī jāegī?*

Apnī salībī maut se Īsā Masīh us par fath pāegā.

- *Kyā is kā matlab hai ki salībī maut se Iblīs duniyā kā hukmrān nahīñ rahā?*

Nahīn. Is kā matlab hai ki ab se us kī tabāhī yaqīnī hai, ab us kā thoṛā waqt bāqī rah gayā hai (dekhie Mukāshafā 12:12).

► *Duniyā kī adālat kis tarah kī jāegī?*

Jo Īsā Masīh kī salībī maut qabūl karke us par imān lāenge wuh adālat se bach jāenge. Jo inkār karenge un kī adālat kī jāegī. Unhoñ ne Īsā Masīh kī najāt qabūl nahīn kī, islie wuh apne gunāhoñ meñ tabāh ho jāenge.

► *Main khud zamīn se ūñche par chaṛhāe jāne ke bād sab ko apne pās khīnch lūngā: Is kā kyā matlab hai?*

Zamīn se ūñche par chaṛhāe jāne ke do mānī haiñ. Ek, Masīh ko salīb par chaṛhāyā jāegā. Dūsre, is rāste se use āsmān par uṭhā liyā jāegā. Wahāñ pahuñchkar wuh un ko apne pās khīnch lāegā jo us par imān lāe haiñ. Ek ākhirī sabaq,

Nūr meñ Chalo, Tab Masīh ko Jān Loge

► *Yih bāt sunkar logoñ ne kyā jawāb diyā?*

Wuh bol uṭhe, “Kalām-e-muqaddas se ham ne sunā hai ki Masīh abad tak qāym rahegā. To phir āp kī yih kaisī bāt hai ki Ibn-e-Ādam ko ūñche par chaṛhāyā jānā hai? Ākhir Ibn-e-Ādam hai kaun?”

Īsā Masīh kī bāteñ sunkar log samajh gae ki Masīh wuh kuchh nahīn karegā jo ham chāhte haiñ. Islie unhoñ ne kahā ki ākhir tum kaun ho?

Tab Īsā Masīh ne farmāyā,

Nūr thoṛī der aur tumhāre pās rahegā. Jitnī der wuh maujūd hai is nūr meñ chalte raho tāki tārikī tum par chhā na jāe. Jo andhere meñ chaltā hai use nahīn mālūm ki wuh kahāñ jā rahā hai. Nūr ke tumhāre pās se chale jāne se pahle pahle us par imān lāo tāki tum nūr ke farzand ban jāo. (Yūhannā 12:35-36)

► *Jab logoñ ne pūchhā ki ākhir tum kaun ho to Īsā Masīh ne yih jawāb kyon diyā?*

Kuchh bāteñ aisi haiñ jo ham sirf aur sirf Īsā Masih ke pīchhe ho lene se samajh sakte haiñ. Islie wuh farmātā hai ki nūr meñ chalte raho. Jo tārīkī meñ chaltā hai wuh nahīn samajh saktā ki Īsā Masih kaun hai.

Yih kahne ke bād Īsā chalā gayā aur ghāyb ho gayā. Wuh kyon ghāyb huā? Log us kī bātoñ se māyūs ho rahe the, kyonki salīb kī yih rāh unheñ nahīn bhātī thī. Sāth sāth ab Īsā Masih kī alāniyā khidmat khatm huī. Ab se us kī tālīm shāgirdoñ par mahdūd rahī.

Īsā Masih kī yih bāteñ ittafāq se nahīn huīñ. Apnī alāniyā khidmat ke iḡtitām par wuh apnī salībī rāh par zor denā chāhtā thā hālāñki wuh jāntā thā ki us waqt yih unheñ be-tukī-sī lag rahī thī. Lekin yih bāteñ āj bhī Masih kī pairawī kī buniyād rahī haiñ. Islie āo,

- Masih kī halīmī apnāo.
- Masih se milo.
- Zamīn meñ dānā bano, tab phal lāoge.
- ẖhudā ko jalāl do.
- Adālat se bacho.
- Nūr meñ chalo, tab Masih ko jān loge.

Injil, Yūhannā 12:12-36

Agle dīn Īd ke lie āe hue logoñ ko patā chalā ki Īsā Yarūshalām ā rahā hai. Ek barā hujūm khajūr kī dāliyāñ pakṛe shahr se nikalkar us se milne āyā. Chalte chalte wuh chillākar nāre lagā rahe the,

Hoshānā!

Mubāarak hai wuh jo Rab ke nām se ātā hai!

Isrāil kā bādshāh mubāarak hai!

Īsā ko kahīñ se ek jawān gadhā mil gayā aur wuh us par baiṭh gayā, jis tarah Kalām-e-muqaddas meñ likhā hai,

Ai Siyyūn beṭi, mat ḍar!

Dekh, terā bādshāh gadhe ke bachche par sawār ā rahā hai.

Us waqt us ke shāgirdoñ ko is bāt kī samajh na āī. Lekin bād meñ jab Īsā apne jalāl ko pahuñchā to unheñ yād āyā ki logoñ ne us ke sāth yih kuchh kiyā thā aur wuh samajh gae ki Kalām-e-muqaddas meñ is kā zikr bhī hai. Jo hujūm us waqt Īsā ke sāth thā jab us ne Lāzar ko murdoñ meñ se zindā kiyā thā, wuh dūsroñ ko is ke bāre meñ batātā rahā thā. Isī wajah se itne log Īsā se milne ke lie āe the, unhoñ ne us ke is ilāhī nishān ke bāre meñ sunā thā. Yih dekhkar Farīsī āpas meñ kahne lage, “Āp dekh rahe haiñ ki bāt nahīñ ban rahī. Dekho, tamām duniyā us ke pīchhe ho lī hai.”

Kuchh Yūnānī bhī un meñ the jo Fasah kī Īd ke mauqe par parastish karne ke lie āe hue the. Ab wuh Filippus se milne āe jo Galīl ke Bait-saidā se thā. Unhoñ ne kahā, “Janāb, ham Īsā se milnā chāhte haiñ.”

Filippus ne Andriyās ko yih bāt batāī aur phir wuh milkar Īsā ke pās gae aur use yih khabar pahuñchāī.

Lekin Īsā ne jawāb diyā, “Ab waqt ā gayā hai ki Ibn-e-Ādam ko jalāl mile. Main tum ko sach batātā hūn ki jab tak gandum kā dānā zamīn mein girkar mar na jāe wuh akelā hī rahtā hai. Lekin jab wuh mar jātā hai to bahut-sā phal lātā hai. Jo apnī jān ko pyār kartā hai wuh use kho degā, aur jo is duniyā mein apnī jān se dushmanī rakhtā hai wuh use abad tak mahfūz rakhegā. Agar koī merī k̄hidmat karnā chāhe to wuh mere pīchhe ho le, kyonki jahān main hūn wahān merā k̄hādīm bhī hogā. Aur jo merī k̄hidmat kare merā bāp us kī izzat karegā. Ab merā dil muztarib hai. Main kyā kahūn? Kyā main kahūn, ‘Ai bāp, mujhe is waqt se bachāe rakh’? Nahīn, main to isī lie āyā hūn. Ai bāp, apne nām ko jalāl de.” Tab āsmān se ek āwāz sunāī dī, “Main use jalāl de chukā hūn aur dubārā bhī jalāl dūngā.”

Hujūm ke jo log wahān khaṛe the unhoñ ne yih sunkar kahā, “Bādāl garaj rahe haiñ.” Auroñ ne k̄hyāl pesh kiyā, “Koī farishtā us se hamkalām huā hai.”

Īsā ne unheñ batāyā, “Yih āwāz mere wāste nahīn balki tumhāre wāste thī. Ab duniyā kī adālat karne kā waqt ā gayā hai, ab duniyā ke hukmrān ko nikāl diyā jāegā. Aur main k̄hud zamīn se ūñche par chaṛhāe jāne ke bād sab ko apne pās khiñch lūngā.” In alfāz se us ne is taraf ishārā kiyā ki wuh kis tarah kī maut maregā.

Hujūm bol uṭhā, “Kalām-e-muqaddas se ham ne sunā hai ki Masīh abad tak qāym rahegā. To phir āp kī yih kaisī bāt hai ki Ibn-e-Ādam ko ūñche par chaṛhāyā jānā hai? Ākhir Ibn-e-Ādam hai kaun?”

Īsā ne jawāb diyā, “Nūr thoṛī der aur tumhāre pās rahegā. Jitnī der wuh maujūd hai is nūr mein chalte raho tāki tārīkī tum par chhā na jāe. Jo andhere mein chaltā hai use nahīn mālūm ki wuh kahān jā rahā hai. Nūr ke

tumhāre pās se chale jāne se pahle pahle us par imān
lāo tāki tum nūr ke farzand ban jāo.”

Al-Masīh Par Īmān

Yih Kyā Hai?



Jab Īsā Masīh ākhiri bār Yarūshalam men dākhlil huā to us kā purjosh istiqbāl huā. Log khushī manāne lage. Unheñ lagā ki Īsā Masīh bādshāh bankar dushman ko mulk se haṭā degā. Lekin us ne aisā na kiyā. Us ne unheñ batāyā ki merī rāh halīmī kī rāh hai. Is ke bād wuh chhip gayā. Yoñ us kī khul-e-ām khidmat iḡhtitām par pahuñchā. Us waqt se wuh sirf apne shāgirdoñ ke mahdūd dāyre men tālīm dene lagā. Is se pahle ki Yūhannā yih ākhiri bāteñ pesh kartā hai wuh Masīh kī āmad kā maqsad aur kalām thoṛe lafzoñ men dohrātā hai.

► *Yūhannā is jagah par yih khulāsā kyon pesh kartā hai?*

Yūhannā hameñ sāf dikhānā chāhtā hai ki Īsā Masīh par imān kyā chīz hai. Pahlī bāt,

Īsā Masīh ko Haqīr Mat Jāno

Īsā Masīh ne yih tamām ilāhī nishān logoñ ke sāmne hī dikhāe. To bhī wuh us par imān na lāe. Kitnī baṛī tragedy! Us ne itne mojize kar dikhāe the, to bhī aksar log imān na lāe. Sab us kā kalām sunkar dang rah jāte the. Un ke dīnī rāhnumā to is tarah kī bāteñ nahīn karte the. To bhī aksar log imān na lāe.

► *Imān na lāne kī kyā wajah thī?*

Imān na lāne ke pīchhe ek rūhānī haqīqat thī. Sadiyon pahle Yasāyāh Nabī farmā chukā thā ki

Ai Rab, kaun hamāre paighām par imān lāyā?
Aur Rab kī qudrat kis par zāhir hui?
(Yūhannā 12:38; Yasāyāh 53:1 se)

► *Is ke pīchhe rūhānī haqīqat kyā hai?*

Aksar log Ḳhudā ke kalām par imān nahīn lāenge.

- *Jab log us kā kalām haqīr jānte haiñ to kyā Ḳhudā ko is se koī farq nahīñ paṛtā?*

Use zarūr farq paṛtā hai. Yūhannā, Yasāyāh Nabī kā hawālā lekar farmātā hai,

Allāh ne un kī āñkhoñ ko andhā
 Aur un ke dīl ko be-his kar diyā hai,
 Aisā na ho ki wuh apnī āñkhoñ se dekheñ,
 Apne dīl se samjheñ,
 Merī taraf rujū karen
 Aur main unheñ shafā dūñ.
 (Yūhannā 12:40; Yasāyāh 6:9-10 se)

- *Jab koī Ḳhudā kā kalām haqīr jāntā hai to Ḳhudā kā kyā jawāb hai?*

Ḳhudā hone detā hai ki aisā shaḵhs rūhānī bātoñ ke lie itnā andhā aur be-his ho jāe ki wuh āindā shāyad hī taubā karke rūhānī shafā pāe.

- *Yūhannā logoñ kā kufr kyon itnī saḵhti se pesh kartā hai?*
 Wuh nahīñ chāhtā ki ham Īsā Masīh kā kalām aur kām haqīr jānane se us najāt se mahrūm rah jāeñ jo Īsā Masīh ke wasīle se miltī hai. Āge wuh kufr ke bure natījoñ par aur zor detā hai.

Kufr ke Bure Natije

Yūhannā farmātā hai ki

Yasāyāh ne yih islie farmāyā kyonki us ne Īsā kā jalāl dekhkar us ke bāre meñ bāt kī.
 (Yūhannā 12:41)

- *Yasāyāh Nabī to kāī sadiyon pahle mar chukā thā. Us ne kis tarah Īsā Masīh kā jalāl dekh liyā thā?*

Yūhannā kā kahnā hai ki Ḳhudā aur Īsā Masīh kā jalāl ek hī hai. Jahāñ Ḳhudā bāp hai wahāñ Ḳhudā beṭā bhī hotā hai. Jab nabī ne royā meñ Ḳhudā kā jalāl dekhā to us ne Īsā Masīh kā jalāl bhī dekhā.

Yon Masīh kā jalāl nabī par zāhir huā. Tab Ẹhudā ne farmāyā ki merā paighām sunākar tū logoñ ke dilon ko be-his kar dālegā. Nabī ne pūchhā ki main kab tak kalām sunāūñ? Use jawāb milā ki us waqt tak ki mulk ke shahr wīrān-o-sunsān, us ke ghar ghairābād aur us ke khet banjar na hon (Yasāyāh 6:11). Yih peshgoī nabī ke jīte-jī pūrī huī: Isrāīl barbād huā aur qaum muḡhtalif mulkon meñ tittar-bittar huī.

► *Yūhannā is hawāle se kyā kahnā chāhtā hai?*

Jis tarah Isrāīliyon ne Yasāyāh Nabī kā kalām rad kiyā thā usī tarah aksar logoñ ne Īsā Masīh kā kalām rad kiya hai. Yasāyāh Nabī kā paighām rad karne se logoñ ke dil rūhānī sachchāiyon ke lie andhe ho gae aur natije meñ pūrā mulk tabāh huā. Isī tarah Īsā Masīh kā kalām rad karne se logoñ ke dil rūhānī sachchāiyon ke lie andhe ho gae aur bād meñ pūrā mulk barbād huā, be-shumār Yahūdī muḡhtalif mulkon meñ tittar-bittar hue.

► *Kyā āp samajhte haiñ ki Īsā Masīh ek azīm nabī hai aur bas?* Yih kāfī nahīñ hai. Is se najāt nahīñ milegī. Is se āp gunāh ke bure natijon se nahīñ bacheñge. Is se āp Ẹhudā kī nazar meñ mañzūr nahīñ ho jāeñge, āp jannat meñ dāḡhil nahīñ ho pāeñge.

Lekin Yūhannā hamēñ ek aur qism kī be-īmānī se bhī ḡhabrdār rakhnā chāhtā hai. Wuh farmātā hai ki

Apnā Īmān Chhipāe Mat Rakho

Pūrī qaum ne to Īsā Masīh ko rad nahīñ kiya thā. Kāfī log us par īmān rakhte the. Kuchh rāhnumā bhī un meñ shāmīl the, hālāñki wuh dūsron ke bāis yih bāt khule taur se nahīñ kahte the.

► *Yih rāhnumā kyon khule taur se nahīñ kahte the ki ham īmān rakhte haiñ?*

Yūhannā farmātā hai ki wuh nahīñ chāhte the ki unheñ Yahūdī jamāt se nikālā jāe. Wuh Allāh kī izzat kī nisbat insān kī izzat ko zyādā azīz rakhte the.

► *Is se ham kyā sīkhte haiñ?*

Un logoñ jaise mat bano jo īmān to lāe the phir bhī yih bāt chhipāe rakhte the. Jab ham apnā īmān chhipāte haiñ to ham Īsā Masīh ko dukh pahuñchāte haiñ. Yūhannā farmātā hai ki yih nahiñ chalegā ki tum Allāh kī izzat kī nisbat insān kī izzat zyādā azīz rakho.

Ab tak Yūhannā ne khule taur se īmān rakhne par zor diyā. Lekin Īsā Masīh par īmān hai kyā? Is kā jawāb wuh ab detā hai. Pahle,

Nūr Pākar Tārīkī se Bacho

Īsā Masīh ne farmāyā,

Main nūr kī haisiyat se is duniyā meñ āyā hūñ tāki jo bhī mujh par īmān lāe wuh tārīkī meñ na rahe. (Yūhannā 12:46)

► *Nūr kā andhere par kyā asar hotā hai?*

Jahāñ nūr kī tez raushnī phailtī hai wahāñ andherā dūr ho jātā hai. Jis ke dil meñ nūr basne lage us se andherā dūr ho jātā hai.

► *Nūr kis tarah miltā hai?*

Īsā Masīh par īmān lāne se. Wuh ḵhud nūr hai.

► *Us par īmān kyon itnā ṭhos hai (āyat 44)?*

Islie ki use Ḵhudā bāp se bhejā gayā hai. Jo us par īmān rakhe wuh Ḵhudā bāp par īmān rakhtā hai.

Ġharz, Īsā Masīh Ḵhudā bāp se bhejā gayā nūr hai, aur sirf use pāne se insān tārīkī se bachegā. Yoñ pahlā qadam yih hai ki ham ilāhī nūr yānī Masīh ko pākar us se bhar jāeñ.

► *Ham kis tarah yih nūr pā sakte haiñ?*

Īsā Masīh aur us kā kalām qabūl karne se. Tab yih nūr hamāre andar phailne lagtā, chamakne-damakne lagtā hai.

Dūsri bāt,

Use Dekhte Raho

Īsā Masīh ne yih bhī farmāyā,

Jo mujhe dekhtā hai wuh use dekhtā hai jis ne mujhe bhejā hai. (Yūhannā 12:45)

► *Ham kis tarah Īsā Masīh ko dekh sakte haiñ?*

Īmān lāne se wuh hamāre diloñ meñ basne lagtā hai. Tab ham Īmān meñ use dekh sakte haiñ. Aur use dekhkar ham Ḳhudā bāp ko bhī dekh sakte haiñ.

► *Ham Masīh ke zariye Ḳhudā bāp ko kyon dekh sakte haiñ?*

Islie ki wuh Ḳhudā kā nūr hai jo is duniyā meñ bhejā gayā tāki hamēñ raushan karke bachāe. Ḳhudā bāp sūraj jaisā hai jabki Īsā Masīh us kī raushnī hai, us kā nūr jo is duniyā meñ ā gayā hai. Ham sūraj ko sirf nūr ke zariye dekh sakte haiñ.

► *Ġharz imāndār ko kyā karnā hai?*

Use bas Masīh ko dekhtā rahnā hai jo nūr hai. Masīh ko dekhne se us kī zindagī nūr aur pākīzagī se bhar jāegī. Tīsri bāt,

Us kī Sunte Raho

Insān apnī āñkhoñ se dekhtā hai. Dekhne se wuh Ḳhudā kā nūr pātā hai. Ab Īsā Masīh sunane kī bāt bhī chheṛtā hai: Insān apne kānoñ se suntā hai, tab jawāb meñ chalne lagtā hai. Īsā Masīh ne farmāyā,

Jo merī bāteñ sunkar un par amal nahīñ kartā main us kī adālat nahīñ karūngā, kyonki main duniyā kī adālat karne ke lie nahīñ āyā balki use najāt dene ke lie. To bhī ek hai jo us kī adālat kartā hai. Jo mujhe rad karke merī bāteñ qabūl nahīñ kartā merā pesh kiyā gayā kalām hī qiyāmat ke din us kī adālat karegā.

(Yūhannā 12:47-48)

Ham bahut kuchh sunane ke ādī ho gae haiñ. Hamāre hukmrān baṛe baṛe wāde karte haiñ jo bād meñ adhūre rah jāte haiñ. Internet ke daur meñ har ek ne apne āp ko achchhī tarah pesh karnā sīkh liyā hai. Har ek ne dūsroñ ko manwāne kā gur apnā liyā hai.

Bahut kuchh sunane meñ ātā hai jo ham sīdhe tāq par rakhkar bhūl jāte haiñ. Aur sach kaheñ, agar aise na karte to bār bār mājūs ho jāte. Islie zarūrī hai ki ham Masīh kī hidāyat par dhyān deñ ki merī suno. Matlab hai merī bāteñ sunkar un par amal karo. Jis ke andar nūr hai wuh khud baḥhud us kī suntā rahegā. Wuh yih bāteñ mahfūz rakhegā, aur un kā us kī zindagī par gahrā asar paṛegā.

Īsā Masīh kī bāteñ tāq par rakhkar chhoṛenge to samajh lo ki āp nahīn bacheñge.

- *Āp kyon nahīn bacheñge? Kyā Īsā Masīh ne nahīn farmāyā thā ki main adālat karne nahīn āyā?*

Zarūr. Bāt yih hai ki us kā kalām hī āp kī adālat karegā. Us kā kalām rad karne se āp kī adālat ho chukī hogī.

- *Lekin kyā ham us kī sārī bātoñ par amal kar pāenge? Kyā kuchh na kuchh adhūrā nahīn rahegā?*

Be-shak. Bāt yih nahīn hai. Amal karne ke pīchhe jo Yūnānī lafz hai us kā matlab mahfūz rakhnā bhī hai. Amal karne kā pahlā qadam Masīh kī bāteñ apne dil meñ mahfūz rakhnā hai. Jab ham nūr kī dhūp señkte rahte haiñ to us kā kalām bhī hamāre dil meñ baiṭhkar phal lātā hai. Baṛī bāt yih nahīn ki ham har bāt par pūre utreñ. Baṛī bāt yih hai ki Īsā Masīh jo hamārā nūr hai hamāre andar base aur apnī bāteñ harkat meñ lāe. Wuh hamārā azīm ustād hai, aur wuh jāntā hai ki ham us ke kamzor shāgird haiñ. Baṛī bāt yih hai ki wuh hamārā hāth thāme sāth chale.

- *Kyā nūr āp ke dil meñ basā huā hai? Kyā wuh āp kā hāth thāme āp ke sāth chal rahā hai?*

Yon Yūhannā hamen āgāh kartā hai ki Īsā Masīh ko haqīr mat jāno balki us par imān lāo. Aur yih imān chhipāe mat rakho. Kyoṅki Īsā Masīh **Nūr** hai, aur nūr kī fitrat yih hai ki wuh phail jāe.

► *Imāndār ko kyā karnā hai?*

- Pahle, use dekhte raho tāki us kā nūr āp meṅ phailtā jāe, āp meṅ chamaktā-damaktā rahe.
- Dūsre, us kī āwāz sunkar us kī rāhoṅ par chalte raho. Sab se baṛī bāt yih ki us kā hāth thāme rakho. Tab jannat kī rāh yaqīnī hai.

Haqīqat meṅ Īsā Masīh par imān sab se mushkil aur sab se āsān kām hai.

► *Us par imān sab se mushkil kām kyoṅ hai?*

Jab ham us ke shāgird ban jāte haiṅ to wuh chāhtā hai ki ham apnā imān chhipāe na rakheṅ. Sāth sāth wuh chāhtā hai ki ham us kī rāh par chaleṅ. Matlab hai muhabbat kī rāh par. Halīmī kī rāh par.

Lekin us par imān sab se āsān kām bhī hai.

► *Us par imān sab se āsān kām kyoṅ hai?*

Hameṅ sirf us par imān lānā hai jo nūr hai. Tab wuh hamāre andar phailkar hameṅ apnī muhabbat se bhar degā, hamārā hāth thāme hamāre sāth chalegā. Adālat ke dīn jab us kā kalām hamārā sāmna karegā to hameṅ koī nuqsān nahīṅ pahuñchegā, kyoṅki hamāre andar basne wālā nūr hameṅ bachāe rakhegā. Wuhī hameṅ jannat tak pahuñchāegā.

Injīl, Yūhannā 12:37-50

Agarche Īsā ne yih tamām ilāhī nishān un ke sāmne hī dikhāe to bhī wuh us par imān na lāe. Yon Yasāyāh Nabī kī peshgoī pūrī huī,

Ai Rab, kaun hamāre paighām par imān
lāyā?

Aur Rab kī qudrat kis par zāhir hui?

Chunānche wuh imān na lā sake, jis tarah Yasāyāh Nabī
ne kahīn aur farmāyā hai,

Allāh ne un kī ānkhon ko andhā
Aur un ke dil ko be-his kar diyā hai,
Aisā na ho ki wuh apnī ānkhon se dekheñ,
Apne dil se samjheñ,
Merī taraf rujū karen
Aur main unheñ shafā dūñ.

Yasāyāh ne yih islie farmāyā kyonki us ne Īsā kā jalāl
dekhkar us ke bāre mein bāt kī.

To bhī bahut-se log Īsā par imān rakhte the. Un mein
kuchh rāhnumā bhī shāmil the. Lekin wuh is kā alāniyā
iqrār nahīn karte the, kyonki wuh chāhate the ki Farīsī
hamen Yahūdī jamāt se khārij kar denge. Asl mein wuh
Allāh kī izzat kī nisbat insān kī izzat ko zyādā azīz rakhte
the.

Phir Īsā pukār uthā, “Jo mujh par imān rakhtā hai wuh
na sirf mujh par balki us par imān rakhtā hai jis ne
mujhe bhejā hai. Aur jo mujhe dekhtā hai wuh use
dekhtā hai jis ne mujhe bhejā hai. Main nūr kī haisiyat
se is duniyā mein āyā hūn tāki jo bhī mujh par imān
lāe wuh tārikī mein na rahe. Jo merī bāteñ sunkar un
par amal nahīn kartā main us kī adālat nahīn karūngā,
kyonki main duniyā kī adālat karne ke lie nahīn āyā
balki use najāt dene ke lie. To bhī ek hai jo us kī adālat
kartā hai. Jo mujhe rad karke merī bāteñ qabūl nahīn
kartā merā pesh kiya gayā kalām hī qiyāmat ke din us
kī adālat karegā. Kyonki jo kuchh mainne bayān kiya
hai wuh merī taraf se nahīn hai. Mere bhejne wāle bāp

hī ne mujhe hukm diyā ki kyā kahnā aur kyā sunānā hai. Aur main jāntā hūn ki us kā hukm abadī zindagī tak pahuñchātā hai. Chunāñche jo kuchh main sunātā hūn wuhī kuchh hai jo bāp ne mujhe batāyā hai.”

Shaitānī Tāqaton se Kaise Bachūn?



- *Ham shaitānī tāqaton se kis tarah nipaṭ sakte haiñ?*

Har ek kā apnā hī tariqā hotā hai. Aksar tāwīz rakhte haiñ. Bahut log pīr ke pās jāte haiñ. Anginat aur tariqe bhī dekhne meñ āte haiñ.

- *Itne tariqe kyon hote haiñ?*

Islie ki ham sab ko shaitānī tāqaton kā tajribā huā kartā hai. Kisī kī burī nazar lag jāti hai. Yā kāle jādū se koī hādasā hotā hai. Kabhī sapnon meñ, kabhī jāgte waqt shaitānī tāqateñ hamāre palle paṛti rahti haiñ. Lekin in ke qābū meñ rahne kī zarūrat nahīn hai. Injil Sharīf hameñ in se bachne kā hal batāti hai.

- *Injil Sharīf hameñ in se bachne kā kyā hal batāti hai?*

Āie ham Yūhannā kī Injil meñ pesh kie gae hal par ghaur karen. Fasah kī Īd shurū hone wālī thī. Īsā Masih jāntā thā ki thoṛī der bād mujhe is duniyā ko chhoṛkar Bāp ke pās wāpas jānā hai.

- *Īsā Masih ko kis tarah Kḥudā Bāp ke pās jānā thā?*

Salībī maut ke rāste se.

Din dhalne lagā to shām kā khānā taiyār huā. Khāne meñ Yahūdāh bhī sharīk thā, wuhī jo use dushman ke hawāle karegā. Īsā Masih ko bahut dukh ho rahā thā kyonki wuh yih jāntā thā. Lekin wuh yih bhī jāntā thā ki merī salībī maut zarūri hai. Sāth sāth wuh mahsūs kar rahā thā ki ab waqt ā gayā hai ki main apne shāgirdon ko ek bahut ahm sabaq sikhāūñ. Us ne dastarkḥān se uṭhkar apnā libās utār diyā aur kamr par tauliyā bāndh liyā. Phir bāsan meñ pānī dālkar wuh shāgirdon ke pānw bārī bārī dho dhokar tauliyā se kḥushk karne lagā. Shāgird dang rah gae.

- *Wuh kyon dang rah gae? Kyā pānw dhonā ām-sā kām nahīn thā?*

Zarūr. Qadīm zamāne ke aksar rāste pakke nahīn the. Wuh dhūl aur kīchaṛ se bhare rahte the. Ām log yā nange pānw yā chamṛe ke chappal pahne safr karte the. Zāhir hai ki rozānā apne pānwon ko dhonā paṛtā thā. Waise bhī is kḥās mauqe par zarūrī thā ki sab apne pānw dho leñ.

- *To phir shāgird kyon dang rah gae?*

Islie ki un kā ustād yih kām kar rahā thā.

- *Yih kyon hairānī kī bāt thī?*

Aisā kām bahut gandā samjhā jātā thā. Ām taur par shāyad hī koī ghulām yā launḍī dūsron ke pānw dhotī thī. Islie jab ustād ne apnā libās utārkar kamr par tauliyā bāndh liyā to tamām shāgird but ban gae. Patras kī bārī āi to us ne kahā, “Ḳhudāwand, āp mere pānw dhonā chāhte haiñ?”

Īsā Masīh ne jawāb diyā, “Is waqt tū nahīn samajhtā ki main kyā kar rahā hūñ, lekin bād meñ yih terī samajh meñ ā jāegā.”

Patras bolā, “Main kabhī bhī āp ko mere pānw dhone nahīn dūngā!”

- *Patras apne etarāz se kyā kahnā chāhtā hai?*

- Pahle, yih sharm kī bāt hai ki āp hamāre pānw dho rahe haiñ.
- Dūsre, ai ustād, āp yih kyon kar rahe haiñ? Ham to āp ke agent, āp ke wazīr haiñ. Ham hī behtar jānte haiñ ki āp ko kyā karnā hai. Bas ham par sārā māmālā chhoṛ do.

- *Kyā āp aise log jānte haiñ jo apne āp ko Ḳhudā ke agent samajhte haiñ?*

Lekin Īsā Masīh kī soch hamārī soch se bahut farq hai. Us ne kyā jawāb diyā? Jawāb yih diyā ki

Mujh se Pāk-Sāf Ho Jāo

Us ne farmāyā, “Agar main tujhe na dhoūn to mere sāth terā koī hissā nahīn hogā.”

► *Iskā kyā matlab hai?*

Zarūrī hai ki main hī tujhe dhoūn. Merā yih kām qabūl karo tab hī terā mere sāth hissā hogā.

► *Masīh ke sāth hissā hone kā kyā matlab hai?*

Jab merā Masīh ke sāth hissā hai to main us ke ghar kā hūn, us ke ghar wālon meñ se hūn.

► *Us kā ghar kahān hai?*

Ḳhudā ke pās. Jannat kah leñ yā āsmān.

► *Kyā ham apnī koshishon se us ke ghar wāle ban sakte haiñ?*

Kabhī bhī nahīn. Lāzim hai ki ham pahle apne gunāhon se pāk-sāf hokar shaitānī tāqaton se āzād ho jāen.

► *Dhone se Īsā Masīh apne ek khās kām kī taraf ishārā kar rahā thā. Wuh kyā hai?*

Wuh apnī salībī maut kī taraf ishārā kar rahā thā.

► *Salībī maut kyon dhone kī tarah hai?*

Us kī salībī maut hameñ gunāhon kī gand se dhokar shaitānī tāqaton se chhuṛā detī hai.

► *Salībī maut kā rāstā kyon zarūrī thā?*

Ham apne nek kāmōñ se Ḳhudā ko manwā nahīn sakte ki wuh hameñ jahannum se chhūṭ de. Koī bhī insān dāwā nahīn kar saktā ki us ne apne nek kāmōñ se apne bure kāmōñ ko ḍhānp diyā hai.

► *Wuh kyon yih dāwā nahīn kar saktā?*

Islie ki hamāre tamām nek kām nākāfī haiñ. Hamāre bure kāmōñ kī gand ham se liptī rahtī hai aur inhīn kī wajah se ham shaitānī tāqaton se ghare rahte haiñ. Jis tarah makkhiyāñ gale-sare khāne ke irdgird bhibhinātī rahtī haiñ, usī tarah shaitānī tāqateñ hamāre bure kāmōñ ke bāis hamāre irdgird bhibhinātī rahtī haiñ. Jab tak yih gand dūr na ho jāe koī sahārā nahīn hai.

Kisī laṛke kā zikr hai jo dhyān na dekar khule gutter meñ gir gayā. Shukr hai ki bach gayā. Magar jab niklā to us kī hālat qābil-e-rahm thī. Pūrā badan gande pānī se kālā thā, aur badbū chāroñ taraf phail gaī.

► *Pahlā kām kyā thā, jo us ne kiyā?*

Us ne achchhī tarah nahā liyā.

► *Kyā yih kāfī na hotā agar wuh nahāne ke bajāe apne ūpar ḡhushbū chhiṛaktā?*

Kabhī nahīn. ḡhushbū chhiṛakne se gand dūr nahīn hotī. Bahut imkān bhī hotā ki wuh bīmār paṛ jātā. Yahī hamārī Ḳhudā ke sāmne hālat hai. Ham apne nek kāmōñ kī ḡhushbū se wuh gand dūr nahīn kar sakte jo hamāre bure kāmōñ se ham se latpat ho gaī hai. Ḳhushbū ke bāwujūd yih badbū rahtī hai. Ḳhushbū ke bāwujūd shaitānī tāqateñ hameñ ghere rakhtī haiñ. Pahle nahāne kī zarūrat hai, pāk-sāf ho jāne kī zarūrat hai. Tab hī ḡhushbū thīk kām karegī. Tab hī shaitānī tāqateñ hameñ chhoṛ jāeñgī.

Islie Īsā Masīh is duniyā meñ utar āyā. Us ne wuh kām kiyā jo ham na kar pāe. Sirf us kā yih kām hameñ dhokar hamāre bure kāmōñ kī gand dūr kar saktā hai. Us se hamāre gunāh na sirf māf ho jāte haiñ. Unheñ miṭāyā bhī jātā hai.

► *Wuh kis tarah miṭāe jāte haiñ?*

Is se ki Īsā Masīh ne salīb par hamāre gunāhoñ kī sazā uṭhā lī hai. Jyoñ hī ham us par imān lāte haiñ hamāre gunāh miṭ jāte haiñ, ham Ḳhudā ke sāmne pāk-sāf hokar shaitānī tāqatoñ se āzād ho jāte haiñ.

Kabhī kabhī jab gutter band ho jāe to kisī ādmī ko gutter ke pānī meñ utarkar use kholnā paṛtā hai. Dekho, Īsā Masīh us jaisā ādmī hai. Wuh jo nūr hai, jo sarāsar pāk hai is duniyā ke gande gutter meñ utar āyā tāki hamāre

bure kāmōñ kī gand dūr karke hamēñ shaitānī tāqatoñ se bachāe.

- *Kyā āpne dhone kā yih kām qabūl kar liyā hai?*

Aisā kām sirf wuh kar saktā hai jo sarāsar nūr, sarāsar pāk hai.

- *Chhoṭe bachche kī misāl lo. Kyā chhoṭā bachchā apne pāñwoñ par kharā ho saktā hai?*

Nahīñ. Chhoṭā bachchā apne māñ-bāp kā ek kām bhī nahīñ kar saktā. Māñ-bāp paise kamāte, us kī dekh-bhāl karte, use khānā khilāte, use nahāte haiñ. Yahī Ḳhudā ke sāmne hamārā hāl hai.

- *Ham Ḳhudā ke sāmne kis tarah bachche jaise hote haiñ?*

Ham apne āp ko chhuṛā nahīñ sakte. Yahī bāt Īsā Masīh Patras ko batānā chāhtā thā: Tū najāt kā yih kām nahīñ kar saktā. Chhoṭe bachche kī tarah apne hāth merī taraf phailā de tāki maiñ tujhe dho dūñ, tujhe apnī god meñ lekar shaitānī tāqatoñ se bachāe rakhūñ.

Īsā Masīh ke sāmne yahī hamārī hālat hai. Duniyā meñ ham na us ke numāinde na us ke wazīr haiñ. Ham sirf us ke qarzdār haiñ. Kyonki usī ne sab kuchh hamārī ḳhātir kiyā hai. Ham apnī najāt ke lie kuchh nahīñ kar sakte. Na nek kām na hadiye hamēñ najāt dilā sakte haiñ. Ḳhudā ke sāmne na ham kisī aur par ilzām lagā sakte haiñ na koī taqāzā kar sakte haiñ. Us ke sāmne ham sab gunāhgār hī haiñ. Islie hamēñ us kī zarūrat hai jis ne hamārī jagah hamārī sazā bardāshst kī.

- *Kyā āpne Īsā Masīh kā pāk-sāf karne wālā kām qabūl kiyā hai?*

Patras jaisā mat bano. Us ne sochā, mujh se hī dhone kā kām ho jāegā. Maiñ hī āp ke lie laṛūngā. Mujhe āp kī madad kī kyā zarūrat hai? Āp ko to merī hī madad kī zarūrat hai.

- *Kyā āp Patras kī tarah sochte haiñ ki mujh se sab kuchh ho jāegā? Yā kyā āpne apnī zindagī Masīh ke supurd kī hai?*

Apnī koshishoñ ko chhoṛ do. Apne āp par bharosā mat karo. Sirf us par pūrā bharosā karne se āp shaitānī tāqatoñ se bach jāēnge. Sirf us par etamād karne se āp adālat ke din bach jāēnge.

Lekin Īsā Masīh ek aur bāt bhī batānā chāhtā hai. Yih ki

Rozānā Pāk-Sāf Ho Jāo

- *Jab Īsā Masīh ne farmāyā ki main hī pāk-sāf karne kā yih kām kar saktā hūñ to Patras ne kyā jawāb diyā?*

Wuh bolā, “To phir Ḳhudāwand, na sirf mere pāñwoñ balki mere hāthoñ aur sar ko bhī dhoen!”

- *Kyā āpne kuchh mahsūs kiyā?*

Patras ab tak ustād ko batānā chāhtā thā ki use kyā karnā hai.

- *Tab Īsā Masīh ne kyā jawāb diyā?*

Jis shakhs ne nahā liyā hai use sirf apne pāñwoñ ko dhone kī zarūrat hotī hai, kyonki wuh pūre taur par pāk-sāf hai. Tum pāk-sāf ho, lekin sab ke sab nahīñ. (Yūhannā 13:10)

- *Iskā kyā matlab hai? Kyā wajah hai ki sirf apne pāñwoñ ko dhone kī zarūrat hotī hai?*

Is men do bāteñ juṛī huī haiñ:

- Īmān lāne se ham us kī salībī maut se ek bār sadā ke lie pāk-sāf ho jāte haiñ. Is se hamen najāt yaqīnī hai.
- Phir bhī rozānā is kī zarūrat hai ki ham us ke huzūr ākar us se pāk-sāf kie jāen. Jab tak ham duniyā kī gandī galiyoñ men phirte chaleñge tab tak hamāre pāñw bār bār dhūl aur kīchaṛ se latpat ho jāēnge, tab tak ham se ghalatīyāñ hotī raheñgī. Islie zarūrī hai ki ham rozānā us se minnat karen ki wuh hamāre pāñwoñ ko dhoe. Warnā khatrā hai ki ham āhistā āhistā dubārā shaitānī tāqatoñ kī zad men ā jāen.

Mere dost, Patras jaise mat bano. Īsā Masih ko mat batānā ki use kyā karnā hai. Chup raho aur use takte raho. Usī kī āwāz sunte raho. Qabūl karo ki wuhī āp ko rozānā pāk-sāf kar saktā hai. Wuhī āp ko rozānā shaitānī tāqaton se mahfūz rakh saktā hai.

► *Lekin Īsā Masih kā kyā matlab thā ki sab ke sab pāk-sāf nahīn hai?*

Yahūdāh Iskariyotī pāk-sāf nahīn thā.

► *Is se ham kyā natijā nikāl sakte hai?*

Anginat log Īsā Masih ke shāgird kahlāte haiñ lekin jhūṭhe shāgird haiñ. Yahūdāh in meñ se ek thā. Wuh pāk-sāf nahīn ho saktā thā. Wuh shaitānī tāqaton se bach nahīn saktā thā.

► *Kyon?*

Us ke dil ne Īsā Masih ko rad kiyā thā. Apnī salībī maut se Īsā Masih ne hamen pāk-sāf karne kā kām saranjām diyā. Lekin sirf wuh najāt pātā hai jo us kā yih kām qabūl kartā hai.

► *Kyā āpne Masih kī yih najāt qabūl kī hai?*

Tab Īsā Masih ne ek tīsri bāt farmāi. Yih ki

Merī Ḳhādīmānā Rūh Apnāo

Sab ke pānw dhone ke bād Īsā Masih dubārā apnā libās pahnkār baiṭh gayā. Us ne farmāyā,

Kyā tum samajhte ho ki mainne tumhāre lie kyā kiyā hai? Tum mujhe ‘Ustād’ aur ‘Ḳhudāwand’ kahkar muḵhātib karte ho aur yih sahī hai, kyonki main yahī kuchh hūñ. Main, tumhāre Ḳhudāwand aur ustād ne tumhāre pānw dhoe. Islie ab tumhārā farz bhī hai ki ek dūsre ke pānw dhoyā karo. Mainne tum ko ek namūnā diyā hai tāki tum bhī wuhī karo jo mainne tumhāre sāth kiyā hai. Main tum ko sach batātā hūñ ki ḡhulām apne mālik se barā

nahīn hotā, na paighambar apne bhejne wāle se. Agar tum yih jānte ho to is par amal bhī karo, phir hī tum mubārak hoge.
(Yūhannā 13:12-17)

► *Shāgirdon kā kyā farz hai?*

Farz yih hai ki wuh ek dūsre ke pānw dhoyā karen.

► *Kyon?*

Islie ki un ke ustād aur Ḳhudāwand ne yih kām kiyā.

► *Kyā baron ke pānw dhone par zyādā dhyān denā chāhie?*

Nahīn. Sab barābar haiñ, chāhe barē hon yā chhoṭe.

► *Kyon?*

Kyonki ustād aur Ḳhudāwand ne shāgirdon kī ḳhātir yih kām kiyā hai.

► *Ham kis tarah ek dūsre ke pānw dhote haiñ?*

Is se ki ham sab kī barābar ḳhidmat karte haiñ. Īsā Masīh yih taqāzā nahīn kartā ki ham us kī tarah apnī jān dekar dūsre ko pāk-sāf karen. Yih ham kar hī nahīn sakte. Lekin jab us ne hamāre lie najāt kā kām saranjām diyā to kyā hameñ us ke namūne par nahīn chalnā chāhie?

Sāth sāth Īsā Masīh ne ek wādā bhī kiya,

Jo shaḳhs use qabūl kartā hai jise mainne bhejā hai wuh mujhe qabūl kartā hai. Aur jo mujhe qabūl kartā hai wuh use qabūl kartā hai jis ne mujhe bhejā hai. (Yūhannā 13:20)

► *Is wāde kā kyā matlab hai?*

Jo bhī Masīh ke nām meñ ātā hai use qabūl karnā hai. Jab ham use qabūl karte haiñ to ham Masīh ko aur us meñ Ḳhudā Bāp ko qabūl karte haiñ. Tab hī hameñ kasrat se barkat miltī hai. Ek dūsre kī ḳhidmat karne se ham taqwiyaat bhī pāte haiñ, wuh taqwiyaat jis se ham shaitānī tāqaton se mahfūz rahte haiñ.

Āḳhiri bāt jo Īsā Masīh hameñ batānā chāhtā hai:

Shaitānī Tāqatoṅ se Merī Hifāzat Qabūl Karo

Ab Īsā Masīh muztarib hone lagā. Wuh bolā, “Main tum ko sach batātā hūn ki tum mein se ek mujhe dushman ke hawāle kar degā.”

► *Īsā Masīh ne yih kyon farmāyā? Agar yih honā hī thā to yih kahne se kyā farq partā thā?*

- Wuh chāhtā thā ki har ek apne āp ko parkhe.
- Wuh Yahūdā ko taubā karne kā ek ākhiri mauqā denā chāhtā thā.

Shāgird uljhan mein par gae. Tab ek shāgird ne Īsā Masīh kī taraf sar jhukākar pūchhā, “Ḳhudāwand, yih kaun hai?”

Īsā Masīh ne jawāb diyā, “Jise main roṭī kā luqmā shorbe mein ḍubokar dūn, wuhī hai.” Phir luqme ko ḍubokar us ne Yahūdāh Iskariyotī ko de diyā. Jyon hī Yahūdāh ne yih luqmā le liyā Iblīs us mein samā gayā. Ustād ne use batāyā, “Jo kuchh karnā hai wuh jaldī se kar le.” Dūsroṅ ko mālūm na huā ki ustād ne yih kyon kahā. Lekin luqmā lete hī Yahūdāh bāhar nikal gayā. Rāt kā waqt thā.

► *Luqmā lene se ham Yahūdāh ke bāre mein kyā sikhte haiṅ?*

Luqmā lene se Yahūdāh ne apnī ḡhalat rāh par chalne kā isrār kiyā. Masīh ne pāk-sāf ho jāne kī dāwat dī par Yahūdāh ne yih dāwat rad kī. Masīh ne Yahūdāh ko taubā karne kā ākhiri mauqā diyā par Yahūdāh ne inkār kiyā. Natije mein wuh Iblīs ke pūre qabze mein ā gayā. Ab wuh Īsā Masīh kī hifāzat se nikalkar Iblīs ke rāj mein ā gayā. Ab wāpas ānā nāmumkin ho gayā. Rāt kā waqt thā, aur Yahūdā ke dil mein bhī andherā hī andherā thā.

► *Kyā āp ko Īsā Masīh kī hifāzat hāsīl hai?*

Pahle qabūl karo ki wuhī āp ko pāk-sāf kar saktā hai. Hān, wuhī āp ko rozānā pāk-sāf kar saktā hai. Wuhī āp ko ḳhidmat kī wuh rūh de saktā hai jis se sab par barkat barsegī. Aur wuhī āp kī shaitānī tāqatoṅ se hifāzat kar saktā hai.

Injil, Yūhannā 13:1-30

Fasah kī Īd ab shurū hone wālī thī. Īsā jāntā thā ki wuh waqt ā gayā hai ki mujhe is duniyā ko chhoṛkar Bāp ke pās jānā hai. Go us ne hameshā duniyā meñ apne logon se muhabbat rakhī thī, lekin ab us ne ākhirī had tak un par apnī muhabbat kā izhār kiyā.

Phir shām kā khānā taiyār huā. Us waqt Iblīs Shamāūn Iskariyotī ke beṭe Yahūdāh ke dil meñ Īsā ko dushman ke hawāle karne kā irādā ḍāl chukā thā. Īsā jāntā thā ki Bāp ne sab kuchh mere supurd kar diyā hai aur ki main Allāh meñ se nikal āyā aur ab us ke pās wāpas jā rahā hūñ. Chunāñche us ne dastarkhān se uṭhkar apnā libās utār diyā aur kamr par tauliyā bāndh liyā. Phir wuh bāsan meñ pānī ḍālkar shāgirdon ke pāñw dhone aur bandhe hue tauliyā se poñchhkar kḥushk karne lagā. Jab Patras kī bārī āī to us ne kahā, “Ḳhudāwand, āp mere pāñw dhonā chāhte haiñ?”

Īsā ne jawāb diyā, “Is waqt tū nahīñ samajhtā ki main kyā kar rahā hūñ, lekin bād meñ yih terī samajh meñ ā jāegā.”

Patras ne etarāz kiyā, “Main kabhī bhī āp ko mere pāñw dhone nahīñ dūngā!”

Īsā ne jawāb diyā, “Agar main tujhe na dhoñ to mere sāth terā koī hissā nahīñ hogā.”

Yih sunkar Patras ne kahā, “To phir Ḳhudāwand, na sirf mere pāñwon balki mere hāthon aur sar ko bhī dhoñ!”

Īsā ne jawāb diyā, “Jis shaḳhs ne nahā liyā hai use sirf apne pāñwon ko dhone kī zarūrat hotī hai, kyonki wuh pūre taur par pāk-sāf hai. Tum pāk-sāf ho, lekin sab ke sab nahīñ.” (Īsā ko mālūm thā ki kaun use dushman ke hawāle karegā. Isliē us ne kahā ki sab ke sab pāk-sāf nahīñ haiñ.)

Un sab ke pānw dhone ke bād Īsā dubārā apnā libās pahnkār baiṭh gayā. Us ne sawāl kiyā, “Kyā tum samajhte ho ki mainne tumhāre lie kyā kiyā hai? Tum mujhe ‘Ustād’ aur ‘Ḳhudāwand’ kahkar muḵhātib karte ho aur yih sahī hai, kyonki main yahī kuchh hūn. Main, tumhāre Ḳhudāwand aur ustād ne tumhāre pānw dhoe. Islie ab tumhārā farz bhī hai ki ek dūsre ke pānw dhoyā karo. Mainne tum ko ek namūnā diyā hai tāki tum bhī wuhī karo jo mainne tumhāre sāth kiyā hai. Main tum ko sach batātā hūn ki ḡhulām apne mālik se barā nahīn hotā, na paighambar apne bhejne wāle se. Agar tum yih jānte ho to is par amal bhī karo, phir hī tum mubārak hoge.

Main tum sab kī bāt nahīn kar rahā. Jinheñ mainne chun liyā hai unheñ main jāntā hoñ. Lekin Kalām-e-Muqaddas kī is bāt kā pūrā honā zarūr hai, ‘Jo merī roṭī khātā hai us ne mujh par lāt uṭhāī hai.’ Main tum ko is se pahle ki wuh pesh āe yih abhī batā rahā hūn, tāki jab wuh pesh āe to tum imān lāo ki main wuhī hūn. Main tum ko sach batātā hūn ki jo shaḵhs use qabūl kartā hai jise mainne bhejā hai wuh mujhe qabūl kartā hai. Aur jo mujhe qabūl kartā hai wuh use qabūl kartā hai jis ne mujhe bhejā hai.”

In alfāz ke bād Īsā nihāyat muztarib huā aur kahā, “Main tum ko sach batātā hūn ki tum meñ se ek mujhe dushman ke hawāle kar degā.”

Shāgird uljhan meñ ek dūsre ko dekhkar sochne lage ki Īsā kis kī bāt kar rahā hai. Ek shāgird jise Īsā pyār kartā thā us ke qarībtarīn baiṭhā thā. Patras ne use ishārā kiyā ki wuh us se dariyāft kare ki wuh kis kī bāt kar rahā hai. Us shāgird ne Īsā kī taraf sar jhukākar pūchhā, “Ḳhudāwand, yih kaun hai?”

Īsā ne jawāb diyā, “Jise main̄ roṭī kā luqmā shorbe meñ ḍubokar dūñ, wuhī hai.” Phir luqme ko ḍubokar us ne Shamāūn Iskariyotī ke beṭe Yahūdāh ko de diyā. Jyon̄ hī Yahūdāh ne yih luqmā le liyā Iblīs us meñ samā gayā. Īsā ne use batāyā, “Jo kuchh karnā hai wuh jaldī se kar le.” Lekin mez par baiṭhe logon̄ meñ se kisī ko mālūm na huā ki Īsā ne yih kyon̄ kahā. Bāz kā khyāl thā ki chūn̄ki Yahūdāh k̄hazānchī thā islie wuh use batā rahā hai ki Īd ke lie darkār chīzen̄ k̄harīd le yā ḡharībōn̄ meñ kuchh taq̄sīm kar de.

Chunān̄che Īsā se yih luqmā lete hī Yahūdāh bāhar nikal gayā. Rāt kā waqt thā.

Al-Masīh kī Naī Birādārī



Ek shām Īsā Masīh ne dastarkhān se uṭhkar apne shāgirdon ke pānw dho die.

► *Is se wuh hamen kyā sikhānā chāhtā thā?*

Yih ki tum sab ko merī k̄hidmat kī zarūrat hai—pāk-sāf karne kī k̄hidmat. Merā shāgird banane kī bas ek hī shart hai—yih ki tum merī yih k̄hidmat qabūl karo. Yih na socho ki tum apnī koshishon se pāk-sāf ho sakte ho. Merī k̄hidmat qabūl karo. Tab hī tum shaitānī tāqaton se mahfūz rahoge. Tab hī tum adālat ke din bach jāoge. Tab hī tum k̄hud bhī yih k̄hidmat karnā sikh jāoge. Kyonki ek dūsre kī k̄hidmat mere ghar wālon kā lāsānī nishān hai.

Ek thā jo Masīh kī yih k̄hidmat qabūl karne ke lie taiyār nahīn thā—Yahūdāh. Natīje mein us kā dil andherā ho gayā aur wuh Iblis ke qabze mein ā gayā. Tab wuh chalā gayā tāki Masīh ko dushman ke hawāle kare.

Ab Masīh ne ek nayā mazmūn chheṛā.

► *Kaun-sā mazmūn?*

Yih ki merī maut aur jī uṭhne se ek nayā zamānā shurū hogā. Ek naī birādārī qāym ho jāegī. Is mein tīn bāten aham haiñ. Pahli bāt,

Naī Birādārī kī Shān Pāo

Īsā Masīh ne farmāyā,

Ab Ibn-e-Ādam ne jalāl pāyā aur Allāh ne us mein jalāl pāyā hai. (Yūhannā 13:31)

► *Ibn-e-Ādam kaun hai?*

Ibn-e-Ādam Īsā Masīh hai jis ke bāre mein Dāniyāl Nabī ne sadiyon pahle royā dekhkar farmāyā thā ki

Āsmān ke bādaloṅ ke sāth sāth koī ā rahā hai jo Ibn-e-Ādam-sā lag rahā hai. Jab Qadīmūl-aiyām ke qarīb pahuñchā to us ke huzūr lāyā gayā. Use saltanat, izzat aur bādshāhī dī gai, aur har qaum, ummat aur zabān ke afrād ne us kī parastish kī. Us kī hukūmat abadī hai aur kabhī khatm nahīn hogī. Us kī bādshāhī kabhī tabāh nahīn hogī. (Dāniyāl 7:13-14)

► *Qadīmūl-aiyām kaun hai?*

Ḳhudā jis ke sāmne Ibn-e-Ādam ko lāyā gayā. Yānī Īsā Masīh apnī jān dene ke bād jī uṭhā aur dubārā Ḳhudā Bāp ke huzūr āyā.

► *Kis ne jalāl pāyā?*

Īsā Masīh aur Ḳhudā Bāp donoṅ ne jalāl pāyā.

► *Īsā Masīh ne kis tarah jalāl pāyā?*

Apnī jān hamārī khatir dekar jī uṭhne se.

► *Ḳhudā Bāp ko kis tarah jalāl mil gayā?*

Us ne azl se apne Farzand ko is duniyā meṅ bhejne kā mansūbā banāyā thā. Sab kuchh us ke mansūbe ke taht huā thā. Yoṅ use apne Farzand meṅ jalāl mil gayā.

Yih kitnā azīm mansūbā thā! Us kā Farzand apnī shān-o-shaukat chhoṛkar is duniyā meṅ utar āyā tākī nāqīs insān kī khatir apnī jān de. Yih kaisī gahrī muhabbat thī! Us ne hameṅ bachāyā, ham jo is lāyq nahīn the.

Yūhannā kī pūrī Injil isī par zor detī hai: ki Ḳhudā Bāp ne apne Farzand ke wasīle se aisā kām kiyā jo insān kī ām soch se kahīn dūr hai. Insān apne āp ko baṛā banānā chāhtā hai. Is ke baraks Ḳhudā ke Farzand ne āsmānī jalāl se utarkar apne āp ko past kar diyā aur maut tak tābe rahā. Isī se us ne jalāl pāyā.

Insān ko zyādātar apnī hī fikr rahtī hai. Us kī muhabbat kā dāyrā bahut mahdūd rahtī hai. Ḳhudā farq hai. Use ham sab kī fikr rahtī hai. Wuh nahīn chāhtā thā ki ham sab jannat kī

ḡhushiyon se mahrūm rah jāēn. Islie us ne apne Farzand ke wasīle se hamēn gunāh aur maut ke panje se chhuṛāyā. Us kī is gahrī muhabbat se us kā lāsānī jalāl zāhir hotā hai.

Lekin ab dhyān deñ. Pas-e-pardā Īsā Masīh ek aur bāt bhī apne shāgirdon ko batānā chāhtā thā. Yih ki jo mujh par imān lāe wuh bhī mere is jalāl meñ sharīk ho jāegā.

► *Imāndār kyon is jalāl meñ sharīk ho jāegā?*

Jo us par imān lātā hai wuh us kā ghar wālā ban jātā hai.
Is se wuh us ke jalāl meñ bhī sharīk ho jātā hai.

► *Kyā āp ko yih shān hāsīl huī hai jo us ke ghar wālon ko hāsīl hotī hai?*

Dūsri bāt,

Naī Birādari ke Nae Hukm par Chalo

Īsā Masīh ne apne shāgirdon ko batāyā ki thoṛī der bād main chālā jāūngā. Aur jahān main jā rahā hūñ wahān tum nahīn ā sakte.

Main tum ko ek nayā hukm detā hūñ, yih ki ek dūsre se muhabbat rakho. Jis tarah mainne tum se muhabbat rakhī usī tarah tum bhī ek dūsre se muhabbat karo. Agar tum ek dūsre se muhabbat rakhoge to sab jān leñge ki tum mere shāgird ho. (Yūhannā 13:34-35)

► *Ek dūsre se muhabbat rakhnā nayā hukm nahīn thā. Kyā Ḳhudā ne pahle se Isrāīliyon ko nahīn batāyā thā ki ek dūsre se muhabbat rakho?*

Zarūr (dekhie Tauret, Ahbār 19:18).

► *To phir ise kyon nayā hukm kahā jātā hai?*

Apnī salībī maut se Īsā Masīh ne ek naī birādari kī buniyād ḡālī. Is birādari kā nishān wuh muhabbat hai jo us ne ḡhud duniyā meñ utarkar insān ke wāste apnī jān dene se dikhāī.

► *Kyā āp is hukm par chalte hain?*

Tīsri bāt,

Nāī Birādari kī Ṭhos Buniyād par Khaṛe Raho

Ab dhyān deñ ki Patras ne Īsā Masīh kī bāt par kyā kahā. Us ne pūchhā, “Ḳhudāwand, āp kahāñ jā rahe haiñ?”

► *Yih sawāl kuchh ajīb-sā lagtā hai. Kyoñ?*

Abhī abhī Īsā Masīh ne apne shāgirdoñ ko muhabbat kā nayā hukm diyā thā, lekin Patras ne is par ḡhaur hī na kiyā. Use bas is kī fikr thī ki ustād kahīñ jā rahā hai.

► *Wuh yih kyoñ jānanā chāhtā thā?*

Patras ab tak apne āp ko Masīh kā agent samajhtā thā. Us kā wazīr jo sab kuchh control karnā chāhtā thā.

Īsā Masīh ne jawāb diyā, “Jahāñ maiñ jā rahā hūñ wahāñ tū mere pīchhe nahīñ ā saktā. Lekin bād meñ tū mere pīchhe ā jāegā.”

Patras ne sawāl kiyā, “Ḳhudāwand, maiñ āp ke pīchhe abhī kyoñ nahīñ jā saktā? Maiñ āp ke lie apnī jān tak dene ko taiyār hūñ.”

Lekin Īsā Masīh ne jawāb diyā, “Tū mere lie apnī jān denā chāhtā hai? Maiñ tujhe sach batātā hūñ ki murḡh ke bāṅg dene se pahle pahle tū tīn martabā mujhe jānane se inkār kar chukā hogā.”

Patras ko pūrā yaqīn thā ki wuh apnī jān dene ko taiyār thā. Lekin Īsā Masīh kā jawāb sāf hai: Tū mere lie kuchh nahīñ kar saktā. Terī koshisheñ nākāfī haiñ.

► *Wuh kyoñ nākāfī haiñ?*

Ham apnī taraf se kuchh nahīñ kar sakte. Na ham apnī koshishoñ se jannat meñ dāḡhil ho sakte haiñ, na sawāb kamā sakte haiñ. Masīh to jannat meñ dāḡhil hone kā wāhid wasīlā hai, kyoñki us ne apnī salībī maut se hameñ chhuṭkārā diyā hai.

Yahī nāī birādari kī mazbūt buniyād hai. Agar hamārī nāqis koshisheñ is birādari kī buniyād hotīñ to yih buniyād nāqis hotī. Lekin nāī birādari kī buniyād najāt kā wuh kām hai jo us ne hamārī ḡhātir kiyā hai.

Kyā āp ko Masih kī naī birādārī kī shān hāsil hai? Kyā is birādārī kā nayā hukm āp ko ubhār rahā hai? Kyā āp kī zindagī aur mustaqbil isī birādārī kī ṭhos buniyād par qāym hai?

Injīl, Yūhannā 13:31-38

Yahūdāh ke chale jāne ke bād Īsā ne kahā, “Ab Ibn-e-Ādam ne jalāl pāyā aur Allāh ne us meñ jalāl pāyā hai. Hāñ, chūñki Allāh ko us meñ jalāl mil gayā hai islie Allāh apne meñ Farzand ko jalāl degā. Aur wuh yih jalāl fauran degā. Mere bachcho, mainṭh thoṛī der aur tumhāre pās ṭhahrūngā. Tum mujhe talāsh karoge, aur jo kuchh mainṭh Yahūdiyonṭh ko batā chukā hūñ wuh ab tum ko bhī batātā hūñ, jahāñ mainṭh jā rahā hūñ wahāñ tum nahīñ ā sakte. Mainṭh tum ko ek nayā hukm detā hūñ, yih kī ek dūsre se muhabbat rakho. Jis tarah mainṭhne tum se muhabbat rakhī usī tarah tum bhī ek dūsre se muhabbat karo. Agar tum ek dūsre se muhabbat rakhoge to sab jān leñge ki tum mere shāgird ho.”

Patras ne pūchhā, “Ḳhudāwand, āp kahāñ jā rahe haiñ?” Īsā ne jawāb diyā, “Jahāñ mainṭh jā rahā hūñ wahāñ tū mere pīchhe nahīñ ā saktā. Lekin bād meñ tū mere pīchhe ā jāegā.”

Patras ne sawāl kiyā, “Ḳhudāwand, mainṭh āp ke pīchhe abhī kyonṭh nahīñ jā saktā? Mainṭh āp ke lie apnī jāñ tak dene ko taiyār hūñ.”

Lekin Īsā ne jawāb diyā, “Tū mere lie apnī jāñ denā chāhtā hai? Mainṭh tujhe sach batātā hūñ ki murgh ke bāñg dene se pahle pahle tū tīn martabā mujhe jānane se inkār kar chukā hogā.

Mat Ghabrāo
Abadī Manzil kī Rāh



Fasah kī id thī. Īsā Masīh shāgirdon ko is ke lie taiyār karne lagā ki thoṛī der bād main tumhārī khatir apnī jān dūngā. Shāgird us waqt pūrī bāt na samajh sake, lekin wuh be-chain hone lage. Thoṛī der pahle yon lag rahā thā ki ustād Isrāīl kā wuh bādshāh banegā jis ke lie sab tarap rahe the. Ab is ke ulaṭ ho rahā thā. Yih sawāl bhī uṭhne lagā ki hamārā kyā banegā? Is dukhī māhaul meñ zarūrī thā ki shāgirdon kī hauslā-afzāī kī jāe. Un kā āqā jāntā thā ki is waqt wuh sab kuchh samajh nahīn pāenge. Lekin bād meñ yih bāteñ unheñ sahī paṭarī par lāengī. Pahlī bāt,

Mat Ghabrāo: Tumhārā Abadī Ghar Hai

Us ne farmāyā,

Tumhārā dil na ghabrāe. Tum Allāh par imān rakhte ho, mujh par bhī imān rakho. Mere Bāp ke ghar meñ be-shumār makān haiñ. Agar aisā na hotā to kyā main tum ko batātā ki main tumhāre lie jagah taiyār karne ke lie wahāñ jā rahā hūñ? Aur agar main jākar tumhāre lie jagah taiyār karūñ to wāpas ākar tum ko apne sāth le jāūngā tāki jahāñ main hūñ wahāñ tum bhī ho. Aur jahāñ main jā rahā hūñ us kī rāh tum jānte ho. (Yūhannā 14:1-4)

- *Shāgird kis par imān rakhte haiñ?*
Kḥudā par.
- *Agar wuh Kḥudā par imān rakhte haiñ to un ko kis par imān rakhnā chāhie?*
Un ko Īsā Masīh par bhī imān rakhnā chāhie.
- *Kyon?*

Kyonki wuh ẖhudā Bāp kā Farzand hai jo us ke pās jākar un ke lie jagah taiyār karegā.

► *ẖhudā ke ghar meñ kyā hai?*

ẖhudā ke ghar ke bahut-se makān haiñ.

► *Hamāre lie yih kyon ẖhushẖhabrī hai?*

Yih ẖhushẖhabrī islie hai ki ẖhudā ke ghar wālon ke lie makān taiyār haiñ. Ghabrāne kī zarūrat nahīn hai, kyonki us ke pās hamārā abadī ghar taiyār hai.

► *Lekin ham kis tarah us ke ghar wāle ban sakte haiñ?*

Īsā Masīh par imān rakhne se. Usī ne apne logoñ ke lie jagah taiyār kar lī hai.

► *Wuh kyon apne logoñ ke lie jagah taiyār karne jā rahā thā?*

Tāki jahān wuh hai ham bhī hoñ.

► *Lekin ham wahān kis tarah pahuñch sakte haiñ?*

Ek ẖhās rāh se. Īsā Masīh ne farmāyā, “Jahān main jā rahā hūn us kī rāh tum jānte ho.”

Tomā shāgird jhaṭ se bol uṭhā, “ẖhudāwand, hamēñ mālūm nahīn ki āp kahān jā rahe haiñ. To phir ham us kī rāh kis tarah jāneñ?”

Jawāb meñ Īsā Masīh ne ek nayā sabaq sikhāyā. Yih ki

Mat Ghabrāo: Main Abadī Ghar kī Rāh Hūn

Us ne farmāyā,

Rāh aur haq aur zindagī main hūn. Koī mere wasile ke baḡhair Bāp ke pās nahīn ā saktā.
(Yūhannā 14:6)

► *Rāh kaun hai?*

Rāh Īsā Masīh hai.

► *Is se wuh kyā kahnā chāhtā hai?*

Apnī salībī maut se main na sirf ẖhudā Bāp ke pās jā rahā hūn. Is se main tumhāre lie ẖhudā ke ghar tak pahuñchne kī rāh banā rahā hūn. Hān, main hī wuh rāh hūn. ẖhudā tak pahuñchāne wālī aur koī rāh nahīn hai.

- *Īsā Masīh rāh hai. Lekin is kā kyā matlab hai ki wuh haq hai?*
Haq kā matlab sachchāī hai. Is ke pīchhe yih khyāl hai ki jis par pūrā bharosā kiyā jā saktā hai wuh sachchā, wuh haq hai. Jo chīz jhūṭhī hai us par bharosā nahīn kiyā jā saktā. Lekin Īsā Masīh par pūrā bharosā kiyā jā saktā hai. Us meñ unnīs-bīs kā farq bhī nahīn hai.
- *Īsā Masīh rāh aur haq hai. To is kā kyā matlab hai ki wuh zindagī hai?*

Wuh zindagī kā sarchashmā hai. Wuh maut par ghālib āyā, islie ham bhī us se zindagī hāsil kar sakte haiñ. Ghabrāne kī zarūrat nahīn hai, kyonki wuhī Kḥudā ke ghar pahuñchne kā rāstā hai, usī par ham pūrā bharosā rakh sakte haiñ, aur usī se hamen ābadī zindagī miltī hai. Tīsri bāt,

Mat Ghabrāo: Merā Bāp Tumhārā Bāp Bhī Hai

Īsā Masīh ne farmāyā,

Agar tum ne mujhe jān liyā hai to is kā matlab hai ki tum mere Bāp ko bhī jān loge. Aur ab se aisā hai bhī. Tum use jānte ho aur tum ne us ko dekh liyā hai. (Yūhannā 14:7)

- *Īsā Masīh ko jān liyā to kis ko jān liyā?*
Use jān liyā to Bāp ko bhī jān liyā.
- *Īsā Masīh ko jān lene se ham Kḥudā Bāp ko kis tarah jān lete haiñ?*

Īsā Masīh Kḥudā Bāp kā Farzand hai. Islie jab ham Masīh ko jānte haiñ to Kḥudā Bāp ko bhī jānte haiñ. Islie Īsā Masīh kah saktā thā ki tum use jānte ho.

Ab Filippus se rahā na gayā. Us ne pūchhā, “Ai Kḥudāwand, Bāp ko hamen dikhāen. Bas yahī hamāre lie kāfī hai.”

Īsā Masīh ne jawāb diyā,

Filippus, main itnī der se tumhāre sāth hūn, kyā is ke bāwujūd tū mujhe nahīn jāntā? Jis ne mujhe dekhā us ne Bāp ko dekhā hai.
(Yūhannā 14:9)

► *Jawāb kyā hai?*

Jis ne Īsā Masīh ko dekhā us ne Ḳhudā Bāp ko dekhā hai.

► *Yih kis tarah ho saktā hai?*

Is kī wajah yih hai ki Īsā Masīh Ḳhudā Bāp kā Farzand hai. Islie jo use dekhtā hai wuh Ḳhudā Bāp ko bhī dekhtā hai. Yahī is kā matlab hai jab us ne farmāyā ki main Bāp mein hūn aur Bāp mujh mein hai.

► *Jab ham Ḳhudā Bāp ko jānte aur dekhte haiñ to hamāre lie kyā natījā nikaltā hai?*

Jab ham Īsā Masīh par imān lāte haiñ to us kā Bāp hamārā Bāp bhī ban jātā hai. Īsā Masīh se ham na sirf Ḳhudā ke ghar wāle ban jāte haiñ balki Ḳhudā hamārā Bāp bhī ban jātā hai. Islie ghabrāne kī koī zarūrat nahīn hai. Ek āḳhiri bāt,

Mat Ghabrāo: Tum Bare Kām Karoge

Īsā Masīh ne farmāyā,

Merī bāt kā yaqīn karo ki main Bāp mein hūn aur Bāp mujh mein hai. Yā kam-az-kam un kāmōñ kī binā par yaqīn karo jo mainne kie haiñ. (Yūhannā 14:11)

► *Shāgirdōñ ko kis kī bāt kā yaqīn karnā chāhie?*

Apne ustād kī bāt kā.

► *Sab se baḳī wajah kyā thī ki unheñ us kī bāt kā yaqīn karnā chāhie thā?*

Unhoñ ne us ke mojize dekhe, us kā kalām sunā thā.

► *Unheñ us ke kāmōñ se kyon yaqīn ānā chāhie thā?*

Islie kī us ke kām ām kām nahīn the. Masīh kā har kām us ke Bāp kī taraf ishārā kartā thā. Jitne yih kām Īsā Masīh

ke the utne hī wuh Bāp ke kām bhī the. Kyoṅki Kḥudā Bāp aur Farzand meṅ pūrī yagāṅgat hai.

Lekin Īsā Masīh ne āge ek bāt farmāi jo hairāṅkun hai:

Main tum ko sach batātā hūn ki jo mujh par imān rakhe wuh wuhī kuchh karegā jo main kartā hūn. Na sirf yih balki wuh in se bhī baṛe kām karegā, kyoṅki main Bāp ke pās jā rahā hūn. (Yūhannā 14:12)

► *Hairāṅkun bāt kyā hai?*

Yih ki Īsā Masīh ke shāgird us ke kām kareṅge.

► *Wuh kyoṅ us ke kām kareṅge?*

Islie ki jo imān rakhtā hai wuh us kā ghar wālā hai. Aur ghar wāloṅ ke lie yih ek qudratī bāt hai ki wuh milkar wuh kām karen jo un kā sarparast chāhtā hai.

Imāndār na sirf Īsā Masīh ke se kām kareṅge balki in se baṛhkar kām bhī kareṅge.

► *Yih kis tarah ho saktā hai?*

Īsā Masīh is kī wajah batātā hai: Main Bāp ke pās jā rahā hūn.

► *Bāp ke pās jānā kyoṅ is kī wajah hai?*

Masīh ke jī uṭhne ke bād Rūhul-quds nāzil hogā. Isī Rūh kī madad se Masīh ke shāgird baṛe kām kareṅge. Lekin un ke yih kām un kī apnī tāqat se kie nahīn jāeṅge. Yih sāf bayān karne ke lie Masīh ne farmāyā,

Jo kuchh tum mere nām meṅ māṅgo main dūṅgā tāki Bāp ko Farzand meṅ jalāl mil jāe. Jo kuchh tum mere nām meṅ mujh se chāho wuh main karūṅgā. (Yūhannā 14:13-14)

► *Yih kām kis ke nām meṅ kie jāeṅge?*

Yih kām Masīh ke nām meṅ māṅgne se kie jāeṅge.

Gharz, ghabrāne kī koī zarūrat nahīn hai. Hamārā abadi ghar hai, aur hameṅ wahān pahuṅchne kī rāh bhī hāsil hai

yānī Īsā Masih. Ghabrāne kī koī zarūrat nahīn hai kyonki Masih kā Bāp hamārā Bāp bhī ban gayā hai. Ghar wālon kī haisiyat se ham Masih ke nām meñ bare kām karenge.

► *Kyā āp bhī Masih ke nām meñ bare kām karne ke lie taiyār haiñ?*

Injil, Yūhannā 14:1-14

“Tumhārā dil na ghabrāe. Tum Allāh par imān rakhte ho, mujh par bhī imān rakho. Mere Bāp ke ghar meñ be-shumār makān haiñ. Agar aisā na hotā to kyā main tum ko batātā ki main tumhāre lie jagah taiyār karne ke lie wahān jā rahā hūn? Aur agar main jākar tumhāre lie jagah taiyār karūn to wāpas ākar tum ko apne sāth le jāūngā tāki jahān main hūn wahān tum bhī ho. Aur jahān main jā rahā hūn us kī rāh tum jānte ho.”

Tomā bol uṭhā, “Ḳhudāwand, hamēñ mālūm nahīn ki āp kahān jā rahe haiñ. To phir ham us kī rāh kis tarah jāneñ?”

Īsā ne jawāb diyā, “Rāh aur haq aur zindagī main hūn. Koī mere wasile ke baḡhair Bāp ke pās nahīn ā saktā. Agar tum ne mujhe jān liyā hai to is kā matlab hai ki tum mere Bāp ko bhī jān loge. Aur ab se aisā hai bhī. Tum use jānte ho aur tum ne us ko dekh liyā hai.”

Filippus ne kahā, “Ai Ḳhudāwand, Bāp ko hamēñ dikhāeñ. Bas yahī hamāre lie kāfī hai.”

Īsā ne jawāb diyā, “Filippus, main itnī der se tumhāre sāth hūn, kyā is ke bāwujūd tū mujhe nahīn jāntā? Jis ne mujhe dekhā us ne Bāp ko dekhā hai. To phir tū kyonkar kahtā hai, ‘Bāp ko hamēñ dikhāeñ’? Kyā tū imān nahīn rakhtā ki main Bāp meñ hūn aur Bāp mujh meñ hai? Jo bāteñ main tum ko batātā hūn wuh merī nahīn balki mujh meñ rahne wāle Bāp kī taraf se haiñ. Wuhī apnā

kām kar rahā hai. Merī bāt kā yaqīn karo ki main Bāp
meñ hūñ aur Bāp mujh meñ hai. Yā kam-az-kam un
kāmoñ kī binā par yaqīn karo jo mainne kie haiñ. Main
tum ko sach batātā hūñ ki jo mujh par imān rakhe wuh
wuhī kuchh karegā jo main kartā hūñ. Na sirf yih balki
wuh in se bhī baṛe kām karegā, kyoñki main Bāp ke pās
jā rahā hūñ. Aur jo kuchh tum mere nām meñ māngo
main dūngā tāki Bāp ko Farzand meñ jalāl mil jāe. Jo
kuchh tum mere nām meñ mujh se chāho wuh main
karūngā.

Fatahmand Zindagī

Rūhul-quḍs kā Kām



Har insān kāmyāb honā chāhtā hai. Har ek apne ghar wālon ke lie izzat aur sukh kā bāis honā chāhtā hai. Ham sab fathmand zindagī guzārñā chāhte haiñ—aisī zindagī jo har challenge kā sāmñā kar pāe, har rukāwaṭ par ghālib āe.

► *Lekin ham kis tarah fathmand rah sakte haiñ?*

Īsā Masīh ne is kā sāf jawāb diyā. Īsā Masīh jāntā thā ki thoṛī der bād mujhe is duniyā se kūch kar jāñā hai. Islie zarūrī hai ki apne shāgirdon ko kuchh hidāyāt dūñ. Ab us ne ek naī bāt chheṛī. Ek aisī bāt jo shāgird us waqt nahīñ samajh sakte the. Bāt kyā thī? Rūhul-quḍs.

► *Us ne Rūhul-quḍs kī bāt kyon chheṛī?*

Wuh shāgirdon ko is bāt ke lie taiyār karnā chāhtā thā ki mere jī uṭhne ke bād Rūhul-quḍs nāzil hogā.

► *Lekin Rūhul-quḍs ke āne kā kyā maqsad thā? Use pāne se hamēñ kyā hāsīl hotā hai?*

Iskā muḳhtasar jawāb yih hai ki us se hamēñ fathmand zindagī hāsīl hogī. Fathmand zindagī guzārne meñ Rūhul-quḍs hamārī madad karegā.

► *Rūhul-quḍs fathmand zindagī guzārne meñ hamārī madad kis tarah karegā?*

Is sawāl kā jawāb Īsā Masīh denā chāhtā thā. Pahlī bāt,

Rūh se Merī Qurbat Pāo

Īsā Masīh ne farmāyā,

Agar tum mujhe pyār karte ho to mere ahkām ke mutābiq zindagī guzāroge. Aur maiñ Bāp se guzārish karūngā to wuh tum ko ek aur madadgār degā jo abad tak tumhāre sāth rahegā yāñī sachchāī kā Rūh, jise duniyā pā

nahīn saktī, kyonki wuh na to use dekhti na jāntī hai. Lekin tum use jānte ho, kyonki wuh tumhāre sāth rahtā hai aur āindā tumhāre andar rahegā. (Yūhannā 14:15-17)

- *Kaun Masīh ke ahkām ke mutābiq zindagī guzāregā?*
Wuh jo use pyār kartā hai. Masīh ke pīchhe ho lene kā yih matlab nahīn ki ham use apnā vote deñ. Use pārtībāzī se nafrat hai. Wuh ek hī bāt chāhtā hai. Yih ki ham use pyār karen. Kyonki use pyār karenge to khud baḥhud us ke ahkām ke mutābiq zindagī guzārenge.

Ājkal solar light ām ho gai hai. Dhūp mein us kī battery, solar panel se charge hone lagti hai. Andherā shurū huā to light on ho jātī hai. Matlab hai jo bijli solar panel se paidā hui hai wuh light ke lie istemāl hotī hai.

Ham bhī us jaisī light haiñ. Hamārā bas ek hī kām hai, yih ki Īsā Masīh kī muhabbat-bharī dhūp señken. Us kī muhabbat jazb kar lene se hamārī muhabbat bhaṛak uṭhti hai aur ham solar panel kī light kī tarah duniyā ke andhere mein us kī raushnī phailāne lagte haiñ. Yahī Īsā Masīh kā matlab hai: Jab ham use pyār karte haiñ to us kī muhabbat-bharī dhūp señkte haiñ. Tab hī ham us ke ahkām par chal pāenge.

- *Lekin Īsā Masīh ko Bāp ke pās jānā thā. Us ke bād shāgird kis tarah us kī dhūp señk sakte the?*
Khudā Bāp ek aur madadgār degā.

- *Pahlā madadgār kaun thā?*
Pahlā madadgār Īsā Masīh thā jo ab kūch kar jāne wālā thā. Isliē Bāp ek aur madadgār bhejega.

- *Yih madadgār kaun hai?*
Sachchāi kā Rūh yānī Rūhul-quds. Wuhī Masīh ke jī uṭhne ke bād shāgirdon par nāzil hogā. Us waqt se wuh har sachche imāndār kī madad karegā. Agar Bāp sūraj hai to Farzand sūraj kī raushnī aur Rūhul-quds sūraj kī garmī hai.

- *Kyā duniyā Rūhul-quds ko pā saktī hai?*
Nahīn.
- *Kaun Rūhul-quds ko pā saktā hai?*
Sirf wuh jo Īsā Masīh par imān rakhtā hai.
- *Iskā kyā matlab hai ki ‘Tum madadgār ko jānte ho, kyonki wuh tumhāre sāth rahtā hai’? Yih madadgār hāl hī meñ kis tarah shāgirdon ke sāth rahtā thā? Us waqt to Rūhul-quds nāzil nahīn huā thā.*

Hāl meñ Īsā Masīh khud un kā madadgār thā. Wuhī un ke sāth rahtā thā. Shāgird use aur us ke kām apnī ānkhon se dekh sakte the, use apne hāthon se chhū sakte the. Yon shāgird use jānte the, aur wuh un kī madad kartā rahtā thā.

Īsā Masīh yahī kuchh kahnā chāhtā thā: Is waqt main hī tumhārā madadgār hūn jis meñ Rūhul-quds bastā hai. Lekin āindā Rūhul-quds nāzil hokar tumhāre hī andar rahegā. Us meñ main khud tumhāre dilon meñ maujūd hūngā. Isliē ghabrāne kī zarūrat nahīn hai—jo muhabbat aur sahāyātā tumheñ is waqt hāsil hai wuh āindā bhī hāsil hogī.

Ab ham us kī aglī bāt bhī samajh sakte haiñ:

Main tum ko yatim chhoṛkar nahīn jāūngā balki tumhāre pās wāpas āūngā. Thoṛī der ke bād duniyā mujhe nahīn dekhegī, lekin tum mujhe dekhte rahoge. Chūñki main zindā hūn isliē tum bhī zindā rahoge. (Yūhannā 14:18-19)

- *Īsā Masīh kis tarah wāpas āegā?*
Jī uṭhne ke bād wuh kuchh dinon ke lie apne shāgirdon par zāhir hogā. Phir wuh uṭhā liyā jāegā aur Rūhul-quds nāzil hogā. Rūhul-quds ke nāzil hone par wuh bhī Rūhul-quds meñ hāzir hogā. Yahāñ Masīh isī par zor de rahā hai ki wuh Rūhul-quds meñ hāzir hogā.

- *Us waqt duniyā use nahīn dekhegī lekin imāndār use dekhte raheṅge. Wuh kis tarah use dekhte raheṅge?*

Wuh Rūhul-quḍs ke zariye use dekhte raheṅge. Rūhul-quḍs ke zariye wuh un ke dilon meṅ maujūd hogā. Aur chūnki wuh zindā hai islie wuh bhī zindā raheṅge. Jis zindagī se wuh maut par ghālib āyā wuhī zindagī unheṅ hāsil hogī.

Rūhul-quḍs ke āne par imāndār ko Masīh kī yih qurbat ekdam mālūm ho jāegī. Īsā Masīh ne farmāyā,

Jab wuh din āegā to tum jān loge ki main apne Bāp meṅ hūn, tum mujh meṅ ho aur main tum meṅ. (Yūhannā 14:20)

Kitnī gahrī qurbat! Masīh Bāp meṅ hai aur wuh ham meṅ bhī hai. Yahī wajah hai ki ham Ḳhudā ke ghar wāle haiṅ. Isī lie ham us ke huzūr rah sakte haiṅ. Aur yih gahrī qurbat Rūhul-quḍs se paidā ho gāi hai. Usī ke wasīle se yih rishtā aur rifāqat hameshā tar-o-tāzā rahtī hai.

Agar mobile kā signal na ho to wuh be-kār hai. Isī tarah hamārī Ḳhudā se rifāqat Rūhul-quḍs ke wasīle se paidā hotī hai. Wuhī mobile kā signal hai. Usī se ham har waqt Ḳhudā ke huzūr rah sakte haiṅ, dukh-sukh kī har bāt us ke sāmne rakh sakte haiṅ.

Īsā Masīh Rūhul-quḍs ke bāre meṅ ek aur bāt bhī kahnā chāhtā hai. Yih ki

Rūh se Mere Pyār kā Bandhan Pāo

Īsā Masīh ne farmāyā,

Jis ke pās mere ahkām haiṅ aur jo un ke mutābiq zindagī guzārtā hai, wuhī mujhe pyār kartā hai. Aur jo mujhe pyār kartā hai use merā Bāp pyār karegā. Main bhī use pyār karūṅgā aur apne āp ko us par zāhir karūṅgā. (Yūhannā 14:21)

- *Jo Īsā Masih ke ahkām par chaltā hai wuh kyā kartā hai?*
Wuh Īsā Masih ko pyār kartā hai.
- *Jo Īsā Masih ko pyār kartā hai use kaun pyār kartā hai?*
Ḳhudā Bāp aur Īsā Masih.

Yon ek bandhan hai jo imāndār ko Ḳhudā Bāp aur Ḳhudā Farzand ke sāth joṛ detā hai.

- *Bandhan kyā hai?*
Pyār—wuh pyār jis se Rūhul-quds imāndār ko Ḳhudā ke sāth jakṛe rakhtā hai.
- *Jo Masih ko pyār kartā hai us ke sāth Īsā Masih kyā karegā?*
Wuh apne āp ko us par zāhir karegā.
- *Apne āp ko pyār karne wāle par zāhir karne se kyā farq partā hai?*

Apne āp ko pyār karne wāle par zāhir karne se us ke sāth rifāqat baṛhtī jāegī. Jitne ham use pyār karenge utnā hī wuh ham par zāhir ho jāegā, utnā hī hamārī us ke sāth rifāqat baṛh jāegī.

Ab ek shāgird ne pūchhā, “Ḳhudāwand, kyā wajah hai ki āp apne āp ko sirf ham par zāhir karenge aur duniyā par nahīn?”

- *Shāgird ne yih kyon pūchhā?*
Īsā Masih farmā chukā thā ki shāgirdon aur duniyā kā koī sambandh nahīn hai. Duniyā Rūhul-quds ko pā hī nahīn saktī. Ab us ne farmāyā thā ki main apne āp ko sirf us par zāhir karūngā jo mujhe pyār kartā hai. Lekin shāgird to abhī tak samajhte the ki wuh thoṛī der bād Yarūshalam mein bādshāh bankar sab par zāhir ho jāegā. Isliē shāgird kā yih sawāl ki āp apne āp ko duniyā par zāhir kyon nahīn karenge? Āp kyon sirf ham par zāhir ho jāenge? Īsā Masih ne jawāb diyā,

Agar koī mujhe pyār kare to wuh mere kalām ke mutābiq zindagī guzāregā. Merā Bāp aise shakhs ko pyār karegā aur ham us ke pās ākar us ke sāth sukūnat kareṅge. (Yūhannā 14:23)

Ek hī shart hai ki Īsā Masīh kisī par zāhir ho jāe.

► *Shart kyā hai?*

Yih ki wuh Īsā Masīh ko pyār kare.

► *Masīh ko pyār karne se kyā hogā?*

Wuh us ke kalām ke mutābiq zindagī guzāregā.

► *Tab kyā hogā?*

Phir Kḥudā Bāp use pyār karegā aur wuh apne Farzand samet us ke pās ākar us ke sāth sukūnat karegā. Dūsre alfāz meṅ wuh us meṅ apnā ghar banā leṅge. Kitnī azīm bāt!

Lekin duniyā kabhī Īsā Masīh se muhabbat nahīn kartī, na us kī bātoṅ ke mutābiq zindagī guzārtī hai. Isliē Masīh kabhī duniyā par zāhir nahīn ho saktā. Kisī par zāhir honā us se gahrī rifāqat rakhne ke barābar hai, wuh rifāqat jo sirf ghar wāloṅ meṅ hotī hai.

Yih bāt ham par bhī sādīq ātī hai. Īsā Masīh duniyā par zāhir nahīn hotā. Is se koī farq nahīn partā ki us ke nām meṅ baṛī baṛī ibādatgāheṅ ban gaī haiṅ, ki logoṅ ne us kā nām lekar qatl-o-ghārat machāī hai, us kā nām lekar daulat aur shān-o-shaukat hāsil kī hai. Īsā Masīh duniyā kī dhūmdhām par zāhir nahīn hotā.

► *Wuh kyon nahīn duniyā par zāhir hotā?*

Kyonki duniyā use pyār nahīn kartī, us ke ahkām par nahīn chaltī. Use Rūhul-quḍs hāsil nahīn hai isliē Kḥudā se rifāqat ho nahīn saktī. Hāṅ, adālat ke dīn wuh duniyā par bhī zāhir ho jāegā, lekin rifāqat rakhne ke liē nahīn balki us kī adālat karne ke liē. Tab Īsā Masīh ne Rūhul-quḍs ke bāre meṅ ek tīsri bāt batāī. Yih ki

Rûh se Merâ Thappâ Pâo

Īsâ Masîh ne farmâyâ,

Yih sab kuchh mainne tumhâre sâth rahte hue tum ko batâyâ hai. Lekin bād meñ Rûhul-quds, jise Bâp mere nām se bhejegâ tum ko sab kuchh sikhâegâ. Yih madadgâr tum ko har bāt kī yād dilâegâ jo mainne tum ko batâi hai.
(Yûhannâ 14:25-26)

Īsâ Masîh ke chale jāne ke bād Ḳhudâ Bâp Rûhul-quds ko bhejegâ.

► *Yih madadgâr kyâ karegâ?*

Wuh sab kuchh sikhâegâ. Yānī wuh Masîh kī har bāt kī yād dilâegâ.

► *Yih karne kâ kyâ maqsad hai?*

Maqsad yih hai ki wuh ham par Masîh kâ thappâ lagâe.

► *Thappâ lagāne kâ kyâ matlab hai?*

Kāghaz par thappâ lagāne kâ matlab yih hai ki mohr lagāyâ jātā hai. Thappâ lakaṛī kâ wuh ṭukṛā bhī hotā hai jis par ubhre hue bel-būṭe bane rahte haiñ aur jis par log rang potkar un bel-būṭon ko kapṛe par chhāpte haiñ. Thappe kâ matlab sāñchā bhī hotā hai jis meñ miṭṭī yā koī aur chīz ḍhalkar sāñche kī shakl apnātī hai.

Jab ham Rûhul-quds pāte haiñ to Masîh kâ thappâ ham par lag jātā hai.

► *Masîh kâ thappâ lagne kâ kyâ matlab hai?*

- Rûh ham par Masîh kâ mohr lagātā hai. Mohr lagāne se yih bāt pakkī ho jātī hai ki ham Masîh ke haiñ.
- Rûh ham par Masîh kâ azīm design yon chhāptā hai, jis tarah safed kapṛe par rangdār thappâ lagtā hai.
- Rûh hameñ Masîh ke sāñche meñ ḍhāltā hai. Tab ham Masîh kī sūrat meñ badalte jāte haiñ. Us kī muhabbat, us kī halīmī, hāñ us kâ pūrā wujūd hamāre andar zor pakartā jātā hai.

Phir Īsā Masīh ne ek ākhirī hidāyat dī. Yih ki

Rūh se Merī Salāmatī Pāo

Īsā Masīh ne farmāyā,

Main tumhāre pās salāmatī chhoṛe jātā hūn,
apnī hī salāmatī tum ko de detā hūn. Aur main
ise yoñ nahīn detā jis tarah duniyā detī hai.
Tumhārā dil na ghabrāe aur na ḍare.
(Yūhannā 14:27)

► *Īsā Masīh kyā chhoṛe jātā hai?*

Salāmatī.

► *Yih kis kī salāmatī hai?*

Yih us kī apnī salāmatī hai.

► *Kyā duniyā yih salāmatī de saktī hai?*

Nahīn.

► *Kyon nahīn?*

Īsā Masīh ne apnī salībī maut se wuh chīz miṭā dī jo
hamēñ Ḳhudā se judā kartī hai yānī hamāre gunāhoñ ko.
Is se ham jo imān lāe haiñ Ḳhudā ke ghar wāle ban gae
haiñ. Aur yih salāmatī hamāre diloñ meñ rahtī hai.

► *Yih salāmatī kis tarah hamāre diloñ meñ rahtī hai?*

Rūhul-quds ke zariye. Wuhī hamāre diloñ meñ yih
salāmatī basā detā hai. Isī wajah se ghabrāne kī zarūrat
nahīn hai. Īsā Masīh to chalā gayā lekin Rūhul-quds ke
zariye us kī salāmatī hamāre sāth rahtī hai.

Duniyā yih salāmatī nahīn dilā saktī. Wuh to daulat, shān-
o-shaukat aur aish-o-ishrat de saktī hai. Lekin wuh yih
salāmatī nahīn de saktī.

► *Īsā Masīh yih sab kuchh kyon shāgirdoñ ko batā rahā thā?*

Us ne farmāyā,

Mainne tum ko pahle se batā diyā hai, is se
peshtar ki yih ho, tāki jab pesh āe to tum imān
lāo. (Yūhannā 14:29)

Shāgirdoñ ko yih jānane kī zarūrat thī ki Īsā Masīh kī dukh-bharī rāh Ḳhudā ke mansūbe ke mutābiq thā. Us waqt wuh nahīn samajh sakte the ki yih madadgār kyā hai aur us kā hamāre sāth kyā tālluq hai. Lekin bād meñ Rūhul-quds un par nāzil huā. Tab us ne unheñ Masīh kī qurbat aur pyār kā bandhan dilāyā. Us ne un par Masīh kā ṭhappā lagā diyā, aur unheñ Ḳhudā kī gahrī salāmatī hāsil huī.

► *Kyā āpne Rūhul-quds pā liyā hai?*

Injīl, Yūhannā 14:15-31

Agar tum mujhe pyār karte ho to mere ahkām ke mutābiq zindagī guzāroge. Aur main Bāp se guzārish karūngā to wuh tum ko ek aur madadgār degā jo abad tak tumhāre sāth rahegā yānī sachchāi kā Rūh, jise duniyā pā nahīn saktī, kyonki wuh na to use dekhti na jāntī hai. Lekin tum use jānte ho, kyonki wuh tumhāre sāth rahtā hai aur āindā tumhāre andar rahegā.

Main tum ko yatīm chhoṛkar nahīn jāūngā balki tumhāre pās wāpas āūngā. Thoṛī der ke bād duniyā mujhe nahīn dekhegī, lekin tum mujhe dekhte rahoge. Chūnki main zindā hūñ islie tum bhī zindā rahoge. Jab wuh dīn āegā to tum jān loge ki main apne Bāp meñ hūñ, tum mujh meñ ho aur main tum meñ.

Jis ke pās mere ahkām haiñ aur jo un ke mutābiq zindagī guzārtā hai, wuhī mujhe pyār kartā hai. Aur jo mujhe pyār kartā hai use merā Bāp pyār karegā. Main bhī use pyār karūngā aur apne āp ko us par zāhir karūngā.”

Yahūdāh (Yahūdāh Iskariyotī nahīn) ne pūchhā, “Ḳhudāwand, kyā wajah hai ki āp apne āp ko sirf ham par zāhir kareñge aur duniyā par nahīn?”

Īsā ne jawāb diyā, “Agar koī mujhe pyār kare to wuh mere kalām ke mutābiq zindagī guzāregā. Merā Bāp

aise shaḵḥs ko pyār karegā aur ham us ke pās ākar us ke sāth sukūnat kareṅge. Jo mujh se muhabbat nahīn kartā wuh merī bātoṅ ke mutābiq zindagī nahīn guzārtā. Aur jo kalām tum mujh se sunte ho wuh merā apnā kalām nahīn hai balki Bāp kā hai jis ne mujhe bhejā hai.

Yih sab kuchh mainne tumhāre sāth rahte hue tum ko batāyā hai. Lekin bād meṅ Rūhul-quḍs, jise Bāp mere nām se bhejegā tum ko sab kuchh sikhāegā. Yih madadgār tum ko har bāt kī yād dilāegā jo mainne tum ko batāi hai.

Main tumhāre pās salāmatī chhoṛe jātā hūṅ, apnī hī salāmatī tum ko de detā hūṅ. Aur main ise yoṅ nahīn detā jis tarah duniyā detī hai. Tumhārā dil na ghabrāe aur na ḍare. Tum ne mujh se sun liyā hai ki ‘Main jā rahā hūṅ aur tumhāre pās wāpas āūṅgā.’ Agar tum mujh se muhabbat rakhte to tum is bāt par ḡhush hote ki main Bāp ke pās jā rahā hūṅ, kyoṅki Bāp mujh se baṛā hai. Mainne tum ko pahle se batā diyā hai, is se peshtar ki yih ho, tāki jab pesh āe to tum imān lāo. Ab se main tum se zyādā bāteṅ nahīn karūṅgā, kyoṅki is duniyā kā hukmrān ā rahā hai. Use mujh par koī qābū nahīn hai, lekin duniyā yih jān le ki main Bāp ko pyār kartā hūṅ aur wuhī kuchh kartā hūṅ jis kā hukm wuh mujhe detā hai.

Ab uṭho, ham yahān se chalen.

Main Angūr kī Bel Hūn

Phal Lāne kā Rāz



Apnī maut se pahle pahle Īsā Masīh ne apne shāgirdon ko kuchh hidāyāt diñ. In hidāyāt kā ek maqsad yih thā ki us ke chale jāne ke bād un ke dil mazbūt raheñ. Sāth sāth wuh unheñ āne wāle nae zamāne ke lie taiyār karnā chāhtā thā—us zamāne ke lie jo Rūhul-quds kā zamānā bhī kahlātā hai. Īsā Masīh kah chukā thā ki mere jāne ke bād Rūhul-quds nāzil hogā. Us ke wasīle se main bhī tumhāre sāth rahūngā. Ab us ne ek nai bāt chheṛī. Bāt kyā thī? Rūhānī phal lāne kā mazmūn. Rūhul-quds kyon imāndār meñ basegā? Wuh imāndār kī zindagī meñ rūhānī phal lāne ke lie us meñ basegā. Yih samjhāne ke lie Masīh ne angūr kī bel kī misāl pesh kī. Pahlī bāt,

Angūr kī Bel kī Tāqat Pāo

Īsā Masīh ne farmāyā,

Main angūr kī haqīqī bel hūñ aur merā bāp mālī hai. Wuh merī har shākh ko jo phal nahīn lātī kātkar phenk detā hai. Lekin jo shākh phal lātī hai us kī wuh kāñṭ-chhāñṭ kartā hai tākī zyādā phal lāe. (Yūhannā 15:1-2)

- *Angūr kī bel kaun hai?*
Īsā Masīh.
- *Angūr kā mālī kaun hai?*
Ḳhudā bāp.
- *Bel kī shākhēñ kaun haiñ?*
Bel kī shākhēñ wuh haiñ jo Īsā Masīh par imān lāe haiñ. Imān ke bāis wuh shākh kī tarah us se juṛe rahte haiñ.
- *Kyā bel kī shākhēñ bel ke binā zindā rah saktī haiñ?*
Nahīñ. Wuh murjhā jātī haiñ.

- *Wuh kyon murjhā jāti haiñ?*
Bel kā ras shākhon ko phalne-phulne detā hai. Ras men bel kī tāqat hai. Jab yih ras shākh tak nahīn pahuñchtā to shākh murjhā jāti hai. Shākh apne āp men kuchh nahīn hai.
- *Mālī aisī sūkhī shākh ke sāth kyā kartā hai?*
Wuh use kāṭkar phenk detā hai.
- *Kyā aisī shākh kisī kām kī hai?*
Nahīn. Wuh be-kār hai. Aisī shākh men mazbūti nahīn hai. Sūkhī shākh sirf jalāne lāyq hai.
- *Lekin jo shākh phal lāti hai us ke sāth māli kyā kartā hai?*
Wuh us kī kāṭ-ḥhāṭ kartā hai.
- *Kyon?*
Kāṭ-ḥhāṭ zarūrī hai tāki shākh behtarīn phal lāe.
- *Kāṭ-ḥhāṭ se shākh kis tarah zyādā phal lāti hai?*
Mālī kī koshish yih hotī hai ki har be-kār aur bīmār hissā dūr kare tāki bel kā pūrā ras phal tak pahuñche. Wuh fazūl chizon men zāyā na ho jāe. Tab hī phal sab se achchhā banegā.
- *Ham is se apne bāre men kyā sikh sakte haiñ?*
- Jo shāgird Masīh par imān lātā hai wuh nae sire se paidā hotā hai. Tab wuh nāzūk koñpal bankar angūr kī bel se phūṭne lagtā hai. Baṛhte baṛhte wuh achchhī-ḥhāsī shākh ban jātā hai. Jo rūhānī tāqat use hāsil hai wuh use Masīh se miltī rahtī hai. Masīh kī zindagī use tar-o-tāzā rakhtī hai. Agar imāndār bel kā ras āne na de to na sirf Masīh kī yih tāqat balki Masīh ḥhud us kī zindagī se dūr ho jāegā. Tab us kī rūhānī zindagī sūkh jāegī aur wuh phenkne lāyq ho jāegā.
- Masīh kā shāgird Yahūdāh aisā ādmī thā. Us ne Masīh kā shāgird bankar us kī har bāt sunī. To bhī us ne use andar se rad kiyā. Lekin is kī zarūrat nahīn ki ham Īsā

Masīh ko khule taur par rad karen. Yih kāfī hai ki ham apnī zindagī par us kī hukūmat na mānen.

- Jo shāgird Masīh se jurā rahtā hai Khudā bāp us kī kānt-chhānt kartā hai. Behtarīn phal lāne kī shart to yahī hai ki wuh hamārī kānt-chhānt kare. Zarūrī hai ki har be-kār aur bīmār hissā dūr kiyā jāe tāki hamārī zindagī khūb phal lāe.

► *Ham kyā kar sakte haiñ tāki hamārī zindagī meñ bel kī tāqat khatm na ho jāe?*

Barī bāt yih hai ki ham Masīh ko har tarah se apnī zindagī meñ āne deñ. Ki hamārī ghalat harkateñ aur duniyā kā kūrā-karkaṭ ras kā rāstā band na karen.

► *Jab hamārī kānt-chhānt hotī hai to kyā diqqat nahīn hotī?*

Diqqat zarūr hotī hai. Islie zarūrī hai ki hamen kānt-chhānt kā maqsad yād rahe. Hamen yaqīn hai ki hamārā ilāhī māli māhir hai, ki wuh jāntā hai ki kyā karnā hai. Us kī niyat achchhī hai, aur wuh hone nahīn degā ki ham janglī ho jāen. Us kā pūrā dhyān is par rahtā hai ki ham phal lāen. Yih bāt yād karnā bahut ahm hai tāki ham mushkilāt se dochār hote waqt māyūs na ho jāen.

► *Kyā angūr kī bel ko bhī diqqat hotī hai?*

- Be-shak. Kā tarah kī diqqat hotī hai. Jo muqaddas aur pāk hai us se ham jur jāte haiñ—ham jo kamzor aur nāqis insān haiñ. Bel ko hamārī yih kamzoriyāñ bardāsht karnī parṭī haiñ.
- Murdā shākh ko sahnā bhī mushkil hai aur use kātne se bhī bel ko taklīf hotī hai.
- Lekin bel ko yih bhī bardāsht karnā parṭā hai ki zindā shākhēñ ekdam ṭhīk-ṭhāk nahīn hotīñ. Tab kānt-chhānt kā zarūrī kām bel ko bhī taklīf pahuñchātā hai.

Hamārā āqā kitnā halīm hai ki wuh yih sab kuchh roz baroz bardāsht kartā hai!

► *Is kām meñ Rūhul-quḍṣ kā kyā hāth hai?*

Rūhul-quds ke zariye Masih khud hamāre dilon meñ bastā hai. Usī se hamēñ Īsā Masīh kī tāqat miltī hai. Aur usī ke zariye Kḥudā bāp māli kā kām kartā rahtā hai. Dūsri bāt,

Angūr kī Bel kā Phal Lāo

Masīh ne farmāyā,

Jo shākh bel se kaṭ gāi hai wuh phal nahīn lā saktī. Bilkul isī tarah tum bhī agar tum mujh meñ qāym nahīn rahte phal nahīn lā sakte. (Yūhannā 15:4)

- *Har paudhe kā sab se ahm maqsad kyā hotā hai?*
Har paudhe kā maqsad yih hotā hai ki wuh phal lāe.
- *Har phal kā kyā maqsad hotā hai?*
 - Phal ko khāyā jā saktā hai. Us kā ek maqsad khāne wāle ko taqwiyyat denā hai.
 - Lekin phal kā sab se ahm maqsad yih hai ki wuh bij paidā kare.
- *Bij se kyā paidā hotā hai?*
Nayā paudhā. Bahut bār ek hī phal meñ kāi bij hote haiñ. Ek phal se kāi paudhe ug āte haiñ.
- *Hamārā phal lāne kā kyā maqsad hai?*
 - Pahle yih ki ham Īsā Masīh ke namūne par chaleñ. Us kī halīmī, us kī muhabbat, us kī hikmat ham meñ sarāyat kare.
 - Dūsre yih ki ham dūsron ke lie barkat kā bāis hoñ. Ki ham se dūsre bhī imān lāeñ. Ki wuh bhī nae sire se paidā hokar Rūhul-quds pāeñ. Hāñ, ki wuh khud phal lāne lageñ.

Gharz Masīh par imān lāne se hamārī zindagī ūpar se niche tak badal jāti hai. Imān lāte waqt ham ek anokhe safr par nikalte haiñ—aisā safr jis meñ challenge bhī hote haiñ aur kḥushiyāñ bhī, kḥatre bhī aur sukūn bhī. Safr kā maqsad

phal hai, safr kī manzil hamārā āsmānī ghar. Dhyān deñ ki phal lāne ke lie hamen ek ḵhās hathiyār diyā gayā hai. Īsā Masīh ne farmāyā,

Agar tum mujh men qāym raho aur main tum men to jo jī chāhe māngo, wuh tum ko diyā jāegā. (Yūhannā 15:7)

- *Hamen phal lāne ke lie kyā hathiyār diyā gayā hai?*
Māngne yānī duā kā hathiyār. Duā men ham har māmālā us ke sāmne rakh sakte haiñ. Is men hamārā ek ḵhās namūnā hai—Īsā Masīh.
- *Īsā Masīh kyon hamārā namūnā hai?*
Jab Īsā Masīh is duniyā men āyā to duā kā yih hathiyār us ke hāth men rahtā thā. Bahut bār likhā hai ki wuh duā karne kisī wīrān jagah chalā gayā. Aur Ḳhudā bāp ne us kī sunī. Us ne use bahut phal baḵsh diyā.
- *Us ne use kaun-sā phal baḵsh diyā?*
Ham hī us kā phal haiñ.
- *Duā kā hathiyār us ke lie itnā aham kyon thā?*
Islie ki is se wuh har pal apne bāp kī qurbat men rahtā thā. Is se āpas kī muhabbat qāym-o-dāym rahtī thī. Isī se use ḵhidmat karne kī tāqat miltī thī. Dhyān deñ ki duā kā ek hī maqsad hai—yih ki ham Ḳhudā kī qurbat men raheñ, ki hamārī us se muhabbat taqwiyat pātī rahe. Tab hī ham us kī tāqat hāsil karte raheñge, wuhī tāqat jo angūr kī bel se milti hai. Tab hī ham ṭhīk-ṭhāk phal lāte raheñge. Islie Īsā Masīh ne farmāyā,

Merī muhabbat men qāym raho. (Yūhannā 15:9)

Jab ham duā men lage rahte haiñ tab ham us kī muhabbat aur qurbat men qāym rahte haiñ. Isī qurbat men rahne se ham māngeñge to wuh hamārī sunkar hamen phal dilāegā.

Us kī qurbat meñ nahīñ raheñge to hamārī sunī nahīñ jāegī aur ham phal nahīñ lāeñge.

► *Kyā āp ko duā kī yih qurbat aur muhabbat hāsil huī hai? Kyā āp duā se phal lāe hain?*

Tīsri bāt,

Angūr kī Bel kī Ḳhushī Manāo

Īsā Masīh ne farmāyā,

Mainne tum ko yih islie batāyā hai tāki merī ḳhushī tum meñ ho balki tumhārā dil ḳhushī se bharkar chhalak uṭhe. (Yūhannā 15:11)

Masīh par imān kā ek aham natijā ḳhushī hai. Yih ām ḳhushī nahīñ hai. Yih usī kī ḳhushī hai—wuh ḳhushī jis ne gunāh aur maut par fath pāī hai.

► *Kyā āp ko yih bharpūr ḳhushī hāsil hai? Aisi ḳhushī jo dil se chhalak uṭhti hai?*

Dāūd Nabī ne sadiyōñ pahle ek mashhūr zabūr meñ Ḳhudā kī yih gahrī ḳhushī bayān kī,

Tū mere dushmanoñ ke rūbarū mere sāmne mez bichhākar mere sar ko tel se tar-o-tāzā kartā hai. Merā pyālā terī barkat se chhalak uṭhtā hai. (Zabūr 23:5)

Kitnā sukūn, kitnī ḳhushī in alfāz se zāhir hotī hai! Jab ham ḳhud ḳhushī talāsh karte hain to yih ḳhushī khokhlī sābit hotī hai. Lekin jab Īsā Masīh hameñ apnī ḳhushī dilātā hai to ham sachmuch ḳhush hote hain chāhe dushman hamāre rūbarū kyoñ na ho.

► *Kyā āp ko angūr kī gahrī ḳhushī hāsil hai?*

Chauthī bāt,

Angūr kī Bel kī Āzādī Apnāo

Īsā Masīh ne farmāyā,

Tum mere dost ho agar tum wuh kuchh karo jo main tum ko batātā hūñ. Ab se main nahīñ kahtā ki tum ġhulām ho, kyonki ġhulām nahīñ jāntā ki us kā mālīk kyā kartā hai. Is ke bajāe mainne kahā hai ki tum dost ho, kyonki mainne tum ko sab kuchh batāyā hai jo mainne apne bāp se sunā hai. (Yūhannā 15:14-15)

- *Īsā Masīh ke shāgird ab se kyā hain?*
Wuh us ke dost hain.
- *Ab se wuh kyā nahīñ hain?*
Ab se wuh ġhulām nahīñ hain.
- *Jo ġhulām nahīñ hai wuh kyā hai?*
Wuh āzād hai.
- *Āzād hone aur ġhulām hone mein kyā farq hai?*
Ġhulām kā farz hai ki wuh mālīk kā har hukm pūrā kare. Wuh inkār nahīñ kar saktā. Is ke ulaṭ dost apnī āzādī se dūsre kī bāt pūrī kartā hai. Masīh ke shāgird ḵhushī se us kī hidāyāt par chalte hain. Isliē nahīñ ki wuh majbūr hain balki isliē ki wuh apne āqā ko ḵhush rakhnā chāhte hain.
- *Īsā Masīh ġhulām aur dost mein ek aur farq bayān kartā hai. Wuh kyā hai?*
Ġhulām nahīñ jāntā ki mālīk kyā kartā hai. Yahūdī aise ġhulām the, kyonki Yahūdī shariāt ke ġhulām the. Is ke muqābale mein Īsā Masīh ne hamen najāt dekar sab kuchh batā diyā hai jo fathmand zindagī guzārne ke lie zarūrī hai. Wuh nahīñ chāhtā ki ham andhe dhund us ke pīchhe ho leñ. Wuh chāhtā hai ki ham samajh-būjh kar us kī har bāt māneñ.
- *Ek bār phir shariāt aur fazal mein farq kī jhalak dikhāi detī hai. Farq kyā hai?*
Īsā Masīh kī āmad se pahle Isrāīlī shariāt ke ġhulām the. Wuh shariāt ke ahkām par chalne par majbūr the. Unhen

dost kī āzādī nahīn thī jo āzādī aur ḡhushī se Ḳhudā kī rāh par chaltā hai. Dekho, Ḳhudā nahīn chāhtā ki ham majbūrī se us kī marzī karen. Wuh chāhtā hai ki ham āzādī se us kī marzī pūrī karen. Yahī fazal kā matlab hai.

- *Jo āzād nahīn hai wuh kyon mālīk ke hukm par chaltā hai?*

Use ḡar hai, aur wuh sazā se bachnā chāhtā hai.

- *Jo āzād hai wuh kyon dost ke hukm par chaltā hai?*

Wuh na ḡartā hai na sazā ke bāre meñ sochtā hai. Wuh itnā hī chāhtā hai ki dost ḡhush ho.

Achchhe gharāne meñ bhī aisā hī hotā hai. Achchhe gharāne meñ har ek ḡhushī se ghar ke farāyṡ adā kartā hai. Use ḡar nahīn ki sarparast sazā degā. Use pūrī ummīd hai ki sarparast kahegā ki shābāsh beṡā, shābāsh beṡī!

Āḡhirī bāt,

Bel Nahīn To Phal Nahīn

- *Ham kis tarah jān sakte haiñ ki ham ḡhulām yā dost haiñ?*

Masīh ne farmāyā,

Tum ne mujhe nahīn chunā balki maiñne tum ko chun liyā hai. Maiñne tum ko muḡarrar kiyā ki jākar phal lāo, aisā phal jo qāym rahe. Phir bāp tum ko wuh kuchh degā jo tum mere nām meñ māṅoge. Merā hukm yahī hai ki ek dūse se muhabbat rakho. (Yūhannā 15:16-17)

- *Ḳyā ḡhulām apne āp ko chhuṡā saktā hai?*

Nahīn. Jo ḡhulām hai wuh apne āp ko āzād nahīn kar saktā. Wuh to zanjīroñ meñ jakṡā rahtā hai. Ham bhī apne āp ko Masīh ke āzād dost nahīn banā sakte haiñ. Sirf wuhī hameñ āzād kar saktā hai.

Jab Īsā Masīh ne salīb par apnī jān dī to us ne maut aur gunāh par fath pākar ḡhulāmī ke bandhan toṡ ḡāle. Ab se jo us par imān lātā hai wuh yih āzādī pātā hai. Tab use mālūm ho jātā hai ki yih merā apnā kām nahīn thā,

kyonki main̄ khud baḡhud gunāh aur maut se āzādī hāsīl nahīn kar saktā thā. Tab wuh angūr kī bel kī shāḡh bankar bel kī tāqat pātā hai, aur wuh phalne-phūlne lagtā hai. Us kī konpleñ nikaltī haiñ, phal lagtā hai. Be-shak mālī us kī kāñṭ-chhāñṭ kartā rahtā hai. Phir bhī us kā dīl ek ajīb-sī khushī se bharā rahtā hai. Kyonki wuh jāntā hai ki yih islie ho rahā hai ki main̄ achchhā-ḡhāsā phal lāūñ. Masīh khud ne mujhe chun liyā hai tāki main̄ āzād aur phaldār zindagī guzārūñ aur ek dīn us ke pās pahunch jāūñ.

- *Ham kis tarah mālūm kar sakte haiñ ki Īsā Masīh ne hamēñ chun liyā hai?*

Phal lāne se aur phal lāne ke hathiyār yāñī duā se. Usī se ham dīn badīn angūr kī bel kī qurbat aur tāqat hāsīl karte rahte haiñ.

- *Kyā āp ko phal lāne kā tajribā huā hai?*

Injīl, Yūhannā 15:1-17

Main̄ angūr kī haqīqī bel hūñ aur merā bāp mālī hai. Wuh merī har shāḡh ko jo phal nahīn lātī kāṭkar phenk detā hai. Lekin jo shāḡh phal lātī hai us kī wuh kāñṭ-chhāñṭ kartā hai tāki zyādā phal lāe. Us kalām ke zariye jo main̄ne tum ko sunāyā hai tum to pāk-sāf ho chuke ho. Mujh meñ qāym raho to main̄ bhī tum meñ qāym rahūngā. Jo shāḡh bel se kaṭ gaī hai wuh phal nahīn lā saktī. Bilkul isī tarah tum bhī agar tum mujh meñ qāym nahīn rahte phal nahīn lā sakte.

Main̄ hī angūr kī bel hūñ, aur tum us kī shāḡheñ ho. Jo mujh meñ qāym rahtā hai aur main̄ us meñ wuh bahut-sā phal lātā hai, kyonki mujh se alag hokar tum kuchh nahīn kar sakte. Jo mujh meñ qāym nahīn rahtā aur na main̄ us meñ use be-fāyda shāḡh kī tarah bāhar phenk

diyā jātā hai. Aisī shāḵheñ sūkh jāti haiñ aur log un kā ḍher lagākar unheñ āg meñ jhoñk dete haiñ jahāñ wuh jal jāti haiñ. Agar tum mujh meñ qāym raho aur maiñ tum meñ to jo jī chāhe māñgo, wuh tum ko diyā jāegā. Jab tum bahut-sā phal lāte aur yoñ mere shāgird sābit hote ho to is se mere bāp ko jalāl miltā hai. Jis tarah bāp ne mujh se muhabbat rakhī hai usī tarah maiñne tum se bhī muhabbat rakhī hai. Ab merī muhabbat meñ qāym raho. Jab tum mere ahkām ke mutābiq zindagī guzārte ho to tum merī muhabbat meñ qāym rahte ho. Maiñ bhī isī tarah apne bāp ke ahkām ke mutābiq chaltā hūñ aur yoñ us kī muhabbat meñ qāym rahtā hūñ.

Maiñne tum ko yih islie batāyā hai tāki merī ḡhushī tum meñ ho balki tumhārā dil ḡhushī se bharkar chhalak uṭhe. Merā hukm yih hai ki ek dūsre ko waise pyār karo jaise maiñne tum ko pyār kiyā hai. Is se baṛī muhabbat hai nahīñ ki koī apne dostoñ ke lie apnī jāñ de de. Tum mere dost ho agar tum wuh kuchh karo jo maiñ tum ko batātā hūñ. Ab se maiñ nahīñ kahtā ki tum ḡhulām ho, kyonki ḡhulām nahīñ jāntā ki us kā mālik kyā kartā hai. Is ke bajāe maiñne kahā hai ki tum dost ho, kyonki maiñne tum ko sab kuchh batāyā hai jo maiñne apne bāp se sunā hai. Tum ne mujhe nahīñ chunā balki maiñne tum ko chun liyā hai. Maiñne tum ko muqarrar kiyā ki jākar phal lāo, aisā phal jo qāym rahe. Phir bāp tum ko wuh kuchh degā jo tum mere nām meñ māñgoge. Merā hukm yahī hai ki ek dūsre se muhabbat rakho.

Dushman ke Rūbarū Mazbūtī
Rūhul Quds kī Zabardast Himāyat



Is duniyā ko chhoṛkar chale jāne se pahle Īsā Masīh apne shāgirdoṅ ko us waqt ke lie taiyār karnā chāhtā thā jab wuh un ke sāth nahīn hogā. Us ne farmāyā ki mat ghabrāo, tum akele nahīn rahoge. Rūhul-quds tum par nāzil hogā. Wuh merī qurbat aur madad dilāegā. Is silsile meṅ Masīh ne ek nayā pahlū chheṛā—dushman ke rūbarū mazbūtī. Ham muḥhālifoṅ ke sāmne kis tarah mazbūt rah sakte haiṅ? Yih is sabaq kā mazmūn hai. Pahlī bāt,

Dushman ke Rūbarū Mazbūt Raho

Īsā Masīh ne farmāyā,

Agar duniyā tum se dushmanī rakhe to yih bāt zahṅ meṅ rakho ki us ne tum se pahle mujh se dushmanī rakhī hai. (Yūhannā 15:18)

- *Is bāt meṅ duniyā kaun hai?*

Duniyā wuh sab haiṅ jo Ḳhudā ke tābe nahīn rahte.

- *Jo Masīh par īmān lāe haiṅ kyā wuh bhī duniyā ke haiṅ?*

Nahīn. Masīh ne farmāyā,

Agar tum duniyā ke hote to duniyā tum ko apnā samajhkar pyār kartī. Lekin tum duniyā ke nahīn ho. Maiṅne tum ko duniyā se alag karke chun liyā hai. (Yūhannā 15:19)

- *Jo īmān rakhte haiṅ wuh duniyā ke nahīn haiṅ. Kyon?*

Islie ki Īsā Masīh ne unheṅ duniyā se alag karke chun liyā hai.

- *Kyā duniyā ḳhush hai ki Masīh ne īmāndāroṅ ko alag kar liyā hai?*

Nahīn. Īsā Masīh ne farmāyā,

Agar unhoñ ne mujhe satāyā hai to tumheñ bhī satāēnge. (Yūhannā 15:20)

► *Yih nāḡhushī kis tarah mālūm hotī hai?*

Yih nāḡhushī satāne se mālūm hotī hai. Jinhoñ ne Masīh ko satāyā wuh us ke shāgirdoñ ko satāne ke lie har rāstā nikāleñge. Īsā Masīh ne farmāyā,

Lekin tumhāre sāth jo kuchh bhī kareñge, mere nām kī wajah se kareñge, kyonki wuh use nahīñ jānte jis ne mujhe bhejā hai.
(Yūhannā 15:21)

► *Duniyā ke log kis ke nām kī wajah se imāndāroñ ko satāēnge?*
Wuh Masīh ke nām kī wajah se unheñ satāēnge.

► *Wuh unheñ kyon satāēnge?*

Wuh Ḳhudā Bāp ko nahīñ jānte jis ne use bhejā thā.

► *Wuh kis lihāz se Ḳhudā Bāp ko nahīñ jānte?*

Īsā Masīh ne Ḳhudā Bāp kī marzī un par zāhir kī lekin unhoñ ne use qabūl nahīñ kiyā thā. Islie wuh Ḳhudā Bāp ko nahīñ jānte.

► *Yahāñ is kā kyā matlab hai ki wuh Ḳhudā Bāp ko nahīñ jānte?*

Yahāñ is kā matlab yih nahīñ hai ki wuh Ḳhudā ke bāre meñ ilm nahīñ rakhte. Yahāñ is kā matlab hai ki un kā Ḳhudā se rishtā nahīñ hai, tālluq nahīñ hai. Unhoñ ne us kī marzī rad karke us ke ghar wāle banane se inkār kiyā hai.

Ġharz, imāndāroñ ko dūsroñ ke hamloñ ke lie chaukas rahnā chāhie. Wuh hairān na hoñ agar unheñ satāyā jāe. Aur yih satānā kā bār bahut saḡht hogā. Īsā Masīh ne farmāyā,

Wuh tum ko Yahūdī jamātoñ se nikāl deñge, balki wuh waqt bhī āne wālā hai ki jo bhī tum ko mār ḡālegā wuh samjhegā, ‘Mainne Allāh kī ḡhidmat kī hai.’ (Yūhannā 16:2)

► *Īmāndāron ke sāth kyā kiyā jāegā?*

- Unheñ jamāton se nikāl diyā jāegā. Matlab hai unheñ birādārī se aur kaī bār ghar se bhī kharīj kiyā jāegā.
- Log Īmāndāron ko mār dāleñge yih samajhkar ki mainñe Allāh kī k̄hidmat kī hai.

Ġharz, yih koī naī bāt nahīñ hai ki logoñ ko Īmān ke bāis ghar aur birādārī se bhagāyā jātā hai.

► *Kyā aise satāne wāle sachmuch dīndār hote haiñ?*

Nahīñ. Īsā Masīh ne farmāyā,

Wuh is qism kī harkateñ islie kareñge ki unhoñ ne na Bāp ko jānā hai, na mujhe. (Yūhannā 16:3)

Yon Īsā Masīh mujh se aur āpse pūchh rahā hai ki kyā tum duniyā kī dushmanī sahne ke lie taiyār ho? Phir bhī wuh hamēñ ḍarānā nahīñ chāhtā. Us kā farmān hai ki mat ghabrāo, kyonki tumheñ ek azīm madadgār milegā. Rūhul-quds tum par nāzil hogā jo tumheñ dushman kā sāmñā karne kī mazbūti dilāegā. Kis tarah? Wuh tumhārā dil pāñch bāton se bharkar mazbūti dilāegā. Pahlī bāt,

Gawāhī Dene kī Mazbūti Pāo

Īsā Masīh ne farmāyā,

Jab wuh madadgār āegā jise main Bāp kī taraf se tumhāre pās bhejūngā to wuh mere bāre meñ gawāhī degā. Wuh sachchāī kā Rūh hai jo Bāp meñ se nikaltā hai. Tum ko bhī mere bāre meñ gawāhī denā hai, kyonki tum ibtidā se mere sāth rahe ho. (Yūhannā 15:26-27)

► *Īsā Masīh Rūhul-quds bhejegā to wuh kyā karegā?*

Wuh Īsā Masīh ke bāre meñ gawāhī degā.

► *Jab log hamāre k̄hilāf kharē ho jāēñ to yih kyon aham hai ki ham Rūhul-quds kī gawāhī pāēñ?*

Jab ḍāñwāñḍol hone kā k̄hatrā hai to Rūhul-quds hamēñ Masīh ke kām aur kalām kī yād dilātā hai. Na sirf yih balki

wuh hamen Masīh kī qurbat bhī dilātā hai. Tab ham apnī zindagī aur bāton se Masīh ke bāre men puḡhtā gawāhī de sakte haiñ.

► *Kyā āp ko gawāhī dene kī tāqat mil gai hai?*

Īmān lāne se āp kā dil Rūhul-quḡs kī gawāhī se bhar jātā hai. Tab āp mazbūtī se muḡhālīf duniyā kā sāmna kar sakte haiñ.

Phir Īsā Masīh ne ek pahelī pesh kī. Us ne Rūhul-quḡs ke bāre men farmāyā,

Jab wuh āegā to gunāh, rāstbāzī aur adālat ke bāre men duniyā kī ḡhalatī ko be-niqāb karke yih zāhir karegā: **gunāh** ke bāre men yih ki log mujh par īmān nahīn rakhte, **rāstbāzī** ke bāre men yih ki main Bāp ke pās jā rahā hūn aur tum mujhe ab se nahīn dekhoge, aur **adālat** ke bāre men yih ki is duniyā ke hukmrān kī adālat ho chukī hai. (Yūhannā 16:8-11)

Rūhul-quḡs tīn bāton men duniyā kī ḡhalatī be-niqāb karegā—gunāh, rāstbāzī aur adālat ke bāre men us kī ḡhalatī. Ham yih pahelī kis tarah suljhā sakte haiñ?

Yih samajhne ke lie yih jānanā zarūrī hai ki jo bhī īmān lāe use tīn chīzen miltī haiñ: gunāh kī māfī, Masīh kī rāstbāzī aur adālat se chhuṡkāre. Yahī tīn chīzen duniyā kabhī nahīn pā saktī. Duniyā apne gunāh, apne jhūṡ aur ilāhī adālat se najāt nahīn pā saktī. Hāñ, wuh yih bāt māntī bhī nahīn. Islie Rūhul-quḡs us kī yih ḡhalatī be-niqāb kartā rahegā. Dūsrī taraf Rūhul-quḡs in tīn bāton se īmāndāron ko mazbūt kartā rahegā tāki wuh duniyā ke hamlon se bache raheñ. Islie dūsrī bāt,

Māfī kī Mazbūtī Pāo

Īsā Masīh ne farmāyā ki Rūhul-quḡs gunāh ke bāre men duniyā kī ḡhalatī be-niqāb karegā.

- *Wuh gunāh ke bāre meñ duniyā kī ḡhalatī kis tarah be-niqāb karegā?*

Duniyā kī ḡhalatī is se be-niqāb hogī ki log Masīh par imān nahīn rakhte.

- *Imān na rakhnā kyon gunāh kā sabūt hai?*

Īsā Masīh ke wasīle se hamāre gunāh māf hue haiñ. Sirf ek wajah hai ki insān ko Masīh kī māfī na mile. Wajah yih hai ki wuh imān na lāe. Jo imān nahīn lātā us kā chhuṭkārā nāmumkin hai. Duniyā kā yahī hāl hai. Wuh nahīn samajhtī ki mujhe us māfī kī zarūrat hai jo sirf Īsā Masīh de saktā hai. Lekin imāndār ko patā hai ki yahī bāt mujhe dāñwāñdol ho jāne se bachātī hai.

- *Kyā āp ko Masīh kī māfī mil gai hai?*

Imān lāne se āp kā dil Rūhul-quds kī madad se māfī kī kḡhushī se bhar jātā hai. Tab āp mazbūti se muḡhālīf duniyā kā sāmna kar sakte haiñ. Tisrī bāt,

Rāstbāzī kī Mazbūti Pāo

Īsā Masīh ne farmāyā ki Rūhul-quds rāstbāzī ke bāre meñ duniyā kī ḡhalatī ko be-niqāb karegā.

- *Wuh yih kis tarah karegā?*

Is se ki Īsā Masīh Ḳhudā Bāp ke pās jā rahā hai.

- *Ḳhudā Bāp ke pās jāne kā kyā matlab hai?*

Ḳhudā Bāp ke pās jāne kā rāstā salībī maut thī. Is salībī maut se hamēn na sirf us kī māfī hāsīl huī balki us kī rāstbāzī bhī.

- *Salībī maut se hamēn rāstbāzī kis tarah hāsīl huī?*

Insān apnī tāqat se Ḳhudā ke sāmne rāstbāz nahīn ṭhahr saktā. Wuh apnī tāqat se kabhī wuh pākīzagī hāsīl nahīn kar saktā jis se wuh Ḳhudā ke huzūr rāstbāz ṭhahr sake. Isliē Īsā Masīh ne hamārī sazā apne ūpar lī tāki ham Ḳhudā Bāp ke sāmne rāstbāz ṭhahreñ. Yih hamārī apnī rāstbāzī nahīn balki usī kī hai. Isliē hamārī najāt yaqīnī

hai: Yih kām ham se nahīn balki us se huā jis kā har kām ṭhos aur pakkā hai.

Duniyā samajhtī hai ki merī rāstbāzī ṭhīk hī hai. Wuh yih nahīn māntī ki Īsā Masīh ko merī kḥātir marne kī zarūrat thī tāki mujhe us kī rāstbāzī hāsil ho. Rūhul-quds duniyā kī yih ḡhalatī be-niqāb karegā, aur adālat ke dīn duniyā ko apnī ḡhalatī khul-e-ām mānanī paregī. Is ke muqābale meṅ jise Īsā Masīh kī rāstbāzī hāsil hai wuh Rūhul-quds se mazbūt rahtā hai.

► *Kyā āp ko Masīh kī rāstbāzī mil gayī hai?*

Īmān lāne se āp kā dil Rūhul-quds kī madad se rāstbāzī kī kḥushī se bhar jātā hai. Tab āp mazbūtī se muḡhālīf duniyā kā sāmna kar sakte haiṅ. Chauthī bāt,

Chhuṭkāre kī Mazbūtī Pāo

Īsā Masīh ne farmāyā ki Rūhul-quds adālat ke bāre meṅ duniyā kī ḡhalatī be-niqāb karegā.

► *Wuh yih kis tarah be-niqāb karegā?*

Is se ki is duniyā ke hukmrān kī adālat ho chukī hai.

► *Duniyā kā hukmrān kaun hai?*

Iblīs.

► *Us kī adālat kis tarah ho chukī hai?*

Masīh kī maut se har wuh insān Iblīs ke qabze se chhūṭ gayā jo Masīh par īmān lāyā hai. Apnī maut aur jī uṭhne se Masīh ne Iblīs par fath pākar us kī adālat kī. Ab tak Iblīs garajte hue sher-babar kī tarah idhar-udhar ḡhūmkar sab ko haṛap kar lene kī talāsh meṅ rahtā hai. Lekin us kī hukūmat mahdūd hai. Ek dīn Īsā Masīh wāpas ākar use us ke cheloṅ samet pakaṛkar jahannum meṅ ḡāl degā. Lekin jo Masīh par īmān lāe haiṅ un kā chhuṭkāre yaqīnī hai.

► *Kyā āp ko Masīh kā chhuṭkāre mil gayā hai?*

Īmān lāne se āp kā dil Rūhul-quds kī madad se chhuṭkāre kī kḥushī se bhar jātā hai. Tab āp mazbūtī se muḡhālīf

duniyā kā sāmṇā kar sakte haiṇ. Magar khabrdār. Agar
īmān na lāe to āp kī adālat yaqīnī hai. Ākhirī bāt,

Sachchāi kī Mazbūtī Pāo

Īsā Masīh ne farmāyā,

Mujhe tum ko mazīd bahut kuchh batānā hai,
lekin is waqt tum use bardāsht nahīn kar sakte.
Jab sachchāi kā Rūh āegā to wuh pūrī sachchāi
kī taraf tumhārī rāhnumāi karegā.
(Yūhannā 16:12-13)

- *Rūhul-quḍḥ ko kyā nām diyā gayā hai?*
Sachchāi kā Rūh.
- *Iskā kyā matlab hai?*
Us par pūrā bharosā rakhā jā saktā hai kyonki wuh
sarāsar sachchā hai. Us meṇ jhūṭh nahīn hai.
- *Sachchāi kā yih Rūh kyā karegā?*
Yih pūrī sachchāi kī taraf hamārī rāhnumāi karegā.
- *Wuh yih kis tarah karegā?*
 - Us ne Īsā Masīh kī har bāt qalamband karne meṇ
shāgirdon kī madad kī.
 - Lekin āj bhī wuh hamārī rāhnumāi kartā hai.
- *Āj wuh kis tarah hamārī rāhnumāi kartā hai?*
 - Wuh Kḥudā kī marzī samajhne meṇ hamārī rāhnumāi
kartā hai.
 - Is ṭeṛhī-meṛhī duniyā meṇ wuh Kḥudā kī marzī par
amal karne meṇ hamārī rāhnumāi kartā hai.
- *Kyā āp ko Rūh kī sachchāi mil gāi hai?*
īmān lāne se āp kā dil Rūhul-quḍḥ kī madad se sachchāi
kī kḥushī se bhar jātā hai. Tab āp mazbūtī se muḥḥālīf
duniyā kā sāmṇā kar sakte haiṇ.

Ġharz Masīh kī in bāton se Rūhul-quḍḥ kā aḥm kirdār kḥūb
mālūm hotā hai. Jo īmān rakhtā hai us ke lie duniyā
kī dushmanī pakkī hai. Lekin īmān lāne se use ek aisā

madadgār miltā hai jo har tarah se us kī madad karegā. Jab duniyā us par hamlā karegī to us kā dīl mazbūt rahegā. Kyoṅki wuh gawāhī dene kī ḡhushī se bhar jāegā; wuh Masīh kī māfī, rāstbāzī aur chhuṭkāre kī ḡhushī se bhar jāegā; aur wuh Rūh kī sachchāī se bhar jāegā.

► *Kyā āp ko yih madadgār hāsīl huā hai?*

Injīl, Yūhannā 15:18–16:15

Agar duniyā tum se dushmanī rakhe to yih bāt zahn meṅ rakho ki us ne tum se pahle mujh se dushmanī rakhī hai. Agar tum duniyā ke hote to duniyā tum ko apnā samajhkar pyār kartī. Lekin tum duniyā ke nahīn ho. Mainne tum ko duniyā se alag karke chun liyā hai. Islie duniyā tum se dushmanī rakhtī hai. Wuh bāt yād karo jo mainne tum ko batāī ki ḡhulām apne mālik se baṛā nahīn hotā. Agar unhoṅ ne mujhe satāyā hai to tumheṅ bhī satāeṅge. Aur agar unhoṅ ne mere kalām ke mutābiq zindagī guzārī to wuh tumhārī bātoṅ par bhī amal kareṅge. Lekin tumhāre sāth jo kuchh bhī kareṅge, mere nām kī wajah se kareṅge, kyoṅki wuh use nahīn jānte jis ne mujhe bhejā hai. Agar main āyā na hotā aur un se bāt na kī hotī to wuh qusūrwar na ṭahrte. Lekin ab un ke gunāh kā koī bhī uzr bāqī nahīn rahā. Jo mujh se dushmanī rakhtā hai wuh mere Bāp se bhī dushmanī rakhtā hai. Agar mainne un ke darmiyān aisā kām na kiyā hotā jo kisī aur ne nahīn kiyā to wuh qusūrwar na ṭahrte. Lekin ab unhoṅ ne sab kuchh dekhā hai aur phir bhī mujh se aur mere Bāp se dushmanī rakhī hai. Aur aisā honā bhī thā tāki Kalām-e-muqaddas kī yih peshgoī pūri ho jāe ki ‘Unhoṅ ne bilāwajah mujh se kīnā rakhā hai.’

Jab wuh madadgār āegā jise main Bāp kī taraf se tumhāre pās bhejūngā to wuh mere bāre mein gawāhī degā. Wuh sachchāī kā Rūh hai jo Bāp mein se nikaltā hai. Tum ko bhī mere bāre mein gawāhī denā hai, kyonki tum ibtidā se mere sāth rahe ho.

Mainne tum ko yih islie batāyā hai tāki tum gumrah na ho jāo. Wuh tum ko Yahūdī jamāton se nikāl denge, balki wuh waqt bhī āne wālā hai ki jo bhī tum ko mār dālegā wuh samjhegā, ‘Mainne Allāh kī k̄hidmat kī hai.’ Wuh is qism kī harkatein islie karenge ki unhoin ne na Bāp ko jānā hai, na mujhe. Mainne tum ko yih bātein islie batāī haiin ki jab un kā waqt ā jāe to tum ko yād āe ki mainne tumhein āgāh kar diyā thā.

Mainne ab tak tum ko yih nahīn batāyā kyonki main tumhāre sāth thā. Lekin ab main us ke pās jā rahā hūn jis ne mujhe bhejā hai. To bhī tum mein se koi mujh se nahīn pūchhtā, ‘Ap kahān jā rahe haiin?’ Is ke bajāe tumhāre dil ghamzadā haiin ki mainne tum ko aisī bātein batāī haiin. Lekin main tum ko sach batātā hūn ki tumhāre lie fāydāmand hai ki main jā rahā hūn. Agar main na jāūn to madadgār tumhāre pās nahīn āegā. Lekin agar main jāūn to main use tumhāre pās bhej dūngā. Aur jab wuh āegā to gunāh, rāstbāzī aur adālat ke bāre mein duniyā kī ḡhalatī ko be-niqāb karke yih zāhir karegā: Gunāh ke bāre mein yih ki log mujh par imān nahīn rakhte, rāstbāzī ke bāre mein yih ki main Bāp ke pās jā rahā hūn aur tum mujhe ab se nahīn dekhoge, aur adālat ke bāre mein yih ki is duniyā ke hukmrān kī adālat ho chukī hai.

Mujhe tum ko mazīd bahut kuchh batānā hai, lekin is waqt tum use bardāshht nahīn kar sakte. Jab sachchāī kā Rūh āegā to wuh pūrī sachchāī kī taraf tumhāri

rāhnumāi karegā. Wuh apnī marzī se bāt nahīn karegā balki sirf wuhī kuchh kahegā jo wuh ḵhud sunegā. Wuhī tum ko mustaqbil ke bāre meñ bhī batāegā. Aur wuh is meñ mujhe jalāl degā ki wuh tum ko wuhī kuchh sunāegā jo use mujh se milā hogā. Jo kuchh bhī Bāp kā hai wuh merā hai. Isle mainne kahā, ‘Rūh tum ko wuhī kuchh sunāegā jo use mujh se milā hogā.’

Fatah!

Janm Lene Wālī Birādarī kī Ḳhushī



Īsā Masīh jāntā thā ki thoṛī der bād mujhe is duniyā ko chhoṛnā hai. Islie us ne apne shāgirdoñ ko ākhirī hidāyāt dīñ tāki wuh us waqt ke lie taiyār ho jāēñ. Wuh jāñ leñ ki hamāre āqā hameñ akelā nahīñ chhoṛēñge. Wuh Rūhul-quds bhejeñge jis meñ wuh kḥud hamāre diloñ meñ sukūnat kareñge. Ab Īsā Masīh ne ek ākhirī mazmūn chheṛā. Yih ki tumheñ thoṛī der dukh hogā, lekin jald hī yih dukh kḥushī meñ badal jāegā—us samay jab merī birādarī janm legī. Yih birādarī kyon had se zyādā kḥushī manāegī? Is kī chār wujūhāt hoñgī. Birādarānā kḥushī kī pahlī wajah,

Tum ko Nāi Zindagī Milegī

Us ne farmāyā,

Thoṛī der ke bād tum mujhe nahīñ dekhoge.
Phir thoṛī der ke bād tum mujhe dubārā dekh
loge. (Yūhannā 16:16)

Us ke kuchh shāgird āpas meñ bāt karne lage, “Un ke yih kahne se kyā murād hai ki ‘thoṛī der ke bād tum mujhe nahīñ dekhoge, phir thoṛī der ke bād tum mujhe dubārā dekh loge’? Aur is kā kyā matlab hai, ‘Main Bāp ke pās jā rahā hūñ’? Yih kis qism kī ‘thoṛī der’ hai jis kā zikr wuh kar rahe haiñ? Ham un kī bāt nahīñ samajhte.”

Īsā Masīh ne jāñ liyā ki wuh āpas meñ aisī bāteñ kar rahe haiñ. Us ne jawāb meñ farmāyā,

Tum ro rokar mātam karoge jabki duniyā
kḥush hogī. Tum ḡham karoge, lekin tumhārā
ḡham kḥushī meñ badal jāegā. Jab kisī aurat ke
bachchā paidā hone wālā hotā hai to use ḡham

aur taklif hotī hai kyonki us kā waqt ā gayā hai. Lekin jyon hī bachchā paidā ho jātā hai to mān khushī ke māre ki ek insān duniyā meñ ā gayā hai apnī tamām musibat bhūl jātī hai. Yahī tumhārī hālat hai. Kyonki ab tum ghamzadā ho, lekin main tum se dubārā milūngā. Us waqt tum ko khushī hogī, aisi khushī jo tum se koī chhīn na legā. (Yūhannā 16:20-22)

- *Īsā Masīh kis waqt kā zikr kar rahā thā?*
Wuh apnī maut kā zikr kar rahā thā. Us waqt shāgird saḡht mātām karenge.
- *Wuh kyon mātām karenge?*
Islie ki Īsā Masīh un ke sāth nahīn hogā, hālānki wuh pakkī ummīd rakhte the ki wuh bādshāh banegā.
- *Duniyā kyon khush hogī?*
Islie ki wuh samjhegī ki Īsā Masīh ko mār dālne se hamārā maslā hal ho gayā hai. Āindā us ke kalām kā sāmna nahīn karnā paregā. Āindā koī nahīn kahegā ki sudhar jāo, taubā karo. Duniyā kā hukmrān Iblīs sab se khush hogā. Wuh to samjhegā ki merā sab se baṛā dushman khatm hai, ab merī hukūmat aur zyādā pakkī ho gaī hai.
- *Lekin shāgirdon kā gham nahīn rahegā. Gham jald hī khushī meñ badal jāegā. Kyon?*
Īsā Masīh farmātā hai ki thoṛī der bād main tum se dubārā milūngā.
- *Salībī maut ke bād yih kis tarah mumkin hogā?*
Yih is se hogā ki wuh jī uṭhegā aur un se milegā. Bād meñ jab use āsmān par uṭhāyā jāegā to Rūhul-quds nāzil hogā jis meñ Īsā Masīh apne shāgirdon ke dilon meñ basegā.
- *Īsā Masīh yahān shāgirdon kī khushī ek khūbsūrat misāl se bayān kartā hai. Kaun-sī misāl se?*
Janm dene wālī aurat kī misāl se. Jab aurat ke bachchā paidā hone lagtā hai to aurat ko gham aur taklif hotī hai

kyonki us kā waqt ā gayā hai. Lekin jyon hī bachchā paidā ho jātā hai to mān khushī ke māre ki ek insān duniyā mein ā gayā hai apnī tamām musibat bhūl jātī hai.

- *Yih misāl kis tarah shāgirdon kī āne wālī khushī bayān kartī hai?*

Īsā Masīh kī maut bhī aisī aurat kī sakht diqqat kī tarah hogī. Jis tarah mān ko gham aur taklīf hotī hai jab us kā waqt ā jātā hai usī tarah Īsā Masīh aur us ke shāgirdon ko gham aur taklīf hogī jab us kā waqt ā jāegā. Lekin mān kī taklīf kā ek maqsad hotā hai, yih kī bachchā paidā ho jāe. Bilkul isī tarah Masīh kī taklīf kā ek maqsad thā, yih kī insān nae sire se paidā ho jāe, kī Rūh kī naī birādārī janm le. Aur jis tarah bachche ke paidā ho jāne par mān itnī khush ho jātī hai ki wuh apnī tamām musibat bhūl jātī hai usī tarah shāgird khushī ke māre apnī tamām musibat bhūl jāenge—islīe bhūl jāenge ki apnī jān dene aur jī uṭhne se Īsā Masīh maut aur Iblīs par fath pākar shāgirdon se dubārā milegā. Us waqt shāgird Rūhul-quds kī madad se nae sire se paidā ho jāenge. Tab wuh Masīh kī jīt, apnī rūhānī paidāish aur naī birādārī kī khushī manāenge.

- *Kyā yih khushī kabhī khatm hogī?*

Nahīn. Yih aisī khushī hogī jo koī un se chhīn na legā.

- *Yih khushī koī kyon nahīn chhīn saktā?*

Islīe kī Īsā Masīh āsmān par uṭhāe jāne ke bād bhī un mein maujūd hogā. Wuh Rūhul-quds ke zariye un ke dilon mein basegā. Īsā Masīh kī huzūrī unhen mazbūt rakhegī. Chūnki wuh āj tak zindā hai islie hamārī ummīd puṛkhtā hai, islie koī yih khushī chhīn nahīn saktā.

- *Kyā āp ko is birādārī kī naī zindagī hāsīl hai?*

Birādarānā khushī kī dūsarī wajah,

Tum Khudā ke Lāḍle Hoge

Īsā Masīh ne farmāyā,

Us din tum mujh se kuchh nahīn pūchhoge. Main tum ko sach batātā hūn ki jo kuchh tum mere nām meñ Bāp se māṅgoge wuh tum ko degā. Ab tak tum ne mere nām meñ kuchh nahīn māṅgā. Māṅgo to tum ko milegā. Phir tumhārī khushī pūrī ho jāegī. (Yūhannā 16:23-24)

- *Us din tum mujh se nahīn pūchhoge—is kā kyā matlab hai?*
Is waqt shāgird Īsā Masīh kī rāh samajh nahīn sakte. Islie wuh bār bār pūchh rahe haiñ ki us kī bātoñ kā kyā matlab hai. Lekin us ke jī uṭhne ke bād unheñ salībī rāh ke maqsad kī samajh āegī. Tab pūchhne kī zarūrat hī nahīn rahegī.
 - *Tab wuh kyā karenge?*
Tab wuh Masīh ke nām meñ Ḳhudā Bāp se māṅenge.
 - *Un ko māṅgne par kyā milegā?*
Jo kuchh wuh māṅenge.
 - *Tab un kī khushī kaisī hogī?*
Wuh pūrī ho jāegī.
 - *Kyon pūrī ho jāegī?*
Isle ki unheñ milegā. Unheñ yon milegā jis tarah bachche ko bāp se miltā hai. Bachchā apne bāp se māṅgtā hai. Bāp use wuh chīz na bhī de, lekin wuh zarūr us kī sunegā. Wuh use us kī zarūriyāt ke mutābiq zarūr degā, yon jis tarah sirf achchhā bāp de saktā hai.
- Ġharz naī birādarī ke log Ḳhudā ke lāḍle haiñ, us ke pyāre bachche. Aur jis tarah bāp kā lāḍlā har waqt bāp ke pās ākar māṅ saktā hai usī tarah naī birādarī ke log be-jhijak apne āsmānī Bāp ke huzūr ā sakte haiñ.
- *Kyā āp bhī Ḳhudā ke lāḍle haiñ?*
Birādarānā khushī kī tīsri wajah,

Āsmān kā Rāstā Khul Jāegā

Īsā Masīh ne farmāyā,

Us waqt main tamsilon mein bat nahin karunga balki tum ko Bap ke bare mein saf saf bata dunga. (Yuhanna 16:25)

► *Ji uthne ke bad Isa Masih kis tarah bat karega?*

Wuh KHUDA Bap ke bare mein saf saf bat karega. Wuh tamsilon mein bat nahin karega. Is waqt shagirdon ko us ki batein paheliyon jaisi lag rahi hain. Lekin us waqt Isa Masih ki is duniya mein rah saf dikhegi. Unhein najat ki rah ki puri samajh aegi. Yah KHUDA Bap ke bare mein sab se azim bat hai—yeh ki us ne apne pyare Farzand ko is duniya mein bhej diya taki hamen gunah, maut aur Iblis ke qabze se najat mile. Isa Masih ne farmaya,

Us din tum mera nam lekar mangoge. Mere kahne ka matlab yeh nahin ki main hi tumhari khatir Bap se dar-khast karunga. Kyonki Bap khud tum ko pyar karti hai, islie ki tum ne mujhe pyar kiya hai aur iman lae ho ki main Allah mein se nikal aya hun. (Yuhanna 16:26-27)

► *Matlab yeh nahin ki main hi tumhari khatir Bap se dar-khast karunga—is ka kya matlab hai? Kyā Isā Masih āindā imāndāron ki khatir Bap se dar-khast nahin karega?*

Wuh zarur dar-khast karega. Lekin buniyadi bat to ho chuki hogi. Isa Masih ke marne aur ji uthne se us ke log na sirf Masih ki biradari mein shamil ho jenge. Is se nai biradari ke lie asman ka rasta khul jagega. Jo rasta pahle yon band tha ki insan KHUDA ke huzur nahin a sakti tha wuh khul jagega. Tab is ki zarurat nahin hogi ki imandār KHUDA se dur rahne ki wajah se Isa Masih se guzarish karen ki wuh Bap ko un ki taraf mayl kare. Us waqt har imandār sidha KHUDA Bap ke huzur a sakega. Kyonki wuh nai biradari mein shamil hone se KHUDA Bap ka ladla hoga. Kaun-sa bap apne ladle ki bat nahin sunti? Us waqt se ko

farq nahīn hogā ki ham Masīh kā nām lekar Ẹhudā Bāp se duā karen̄ yā Masīh se duā karen̄. Ek hī bāt hogī, kyon̄ki Ẹhudā Bāp aur Ẹhudā Farzand meñ gahrī yagāngat hai.

- *Kyā āp ke lie bhī āsmān kā rāstā khul gayā hai?*

Birādarānā khushī kī chauthī wajah,

Duniyā par Fath Pāi Jāegī

Masīh kī yih bāteñ sunkar shāgirdon̄ ko lagā ki bāt sāf ho gāi hai. Wuh bole, “Ab āp tamsilon̄ meñ nahīn balki sāf sāf bāt kar rahe haiñ. Ab hameñ samajh āi hai ki āp sab kuchh jānte haiñ aur ki is kī zarūrat nahīn ki koī āp kī pūchh-gachh kare. Islie ham imān rakhte haiñ ki āp Allāh meñ se nikalkar āe haiñ.”

Shāgird samajhte the ki ab ustād tamsilon̄ meñ nahīn balki sāf sāf bāt kar rahe haiñ.

- *Shāgirdon̄ ko kis bāt kī samajh āi?*

Yih sāf mālūm nahīn hotā, lekin aisā lagtā hai ki unheñ zarūr mahsūs huā ki use sab kuchh mālūm hai aur ki wuh Allāh meñ se nikalkar āyā hai.

- *Kyā unheñ sachmuch samajh āi thī?*

Nahīn. Wuh kuchh nahīn samajhte the. Aur yih ho bhī nahīn saktā thā. Unheñ salīb kī rāh kī samajh us waqt āi jab Īsā Masīh jī uṭhkar un par zāhir huā. Islie Masīh ne dukh-bharī āwāz ke sāth farmāyā,

Ab tum imān rakhte ho? Dekho, wuh waqt ā rahā hai balki ā chukā hai jab tum tittar-bittar ho jāoge. Mujhe akelā chhoṛkar har ek apne ghar chalā jāegā. To bhī main̄ akelā nahīn hūngā kyon̄ki Bāp mere sāth hai.

(Yūhannā 16:31-32)

- *Kyā Īsā Masīh mān gayā ki shāgird samajh gae haiñ?*

Nahīn. Us ne un kī bāton̄ se dhokā na khāyā. Wuh sāf sāf jāntā thā ki unheñ samajh nahīn āi. Na sirf yih. Wuh use

akelā bhī chhoṛēnge. Bas ek hī hai jis par pūrā bharosā kiyā jā saktā hai—Ḳhudā Bāp jo use nahīn chhoṛegā.

- *Agar use mālūm thā ki shāgird kuchh nahīn samajh rahe haiñ to us ne yih tamām bāteñ kyon unheñ batāi thīn?*

Us ne farmāyā,

Mainne tum ko islie yih bāt batāi tāki tum mujh meñ salāmatī pāo. Duniyā meñ tum musibat meñ phan̄se rahte ho. Lekin hauslā rakho, main duniyā par ghālib āyā hūñ.

(Yūhannā 16:33)

- *Us ne yih tamām bāteñ kyon unheñ batāi thīn?*

Us ne un ko islie yih bāteñ batāi thīn tāki wuh Masīh meñ salāmatī pāeñ.

- *Wuh us meñ kis tarah salāmatī pā sakte haiñ?*

Wuh farmā chukā thā ki main angūr kī bel hūñ aur tum merī shākhēñ ho. Mujh meñ raho. Merā ras pāte raho. Merī har bāt par amal karte raho. Tab tumheñ salāmatī milegī. Ras meñ us kī tāqat hai. Yād rakho: Masīh se āsmānī ghar kā rāstā khul gayā islie ham thos qadam rakhkar āge barheñge. Dushman jo bhī hamlā ham par kare us kā sām̄nā ham kar pāeñge—apnī tāqat se nahīn balki usī kī tāqat se.

Tab Īsā Masīh ne ek ākhirī bāt kī,

Duniyā meñ tum musibat meñ phan̄se rahte ho. Lekin hauslā rakho, main duniyā par ghālib āyā hūñ. (Yūhannā 16:33)

Kitnī sukūn dilāne wālī bāt!

- *Ḳyā imān lāne se ham duniyā kī musibat se bacheñge?*

Nahīn. Sachchā imāndār musibat meñ phan̄sā rahegā. Jise koī musibat na ho, jise is duniyā meñ kāmyābī hī kāmyābī hāsil ho, use apne āpse yih pūchhnā chāhie ki kyā main thīk Masīh kī rāh par chal rahā hūñ? Is kā

matlab nahīn ki sachchā īmāndār amīr nahīn ho saktā. Lekin jis amīr ko bahut milā hai us kī zimmedāriyān bhī baṛh jātī haiñ. Agar wuh sachchā ho to wuh bhī musībatoñ se nahīn bachegā.

Lekin sāth sāth Masīh ne yih bhī farmāyā: Hauslā rakho, main duniyā par ghālib āyā hūñ!

► *Īsā Masīh kis tarah duniyā par ghālib āyā hai?*

Wuh apnī salībī maut aur jī ūṭhne se duniyā par ghālib āyā hai. Duniyā samajhtī hai ki wuh hār gayā hai, lekin is ke ulaṭ huā. Us ne is se duniyā par fath pāī. Is se us ne har insān ko nae sire se paidā hone kā mauqā baḥsh diyā. Is se us ne janm lene wālī birādarī kī buniyād rakhī. Gharz apne āpse pūchho,

- *Kyā mujhe naī zindagī mil gāi hai?*
- *Kyā main Khudā kā lāḍlā hūñ?*
- *Kyā mere lie āsmān kā rāstā khul gayā hai?*
- *Kyā main Masīh kī fath meñ sharīk ho gayā hūñ?*

Injīl, Yūhannā 16:16-33

[Īsā Masīh ne farmāyā,] “Thoṛī der ke bād tum mujhe nahīn dekhoge. Phir thoṛī der ke bād tum mujhe dubārā dekh loge.”

Us ke kuchh shāgird āpas meñ bāt karne lage, “Īsā ke yih kahne se kyā murād hai ki ‘thoṛī der ke bād tum mujhe nahīn dekhoge, phir thoṛī der ke bād mujhe dubārā dekh loge’? Aur is kā kyā matlab hai, ‘Main Bāp ke pās jā rahā hūñ?’” Aur wuh sochte rahe, “Yih kis qism kī ‘thoṛī der’ hai jis kā zikr wuh kar rahe haiñ? Ham un kī bāt nahīn samajhte.”

Īsā ne jān liyā ki wuh mujh se is ke bāre meñ sawāl karnā chāhte haiñ. Islie us ne kahā, “Kyā tum ek dūsre se pūchh rahe ho ki merī is bāt kā kyā matlab hai ki ‘thoṛī

der ke bād tum mujhe nahīn dekhoge, phir thoṛī der ke bād mujhe dubārā dekh loge?’ Main tum ko sach batātā hūn ki tum ro rokar mātām karoge jabki duniyā khush hogī. Tum gham karoge, lekin tumhārā gham khushī meñ badal jāegā. Jab kisī aurat ke bachchā paidā hone wālā hotā hai to use gham aur taklif hotī hai kyonki us kā waqt ā gayā hai. Lekin jyon hī bachchā paidā ho jātā hai to māñ khushī ke māre ki ek insān duniyā meñ ā gayā hai apnī tamām musibat bhūl jātī hai. Yahī tumhārī hālat hai. Kyonki ab tum ghamzadā ho, lekin main tum se dubārā milūngā. Us waqt tum ko khushī hogī, aisi khushī jo tum se koī chhīn na legā.

Us dīn tum mujh se kuchh nahīn pūchhoge. Main tum ko sach batātā hūn ki jo kuchh tum mere nām meñ Bāp se māngoge wuh tum ko degā. Ab tak tum ne mere nām meñ kuchh nahīn māngā. Māngo to tum ko milegā. Phir tumhārī khushī pūri ho jāegī.


Mainne tum ko yih tamsilon meñ batāyā hai. Lekin ek dīn āegā jab main aīsā nahīn karūngā. Us waqt main tamsilon meñ bāt nahīn karūngā balki tum ko Bāp ke bāre meñ sāf sāf batā dūngā. Us dīn tum merā nām lekar māngoge. Mere kahne kā matlab yih nahīn ki main hī tumhārī khātir Bāp se darkhāst karūngā. Kyonki Bāp khud tum ko pyār kartā hai, islie ki tum ne mujhe pyār kiyā hai aur imān lāe ho ki main Allāh meñ se nikal āyā hūn. Main Bāp meñ se nikalkar duniyā meñ āyā hūn. Aur ab main duniyā ko chhoṛkar Bāp ke pās wāpas jātā hūn.”

Is par us ke shāgirdon ne kahā, “Ab āp tamsilon meñ nahīn balki sāf sāf bāt kar rahe haiñ. Ab hameñ samajh āī hai ki āp sab kuchh jānte haiñ aur ki is kī zarūrat

nahīn ki koī āp kī pūchh-gachh kare. Islie ham īmān rakhte haiñ ki āp Allāh meñ se nikalkar āe haiñ.”

Īsā ne jawāb diyā, “Ab tum īmān rakhte ho? Dekho, wuh waqt ā rahā hai balki ā chukā hai jab tum tittar-bittar ho jāoge. Mujhe akelā chhoṛkar har ek apne ghar chalā jāegā. To bhī maiñ akelā nahīn hūngā kyonki Bāp mere sāth hai. Maiñne tum ko islie yih bāt batāī tāki tum mujh meñ salāmatī pāo. Duniyā meñ tum musibat meñ phañse rahte ho. Lekin hauslā rakho, maiñ duniyā par ghālib āyā hūñ.”

Sachche Shāgird ke Anmit Nishān



Īsā Masīh jāntā thā ki jald hī dushman mujhe salīb par chaṛhākar mār ḍāleṅge. Us ne apne shāgirdoṅ ko āḅhiri hidāyāt diṅ, phir apnī nazar āsmān kī taraf uṭhākar duā kī.

► *Duā kā kyā maqsad thā?*

Maqsad yih thā ki wuh apne shāgirdoṅ ko Ḳhudā Bāp ke supurd kare. Is duā meṅ sachche shāgird ke chhih nishān dikhāi dete haiṅ. Pahlā nishān,

Masīh ke Jalāl meṅ Sharīk

Īsā Masīh ne farmāyā,

Ai Bāp, waqt ā gayā hai. Apne Farzand ko jalāl de tāki Farzand tujhe jalāl de. Kyonki tūne use tamām insānoṅ par iḳhtiyār diyā hai tāki wuh un sab ko abadī zindagī de jo tūne use die haiṅ.
(Yūhannā 17:1-2)

► *Īsā Masīh Ḳhudā Bāp se kyā pānā chāhtā hai?*

Jalāl.

► *Wuh kyon jalāl pānā chāhtā hai?*

Jalāl pāne kā ek hī maqsad hai, yih ki wuh Ḳhudā Bāp ko jalāl de. Matlab hai jo bhī kām Īsā Masīh kare is se Ḳhudā Bāp ko izzat-o-jalāl mile.

► *Īsā Masīh kis tarah Ḳhudā Bāp ko jalāl denā chāhtā hai?*

Wuh apnī jān insān kī ḳhātir dene se Ḳhudā Bāp ko jalāl denā chāhtā hai. Kitnā anokhā ḳhyāl! Aisi soch duniyā kī soch se kahīn dūr hai. Duniyā ke ḳhyāl meṅ Īsā Masīh apnī jān dene se fail ho gayā. Wuh yih kabhī nahīn mān saktī ki kisi kī salībī maut Ḳhudā ko jalāl de saktī hai.

► *Bāp ne Īsā Masīh ko insānoṅ par iḳhtiyār kyon diyā?*

Islie ki wuh apnī jān dene se insān ko abadī zindagī de. Yahī to us ke āne kā maqsad thā. Aur isī se use jalāl milegā.

- *Yih bāt hamāre lie kyon ahm hai ki Masīh ko jalāl milegā?*
Yih bāt islie ahm hai ki jo bhī Masīh par imān lātā hai wuh us ke jalāl meñ sharīk ho jātā hai. Yūhannā 15 meñ ham sīkh chuke hain ki Īsā Masīh angūr kī bel hai. Us kī jalālī rāh se hī ham us se juṛ gae hain, ham us kī shāḡheñ ban gae hain. Us kī jalālī rāh se hī hameñ us kī abadī zindagī mil gāī hai. Aur us kī jalālī rāh se hī ham us kī shān-o-shaukat meñ sharīk ho gae hain.
- *Kyā āp is bel meñ juṛkar us ke jalāl meñ sharīk ho gae hain?*
Sachche shāgird kā dūsrā nishān,

Badlī Huī Zindagī

Ab Īsā Masīh ne Bāp ko apnī ḡhidmat kā achchhā natijā pesh kiyā.

- *Natijā kyā thā?*
Shāgirdon kī badlī huī zindagī. Us ne farmāyā,

Mainne terā nām un logon par zāhir kiyā jinheñ tūne duniyā se alag karke mujhe diyā hai. Wuh tere hī the. Tūne unheñ mujhe diyā aur unhon ne tere kalām ke mutābiq zindagī guzārī hai.
(Yūhannā 17:6)

- *Masīh kī ḡhās ḡhidmat kyā thī?*
Us ne logon par Ḳhudā Bāp kā nām zāhir kiyā.
- *Ḳhudā kā nām zāhir karne kā kyā matlab hai?*
Matlab yih hai ki us ne Ḳhudā kī fitrat zāhir kī. Sachchā shāgird banane ke lie zarūrī hai ki ham jān leñ ki Ḳhudā ham se muhabbat rakhtā hai aur hameñ apne qarīb lānā chāhtā hai, ki us ne hameñ qarīb lāne ke lie apnā Farzand qurbān kiyā. Yahī bāteñ us ke nām meñ pinhāñ hain.

- *Jab Ẹhudā kā nām shāgirdon̄ par zāhir huā to un meñ kyā tabdilī āī?*

Īsā Masīh ne farmāyā,

Unhoñ ne tere kalām ke mutābiq zindagī guzārī hai. Ab unhoñ ne jāñ liyā hai ki jo kuchh bhī tūne mujhe diyā hai wuh terī taraf se hai. Unhoñ ne yih bāteñ qabūl karke haqīqī taur par jāñ liyā ki maiñ tujh meñ se nikalkar āyā hūñ. Sāth sāth wuh imān bhī lāe ki tūne mujhe bhejā hai. (Yūhannā 17:6-8)

- *Kyā tabdilī āī?*

Kalām sunane se un kā chāl-chalan badal gayā.

- *Yih tabdilī kyon̄ āī?*

Unhoñ ne jāñ liyā hai ki Masīh kā kalām aur kām Ẹhudā kī taraf se hai, ki Īsā Masīh Ẹhudā Bāp se nikal āyā hai jis ne use bhejā hai.

Dekho, hamārī tabdilī sarāsar Masīh par mabnī hotī hai. Jab ham angūr kī is bel se jur jāte haiñ to us kā ras hamārī zindagī badal detā hai. Us ras ke baġhair ham janglī aur be-kār phal lāte haiñ, aisā phal jis se sab ko ghin ātī hai. Lekin jab us kā ras hamāre ragon̄ meñ dauṛtā hai to ham mīṭhā aur rasilā phal lāte haiñ, aisā phal jo har ek chakhkar wāh, wāh kahtā hai.

- *Kyā āp meñ bel se lāī yih tabdilī āī hai?*

Sachche shāgird kā tīsrā nishān,

Shaitānī Tāqaton̄ se Mahfūz

Ab tak Īsā Masīh shāgirdon̄ ke sāth thā. Us kī maujūdagī meñ wuh hameshā mazbūt rahe the, kyon̄ki wuh un kā achchhā charwāhā thā. Lekin ab wuh apne Bāp ke pās wāpas jā rahā thā. Ab kyā hogā? Yahī duā kā markazī maqsad thā. Is meñ Īsā Masīh ne unheñ Ẹhudā Bāp ke supurd kiyā tāki wuh unheñ mahfūz rakhe. Īsā Masīh ne is kī wajah bhī batāī,

Jinheñ tūne mujhe diyā hai [...] wuh tere hī haiñ. (Yūhannā 17:9)

Ḳhudā Bāp Ḳhud ne imāndāroñ ko alag karke Masīh ko diyā thā (Yūhannā 17:6). Ab Īsā Masīh ne unheñ dubārā us ke supurd kiyā. Us ne farmāyā,

Quddūs Bāp, apne nām meñ unheñ mahfūz rakh. [...] jitnī der main un ke sāth rahā mainne unheñ tere nām meñ mahfūz rakhā, usī nām meñ jo tūne mujhe diyā thā.
(Yūhannā 17:11-12)

- *Īsā Masīh ne unheñ kis nām meñ mahfūz rakhā thā?*
Ḳhudā Bāp ke nām meñ.
- *Us ke nām meñ wuh kyon mahfūz the?*
Nām meñ Ḳhudā kā pūrā kirdār hai. Us meñ us kī apne logoñ ke lie muhabbat aur wafādārī hai. Yahī nām Īsā Masīh ne apne shāgirdoñ par zāhir kiyā thā, aur isī meñ us ne unheñ mahfūz rakhā thā. Ab wuh chāhtā hai ki Ḳhudā Bāp yih kām jāri rakhe.
- *Kyā mahfūz rahne se mushkilāt kam ho jāengī?*
Nahīñ. Īsā Masīh ne farmāyā,

Mainne unheñ terā kalām diyā hai aur duniyā ne un se dushmanī rakhī, kyonki yih duniyā ke nahīñ haiñ, jis tarah main bhī duniyā kā nahīñ hūñ. Merī duā yih nahīñ hai ki tū unheñ duniyā se uṭhā le balki yih ki unheñ Iblīs se mahfūz rakhe. (Yūhannā 17:14-15)

- *Duniyā ne un se dushmanī rakhī. Kyon?*
Unheñ Masīh kā kalām mil gayā hai, islie yih duniyā ke nahīñ haiñ.
- *Wuh kyon duniyā ke nahīñ haiñ?*
Īsā Masīh duniyā kā nahīñ hai, islie us ke shāgird bhī duniyā ke nahīñ haiñ.

► *Duniyā kyā hai? Kyā yih Ḳhudā kī khalaq kī gai duniyā hai?*
 Nahīn. Ḳhudā ne har maḳhlūq achchhī banāī hai. Wuh chāhtā hai ki ham duniyā kī achchhī chīzoñ kā mazā leñ. Lekin yahān duniyā se murād wuh sab kuchh hai jo Ḳhudā ke ḳhilāf hai aur jis kā hukmrān Iblīs hai. Yānī tārikī kī tamām tāqateñ jo Ḳhudā kī har achchhī chīz par qābū karnā chāhtī haiñ.

► *Kyā Masīh chāhtā hai ki shāgirdoñ ko duniyā se uṭhā liyā jāe?*
 Nahīn.

► *Kyoñ nahīn? Kyā is se duniyā kī dushmanī khatm nahīn hogī?*
 Be-shak. Lekin shāgirdoñ kā is duniyā meñ rahne kā ek ḳhās maqsad hai. Yih ki wuh duniyā meñ Ḳhudā kā kalām aur nūr phailāeñ. Āḳhir Masīh ke āne kā maqsad yih thā ki sab us par imān lākar halāk na hoñ balki abadī zindagi pāeñ. In meñ main aur āp bhī shāmil haiñ.

Islie Masīh kī duā yih nahīn hai ki unheñ uṭhā liyā jāe balki yih ki wuh Iblīs aur us kī shaitānī tāqatoñ se mahfūz raheñ. Iblīs kī pūrī koshish yih hai ki har imāndār ko bigāṛkar khatm kare, kyoñki use Masīh ke shāgirdoñ kā mission patā hai. Wuh jāntā hai ki unheñ is duniyā meñ islie rakhā gayā hai tāki wuh Ḳhudā kā kalām aur nūr phailāeñ, tāki jitne ho sakeñ najāt pāeñ.

Hameñ pūrī tasallī hai ki ham Īsā Masīh ke sāth jo angūr kī bel hai juṛ gae haiñ. Ab rahī mālī yānī Ḳhudā Bāp kī zimmedārī ki wuh hamārī dekh-bhāl kare. Wuhī hameñ janglī jānwaroñ se mahfūz rakhegā, wuhī hameñ har zarūrī chīz se nawāztā rahegā. Wuhī is par dhyān degā ki ham achchhā phal lāeñ.

► *Kyā āp ko Ḳhudā kī yih hifāzat hāsil hai?*

Sachche shāgird kā chauthā nishān,

Ḳhudā ke lie Maḳhsūs

Īsā Masīh ne farmāyā,

Unheñ sachchāi ke wasīle se maḥsūs-o-muqaddas kar. Terā kalām hī sachchāi hai. Jis tarah tūne mujhe duniyā meñ bhejā hai usī tarah mainne bhī unheñ duniyā meñ bhejā hai. Un kī ḡhātīr main apne āp ko maḥsūs kartā hūñ, tāki unheñ bhī sachchāi ke wasīle se maḥsūs-o-muqaddas kiyā jāe.

(Yūhannā 17:17-19)

- *Īsā Masīh kyā chāhtā hai ki Ḳhudā Bāp shāgirdoñ ke sāth kare?*

Wuh chāhtā hai ki wuh unheñ apne kalām se maḥsūs-o-muqaddas kare.

- *Unheñ kis se aur kis tarah maḥsūs-o-muqaddas kiyā jāegā?*
Unheñ Īsā Masīh se maḥsūs kiyā jāegā. Apne āp ko maḥsūs karne se Masīh unheñ maḥsūs-o-muqaddas karegā.

- *Īsā Masīh ne kis tarah apne āp ko maḥsūs kiyā?*
Us ne apne āp ko hamārī ḡhātīr qurbān karne ke lie maḥsūs kiyā. Jald hī us kī yih qurbānī mukammal ho jāegī. Isī rāste se shāgird ke gunāh miṭāe jāenge. Is se shāgird pāk aur muqaddas hokar Ḳhudā ko mañzūr ho jāegā. Lekin har ek jise Masīh ne muqaddas kiyā use us ne maḥsūs bhī kiyā hai.

- *Masīh ne use kis ke lie maḥsūs kiyā hai?*
Us ne use Ḳhudā ke lie maḥsūs kiyā hai.

- *Use kis kām ke lie maḥsūs kiyā gayā hai?*
Use Ḳhudā aur dūsroñ kī ḡhidmat ke lie maḥsūs kiyā gayā hai.

Jab ham angūr kī bel ke sāth juṛ jāte haiñ to ham sarāsar bel kā hissā ban jāte haiñ. Wuhī hamārī rāhnumāi kartī hai, usī kā ras har pal hameñ naī zindagī detā hai. Ham pūre taur par usī ke haiñ aur usī kā miṭhā phal lāte haiñ.

- *Kyā āp ko Īsā Masīh se maḥsūs kiyā gayā hai?*

Sachche shāgird kā pānchwān nishān,

Birādarī meñ Ek

Īsā Masīh ne farmāyā,

Merī duā na sirf inhīn ke lie hai, balki un sab ke lie bhī jo in kā paighām sunkar mujh par imān lāenge tāki sab ek hoñ. Jis tarah tū ai Bāp, mujh meñ hai aur main tujh meñ hūñ usī tarah wuh bhī ham meñ hoñ tāki duniyā yaqīn kare ki tūne mujhe bhejā hai. (Yūhannā 17:20-21)

- *Masīh na sirf pahle shāgirdon kī bāt kar rahā hai. Kaun bhī us kī duā meñ shāmīl haiñ?*

Bād ke sab imān lāne wāle bhī is meñ shāmīl haiñ.

- *Masīh kā paighām sunāne kā kyā maqsad hai?*

Yih ki sab Masīh meñ ek hoñ.

- *Iskā namūnā kaun haiñ?*

Iskā namūnā Ḳhudā Bāp aur Farzand haiñ, jo pūre taur par ek haiñ.

- *Shāgird kis tarah ek ho jāenge?*

Is se ki wuh Ḳhudā Bāp aur Farzand meñ hoenge.

- *Iskā kyā matlab hai?*

Masīh, Ḳhudā Bāp ke tābe rahtā aur Ḳhudā Bāp har bāt meñ Farzand kī suntā rahtā hai. Wuh muhabbat ke bandhan se ghire rahte haiñ. Masīh ke najāt dene wāle kām se us ke shāgird bhī muhabbat ke is bandhan meñ ā jāte haiñ. Sirf yih bandhan unheñ mahfūz aur ek rakh saktā hai.

- *Aisī yagāngat kis tarah mumkin ho saktī hai?*

Na kisī tanzīm se, na kisī idāre se. Sirf Rūhul-quds se jo yih bandhan qāym rakhtā hai. Shart yih hai ki shāgird sahī mānoñ meñ maḳhsūs-o-muqaddas hoñ. Is bandhan meñ rahte hue tamām qaumon ke imāndār ek ho jāte haiñ

chāhe wuh qabile aur zabān ke hisāb se kitne muḡhtalif
kyoñ na hoñ. Īsā Masīh ne farmāyā,

Mainne unheñ wuh jalāl diyā hai jo tūne mujhe
diyā hai tāki wuh ek hoñ jis tarah ham ek haiñ,
maiñ un meñ aur tū mujh meñ. Wuh kāmīl
taur par ek hoñ tāki duniyā jān le ki tūne mujhe
bhejā aur ki tūne un se muhabbat rakhī hai jis
tarah mujh se rakhī hai. (Yūhannā 17:22-23)

► *Masīh ko kis kām se jalāl milā hai?*

Ham dekh chuke haiñ ki use yih jalāl apnī jān dene se
milā hai.

► *To shāgird kis tarah ek ho jāeñge?*

Shāgird Masīh kī qurbānī se mile is jalāl se ek ho jāeñge.
Matlab hai ki wuh tab ek ho jāeñge jab ḡhud qurbānī dene
ke lie taiyār raheñge.

► *Ek hone se duniyā kyā jān legī?*

Is se duniyā jān legī ki Ḳhudā Bāp ne shāgirdoñ se
muhabbat rakhī hai.

Jab ham angūr kī bel ke sāth juṛ jāte haiñ to usī kā ras
tamām shāḡhoñ meñ dauṛtā hai. Usī kā ras sab ke sab
ko zindagī detā hai. Yih nāmumkin hai ki bel kī koī bhī
shāḡh dūsarī shāḡh ke sāth ek na ho.

► *Kyā āp ko ek hone kā tajribā hāsil huā hai?*

Sachche shāgird kā chhaṭā nishān,

Ek Dīn Masīh ke Pās

Īsā Masīh ne farmāyā,

Ai Bāp, maiñ chāhtā hūñ ki jo tūne mujhe
die haiñ wuh bhī mere sāth hoñ, wahāñ
jahāñ maiñ hūñ, ki wuh mere jalāl ko dekheñ.
(Yūhannā 17:24)

► *Masīh apne shāgirdoñ ke lie kyā māñgtā hai?*

Yih ki shāgird us ke sāth raheñ aur ek dīn us ke pās hoñ.

► *Tab wuh kyā dekheṅge?*

Us kā jalāl.

Lekin is duniyā meṅ rahte hue bhī shāgirdoṅ ko us kī himāyat hāsil hogī. Duā ke āḡhir meṅ Masīh ne ek wādā pesh kiyā,

Mainne terā nām un par zāhir kiya aur ise zāhir kartā rahūṅgā tāki terī mujh se muhabbat un meṅ ho aur main un meṅ hūṅ. (Yūhannā 17:26)

► *Wādā kyā hai?*

Yih ki āindā bhī Masīh Ḳhudā kā nām shāgirdoṅ par zāhir kartā rahegā.

► *Nām zāhir karne kī kyā zarūrat rahtī hai?*

Nām zāhir karne kī zarūrat islie rahtī hai ki Ḳhudā Bāp kī muhabbat aur Masīh Ḳhud shāgirdoṅ meṅ raheṅ.

Ġharz, jab ham Īsā Masīh ke sāth juṛ jāte haiṅ jo angūr kī bel hai tab hamen pakkā yaqīn ho jātā hai ki jahān wuh hai wahān ham bhī ek din hoṅge.

► *Kyā āp ko yih yaqīn hāsil hai ki āp ek din usī ke pās hoṅge?*

Īsā Masīh angūr kī bel hai. Jo us ke sāth juṛ jātā hai wuh us ke jalāl meṅ sharīk ho jātā hai. Us ke ragoṅ meṅ us kā ras daurtā hai, islie wuh tabdīl ho jātā hai. Ḳhudā Bāp jo bel kā māli hai use tamām shāḡhoṅ samet shaitānī tāqaton se mahfūz rakhtā hai. Kyonki us kī shāḡheṅ mīṭhā aur rasīlā phal lāne ke lie maḡhsūs kī gaī haiṅ. Sārī shāḡheṅ ek haiṅ, kyonki sab bel se juṛī huī haiṅ, aur yahī wajah hai ki sab ke sab ek din Masīh ke pās hoṅge.

Injīl, Yūhannā 17:1-26

Yih kahkar Īsā ne apnī nazar āsmān kī taraf uṭhāī aur duā kī, “Ai Bāp, waqt ā gayā hai. Apne Farzand ko jalāl de tāki Farzand tujhe jalāl de. Kyonki tūne use tamām

insānoṅ par iḡhtiyār diyā hai tāki wuh un sab ko abadī zindagī de jo tūne use die haiṅ. Aur abadī zindagī yih hai ki wuh tujhe jān leṅ jo wāhid aur sachchā Ḳhudā hai aur Īsā Masīh ko bhī jān leṅ jise tūne bhejā hai. Mainne tujhe zamīn par jalāl diyā aur us kām kī takmīl kī jis kī zimmedārī tūne mujhe dī thī. Aur ab mujhe apne huzūr jalāl de, ai Bāp, wuhī jalāl jo main duniyā kī taḡhlīq se peshtar tere huzūr rakhtā thā.

Mainne terā nām un logoṅ par zāhir kiyā jinheṅ tūne duniyā se alag karke mujhe diyā hai. Wuh tere hī the. Tūne unheṅ mujhe diyā aur unhoṅ ne tere kalām ke mutābiq zindagī guzārī hai. Ab unhoṅ ne jān liyā hai ki jo kuchh bhī tūne mujhe diyā hai wuh terī taraf se hai. Kyoṅki jo bāteṅ tūne mujhe dīṅ mainne unheṅ dī haiṅ. Natije meṅ unhoṅ ne yih bāteṅ qabūl karke haqīqī taur par jān liyā ki main tujh meṅ se nikalkar āyā hūṅ. Sāth sāth wuh īmān bhī lāe ki tūne mujhe bhejā hai.

Main un ke lie duā kartā hūṅ, duniyā ke lie nahīṅ balki un ke lie jinheṅ tūne mujhe diyā hai, kyoṅki wuh tere hī haiṅ. Jo bhī merā hai wuh terā hai aur jo terā hai wuh merā hai. Chunāṅche mujhe un meṅ jalāl milā hai. Ab se main duniyā meṅ nahīṅ hūṅgā. Lekin yih duniyā meṅ rah gae haiṅ jabki main tere pās ā rahā hūṅ. Quddūs Bāp, apne nām meṅ unheṅ mahfūz rakh, us nām meṅ jo tūne mujhe diyā hai, tāki wuh ek hoṅ jaise ham ek haiṅ. Jitnī der main un ke sāth rahā mainne unheṅ tere nām meṅ mahfūz rakhā, usī nām meṅ jo tūne mujhe diyā thā. Mainne yoṅ un kī nigahbānī kī ki un meṅ se ek bhī halāk nahīṅ huā siwāe halākat ke Farzand ke. Yoṅ kalām kī peshgoī pūrī huī. Ab to main tere pās ā rahā hūṅ. Lekin main duniyā meṅ hote hue yih bayān kar rahā hūṅ tāki un ke dil merī ḡhushī

se bharkar chhalak uṭheñ. Maiñne unheñ terā kalām diyā hai aur duniyā ne un se dushmanī rakhī, kyoñki yih duniyā ke nahīñ haiñ, jis tarah maiñ bhī duniyā kā nahīñ hūñ. Merī duā yih nahīñ hai ki tū unheñ duniyā se uṭhā le balki yih ki unheñ Iblīs se mahfūz rakhe. Wuh duniyā ke nahīñ haiñ jis tarah maiñ bhī duniyā kā nahīñ hūñ. Unheñ sachchāī ke wasīle se maḥsūs-o-muqaddas kar. Terā kalām hī sachchāī hai. Jis tarah tūne mujhe duniyā meñ bhejā hai usī tarah maiñne bhī unheñ duniyā meñ bhejā hai. Un kī ḡhātir maiñ apne āp ko maḥsūs kartā hūñ, tāki unheñ bhī sachchāī ke wasīle se maḥsūs-o-muqaddas kiyā jāe.

Merī duā na sirf inhiñ ke lie hai, balki un sab ke lie bhī jo in kā paighām sunkar mujh par imān lāeñge tāki sab ek hoñ. Jis tarah tū ai Bāp, mujh meñ hai aur maiñ tujh meñ hūñ usī tarah wuh bhī ham meñ hoñ tāki duniyā yaqīn kare ki tūne mujhe bhejā hai. Maiñne unheñ wuh jalāl diyā hai jo tūne mujhe diyā hai tāki wuh ek hoñ jis tarah ham ek haiñ, maiñ un meñ aur tū mujh meñ. Wuh kāmīl taur par ek hoñ tāki duniyā jān le ki tūne mujhe bhejā aur ki tūne un se muhabbat rakhī hai jis tarah mujh se rakhī hai.

Ai Bāp, maiñ chāhtā hūñ ki jo tūne mujhe die haiñ wuh bhī mere sāth hoñ, wahāñ jahāñ maiñ hūñ, ki wuh mere jalāl ko dekheñ, wuh jalāl jo tūne islie mujhe diyā hai ki tūne mujhe duniyā kī taḡhlīq se peshtar pyār kiya hai. Ai rāst Bāp, duniyā tujhe nahīñ jāntī, lekin maiñ tujhe jāntā hūñ. Aur yih shāgird jānte haiñ ki tūne mujhe bhejā hai. Maiñne terā nām un par zāhir kiya aur ise zāhir kartā rahūñgā tāki terī mujh se muhabbat un meñ ho aur maiñ un meñ hūñ.”

Sachchāī kā Bādshāh

Al-Masīh kī Peshī



Pakaṛā Gayā

Īsā Masīh jāntā thā ki jald hī mujhe giriftār kiyā jāegā. Ab us ne duā karke apne shāgirdon ko Ḳhudā Bāp ke supurd kar diyā. Tab wuh apne shāgirdon ke sāth niklā aur Wādī-e-Qidron ko pār karke ek bāgh meñ dākḥil huā. Yahūdāh Iskariyoti to rāhnumā imāmon ke pās jā chukā thā tāki Īsā Masīh ko pakaṛne meñ un kī madad kare. Rāhnumā imāmon aur Farīsiyon ne Yahūdāh ko Romī faujiyon kā dastā aur Baitul-muqaddas ke kuchh pahredār die the. Ab yih mashāleñ, lālṭain aur hathiyār lie bāgh meñ pahuñche. Īsā Masīh ko mālūm thā ki use kyā pesh āegā. Us ne nikalkar un se pūchhā, “Tum kis ko ḍhūṇḍ rahe ho?”

Unhon ne jawāb diyā, “Īsā Nāsarī ko.”

Wuh bolā, “Main hī hūñ.”

Yih sunkar sab pīchhe haṭkar zamīn par gir paṛe. Kyā wuh apne shāgirdon ke sāth un par ṭuṭ paṛegā? Yā kyā wuh unheñ shāp dekar bhasm karegā?

Ek aur bār Īsā Masīh ne un se sawāl kiyā, “Tum kis ko ḍhūṇḍ rahe ho?”

Unhon ne jawāb diyā, “Īsā Nāsarī ko.”

Us ne kahā, “Main tum ko batā chukā hūñ ki main hī hūñ. Agar tum mujhe ḍhūṇḍ rahe ho to in ko jāne do.”

► *Us ne yih kyon farmāyā ki in ko jāne do?*

Wuh achchhā charwāhā hai jo apnī bheṛon kī baṛī fikr kartā hai.

Patras ke pās talwār thī. Ab us ne use miyān se nikālkar imām-e-āzam ke ḡhulām kā dahnā kān uṛā diyā. Lekin Īsā Masīh ne Patras se kahā, “Talwār ko miyān meñ rakh. Kyā main wuh pyālā na piyūñ jo Bāp ne mujhe diyā hai?”

► *Pyālā pine se wuh kyā kahnā chāhtā hai?*

Jo ho rahā hai wuh Ḳhudā Bāp kī taraf se hai. Wuhī yih talḳh pyālā pilā rahā hai. Dūsri Injilon se ham jānte hain ki Īsā Masīh ne ḡhulām ko shafā dī. Use us kī bhī fikr rahī.

- *Jitnā Masīh kā jawāb halīm thā utnā Patras kā rawaiyā saḡht thā. Us ne dushman ko dekhkar kyā kiya?*

Us ne talwār chalākar ḡhulām kā kān uṛā diyā. Use abhī tak samajh nahīn āī thī ki salīb kī yih rāh Īsā Masīh ke lie muqarrar hī thī. Ab tak Patras zabardastī Ḳhudā kī bādshāhī lānā chāhtā thā. Lekin insān Ḳhudā kī bādshāhī nahīn lā saktā.

Phir Īsā Masīh ke muḳhālifoṅ ne use bāndh liyā. Pahle wuh use Hannā ke pās le gae. Hannā us sāl ke imām-e-āzam Kāyfā kā susar thā.

Inkār

Patras ne himmat na hārī. Wuh sher ke munh mein jāne ko bhī taiyār thā. Ab wuh kisī aur shāgird ke sāth Īsā Masīh ke pīchhe ho liyā. Yih dūsra shāgird imām-e-āzam kā jānane wālā thā, islie wuh Īsā Masīh ke sāth imām-e-āzam ke sahn mein dāḳhil huā. Patras bāhar darwāze par kharā rahā. Phir imām-e-āzam kā jānane wālā shāgird dubārā nikal āyā. Us ne gate kī nigrānī karne wālī aurat se bāt kī to use Patras ko apne sāth andar le jāne kī ijāzat milī. Lekin Patras ko dekhkar naukārānī ne pūchhā, “Tum bhī is ādmī ke shāgird ho ki nahīn?”

Patras ne jawāb diyā, “Nahīn, main nahīn hūn.” Ustād ne peshgoī kī thī ki tū tin bār merā inkār karegā.

- *Inkār karne kī kyā wajah thī? Kyā Patras ḍarpok thā?*

Patras ḍarpok nahīn thā. Us sahn mein jāne se Patras jān par khel rahā thā. Is ke lie wuh jhūṭh bolne ke lie bhī taiyār thā.

- *Lekin kyā sachche shāgird ko kabhī jhūṭh bolne kī ijāzat hai?*
Nahīn, jo sachche aur wafādār charwāhe kī bheṛ hai us kā jhūṭh bolnā kabhī nahīn jachtā.

Ṭhanḍ thī, islie ġhulāmoñ aur pahredāroñ ne lakaṛī ke koyloñ se āg jalāī. Ab wuh us ke pās khaṛe tāp rahe the. Patras bhī un ke sāth khaṛā tāp rahā thā.

Yahūdī Buzurgoñ ke Sāmne

Itne meñ imām-e-āzam Hannā, Īsā Masīh kī pūchh-gachh karke us ke shāgirdoñ aur tālīm ke bāre meñ taftīsh karne lagā.

► *Yih mazhabī rāhnumā Īsā Masīh kī pūchh-gachh kyoñ karne lage?*

Yih koī na koī bahānā ḍhūṇḍ rahe the tāki sazā-e-maut kā faislā kar sakeñ. Unheñ sachchāī kī parwāh nahīñ thī.

Īsā Masīh bolā, “Mainne duniyā meñ khulkar bāt kī hai. Main hameshā Yahūdī ibādatḡhānoñ aur Baitul-muqaddas meñ tālīm detā rahā, wahāñ jahāñ tamām Yahūdī jamā huā karte haiñ. Poshīdagī meñ to mainne kuchh nahīñ kahā. Āp mujh se kyoñ pūchh rahe haiñ? Un se dariyāft karen jinhoñ ne merī bāteñ sunī haiñ. Un ko mālūm hai ki mainne kyā kuchh kahā hai.”

Tab ek pahredār ne Īsā Masīh ke muñh par thappaṛ mārkar kahā, “Kyā yih imām-e-āzam se bāt karne kā tariqā hai jab wuh tum se kuchh pūchhe?”

Īsā Masīh ne jawāb diyā, “Agar mainne burī bāt kī hai to sābit kar. Lekin agar sach kahā, to tūne mujhe kyoñ mārā?”

► *Apne jawāb se Īsā Masīh ne kis chīz par zor diyā?*

Apne jawāb se us ne apnī bātoñ kī sachchāī par zor diyā. Wuh to sachchā charwāhā hai jise sachche Bāp se bhejā gayā hai. Us meñ jhūṭh nahīñ hai, na wuh kisī meñ jhūṭh bardāsht kar saktā hai. Na use Patras kā jhūṭh, na Yahūdī rāhnumāoñ kī ṭeṛhī-meṛhī siyāsāt pasand thī. Maut ke sāmne bhī wuh na dāīñ na bāīñ taraf hilā. Sach bolnā aur wafādārī—aisī qīmatī chīzeñ ājkal kahāñ pāī jātī haiñ? Kyā āp meñ us kī sachchāī hai?

Phir Hannā ne Īsā Masīh ko bandhī huī hālat meñ imām-e-āzam Kāyfā ke pās bhej diyā. Imām-e-āzam Kāyfā ke sāth Yahūdī adālat-e-āliyā ke buzurg bhī baiṭhe the. Asl adālat yahī thī.

Dubārā Inkār

Patras ab tak āg ke pās kharā tāp rahā thā. Itne meñ dūsre us se pūchhne lage, “Tum bhī us ke shāgird ho ki nahīn?”

Lekin Patras ne inkār kiyā, “Nahīn, main nahīn hūn.”

Lagtā nahīn ki Patras mahsūs kar rahā thā ki us se ḡhalatī ho rahī hai. Shāyad wuh dil meñ faḡhr bhī kar rahā thā ki main ab tak is ḡhatarnāk jagah meñ kharā hūn.

Phir imām-e-āzam kā ek ḡhulām bol uṭhā jo us ādmī kā rishtedār thā jis kā kām Patras ne uṛā diyā thā, “Kyā mainne tum ko bāḡh meñ us ke sāth nahīn dekhā thā?”

Patras ne ek bār phir inkār kiyā, aur inkār karte hī murḡh kī bāṅg sunāī dī.

Ab Patras ko Īsā Masīh kī bāt yād āī aur wuh nikalkar ḡhūb ro paṛā.

► *Patras kyon ro paṛā?*

Achānak use Īsā Masīh kī bāt yād āī ki tū mujhe jānane se inkār karegā. Us ne ekdam apnī jhūṭhī hālat mahsūs kī. Use is kā ehsās huā ki ustād kī pāk sachchāī aur wafādārī mujh meñ nahīn hai. Main us kī sachchāī kī rāh par chalne meñ fail ho gayā hūn. Patras hathiyār ḡālkar mām gayā ki merī har koshish be-fāyda, sifar ke barābar hai.

► *Patras ne hathiyār kyon ḡāl die?*

Pahle wuh samajhtā thā ki main ustād kā behtarīn shāgird hūn. Sab kuchh mere qābū meñ hai, aur ustād mujh par pūrā bharosā rakh saktā hai. Main hī us kī bādshāhī lāūngā. Main hī us kā sab se baṛā wazīr ban jāūngā. Lekin ab yih ḡhyāl ekdam ḡhalat sābit huā.

► *Patras kī hār se ham kyā sikh sakte haiñ?*

Jo shāgird bananā chāhtā hai zarūrī hai ki wuh pahle apne tamām hathiyār dāl de. Pahle wuh māl le ki mujh se kuchh nahīn ho saktā. Na mainī Īsā Masīh kī madad karne lāyq hūn na apnī hī tāqat se apnī najāt pā saktā hūn. Ek hī hai jo merī madad kar saktā hai—wuh jo gunāh aur maut par fath pākar jī uṭhā hai. Patras ne ekdam pahchān liyā ki merī apnī sachchāī aur wafādārī khokhlī-sī hai. Ūnchī dukān phikā pakwān wālī bāt hai. Aur ab mainne ustād ko jānane se inkār bhī kiyā hai. Kyā wuh kabhī mujhe māf karegā?

Pīlātus ke Sāmne

Yahūdī buzurgoñ ne Īsā Masīh ko sazā-e-maut ke lāyq qarār diyā. Phir wuh qaidī ko apne sāth lekar Romī governor ke mahl banām praetorium ke pās pahunch gae.

► *Yahūdī buzurgoñ ne Īsā Masīh ko sīdhā sazā-e-maut kyon na dī?*

Yahūdīyon ko sazā-e-maut dene kī ijāzat nahīn thī. Sirf Romī governor Pīlātus ko yih iḥtiyār thā.

Ab subh ho chukī thī. Chūnki Yahūdī Fasah kī Īd ke khāne mein sharīk honā chāhte the, islie wuh mahl mein dāḡhil na hue, warnā wuh nāpāk ho jāte. Islie Pīlātus nikalkar un ke pās āyā aur pūchhā, “Tum is ādmī par kyā ilzām lagā rahe ho?”

Unhon ne jawāb diyā, “Agar yih mujrim na hotā to ham ise āp ke hawāle na karte.”

Pīlātus ne kahā, “Phir ise le jāo aur apnī sharaī adālaton mein pesh karo.”

Lekin Yahūdīyon ne etarāz kiyā, “Hameñ kisī ko sazā-e-maut dene kī ijāzat nahīn.”

Tab Pīlātus phir apne mahl mein gayā. Wahān se us ne Īsā Masīh ko bulāyā aur us se pūchhā, “Kyā tum Yahūdīyon ke bādshāh ho?”

Īsā Masīh ne pūchhā, “Kyā āp apnī taraf se yih sawāl kar rahe haiñ, yā auron ne āp ko mere bāre meñ batāyā hai?”

Pīlātus ne jawāb diyā, “Kyā main Yahūdī hūñ? Tumhārī apnī qaum aur rāhnumā imāmon hī ne tumheñ mere hawāle kiyā hai. Tum se kyā kuchh sarzad huā hai?”

Īsā Masīh ne farmāyā,

Merī bādshāhī is duniyā kī nahīn hai. Agar wuh is duniyā kī hotī to mere k̄hādīm saḡht jidd-o-jahd karte tāki mujhe Yahūdiyon ke hawāle na kiyā jātā. Lekin aisā nahīn hai. Ab merī bādshāhī yahān kī nahīn hai. (Yūhannā 18:36)

► *Kyā Īsā Masīh kī bādshāhī is duniyā kī hai?*

Nahīn. Us kī bādshāhī K̄hudā kī bādshāhī hai.

Pīlātus ne kahā, “To phir tum wāqāī bādshāh ho?”

Īsā Masīh ne jawāb diyā,

Āp sahī kahte haiñ, main bādshāh hūñ. Main isī maqsad ke lie paidā hokar duniyā meñ āyā kī sachchāī kī gawāhī dūñ. Jo bhī sachchāī kī taraf se hai wuh merī suntā hai. (Yūhannā 18:37)

► *Īsā Masīh kis maqsad ke lie duniyā meñ āyā?*

Wuh sachchāī kī gawāhī dene duniyā meñ āyā.

► *Yih kis qism kī sachchāī hai?*

Sachchāī ek aisī chīz hai jo ṭhos hai. Jo kabhī miṭāī nahīn jā saktī.

► *Yih sachchāī kyon ṭhos hai?*

Islie kī yih K̄hudā kī muhabbat-bharī wafādārī hai. Isī wafādārī ne bardāsht na kiyā kī ham barbād ho rahe haiñ. Islie us ne apnā Farzand is duniyā meñ bhej diyā tāki wuh apnī jān gunāhgār insān kī k̄hātir qurbān kare. Aur yahī ṭhos wafādārī us ke Farzand meñ bhī pāī jātī hai. Wuh sachchāī yānī muhabbat-bharī wafādārī kā bādshāh hai.

Īsā Masīh pahle kah chukā thā ki main achchhā charwāhā hūn. Sachchāi kā yih bādshāh achchhā charwāhā hai. Yih wuh charwāhā hai jo apnī khoī huī bheṛon ke pīchhe chal partā hai tāki unheñ bachāe rakhe. Yih wuhī charwāhā hai jo apnī bheṛon kī khatīr apnī jān bhī detā hai.

► *Masīh kā kyā matlab hai ki jo bhī sachchāi kī taraf se hai wuh merī suntā hai?*

Jo Īsā Masīh par imān lāe wuh is shāhī charwāhe kī bheṛ ban jātā hai, aur wuh us kī suntā hai. Ab se wuh Masīh kī ilāhī bādshāhī kā shahrī hai. Be-shak wuh is duniyā meñ baste hue apne gharāne aur mulk kā zimmedār rukn rahtā hai. Lekin use mālūm hai ki yih duniyā merā haqīqī ghar nahīn hai. Main duniyā meñ ajnabī aur musāfir hūn.

► *Ham kyon musāfir haiñ?*

Islie ki ham sachchāi ke charwāhe kī bheṛen haiñ. Yih sachchāi aur duniyā kā jhūṭh āpas meñ mel nahīn khāte.

Isī lie hamārā ghar is duniyā meñ kabhī nahīn ho saktā.

Pilātus ne pūchhā, “Sachchāi kyā hai?”

Pilātus siyāsatdān thā. Us ke nazdik sachchāi kī koī qadr nahīn thī. Tāqat aur paise se kām chaltā thā, aur yih pāne ke lie har chāl chaltī thī—bilkul āj kī siyāsat kī tarah. Use is muhabbat-bharī wafādārī se koī matlab nahīn thā.

Sazā-e-Maut kā Faislā

Phir wuh dubārā nikalkar Yahūdion ke pās gayā. Us ne elān kiyā, “Mujhe use mujrim ṭaharāne kī koī wajah nahīn milī. Lekin tumhārī ek rasm hai jis ke mutābiq mujhe Īd-e-Fasah ke mauqe par tumhāre lie ek qaidī ko rihā karnā hai. Kyā tum chāhte ho ki main ‘Yahūdion ke bādshāh’ ko rihā kar dūn?” Lekin jawāb meñ log chillāne lage, “Nahīn, is ko nahīn balki Bar-abbā ko.” (Bar-abbā ḍākū thā.)

Phir Pilātus ne Īsā Masīh ko koṛe lagwāe. Faujiyon ne kāntedār ṭahniyon kā ek tāj banākar us ke sar par rakh diyā. Unhon ne use arghawānī rang kā libās bhī pahnāyā. Phir us

ke sāmne ākar wuh kahte, “Ai Yahūdiyoñ ke bādshāh, ādāb!”
Aur use thappaṛ mārte the.

Ek bār phir Pilātus nikal āyā aur Yahūdiyoñ se bāt karne lagā, “Dekho, main̄ ise tumhāre pās bāhar lā rahā hūñ tāki tum jān lo ki mujhe ise mujrim ṭhahrāne kī koī wajah nahīñ mili.” Phir Īsā Masīh kāṇṭedār tāj aur arghawānī rang kā libās pahne bāhar āyā. Pilātus ne un se kahā, “Lo yih hai wuh ādmi.”

Jo sachchāī kā bādshāh thā us ke zaḥmoñ se ḡhūñ ṭapak rahā thā. Jo akelā hī insān ko najāt de saktā thā use badtarīn mujrim kī tarah pesh kiyā gayā thā. Jo har khoī huī bheṛ kī khoj meñ rahtā thā use pāñwoñ tale kuchlā gayā thā.

Use dekhte hī rāhnumā imām aur un ke mulāzim chīḡhne lage, “Ise maslūb karen, ise maslūb karen!”

Pilātus ne un se kahā, “Tum hī ise le jākar maslūb karo. Kyoñki mujhe ise mujrim ṭhahrāne kī koī wajah nahīñ mili.” Yahūdiyoñ ne isrār kiyā, “Hamāre pās shariāt hai aur is shariāt ke mutābiq lāzim hai ki wuh mārā jāe. Kyoñki is ne apne āp ko Allāh kā Farzand qarār diyā hai.”

► *Ab Yahūdī rāhnumā aslī ilzām par utar āe the. Wuh kyā thā? Ilzām yih thā ki wuh apne āp ko Allāh kā Farzand samajhtā hai.*

Yih sunkar Pilātus mazīd ḡar gayā.

► *Wuh kyoñ ḡar gayā?*

Us ne sochā, agar Īsā Masīh apne āp ko Allāh kā Farzand samajhtā hai to aisā na ho ki wuh mere ḡhilāf koī jādū-ṭonā kare.

Dubārā mahl meñ jākar us ne Īsā Masīh se pūchhā, “Tum kahāñ se āe ho?”

Lekin Īsā Masīh ḡhāmosh rahā. Pilātus ne us se kahā, “Achchhā, tum mere sāth bāt nahīñ karte? Kyā tumheñ mālūm nahīñ ki mujhe tumheñ rihā karne aur maslūb karne kā iḡhtiyār hai?”

Īsā Masīh ne jawāb diyā,

Āp ko mujh par iḡhtiyār na hotā agar wuh āp ko ūpar se na diyā gayā hotā. Is wajah se us shaḡhs se zyādā sangīn gunāh huā hai jis ne mujhe dushman ke hawāle kar diyā hai.”

(Yūhannā 19:11)

► *Pīlātus ko kis se iḡhtiyār milā thā?*

Ḳhudā se.

► *Īsā Masīh farmātā hai kī Pīlātus se zyādā qusūrwar koī aur hai. Wuh kaun?*

Wuh jis ne use dushman ke hawāle kar diyā hai.

► *Wuh kaun thā?*

Yahūdāh bhī aur wuh tamām Yahūdī buzurg bhī jinhoñ ne use pakaḡkar governor ke hawāle kar diyā.

Is ke bād Pīlātus ne use āzād karne kī koshish kī. Lekin Yahūdī chīḡh chīḡhkar kahne lage, “Agar āp ise rihā karen to āp Romī shahanshāh Qaisar ke dost sābit nahīñ hoñge. Jo bhī bādshāh hone kā dāwā kare wuh shahanshāh kī muḡhālafat kartā hai.”

Is tarah kī bāteñ sunkar Pīlātus Īsā Masīh ko bāhar le āyā. Phir wuh judge kī kursī par baiṡh gayā. Us jagah kā nām “Pachchikārī” thā. Ab dopahar ke taqriban bārah baj gae the. Us dīn īd ke lie taiyāriyāñ kī jāti thīñ, kyonḡki agle dīn īd kā āḡhāz thā. Pīlātus bol uṡhā, “Lo, tumhārā bādshāh!”

Lekin wuh chillāte rahe, “Le jāeñ ise, le jāeñ! Ise maslūb karen!”

Pīlātus ne pūchhā, “Kyā main tumhāre bādshāh ko salīb par chaḡhāūñ?”

Rāhnumā imāmoñ ne jawāb diyā, “Siwāe shahanshāh ke hamārā koī bādshāh nahīñ hai.”

Phir Pīlātus ne Īsā Masīh ko un ke hawāle kar diyā tāki use maslūb kiyā jāe.

Kuchh Ākhirī Bāteñ

Yon Īsā Masīh pakke irāde se salīb kī rāh par chaltā rahā. Use maut se bachne ke kaī mauqe the. Use mālūm thā ki Yahūdāh use dushman ke hawāle karegā. Wuh Yarūshalam ko chhoṛ saktā thā. Lekin wuh jān-būjhkar us bāgh meñ gayā jo Yahūdāh jāntā thā. Bād meñ bhī wuh bach saktā thā. Yahūdī adālat-e-āliyā aur Pilātus ke sāmne wuh inkār kar saktā thā. Lekin us ne aisā na kiyā. Wuh jāntā thā ki mujhe yih talḡh pyālā pīnā hī hai.

Musibat meñ bhī wuh achchhā charwāhā thā. Pakṛe jāte waqt us ne apne shāgirdon ko pakṛe jāne se bachāyā. Us ne Patras ko talwār chalāne se rokkar ḡhulām kā kām thīk kiyā. Use Romī governor Pilātus kī bhī fikr thī. Wuh use bhī sachchāi kī rāh par lāne se na jhīkā.

Rahā yih sawāl: Āp is wafādār shāhī charwāhe ke sāmne kyā kareñge? Kyā āp use Yahūdī rāhnumāon kī tarah rad kareñge? Yā kyā āp Pilātus kī tarah tañz kaskar kaheñge ki sachchāi kyā hai?

Yā kyā āp Yahūdāh kī tarah hoñge? Wuh shāgird to thā, lekin wuh ustād se sirf fāyda uṭhānā chāhtā thā. Ḳhazānchī ke taur par us ne be-īmānī kī. Aur jab dekhā ki merī bāt nahīn ban rahī to us ne paison ke lālch meñ use dushman ke hawāle kar diyā.

Lekin shāyad āp Patras kī-sī soch rakheñge? Āp apne āp ko Masīh ke wazīr samajhte haiñ. Āp samajhte haiñ ki main apnī hī tāqat se sab kuchh karūngā, najāt kā kām bhī.

Mere dost, agar āp sochte haiñ ki āp zarā bhī apnī najāt ḡhud hāsil kar sakte haiñ to āp sachche shāgird nahīn ban sakte. Hāñ, Patras sachchā shāgird ban gayā, lekin bād meñ. Pahle use mānanā parā ki main kuchh nahīn kar saktā. Agar main apnī tāqat se kuchh karnā chāhūn to sarāsar fail ho jāūngā, us kā inkār karne tak gir jāūngā.

Mere azīz, najāt pāne kī ek hī rāstā hai: yih ki apne hathiyār ḍālkar apnī jān ko us ke supurd karo. Yahī mām lo ki mujh se kuchh nahīn ho saktā. Ai Īsā Masīh, tū hī sab kuchh hai. Tū hī mujhe āzād kar saktā hai. Mujhe apnī bheṛ banā de. Mujhe harī charāgāhoṅ par le jā, aisī jaghoṅ par jahān chashme kā tāzā pānī ubaltā rahtā hai. Jahān dushman ke rūbarū bhī dastarkhān bichhā rahtā hai. Mujhe is tar-o-tāzagī kī ashad zarūrat hai. Ai mere āqā, mujh meṅ najāt pāne kī koī tāqat nahīn hai. Islie ā, merī madad kar. Āmīn.

Injil, Yūhannā 18:1–19:16

Pakarā Gayā

Yih kahkar Īsā apne shāgirdoṅ ke sāth niklā aur Wādī-e-Qidron ko pār karke ek bāgh meṅ dākhil huā. Yahūdāh jo use dushman ke hawāle karne wālā thā wuh bhī is jagah se wāqif thā, kyonki Īsā wahān apne shāgirdoṅ ke sāth jāyā kartā thā. Rāhnumā imāmoṅ aur Farīsiyoṅ ne Yahūdāh ko Romī faujiyoṅ kā dastā aur Baitul-muqaddas ke kuchh pahredār die the. Ab yih mashāleṅ, lālṭain aur hathiyār lie bāgh meṅ pahuṅche. Īsā ko mālūm thā ki use kyā pesh āegā. Chunnāṅche us ne nikalkar un se pūchhā, “Tum kis ko ḍhūṇḍ rahe ho?”

Unhoṅ ne jawāb diyā, “Īsā Nāsari ko.”

Īsā ne unheṅ batāyā, “Main hī hūn.”

Yahūdāh jo use dushman ke hawāle karnā chāhtā thā, wuh bhī un ke sāth kharā thā. Jab Īsā ne elān kiyā, “Main hī hūn,” to sab pīchhe haṭkar zamīn par gir pāre. Ek aur bār Īsā ne un se sawāl kiyā, “Tum kis ko ḍhūṇḍ rahe ho?”

Unhoṅ ne jawāb diyā, “Īsā Nāsari ko.”

Us ne kahā, “Main tum ko batā chukā hūn ki main hī hūn. Agar tum mujhe ḍhūṇḍ rahe ho to in ko jāne do.”

Yoñ us kī yih bāt pūrī huī, “Maiñne un meñ se jo tūne mujhe die haiñ ek ko bhī nahīñ khoyā.”

Patras ke pās talwār thī. Ab us ne use miyān se nikālkar imām-e-āzam ke ġhulām kā dahnā kān uṛā diyā (ġhulām kā nām Malkḥus thā). Lekin Īsā ne Patras se kahā, “Talwār ko miyān meñ rakh. Kyā maiñ wuh pyālā na piyūñ jo Bāp ne mujhe diyā hai?”

Phir faujī daste, un ke officer aur Baitul-muqaddas ke Yahūdī pahredāron ne Īsā ko giriftār karke bāndh liyā. Pahle wuh use Hannā ke pās le gae. Hannā us sāl ke imām-e-āzam Kāyfā kā susar thā. Kāyfā hī ne Yahūdiyoñ ko yih mashwarā diyā thā ki behtar yih hai ki ek hī ādmī ummat ke lie mar jāe.

Inkār

Patras kisī aur shāgird ke sāth Īsā ke pīchhe ho liyā thā. Yih dūsrā shāgird imām-e-āzam kā jānane wālā thā, islie wuh Īsā ke sāth imām-e-āzam ke sahn meñ dākḥil huā. Patras bāhar darwāze par khaṛā rahā. Phir imām-e-āzam kā jānane wālā shāgird dubārā nikal āyā. Us ne gate kī nigrānī karne wālī aurat se bāt kī to use Patras ko apne sāth andar le jāne kī ijāzat milī. Us aurat ne Patras se pūchhā, “Tum bhī is ādmī ke shāgird ho ki nahīñ?” Us ne jawāb diyā, “Nahīñ, maiñ nahīñ hūñ.”

Ṭhand thī, islie ġhulāmon aur pahredāron ne lakaṛī ke koyloñ se āg jalāī. Ab wuh us ke pās khaṛe tāp rahe the. Patras bhī un ke sāth khaṛā tāp rahā thā.

Yahūdī Buzurgoñ ke Sāmne

Itne meñ imām-e-āzam Īsā kī pūchh-gachh karke us ke shāgirdoñ aur tālīm ke bāre meñ taftish karne lagā. Īsā ne jawāb meñ kahā, “Maiñne duniyā meñ khulkar bāt kī hai. Maiñ hameshā Yahūdī ibādatḥānoñ aur Baitul-muqaddas meñ tālīm detā rahā, wahāñ jahāñ tamām

Yahūdī jamā huā karte haiñ. Poshīdagī meñ to mainne kuchh nahīñ kahā. Āp mujh se kyoñ pūchh rahe haiñ? Un se dariyāft karen jinhoñ ne merī bāteñ sunī haiñ. Un ko mālūm hai ki mainne kyā kuchh kahā hai.”

Is par sāth khaṛe Baitul-muqaddas ke pahredāroñ meñ se ek ne Īsā ke muñh par thappaṛ mārkar kahā, “Kyā yih imām-e-āzam se bāt karne kā tarīqā hai jab wuh tum se kuchh pūchhe?”

Īsā ne jawāb diyā, “Agar mainne burī bāt kī hai to sābit kar. Lekin agar sach kahā, to tūne mujhe kyoñ mārā?”

Phir Hannā ne Īsā ko bandhī huī hālat meñ imām-e-āzam Kāyfā ke pās bhej diyā.

Dubārā Inkār

Patras ab tak āg ke pās khaṛā tāp rahā thā. Itne meñ dūsre us se pūchhne lage, “Tum bhī us ke shāgird ho ki nahīñ?”

Lekin Patras ne inkār kiyā, “Nahīñ, main nahīñ hūñ.”

Phir imām-e-āzam kā ek ḡhulām bol uṭhā jo us ādmī kā rishtedār thā jis kā kān Patras ne uṛā diyā thā, “Kyā mainne tum ko bāḡh meñ us ke sāth nahīñ dekhā thā?”

Patras ne ek bār phir inkār kiyā, aur inkār karte hī murḡh kī bāṅg sunāī dī.

Pīlātus ke sāmne

Phir Yahūdī Īsā ko Kāyfā se lekar Romī governor ke mahl banām praetorium ke pās pahuñch gae. Ab subh ho chukī thī aur chūñki Yahūdī Fasah kī Īd ke khāne meñ sharīk honā chāhte the, islie wuh mahl meñ dāḡhil na hue, warnā wuh nāpāk ho jāte. Chunāñche Pīlātus nikalkar un ke pās āyā aur pūchhā, “Tum is ādmī par kyā ilzām lagā rahe ho?”

Unhoñ ne jawāb diyā, “Agar yih mujrim na hotā to ham ise āp ke hawāle na karte.”

Pilātus ne kahā, “Phir ise le jāo aur apnī sharaī adālatoñ meñ pesh karo.”

Lekin Yahūdiyoñ ne etarāz kiya, “Hameñ kisī ko sazā-e-maut dene kī ijāzat nahīñ.” Īsā ne is taraf ishārā kiya thā ki wuh kis tarah maregā aur ab us kī yih bāt pūrī huī.

Tab Pilātus phir apne mahl meñ gayā. Wahāñ se us ne Īsā ko bulāyā aur us se pūchhā, “Kyā tum Yahūdiyoñ ke bādshāh ho?”

Īsā ne pūchhā, “Kyā āp apnī taraf se yih sawāl kar rahe haiñ, yā auroñ ne āp ko mere bāre meñ batāyā hai?”

Pilātus ne jawāb diyā, “Kyā main Yahūdī hūñ? Tumhārī apnī qaum aur rāhnumā imāmoñ hī ne tumheñ mere hawāle kiya hai. Tum se kyā kuchh sarzad huā hai?”

Īsā ne kahā, “Merī bādshāhī is duniyā kī nahīñ hai. Agar wuh is duniyā kī hotī to mere khādīm saḡht jidd-o-jahd karte tāki mujhe Yahūdiyoñ ke hawāle na kiya jātā. Lekin aisā nahīñ hai. Ab merī bādshāhī yahāñ kī nahīñ hai.”

Pilātus ne kahā, “To phir tum wāqaī bādshāh ho?”

Īsā ne jawāb diyā, “Āp sahī kahte haiñ, main bādshāh hūñ. Main isī maqsad ke lie paidā hokar duniyā meñ āyā ki sachchāī kī gawāhī dūñ. Jo bhī sachchāī kī taraf se hai wuh merī suntā hai.”

Pilātus ne pūchhā, “Sachchāī kyā hai?”

Sazā-e-Maut kā Faislā

Phir wuh dubārā nikalkar Yahūdiyoñ ke pās gayā. Us ne elān kiya, “Mujhe use mujrim ṭaharāne kī koī wajah nahīñ milī. Lekin tumhārī ek rasm hai jis ke mutābiq mujhe Īd-e-Fasah ke mauqe par tumhāre lie ek qaidī ko rihā karnā hai. Kyā tum chāhte ho ki main ‘Yahūdiyoñ ke bādshāh’ ko rihā kar dūñ?”

Lekin jawāb meñ log chillāne lage, “Nahīn, is ko nahīn balki Bar-abbā ko.” (Bar-abbā dākū thā.)

Phir Pilātus ne Īsā ko koṛe lagwāe. Faujiyoñ ne kāñṭedār ṭahniyoñ kā ek tāj banākar us ke sar par rakh diyā. Unhoñ ne use arghawānī rang kā libās bhī pahnāyā. Phir us ke sāmne ākar wuh kahte, “Ai Yahūdiyoñ ke bādshāh, ādāb!” Aur use thappaṛ mārte the.

Ek bār phir Pilātus nikal āyā aur Yahūdiyoñ se bāt karne lagā, “Dekho, main ise tumhāre pās bāhar lā rahā hūn tāki tum jān lo ki mujhe ise mujrim ṭahrāne kī koī wajah nahīn mili.” Phir Īsā kāñṭedār tāj aur arghawānī rang kā libās pahne bāhar āyā. Pilātus ne un se kahā, “Lo yih hai wuh ādmī.”

Use dekhte hī rāhnumā imām aur un ke mulāzim chīkhne lage, “Ise maslūb karen, ise maslūb karen!”

Pilātus ne un se kahā, “Tum hī ise le jākar maslūb karo. Kyoñki mujhe ise mujrim ṭahrāne kī koī wajah nahīn mili.”

Yahūdiyoñ ne isrār kiyā, “Hamāre pās shariat hai aur is shariat ke mutābiq lāzim hai ki wuh mārā jāe. Kyoñki is ne apne āp ko Allāh kā Farzand qarār diyā hai.”

Yih sunkar Pilātus mazīd ḍar gayā. Dubārā mahl meñ jākar Īsā se pūchhā, “Tum kahān se āe ho?”

Lekin Īsā khāmosh rahā. Pilātus ne us se kahā, “Achchhā, tum mere sāth bāt nahīn karte? Kyā tumheñ mālūm nahīn ki mujhe tumheñ rihā karne aur maslūb karne kā iḳhtiyār hai?”

Īsā ne jawāb diyā, “Āp ko mujh par iḳhtiyār na hotā agar wuh āp ko ūpar se na diyā gayā hotā. Is wajah se us shaḳhs se zyādā sangīn gunāh huā hai jis ne mujhe dushman ke hawāle kar diyā hai.”

Is ke bād Pilātus ne use āzād karne kī koshish kī. Lekin Yahūdī chīḡh chīḡhkar kahne lage, “Agar āp ise rihā karen to āp Romī shahanshāh Qaisar ke dost sābit nahīn hoṅge. Jo bhī bādshāh hone kā dāwā kare wuh shahanshāh kī muḡhālafat kartā hai.”

Is tarah kī bāteṅ sunkar Pilātus Īsā ko bāhar le āyā. Phir wuh judge kī kursī par baiṡh gayā. Us jagah kā nām “Pachchīkāri” thā. (Arāmī zabān meṅ wuh Gabbatā kahlāti thī.) Ab dopahar ke taqrīban bārah baj gae the. Us dīn īd ke lie taiyāriyāṅ kī jāti thīṅ, kyonki agle dīn īd kā āḡhāz thā. Pilātus bol uṡhā, “Lo, tumhārā bādshāh!” Lekin wuh chillāte rahe, “Le jāeṅ ise, le jāeṅ! Ise maslūb karen!”

Pilātus ne sawāl kiyā, “Kyā main tumhāre bādshāh ko salīb par chaṡhāūṅ?”

Rāhnumā imāmoṅ ne jawāb diyā, “Siwāe shahanshāh ke hamārā koī bādshāh nahīn hai.”

Phir Pilātus ne Īsā ko un ke hawāle kar diyā tāki use maslūb kiyā jāe.

Kām Mukammal Ho Gayā Hai

Al-Masīh kī Maut



Salīb

Yahūdī rāhnumāon ke uksāne par Romī governor Pilātus ne hukm diyā ki Īsā Masīh ko salīb par chaṛhāyā jāe. Tab use salīb pakaṛā dī gaī aur faujī us ke sāth chal paṛe. Dūsri Anājil is ke gawāh haiṁ ki Īsā Masīh koṛon ke bāis kāfī kamzor ho gayā thā. Rāste meṁ us kī tāqat jawāb de gaī. Tab faujiyon ne ek guzarne wāle ko yih lakaṛī uṭhākar le jāne par majbūr kiya.

Chalte chalte wuh shahr se nikalkar sazā-e-maut kī jagah par pahuṁch gae. Jagah kā nām khopaṛī thā. Yih shahr kī chārdiwāri ke qarīb hī thī jahān se log tamāshā dekh sakte the. Wahān faujiyon ne use salīb par chaṛhā diyā. Us ke bāen aur dāen hāth unhoṁ ne do mujrimon ko maslūb kiya.

► *Maslūb karne kā kyā tariqā thā?*

Fauji, hāthoṁ aur pānwoṁ meṁ baṛe kīl ṭhoṅkar mujrim ko salīb se laṭkā dete the.

Yahūdiyon kā Bādshāh

Itne meṁ Pilātus ne ek taḥtī banwākar use Īsā Masīh kī salīb par lagwā diyā. Taḥtī par likhā thā, ‘Īsā Nāsari, Yahūdiyon kā bādshāh.’ Bahut-se Yahūdiyon ne yih paṛh liyā, kyonki yih maqām shahr ke qarīb thā aur yih bāt Arāmī, Lātīnī aur Yūnānī zabānon meṁ likhī thī. Yih dekhkar rāhnumā imāmon ne etarāz kiya, “‘Yahūdiyon kā bādshāh’ na likheṁ balki yih ki ‘Is ādmī ne Yahūdiyon kā bādshāh hone kā dāwā kiya.’”

Pilātus ne jawāb diyā, “Jo kuchh mainne likh diyā so likh diyā.”

► *Pilātus kyon aṛā rahā?*

Pilātus zālīm thā, aur use unheñ diqqat pahuñchāne meñ mazā ātā thā. Lekin anjāne meñ us ne is takḥti se ek gahri haqīqat kā elān kiyā.

► *Us ne kis haqīqat kā elān kiyā?*

Yih ki Īsā Masīh sachmuch bādshāh hai. Wuh is duniyā meñ āyā tāki pahle Yahūdiyoñ aur phir pūrī duniyā kā bādshāh bane.

Kapṛoñ kī Taqsīm

Īsā Masīh ko salīb par chaṛhāne ke bād faujiyoñ ne us ke kapṛe lekar chār hissoñ meñ bāñṭ lie, har fauji ke lie ek hissā. Yih bhī ek Romī riwāj thā. Lekin choḡhā be-joṛ thā. Wuh ūpar se lekar nīche tak bunā huā ek hī ṭukṛe kā thā. Islie faujiyoñ ne kahā, “Āo, ise phāṛkar taqsīm na karen balki is par qurā ḍāleñ.” Yoñ Zabūr kī yih peshgoī pūrī huī, “Unhoñ ne āpas meñ mere kapṛe bāñṭ lie aur mere libās par qurā ḍālā.”

► *Is peshgoī kā zikr kahāñ huā thā?*

Yih peshgoī Zabūr 22:18 meñ pāī jāti hai. Yih zabūr al-Masīh kī taklifdeh maut kī peshgoī kartā hai.

Mariyam kī Fikr

Kuchh aurateñ Īsā Masīh kī salīb ke qarīb khaṛī thiñ—us kī māñ, us kī ḡhālā, Klopās kī biwī Mariyam aur Mariyam Magdalīnī. Īsā Masīh ne apnī māñ ko us shāgird ke sāth khaṛe dekhā jo use pyārā thā. Us ne kahā, “Ai ḡhātūn, dekheñ āp kā beṭā yih hai.” Us shāgird se us ne kahā, “Dekh, terī māñ yih hai.” Us waqt se us shāgird ne Īsā Masīh kī māñ ko apne ghar rakhā.

► *Yih kaun-sā shāgird thā jo use pyārā thā?*

Be-shak yih Yūhannā rasūl thā jis ne Injil kā yih bayān likhā.

► *Us ne apne nām kā zikr kyon nahīñ kiyā?*

Ham andāzā lagā sakte haiñ ki wuh bhī Yahyā baptismā dene wāle kī-sī soch rakhtā thā jis ne farmāyā thā ki

Masīh barhtā jāe jabki main̄ ghattā jāūn̄ (Yūhannā 3:30). Wuh nām-dām kamāne ke chakkar meñ nahīn̄ ānā chāhtā thā.

- *Īsā Masīh ne Mariyam aur shāgird se yih bāt kyon̄ kī?*
Maut ke rūbarū bhī use Mariyam kī fikr thī. Wuh chāhtā thā ki yih shāgird us kī dekh-bhāl kare.

Pyās

Is ke bād jab Īsā Masīh ne jān liyā ki merā mission takmīl tak pahunch chukā hai to us ne kahā, “Mujhe pyās lagī hai.” Is se bhī Zabūr kī ek peshgoī pūrī huī.

- *Kaun-sī peshgoī pūrī huī?*
Ek zabūr meñ likhā hai,

Unhoñ ne merī k̄hurāk meñ kaṛwā zahr
milāyā, mujhe sirkā pilāyā jab pyāsā thā.
(Zabūr 69:21; bamuqābalā Zabūr 22:15)

- *Yūhannā yih bāt kyon̄ bayān kartā hai?*
Pahle, wuh kahnā chāhtā hai ki yih peshgoī pūrī huī. Lekin is se baṛhkar wuh in tamām dukhī bātoñ se is par zor denā chāhtā hai ki Masīh ne sachmuch saṅht dukh uṭhāyā. Salībī maut ke kuchh sāl bād chand-ek ḡhalat ustād kahne lage the ki aisī azīm hastī dukh nahīn̄ uṭhā saktī. Un ke k̄hyāl meñ wuh sirf dekhne meñ dukh uṭhā rahā thā.

Yūhannā farmātā hai ki hargiz nahīn̄! K̄hudā ke Farzand ne insān bankar hamārī jagah dukh sahā tāki hamēñ najāt dekar apnī bādshāhī meñ shāmil kare. Lāzim thā ki wuh pūre taur par K̄hudā bhī ho aur insān bhī. Agar wuh sirf K̄hudā hotā to wuh apnī jān insān kī jagah na de saktā. Aur agar wuh sirf insān hotā to insān ko us kī qurbānī se koī matlab na hotā. Yih bāt ḡhalat hai ki wuh sirf K̄hudā hai. Wuh pūre taur par insān bhī hai. Main̄ne

apnī āṅkhoṅ se dekhā ki wuh maut tak dukh uṭhā rahā thā.

Mere dost, yih bāt sachche īmān kā buniyādī satūn hai. Sachchā shāgird wuhī hotā hai jo yih bāt māne. Sachchā shāgird jāntā hai ki main apnī najāt ḳhud hāsil nahīn kar saktā. Sirf Ḳhudā kā Farzand jo pūre taur par Ḳhudā aur pūre taur par insān hai mujhe yih najāt dekar nūr meṅ lā saktā hai. Merā is meṅ koī hissā nahīn hai.

Is buniyādī soch se hamārā īmān duniyā kī har dūsri soch se farq hai. Najāt milne ke lie hameṅ pahle hathiyār ḍālkar mānanā partā hai ki ai Masīh, tū hī sab kuchh hai. Main apnī hī tāqat se najāt hāsil nahīn kar saktā. Terā hī nūr mujhe badal saktā hai.

► *Achchhā, āp yih bāt nahīn mānte?*

Mere azīz, apne irdgird dekho. Kyā ek nazar sābit nahīn kartī ki sab ke sab ṭeṛhe-meṛhe haiṅ? Sab ke sab gunāh meṅ phaṅse hue haiṅ. Yih bāt alag ki har ek apne āp ko ṭhīk-ṭhāk aur achchhā insān samajhtā hai chāhe wuh kitnā jhūṭh kyon na bole, kitnī be-īmānī kyon na kare. Jitnā koī Ḳhudā kī qasm khāe utnā hī wuh mashkūk nikaltā hai. Jitnā koī kar dikhāe ki main baṛā farishtā hūn utnā hī wuh hote hote shaitān sābit hotā hai.

Sirf aur sirf Ḳhudā hamārī hālat badal saktā hai. Sirf Īsā Masīh kī sachchāī, us kā nūr, us kā abādī pānī aur abādī roṭī ham meṅ tabdilī lā saktī hai.

► *Kyā wajah hai ki sirf Īsā Masīh ham meṅ tabdilī lā saktā hai?*

Wajah yih hai ki hamārī apnī koshisheṅ bakwās hī haiṅ. Sirf wuh jo achchhā charwāhā hai ham meṅ pakkī tabdilī lā saktā hai.

Kām Mukammal Ho Gayā Hai

Qarīb mai ke sirke se bharā bartan parā thā. Unhoṅ ne ek sponge sirke meṅ ḍubokar use zūfe kī shāḳh par lagā diyā aur uṭhākar Masīh ke muṅh tak pahuñchāyā. Jo abādī zindagī kā

sarchashmā hai use ghaṭiyā qism kā sirkā pilāyā gayā. Yih sirkā pīne ke bād wuh bol uṭhā, “Kām mukammal ho gayā hai.” Aur sar jhukākar us ne apnī jān Allāh ke supurd kar dī.

► *Kaun-sā kām mukammal ho gayā thā?*

Najāt kā kām mukammal ho gayā thā. Īsā Masīh ko duniyā meñ bhejā gayā thā tāki wuh maut aur gunāh par fath pāe, insān ko nūr meñ lāe. Use duniyā meñ bhejā gayā thā tāki wuhī sazā uṭhāe jo insān ko uṭhānī thī. Jo kām insān kar nahīn pātā wuh us ne kiyā. Jo us par imān lātā hai us ke gunāh miṭāe jāte haiñ, aur wuh Ḳhudā ko mañzūr ho jātā hai. Yoñ Masīh kī maut us kī anokhī ḳhidmat kā urūj thī. Aisā kām duniyā nahīn samajh saktī. Us kī nazar meñ yih hastī fail ho gaī. Sirf wuh jo imān lāyā hai is kām kī qadr kar saktā hai.

► *Yih bāt kahne ke bād Īsā Masīh ne kyā kiyā?*

Us ne apnī jān apne Bāp ke supurd kī.

► *Is se ham kyā sīkh sakte haiñ?*

Marte waqt ham bhī jo us ke shāgird haiñ apnī jān us ke supurd kar sakte haiñ. Tab ham sīdhe us kī god meñ ā jāenge jo hamārā achchhā charwāhā hai. Ḍarne kī zarūrat nahīn hai, kyōnki us kī bheṛeñ maut ke pār bhī mahfūz rahtī haiñ.

Chhedā Huā Pahlū

Taiyārī kā dīn yānī jumā thā, aur agle dīn Īd-e-Fasah kā āghāz thā. Islie Yahūdī nahīn chāhte the ki lāsheñ agle dīn tak saliboñ par laṭkī raheñ. Unhoñ ne Pilātus se guzārish kī ki wuh un kī ṭāngeñ tuṛwākar unheñ saliboñ se utārne de.

► *Ṭāngeñ tuṛwāne se kyā hotā thā?*

Ṭāngeñ tuṛwāne se jism ko pāñwoñ se sahārā nahīn miltā thā aur dam jald hī ghuṭ jātā thā.

Faujiyoñ ne dūsre do mujrimoñ kī ṭāngeñ toṛ dīñ, pahle ek kī phir dūsre kī. Jab wuh Īsā Masīh ke pās āe to unhoñ ne dekhā ki wuh faut ho chukā hai. Islie unhoñ ne us kī ṭāngeñ

na toṛiñ. Lekin tasallī pāne ke lie ki wuh sachmuch mar gayā hai ek ne neze se us kā pahlū chhed diyā. Zaḥm se fauran ḡhūn aur pānī bah niklā.

► *Ḡhūn aur pānī bah nikalne kā kyā matlab thā?*

Iskā matlab thā ki wuh sachmuch mar chukā thā. Sciencedān kahte haiñ ki jo insān thoṛī der pahle mar gayā ho us ke pahlū se ḡhūn aur pānī nikal saktā hai. Zindā insān se sirf ḡhūn nikaltā hai aur kuchh der se mare hue insān se thoṛā hī nikaltā hai.

Yūhannā kī Pakkī Gawāhī

Yūhannā rasūl farmātā hai,

Jis ne yih dekhā hai us ne gawāhī dī hai aur us kī gawāhī sachchī hai. Wuh jāntā hai ki wuh haqīqat bayān kar rahā hai aur us kī gawāhī kā maqsad yih hai ki āp bhī imān lāeñ.

(Yūhannā 19:35)

► *Yih gawāh kaun thā?*

Be-shak yih gawāh Yūhannā rasūl thā jo apne āqā kī salīb ke qarīb hī khaṛā thā.

► *Wuh is par itnā zor kyon detā hai ki main is maut kā gawāh hūñ?*

Iskā zikr ho chukā hai ki kuchh ḡhalat ustād inkār karne lage the ki Ḡhudā kā Farzand dukh uṭhā saktā hai. Un kā kahnā thā ki Īsā Masīh nahīñ marā. Isī lie Yūhannā is par bhī zor detā hai ki Mariyam dūsri jānī-pahchānī auratoñ samet salīb ke bilkul qarīb thīñ jab Īsā Masīh mar gayā. Dūsri Anājīl is ke gawāh haiñ ki aur aurateñ bhī kuchh dūr khaṛī sārā māmālā dekhtī rahīñ. Ham andāzā lagā sakte haiñ ki bahut-se log shahr kī moṭī moṭī chārdiwārī par khaṛe sab kuchh dekh rahe the, kyonki yih chārdiwārī nazdik hī thī. Is kā zikr ho chukā hai ki

yih log salīb kī taḡhtī par likhī bāt paṛh sakte the (Yūhannā 19:20).

Yūhannā ke bayān se sāf zāhir hotā hai ki Īsā Masīh ke lie bachnā nāmumkin hī thā. Sārā intazām Romī faujiyon ke hāth meñ thā, aur salīb par yon kiloñ se laṭkāne se chance hī nahiñ thā ki wuh bach jāe. Yūhannā farmātā hai ki merī gawāhī sachchī hai. Main jāntā hūñ ki main haqīqat bayān kar rahā hūñ.

► *Sachchāi kī yih bāt kis kī yād dilāti hai?*

Yih Īsā Masīh kī yād dilāti hai jo sachchāi kā bādshāh hai aur jis ne Pilātus ke sāmne is sachchāi, is ṭhos wafādārī par zor diyā thā. Sachche shāgird ko is se pahchānā jātā hai ki wuh sachchāi boltā hai.

► *Yūhannā kī gawāhī kā kyā maqsad hai?*

Maqsad yih hai ki sunane aur paṛhne wāle imān lāeñ. Injīl kā pūrā maqsad yahī hai ki insān Ḳhudā ke Farzand Īsā Masīh par imān lākar najāt pāe.

► *Yih bāt itnī ahm kyon thī ki Masīh ke pahlū se ḡhūn aur pānī bah niklā?*

Yūhannā is kā jawāb detā hai,

Yih yon huā tāki Kalām-e-muqaddas kī yih peshgoī pūrī ho jāe, “Us kī ek haḡḡī bhi toṛī nahiñ jāegī.” Kalām-e-muqaddas meñ yih bhi likhā hai, “Wuh us par nazar ḡāleñge jise unhoñ ne chhedā hai.”

(Yūhannā 19:36-37)

Yūhannā do peshgoiyāñ bayān kartā hai jo pūrī huñ.

► *In do peshgoiyon kā kyā matlab hai?*

Pahlī bāt,

Masīh Najāt Dene Wālā Lelā Hai

Pahlī peshgoī Ḳhurūj kī kitāb meñ likhī hai:

Yih khānā ek hī ghar ke andar khānā hai. Na gosht ghar se bāhar le jānā, na lele kī kisī haḍḍī ko toṛnā. (Ḳhurūj 12:46)

► *Yih kis qism kā khānā hai?*

Yih wuh khānā hai jo Isrāīliyon ne Misr se nikalne se pahle pahle khāyā. Jab Misr ke bādshāh ne unheñ chhoṛne se inkār kiyā to Ḳhudā ne farmāyā ki main Misr ke har pahlauṭhe ko mār ḍālūngā. Lekin merī qaum is se bach saktī hai. Bachne kā yih tarīqā hai: Har gharānā ek lelā zabah kare. Phir zūfe kā guchchhā lele ke ḳhūn meñ ḍubokar wuh yih ḳhūn chaukhaṭ par lagā de. Jab halāk karne wālā farishtā wahān se guzregā to wuh yih ḳhūn dekhkar aise ghar ke pahlauṭhon ko chhoṛegā. Lele ko usī rāt bhūnkar khānā hai, lekin us kī haḍḍiyon ko mat toṛnā.

Bād meñ yih khānā har sāl manāyā jātā thā. Īd kā nām Fasah kī Īd thī. Isī id ke pahle din Īsā Masīh maslūb huā. Jab wuh salīb par laṭkā huā thā us waqt shahr meñ Īd ke lele zabah kie jā rahe the.

► *Yih bāt kī lele kī haḍḍiyān toṛī nahīn jātī thīn kis tarah Īsā Masīh meñ pūri hui?*

Īsā Masīh Fasah kā haqīqī lelā hai. Lele kī tarah us kī haḍḍiyān toṛī na gaīn hālānki dūsron kī ṭāngeñ toṛī gaīn. Ek aur bāt bhī is taraf ishārā kartī hai: Zūfe kī shāḳh par sponge lagākar use sirkā pilāyā gayā. Yih zūfā us zūfe ke guchchhe kī taraf ishārā hai jis se ghar ke chaukhaṭ par ḳhūn lagāyā jātā thā. Ġharz Īsā Masīh wuh haqīqī lelā hai jis kā ḳhūn ilāhī adālat se chhuṛātā hai. Dūsri bāt,

Masīh Pāk Karne Wālā Chashmā Hai

Dūsri peshgoī Zakariyāh Nabī kī hai. Us meñ Ḳhudā ne farmāyā,

Main Dāūd ke gharāne aur Yarūshalam ke bāshindoñ par mehrbānī aur iltamās kā Rūh undelūngā. Tab wuh mujh par nazar ḍaleñge jise unhoñ ne chhedā hai, aur wuh us ke lie aisā mātām kareñge jaise apne iklaute beṭe ke lie. (Zakariyāh 12:10)

Nabī wuh zamānā bayān kar rahā hai jab Isrāīl al-Masīh ko pahchān legā. Tab wuh us kā mātām kareñge jise unhoñ ne chhedā thā. Phir nabī farmātā hai,

Us din [...] chashmā kholā jāegā jis ke zariye wuh apne gunāhoñ aur nāpākī ko dūr kar sakeñge. (Zakariyāh 13:1)

Matlab hai ki us lele se ek chashmā kholā gayā jis ke zariye har imān lāne wāle ke gunāhoñ aur nāpākī ko dūr kiyā jāegā. Ġharz, jab ḵhūn aur pānī us ke pahlū se bah niklā to is se ek gahrī haqīqat zāhir huī: Masīh wuh lelā hai jis kā ḵhūn hamen ilāhī adālat se chhuṛatā hai. Sāth sāth Masīh abadī zindagī kā wuh chashmā hai jis kā pānī hamāre gunāhoñ aur nāpākī ko dūr kartā hai.

Dafn

Bād meñ Arimatiyāh ke rahne wāle Yūsuf ne Pilātus se Masīh kī lāsh utārne kī ijāzat māngī. Ijāzat milne par wuh āyā aur lāsh ko utār liyā.

► *Arimatiyāh kā rahne wālā Yūsuf kaun thā?*

Dūsri Anājil is ke gawāh haiñ ki yih Yūsuf Yahūdī adālat-e-āliyā kā amīr aur izzatdār rukn thā. Wuh Masīh kā shāgird bhī thā magar ḵhufiyā taur par, kyonki wuh Yahūdī rāhnumāoñ se ḍartā thā. Wuh Masīh ko sazā-e-maut dene ke ḵhilāf thā. Ab us ne lāsh ko dafnākar baṛī mardānagī dikhāī.

► *Nīkudemus bhī sāth thā. Nīkudemus kaun thā?*

Wuh ek izzatdār ālim thā jo Īsā Masīh se rāt ke waqt milā thā (Yūhannā 3). Ek mauqe par jab Yahūdī rāhnumā Masīh ke ḵhilāf bāteñ karne lage to us ne us kā difā kiyā thā (Yūhannā 7:50-52). Yih do jāne-pahchāne ādmī bhī is ke pakke gawāh the ki Īsā Masīh sachmuch mar gayā thā.

Nikudemus apne sāth mur aur ūd kī taqriban 34 kilogram ḵhushbū lekar āyā thā. Sirf amīr ādmī yih ḵharīd saktā thā. Janāze kī rasūmāt ke mutābiq unhoñ ne lāsh par ḵhushbū lagākar use paṭṭiyon se lapet diyā.

► *Lekin lāsh ko kahāñ dafn karnā thā?*

Sabat yānī hafte kā din qarīb thā, kyonki Yahūdī hisāb se wuh jume kī shām se shurū hotā thā. Us din lāsh ko kahīñ uṭhākar le jānā mushkil thā. Ḵhushqismatī se salībōñ ke qarīb ek bāgh thā, aur bāgh meñ ek naī qabr thī jo ab tak istemāl nahīñ huī thī.

► *Yih qabr kaisī banī thī?*

Yih qabr chaṭṭān meñ tarāshā huā ghār yānī guphā thī jis kī ek dīwār meñ ek qism kī baṛī shelf tarāshī gāī thī. Isī shelf par lāsh ko rakhā gayā.

Phir baṛā patthar ghār ke muñh par luṛhkāyā gayā. To bhī Yahūdī rāhnumā mutma'in na the. Us par mohr lagākar unhoñ ne qabr par pahredār muqarrar kie. Unheñ ḍar thā ki shāgird lāsh ko chhīn leñge.

Kyā Injil kī is jagah par Yūhannā ko 'ḵhatm shud' nahīñ likhnā chāhie thā? Īsā Masīh guzar gayā thā, shāgird ḍar ke māre bikhar gae the. Jo log pahle us kī tārif meñ nāre lagāte wuh ab himmat hārkar apne apne ghar chale gae the.

Is sawāl kā jawāb agle bāb meñ milegā.

Injil, Yūhannā 19:16b-42

Chunāñche wuh Īsā ko lekar chale gae. Wuh apnī salīb uṭhāe shahr se niklā aur us jagah pahuñchā jis kā nām

khopaṛī (Arāmī zabān meñ Gulgutā) thā. Wahāñ unhoñ ne use salīb par chaṛhā diyā. Sāth sāth unhoñ ne us ke bāeñ aur dāeñ hāth do aur ādmiyoñ ko maslūb kiyā. Pīlātus ne ek taḡhti banwākar use Īsā kī salīb par lagwā diyā. Taḡhti par likhā thā, ‘Īsā Nāsari, Yahūdiyoñ kā bādshāh.’ Bahut-se Yahūdiyoñ ne yih paṛh liyā, kyoñki maslūbiyat kā maqām shahr ke qarīb thā aur yih jumlā Arāmī, Lātīnī aur Yūnānī zabānoñ meñ likhā thā. Yih dekhkar Yahūdiyoñ ke rāhnumā imāmoñ ne etarāz kiyā, “‘Yahūdiyoñ kā bādshāh’ na likheñ balki yih ki ‘Is ādmī ne Yahūdiyoñ kā bādshāh hone kā dāwā kiyā.’”

Pīlātus ne jawāb diyā, “Jo kuchh mainne likh diyā so likh diyā.”

Īsā ko salīb par chaṛhāne ke bād faujiyoñ ne us ke kapṛe lekar chār hissoñ meñ bāñṭ lie, har faujī ke lie ek hissā. Lekin choḡhā be-joṛ thā. Wuh ūpar se lekar nīche tak bunā huā ek hī ṭukṛe kā thā. Islie faujiyoñ ne kahā, “‘Āo, ise phāṛkar taqsīm na kareñ balki is par qurā ḍāleñ.’” Yoñ Kalām-e-muqaddas kī yih peshgoī pūrī huī, “Unhoñ ne āpas meñ mere kapṛe bāñṭ lie aur mere libās par qurā ḍālā.” Faujiyoñ ne yahī kuchh kiyā.

Kuchh ḡhawātīn bhī Īsā kī salīb ke qarīb khaṛī thīñ: us kī māñ, us kī ḡhālā, Klopās kī bīwī Mariyam aur Mariyam Magdalīnī. Jab Īsā ne apnī māñ ko us shāgird ke sāth khaṛe dekhā jo use pyārā thā to us ne kahā, “‘Ai ḡhātūn, dekheñ āp kā beṭā yih hai.’”

Aur us shāgird se us ne kahā, “Dekh, terī māñ yih hai.” Us waqt se us shāgird ne Īsā kī māñ ko apne ghar rakhā. Is ke bād jab Īsā ne jāñ liyā ki merā mission takmīl tak pahuñch chukā hai to us ne kahā, “Mujhe pyās lagī hai.” (Is se bhī Kalām-e-muqaddas kī ek peshgoī pūrī huī.)

Qarīb mai ke sirke se bharā bartan parā thā. Unhoñ ne ek sponge sirke meñ ñubokar use zūfe kī shāḵh par lagā diyā aur uṭhākar Īsā ke muñh tak pahuñchāyā. Yih sirkā pīne ke bād Īsā bol uṭhā, “Kām mukammal ho gayā hai.” Aur sar jhukākar us ne apnī jān Allāh ke supurd kar dī. Fasah kī taiyārī kā din thā aur agle din Īd kā āghāz aur ek ḵhās Sabat thā. Islie Yahūdī nahīn chāhte the ki maslūb huī lāsheñ agle din tak salībōñ par laṭkī raheñ. Chunāñche unhoñ ne Pilātus se guzārish kī ki wuh un kī ṭāñgeñ tuṛwākar unheñ salībōñ se utārne de. Tab faujiyoñ ne ākar Īsā ke sāth maslūb kie jāne wāle ādmiyoñ kī ṭāñgeñ toṛ diñ, pahle ek kī phir dūsre kī. Jab wuh Īsā ke pās āe to unhoñ ne dekhā ki wuh faut ho chukā hai, islie unhoñ ne us kī ṭāñgeñ na toṛiñ. Is ke bajāe ek ne neze se Īsā kā pahlū chhed diyā. Zaḵhm se fauran ḵhūn aur pānī bah niklā. (Jis ne yih dekhā hai us ne gawāhī dī hai aur us kī gawāhī sachchī hai. Wuh jāntā hai ki wuh haqīqat bayān kar rahā hai aur us kī gawāhī kā maqsad yih hai ki āp bhī imān lāeñ.) Yih yoñ huā tāki Kalām-e-muqaddas kī yih peshgoī pūrī ho jāe, “Us kī ek haḍḍī bhī toṛī nahīn jāegī.” Kalām-e-muqaddas meñ yih bhī likhā hai, “Wuh us par nazar ḍāleñge jise unhoñ ne chhedā hai.”

Bād meñ Arimatiyāh ke rahne wāle Yūsuf ne Pilātus se Īsā kī lāsh utārne kī ijāzat māñgī. (Yūsuf Īsā kā ḵhufiyā shāgird thā, kyoñki wuh Yahūdīyoñ se ḍartā thā.) Is kī ijāzat milne par wuh āyā aur lāsh ko utār liyā. Nīkudemus bhī sāth thā, wuh ādmī jo guzre dinoñ meñ rāt ke waqt Īsā se milne āyā thā. Nīkudemus apne sāth mur aur ūd kī taqrīban 34 kilogram ḵhushbū lekar āyā thā. Yahūdī janāze kī rasūmāt ke mutābiq unhoñ ne lāsh par ḵhushbū lagākar use paṭṭīyoñ se lapeṭ diyā. Salībōñ

ke qarīb ek bāgh thā aur bāgh meñ ek naī qabr thī jo ab tak istemāl nahīn kī gai thī. Us ke qarīb hone ke sabab se unhoñ ne Īsā ko us meñ rakh diyā, kyonki Fasah kī taiyārī kā din thā aur agle din Īd kā āghāz thā.

**Main ne ẖhudāwand ko
Dekhā Hai
Al-Masīh Jī Uṭhtā Hai**



Īsā Masīh ne marne se pahle farmāyā thā ki mujhe qatl kiyā jāegā, lekin tīsre din main jī uṭhūngā. Us ke shāgird aisi bāteñ mānane ke lie taiyār nahīn the. Islie jab use sachmuch qatl kiyā gayā to wuh saḡht ghabrākar chhup gae. Un ke sāre sapne dhūl meñ milāe gae the. Ab kyā karen? Pahlī bāt,

Auratoñ kī Mardānagī

Jume ke din Īsā Masīh ko dafnāyā gayā. Hafte kā din ḡhāmoshī se guzar gayā, kyonki us din kām karnā manā thā. Phir itwār kā din shurū huā. Abhī andherā hī thā ki kuchh shāgird apne gharoñ se khisakkar qabr ke lie rawānā hue.

- *Kyā un meñ Patras aur dūsre buzurg shāmil the?*
Nahīn. Sirf auratoñ meñ wahāñ jāne kī himmat thī. Kaisī bāt!
- *Wuh kyon qabr ke pās jānā chāhtī thīn?*
Wuh lāsh par ḡhushbūdār masāle lagānā chāhtī thīn.
- *Lekin qabr par lambā-chaurā patthar paṛā thā. Wuh kis tarah use haṭā saktī thīn?*

Dekho in auratoñ kī ummīd aur jurrat. Wuh to jāntī thīn ki ham patthar ko haṭā nahīn saktīn. Phir bhī wuh ek āḡhirī bār apne ustād aur āqā kī izzat-o-eharām karnā chāhtī thīn. Is ke lie wuh faujiyoñ aur muḡhālifoñ kā sāmānā karne ke lie bhī taiyār thīn. Patthar ko kis tarah haṭāeṅgī? Ham ko mālūm nahīn. Lekin ham majbūr haiñ. Hamārī gahrī muhabbat hameñ wuh karne ke lie ubhār rahī hai. Dūsri bāt,

ḡhālī Qabr

In auratoñ meñ se ek Mariyam Magdalīnī thī. Qabr shahr kī chārdīwārī se bāhar thī. Chaltī chaltī wuh andhere meñ qabr tak pahuñch gaī. Lekin yih kyā thā?! Wuh ghabrā gaī. Qabr

ke muñh par kâ patthar ek taraf haṭāyā gayā thā. Yih kyā gaṛbaṛ thī? Mariyam sar par pāñw rakhkar sīdhe Patras aur Yūhannā ke pās dauṛ āī. Wuh chillāī, “Wuh Ḳhudāwand ko qabr se le gae haiñ, aur hameñ mālūm nahīn ki unhoñ ne use kahāñ rakh diyā hai.”

- *Kyā Mariyam ne dekhā thā ki kisī ne lāsh ko chhīn liyā thā?*
 Nahīn. Jab insān saḡht pareshān ho jātā hai to kaī bār wuh ḡhalat natījā nikāltā hai. Mariyam ne andherī qabr meñ jhānkā tak nahīn thā. Bas ek wahm us ke sar par sawār ho gayā thā. Shāyad use pahle se ḍar thā ki koī lāsh ko le jāegā. Tīsri bāt,

Yūhannā kā Īmān

Yih sunte hī Patras aur Yūhannā ekdam ghar se nikle. Donoñ dauṛne lage, lekin Yūhannā zyādā tez thā. Wuh pahle qabr par pahuñch gayā. Us ne jhukkar andar jhānkā to kafan kī paṭṭiyāñ wahāñ paṛī nazar āīñ. Lekin wuh andar na gayā. Phir Patras pahuñchkar qabr meñ dāḡhil huā. Us ne bhī kafan kī paṭṭiyāñ wahāñ paṛī dekhīñ. Jis kapṛe meñ lāsh kā sar liptā huā thā wuh tah karke paṭṭiyon se alag paṛā thā. Phir Yūhannā bhī andar gayā. Jab us ne yih dekhā to wuh īmān lāyā.

- *Dekhne par wuh īmān lāyā. Is kā kyā matlab hai?*
 Rasm ke mutābiq pūrī lāsh ko kapṛe ke ek ṭukṛe meñ lapetā gayā thā. Phir hāthoñ ko ek paṭṭī se jism ke sāth jakṛā gayā thā jabki dūsri paṭṭī se pāñwoñ ko bāndhā gayā thā. Baṛe kapṛe ke alāwā sar ko ek alag kapṛe se lapetā gayā thā. Ab kafan jyon kā tyon wahāñ paṛā thā. Matlab hai jab Īsā Masīh jī uṭhā to us kā jism āsmānī jism thā aur use kafan ko utārne kī zarūrat nahīn thī. Jism kafan meñ se nikal gayā aur kapṛā jyon kā tyon paṛā rahā. Lekin sar kā kapṛā alag karke rakhā gayā thā.
 Yahī wajah hai ki Yūhannā īmān lāyā. Wuh samajh gayā ki agar luṭere lāsh ko lūṭte to wuh kafan pīchhe na

chhoṛte. Masīh sachmuch jī uṭhā hai. Lekin Patras ab tak shak meñ uljhā rahā.

Kalām-e-muqaddas ne is kī peshgoī kī thī.¹ Sāth sāth Īsā Masīh ne shāgirdoñ ko yih bāt bār bār batāī thī.² Phir bhī shāgird ab tak yih peshgoī nahīñ samajhte the ki use murdoñ meñ se jī uṭhnā hai. Ab kyā karen? Patras aur Yūhannā hairānī ke ālam meñ ghar wāpas chale gae. Chauthī bāt,

Mariyam se Narmī

Lekin Mariyam un ke sāth wāpas na chalī. Wuh ro rokar qabr ke sāmne khaṛī rahī. Kuchh der bād us ne rote hue jhukkar qabr meñ jhānkā to kyā dekhti hai: Do farishte safed libās pahne hue wahāñ baiṭhe haiñ jahāñ pahle lāsh paṛī thī—ek us ke sirhāne aur dūsra us ke paintāne. Unhoñ ne Mariyam se pūchhā, “Ai kḥātūn, tū kyoñ ro rahī hai?”

Sawāl meñ narm-sī jhiṛkī thī. Matlab hai tujhe rone kī kyā zarūrat hai?

Us ne kahā, “Wuh mere Kḥudāwand ko le gae haiñ, aur mālūm nahīñ ki unhoñ ne use kahāñ rakh diyā hai.”

Phir us ne pīchhe muṛkar Īsā Masīh ko wahāñ khaṛe dekhā. Lekin us ne use na pahchānā.

► *Us ne use kyoñ nahīñ pahchānā?*

Shāyad wuh apne āñsuoñ ke bāis sahī nahīñ dekh saktī thī. Waise bhī pichhlī bār us ne Īsā Masīh ko murdā hālat meñ dekhā thā. Wuh kis tarah yahāñ khaṛā ho saktā thā? Īsā Masīh ne pūchhā, “Ai kḥātūn, tū kyoñ ro rahī hai, kis ko ḍhūnd rahī hai?”

Hamāre āqā kā kitnā narm sawāl. Us ne use saḡht jhiṛkī na dī. Us ne us kī āñkhoñ ko baṛī narmī aur sabr se khol diyā. Wuh hamārā achchhā charwāhā hai. Wuh hamēñ pyār kartā hai.

¹ Masalan Zabūr 16:8 o-mābād; 22:21 o-mābād; 49:15; 73:24; Yasāyāh 26:19; 53:10 o-mābād; Hosea 6:2; 13:14.

² Mattī 16:21-23; 17:22-23; 20:17-19

Wuh hamen ĩmān lāne par majbūr nahīn kartā. Wuh hamen baṛī narmī se sahī ilm aur āzādī tak le jātā hai.

Yih sochkar ki wuh mālī hai Mariyam ne kahā, “Janāb, agar āp use le gae haiñ to mujhe batā deñ ki use kahān rakh diyā hai tāki use le jāūñ.”

Īsā Masīh ne us se kahā, “Mariyam!”

Us kī āwāz se kitnā pyār ṭapak rahā thā! Achchhā charwāhā baṛe rahm aur muhabbat se apnī badhawās aur uljhan meñ paṛī huī bheṛ ko sahī paṭarī par lātā hai—āpko bhī aur mujh ko bhī. Wuh zālīm nahīn hai jise ḍanḍā pakṛe hamen kuchal ḍālne kā mazā āe.

Yih sunkar Mariyam us kī taraf muṛī aur bol uṭhī, “Rabbūnī!”
Yānī ustād! Pāñchwīn bāt,

Āsmānī Ghar Taiyār Hai

Bheṛ apne charwāhe kī āwāz suntī hai. Mariyam kā dil ekdam muhabbat aur ḡhushī se bhar gayā. Pichhle dinon meñ duniyā be-maqsad aur haulnāk ho gāī thī. Sar par kāle kāle bādal aur ghup-andherā chhā gayā thā. Lekin ab ekdam sūraj tulū huā. Parinde chahchahāne lage. Dil ḡhushī se nāchne lagā.

Īsā Masīh ne kahā, “Mere sāth chimṭī na rah, kyonki abhī main ūpar, Bāp ke pās nahīn gayā. Lekin bhāīyon ke pās jā aur unheñ batā, ‘Main apne Bāp aur tumhāre Bāp ke pās wāpas jā rahā hūñ, apne Ḳhudā aur tumhāre Ḳhudā ke pās’.”

► *Mariyam ko kyon kahā gayā ki mere sāth chimṭī na rah?*

Īsā Masīh apne Bāp ke pās wāpas jā rahā thā. Lekin pahle kaī-ek zarūrī kām bāqī rah gae the. Ab chimṭī rahne kā waqt nahīn thā.

► *Us ne farmāyā ki bhāīyon ke pās jā. Yih bhāī kaun the?*
Bhāī se murād us ke shāgird the.

► *Pahle wuh unheñ bhāī nahīn pukārtā thā. Ab kyon?*

Apnī maut aur jī uṭhne se us ne gunāh aur maut par fath pā lī thī. Is fath kī buniyād par insān ke lie ek āsmānī ghar

taiyār ho gayā thā—aisā ghar jis meñ har ek bhāi-bahn barābar hai.

- *Wuh kyon farmātā hai ki main apne Bāp aur tumhāre Bāp ke pās wāpas jā rahā hūñ, apne Ḳhudā aur tumhāre Ḳhudā ke pās?*

Jo āsmānī ghar taiyār huā thā wuh Ḳhudā hī kā ghar thā. Matlab hai gunāh aur maut par fath pāne se Īsā Masīh ne imāndār ko apnā ghar wālā banā diyā thā. Jo bhī imān lāe wuh is gharāne kā bhāi yā bahn ban jātā hai. Masīh pahle se farmā chukā thā ki ab se tum mere dost ho (Yūhannā 15:14-15). Us kī maut aur jī uṭhne se yih bāt pūrī hūī.

Masīh kī bāt sunkar Mariyam Magdalīnī shāgirdon ke pās gaī. Wuh phūlī na samāī. Wuh bolī, “Mainne Ḳhudāwand ko dekhā hai aur us ne mujh se yih bāteñ kahīñ.”

Ḳhidmat ke shurū meñ Masīh ne shāgirdon ko farmāyā thā ki āo aur ḳhud dekh lo. Wuh chāhtā thā ki log soch-samajhkar us par imān lāeñ. Wuh chāhtā thā ki imān se ek gahrā gharelū tālluq qāym ho jāe. Ab jī uṭhne ke bād bhī yih silsilā jāri rahā. Pahle Yūhannā ḳhālī kafan ko dekhkar imān lāyā. Phir Mariyam Īsā Masīh ko dekhkar imān lāī. Yih imān khokhlā nahiñ thā. Yih imān kisī farzī kahānī par mabnī nahiñ thā. Yih dekhne, sunane, chhūne se qāym huā thā. Ab shāgirdon kī bārī āī. Chhaṭī bāt,

Tumhāri Salāmatī Ho

Us itwār kī shām ko shāgird jamā the. Unhoñ ne darwāzon par tāle lagā die the kyonki wuh saḳht ḍare hue the. Achānak Īsā Masīh un ke darmiyān ā khaṛā huā.

- *Wuh kis tarah ā khaṛā huā? Kyā darwāze par tālā nahiñ lagā thā?*

Ab us kā āsmānī jism thā. Jī uṭhte waqt use kafan ko utārne kī zarūrat nahiñ thī. Ab wuh jagah aur waqt kā pāband nahiñ rahā thā.

Us ne farmāyā, “Tumhāri salāmatī ho.”

► *Us ne yih kyon kahā?*

Us kī maut aur jī uṭhne kā maqsad to yahī thā ki insān ko salāmatī hāsil ho. Ki us kā Ḳhudā se tālluq bahāl ho jāe.

Phir us ne unheñ apne hāthoñ aur pahlū ko dikhāyā.

► *Us ne apne hāthoñ aur pahlū kyon un ko dikhāyā?*

Ab tak hāthoñ meñ kiloñ kā nishān thā, ab tak pahlū meñ us zaḡhm kā nishān thā jis se ḡhūn aur pānī bah niklā thā.

Īsā Masīh ko dekhkar wuh nihāyat ḡhush hue.

► *Use dekhkar wuh kyon ḡhush hue?*

Wuh bhūt-pret nahīn thā. Be-shak us kā jism āsmānī thā, magar jism hī thā. Us kī āwāz, us kā andāz—sab kuchh waisā hī thā. Jis se judā hone par wuh baṛī māyūsī aur ghabrāhaṭ meñ ulajh gae the wuh dubārā ā gayā thā. Achchhā charwāhā wāpas ā gayā thā. Sātwin bāt,

Āsmānī Ghar kī Khulī Dāwat

Īsā Masīh ne dubārā kahā, “Tumhārī salāmatī ho! Jis tarah Bāp ne mujhe bhejā usī tarah main tum ko bhej rahā hūn.”

► *Ḳhudā Bāp ne apne Farzand ko kahān bhejā thā?*

Duniyā meñ.

► *Us ne use kyon bhejā thā?*

Tāki wuh logoñ ko ek dāwat de. Yih ki main tumhāre lie ek āsmānī ghar taiyār kar rahā hūn. Taubā karke mujh par imān lāo tāki tum mere ghar wāle ban jāo.

► *Yih āsmānī ghar kis tarah qāym huā?*

Īsā Masīh kī gunāh aur maut par fath se. Jo bhī taubā karke us par imān lāe use apne gunāhoñ kī māfī miltī hai, aur wuh us kā ghar wālā ban jātā hai.

Ab Īsā Masīh chāhtā hai ki shāgird dāwat dene kā yih silsilā jāri rakheñ.

► *Wuh kaun-sī dāwat deñ?*

Yih ki Īsā Masīh ne āsmānī ghar taiyār kar rakhā hai. Islie taubā karke Īsā Masīh par imān lāo tāki tum bhī us ke ghar wāle ban jāo.

Phir un par phūnkkar Masīh ne farmāyā, “Rūhul-quds ko pā lo. Agar tum kisī ke gunāhoñ ko māf karo to wuh māf kie jāeñge. Aur agar tum unheñ māf na karo to wuh māf nahīñ kie jāeñge.”

► *Phūnkkne se Īsā Masīh ne kyā zāhir kiyā?*

Us ne us wāqiye kī taraf ishārā kiyā jo us ke āsmān par uṭhā liyā jāne par ho jāegā. Us waqt Rūhul-quds un par nāzil hogā. Aur Rūhul-quds meñ Masīh ḳhud hāzir hogā. Islie us ne phūnkkar yih bāt farmāi. Yahī Rūh pāne se shāgirdoñ ko wuh tāqat milegī ki wuh Masīh kī dāwat duniyā ke kone kone sunā sakeñge.

► *Lekin is kā kyā matlab hai ki ab se shāgirdoñ ko māf karne kā iḳhtiyār hāsil hai?*

Ab se shāgirdoñ kī awwal zimmedārī yih hogī ki wuh sab ko Masīh kā ghar wālā banane kī khulī dāwat deñ. Isī ke lie un ko bhejā jā rahā hai.

► *Is dāwat kī sab se baṛī bāt kyā hai?*

Yih ki tumhāre gunāhoñ ko māf kie jāeñge agar tum taubā karke Masīh par imān lāo.

► *Agar sunane wāle yih dāwat qabūl karen to kyā hogā?*

Un ke gunāhoñ ko māf kiyā jāegā.

► *Agar sunane wāle yih dāwat qabūl na karen to kyā hogā?*

Un ke gunāhoñ ko māf nahīñ kiyā jāegā. Īsā Masīh yahī bāt farmā rahā hai: Jo yih dāwat qabūl kare us ke gunāhoñ ko māf kiyā jāegā aur wuh merā ghar wālā ban jāegā. Warnā nahīñ. Āṭhwiñ bāt,

Tomā kā Shak

Īsā Masīh ke āne par Tomā maujūd na thā. Dūsre shāgirdoñ ne use batāyā, “Ham ne Ḳhudāwand ko dekhā hai!” Lekin Tomā ne kahā, “Mujhe yaqīn nahīñ ātā. Pahle mujhe us ke hāthoñ meñ kiloñ ke nishān nazar āeñ aur maiñ un meñ apnī ungli dālūñ, pahle maiñ apne hāth ko us ke pahlū ke zaḳhm meñ dālūñ. Phir hī mujhe yaqīn āegā.” Nawīñ bāt,

Masīh kā Tajribā Karo

► *Kyā Tomā kī shak wālī bāt ḡhalat thī?*

Bilkul nahīn. Us ne apnī ānkhon se dekhā thā ki Īsā Masīh marker dafnāyā gayā thā. Wuh apnī ānkhon se Masīh ko dekhnā, apne hāthon se use chhūnā chāhtā thā. Yih buri bāt nahīn hai. Āj bhī zarūrī hai ki Masīh hamāre dilon meñ base. Ki ham rozānā us kā tajribā karen.

Kyā āp ko Īsā Masīh kā tajribā huā hai? Daswīn bāt,

Masīh kī Haqīqat Jān Lo

Tomā ek bāt par zor detā hai jo īmān kī buniyād hai: Īsā Masīh aur jo kuchh us ne hamāre wāste kiyā hai wuh ek ṭhos haqīqat hai. Tomā kahtā hai, main haqīqat ko jānanā chāhtā hūn. Kisī farzī bāt par bharosā karne kā kyā fāyda hai?

Kyā āp haqīqat ko jānanā chāhte haiñ? Gyārhwīn bāt,

Ai Mere Ḳhudāwand! Ai Mere Ḳhudā!

Ek haftā guzar gayā. Shāgird dubārā makān meñ jamā the. Is martabā Tomā bhī sāth thā. Darwāzon par tāle lage the. Phir bhī Īsā Masīh un ke darmiyān ākar kharā huā. Us ne kahā, “Tumhārī salāmatī ho!” Phir wuh Tomā se muḡhātib huā, “Apnī ungli ko mere hāthon aur apne hāth ko mere pahlū ke zaḡhm meñ ḡāl aur be-etaḡād na ho balki īmān rakh.”

Īsā Masīh Tomā kā shak jāntā thā. Phir bhī us ne use jhīṛkī na dī. Us ne use khulī dāwat dī ki ā jā, check kar ki main sachmuch Īsā Masīh hūn. Īsā Masīh andhe shāgird nahīn chāhtā. Wuh aise shāgird chāhtā hai jo soch-samajhkar shāgird ban jāen.

Use dekhkar Tomā ne kahā, “Ai mere Ḳhudāwand! Ai mere Ḳhudā!”

Tomā kā shak ekdam kāfūr ho gayā, aur us ne pahchān liyā ki Īsā Masīh kaun hai: Wuh merā Ḳhudāwand aur merā Ḳhudā hai.

► *Kyā Īsā Masīh ne kahā ki aisī bāt mat bol?*

Nahīn. Na us ne yih kahā na dūsre shāgirdon ne.

► *Kyon?*

Islie ki Īsā Masīh Ḳhudā kā Farzand hai. Wuh taslīs kā dūsra uqnūm hai. Lekin dhyān do: Tomā kahtā hai ki **mere** Ḳhudāwand, **mere** Ḳhudā.

► *Wuh kyon merā Ḳhudāwand, merā Ḳhudā hai?*

Wuh **merā** charwāhā hai, jis ne apnī jān **merī** ḳhātir dī. Jo pūre taur se Ḳhudā bhī hai aur pūre taur se insān bhī us ne apnī qurbānī se mujhe gunāh aur maut ke changul se chhuṛāyā. Agar wuh sirf Ḳhudā hotā to wuh merī jagah na mar saktā, aur agar wuh sirf insān hotā, to mujhe us kī maut se koī matlab na hotā. Tomā ekdam yih samajh gayā, aur us kā dil ḳhushī aur ehtarām se bhar gayā. Is bheṛ ne apne charwāhe kī āwāz sun lī thī.

Īsā Masīh bolā, “Kyā tū islie īmān lāyā hai ki tūne mujhe dekhā hai? Mubārak haiñ wuh jo mujhe dekhe baḡhair mujh par īmān lāte haiñ.” Āḳhirī bāt,

Īmān Kyā Hai?

Īsā Masīh kī yih bāt hamēñ dubārā yih sochne par majbūr kartī hai ki īmān kyā hai?

► *Kyā īmān ek badge hai jis se main dikhātā hūñ ki main kis school yā party kā member hūñ? Yā kyā īmān rakhne kā matlab yih hai ki main ḳhās rasūmāt adā karūñ?*

Nahīn. Īmān achchhe charwāhe par bharosā hai. Us charwāhe par jis ne apnī jān qurbān karke mujhe apnā ghar wālā banā diyā hai.

Is par zor dene ke lie Yūhannā farmātā hai ki Īsā Masīh ne mazīd bahut-se aise ilāhī nishān dikhāe jo mainne bayān nahīn kie. Lekin jitne bayān kie haiñ un kā maqsad yih hai ki āp īmān lāen ki Īsā hī Masīh yānī Allāh kā Farzand hai aur āp ko is īmān ke wasīle se us ke nām se zindagī hāsil ho.

► *Jo mojīze aur ilāhī nishān bayān kie gae haiñ un kā kyā maqsad hai?*

Yih ki sunane wālā īmān lāe ki Īsā hī Masīh hai, ki wuh Allāh kā Farzand hai. Kyoṅki yahī jānane se insān ko abadī zindagī hāsil hotī hai. Yahī pūrī Injīl kā maqsad hai ki har insān achchhe charwāhe kī bheṛ aur ghar wālā ban jāe.

- *Kyā āp achchhe charwāhe kī bheṛ haiñ? Kyā āp us ke ghar wāle ban gae haiñ?*

Injīl, Yūhannā 20

Ḳhālī Qabr

Haftē kā dīn guzar gayā to itwār ko Mariyam Magdalīnī subh-sawere qabr ke pās āī. Abhī andherā thā. Wahān pahuñchkar us ne dekhā ki qabr ke muñh par kā patthar ek taraf haṭāyā gayā hai. Mariyam dauṛkar Shamāūn Patras aur Īsā ko pyāre shāgird ke pās āī. Us ne ittalā dī, “Wuh Ḳhudāwand ko qabr se le gae haiñ, aur hamēn mālūm nahīn ki unhoñ ne use kahān rakh diyā hai.”

Tab Patras dūsre shāgird samet qabr kī taraf chal paṛā. Donoñ dauṛ rahe the, lekin dūsra shāgird zyādā tezraftār thā. Wuh pahle qabr par pahuñch gayā. Us ne jhukkar andar jhānkā to kafan kī paṭṭiyān wahān paṛī nazar āīn. Lekin wuh andar na gayā. Phir Shamāūn Patras us ke pīchhe pahuñchkar qabr meñ dāḳhil huā. Us ne bhī dekhā ki kafan kī paṭṭiyān wahān paṛī haiñ aur sāth wuh kapṛā bhī jis meñ Īsā kā sar liptā huā thā. Yih kapṛā tah kiyā gayā thā aur paṭṭiyōñ se alag paṛā thā. Phir dūsra shāgird jo pahle pahuñch gayā thā, wuh bhī dāḳhil huā. Jab us ne yih dekhā to wuh īmān lāyā. (Lekin ab bhī wuh Kalām-e-muqaddas kī yih peshgoī nahīn samajhte the ki use murdoñ meñ se jī uṭhnā hai.) Phir donoñ shāgird ghar wāpas chale gae.

Mariyam Magdalīnī aur Masīh

Lekin Mariyam ro rokar qabr ke sāmne kharī rahī. Aur rote hue us ne jhukkar qabr meñ jhānkā to kyā dekhti hai ki do farishte safed libās pahne hue wahāñ baiṭhe haiñ jahāñ pahle Īsā kī lāsh paṛī thī, ek us ke sirhāne aur dūsrā wahāñ jahāñ pahle us ke pāñw the. Unhoñ ne Mariyam se pūchhā, “Ai kḥātūn, tū kyoñ ro rahī hai?”

Us ne kahā, “Wuh mere Kḥudāwand ko le gae haiñ, aur mālūm nahīñ ki unhoñ ne use kahāñ rakh diyā hai.”

Phir us ne pīchhe muṛkar Īsā ko wahāñ kharē dekhā, lekin us ne use na pahchānā. Īsā ne pūchhā, “Ai kḥātūn, tū kyoñ ro rahī hai, kis ko dḥūṇḍ rahī hai?”

Yih sochkar ki wuh mālī hai us ne kahā, “Janāb, agar āp use le gae haiñ to mujhe batā deñ ki use kahāñ rakh diyā hai tāki use le jāūñ.” Īsā ne us se kahā, “Mariyam!”

Wuh us kī taraf muṛī aur bol uṭhī, “Rabbūnī!” (Iskā matlab Arāmī zabān meñ ustād hai.)

Īsā ne kahā, “Mere sāth chimṭī na rah, kyoñki abhī main ūpar, Bāp ke pās nahīñ gayā. Lekin bhāiyoñ ke pās jā aur unheñ batā, ‘Main apne Bāp aur tumhāre Bāp ke pās wāpas jā rahā hūñ, apne Kḥudā aur tumhāre Kḥudā ke pās.’”

Chunāñche Mariyam Magdalīnī shāgirdoñ ke pās gai aur unheñ ittalā dī, “Mainne Kḥudāwand ko dekhā hai aur us ne mujh se yih bāteñ kahīñ.”

Shāgird aur Masīh

Us itwār kī shām ko shāgird jamā the. Unhoñ ne darwāzoñ par tāle lagā die the kyoñki wuh Yahūdīyoñ se darte the. Achānak Īsā un ke darmiyān ā kharā huā aur kahā, “Tumhārī salāmatī ho,” aur unheñ apne hāthoñ aur pahlū ko dikhāyā. Kḥudāwand ko dekhkar wuh nihāyat kḥush hue. Īsā ne dubārā kahā, “Tumhārī

salāmatī ho! Jis tarah Bāp ne mujhe bhejā usī tarah main tum ko bhej rahā hūn.” Phir un par phūnkkar us ne farmāyā, “Rūhul-quds ko pā lo. Agar tum kisī ke gunāhoñ ko māf karo to wuh māf kie jāēnge. Aur agar tum unheñ māf na karo to wuh māf nahīñ kie jāēnge.”

Shakkī Tomā aur Masīh

Bārah shāgirdoñ meñ se Tomā jis kā laqab jurwāñ thā Īsā ke āne par maujūd na thā. Chunāñche dūsre shāgirdoñ ne use batāyā, “Ham ne Ḳhudāwand ko dekhā hai!” Lekin Tomā ne kahā, “Mujhe yaqīn nahīñ ātā. Pahle mujhe us ke hāthoñ meñ kiloñ ke nishān nazar āēñ aur main un meñ apnī unglī ḍālūñ, pahle main apne hāth ko us ke pahlū ke zaḡhm meñ ḍālūñ. Phir hī mujhe yaqīn āegā.”

Ek haftā guzar gayā. Shāgird dubārā makān meñ jamā the. Is martabā Tomā bhī sāth thā. Agarche darwāzoñ par tāle lage the phir bhī Īsā un ke darmiyān ākar khaṛā huā. Us ne kahā, “Tumhārī salāmatī ho!” Phir wuh Tomā se muḡhātib huā, “Apnī unglī ko mere hāthoñ aur apne hāth ko mere pahlū ke zaḡhm meñ ḍāl aur be-etaqād na ho balki imān rakh.”

Tomā ne jawāb meñ us se kahā, “Ai mere Ḳhudāwand! Ai mere Ḳhudā!”

Phir Īsā ne use batāyā, “Kyā tū islie imān lāyā hai ki tūne mujhe dekhā hai? Mubāarak haiñ wuh jo mujhe dekhe baḡhair mujh par imān lāte haiñ.”

Likhne kā Maqsad: Imān

Īsā ne apne shāgirdoñ kī maujūdagī meñ mazīd bahut-se aise ilāhī nishān dikhāe jo is kitāb meñ darj nahīñ haiñ. Lekin jitne darj haiñ un kā maqsad yih hai ki āp imān lāēñ ki Īsā hī Masīh yānī Allāh kā Farzand hai aur āp ko is imān ke wasīle se us ke nām se zindagī hāsil ho.

Kyā Tū Mujhe Pyār Kartā Hai?

Barkat Pāne kā Rāz



Jume ke din Īsā Masīh ko sazā-e-maut dī gai. Shāgird ɗar ke māre chhup gae. Un ke ɓhāb dhūl meñ milāe gae the. Wuh sann rah gae. Āge koī rāstā nahīn dikh rahā thā.

Hafte kā din guzar gayā. Phir itwār kā din shurū huā. Us din kuchh logoñ ne achānak Īsā Masīh ko dekhā. Aur wuh bhūt nahīn thā. Us kā pakkā jism thā. Be-shak wuh jagah aur waqt kā pāband nahīn thā, lekin wuh khānā khā saktā thā. Us kī āwāz aur andāz—sab kuchh waisā hī thā. Shāgird use chhū sakte the, bilkul ām ādmī kī tarah. Tab us ne shāgirdoñ ko farmāyā ki Galīl jākar mujh se milo. Ab Yūhannā hameñ Galīl kā ek wāqiyā sunātā hai. Is se ham kaī sabaq sīkhte haiñ. Pahlā sabaq,

Achche Charwāhe kī Pukār Suno

Chhih shāgird Patras ke sāth jamā the. Tab Patras ne kahā, “Main machhlī pakarne jā rahā hūñ.” Machhlī pakarnā to us kā peshā hī thā. Yih kām karte hue wuh parwān chaṛhā thā. Dūsroñ ne kahā, “Ham bhī sāth jāenge.” Wuh nikalkar kashtī par sawār hue. Lekin us pūrī rāt ek bhī machhlī hāth na āī. Subh-sawere Īsā Masīh jhīl ke kināre par ā khaṛā huā. Lekin dhundhlepan meñ shāgirdoñ ne use na pahchānā. Us ne un se pūchhā, “Bachcho, kyā tumheñ khāne ke lie kuchh mil gayā?”

Āj Īsā Masīh kināre par khaṛe hameñ bhī pukār rahā hai. Shāyad ham use ab tak dhundhlepan meñ sāf pahchān nahīn sakte. Ham apne māmūl ke kām meñ juṭe haiñ magar ɓhās barkat hāsil nahīn ho rahī. Tab achchhā hai ki ham achche charwāhe kī āwāz sun leñ. Wuh to apnī bheṛoñ kī fikr kartā hai.

► *Kyā ham us kī āwāz sunte haiñ?*

Īsā Masīh ke sawāl par shāgirdon ne jawāb diyā ki ab tak kuchh nahīn milā.

- *Kyā shāgirdon ko Īsā Masīh ke binā machhliyān mil gayī thīn?*
Ek bhī nahīn. Kitnī bār ham baṛī mehnat-mashaqqat karte haiñ aur koī phal, koī achchhā natījā nazar nahīn ātā. Aise mauqon par insān sochtā hai ki kyā Ḳhudā mujhe sazā de rahā hai? Mere dost, pahle achchhe charwāhe kī pukār suno. Dūsrā sabaq,

Achchhe Charwāhe kī Barkat Pāo

Īsā Masīh ne kahā, “Apnā jāl kashtī ke dāen hāth ḍālo, phir tum ko kuchh milegā.” Unhon ne aisā kiyā to machhliyon kī itnī baṛī tādād thī ki wuh jāl kashtī tak na lā sake.

- *Jab Īsā Masīh ne sāth diyā, to kyā un ko machhlī mil gayī?*

Hāñ, itnī machhliyān kī jāl phaṭne kā ḵhatrā thā.

Tab Yūhannā ne Patras se kahā, “Yih to Ḳhudāwand hai.” Yūhannā, Īsā Masīh ke bahut qarīb rahā thā islie use jald hī patā chal gayā ki yih kaun hai.

Us kī bāt sunte hī Patras apnī chādar oṛhkar pānī meñ kūd paṛā (Us ne chādar ko kām karne ke lie utār liyā thā.) Yūhannā samajhne meñ tez thā jabki Patras qadam uṭhāne meñ tez thā.

Dūsre shāgird kashtī par sawār us ke pīchhe āe. Wuh kināre se zyādā dūr nahīn the, taqrīban sau meter ke fāsle par. Islie wuh machhliyon se bhare jāl ko pānī meñ khīnch khīnchkar ḵhushkī tak lāe. Wuh kashtī se utre to dekhā ki lakaṛī ke koylon kī āg par machhliyān bhunī jā rahī haiñ aur sāth roṭī bhī hai. Īsā ne un se kahā, “Un machhliyon meñ se kuchh le āo jo tum ne abhī pakṛī haiñ.”

Patras kashtī par gayā aur jāl ko ḵhushkī par ghasīṭ lāyā. Yih jāl 153 baṛī machhliyon se bharā huā thā, to bhī wuh na phaṭā.

- *Yūhannā hamen yih sārā mājrā itnī tafsīl se kyon batātā hai?*

Īsā Masīh unheñ ek ahm sabaq sikhānā chāhtā thā. Yih ki mere binā tumhārā kām phaldār nahīn ho saktā chāhe tum kitnī mehnat-mashaqqat kyon na karo. Main hī abadī zindagī kā chashmā hūn. Pal dar pal merī āwāz suno. Tab hī barkat kī bārish tum par barsegī. Tab hī barkat kā jāl phaṭegā nahīn. Tīsrā sabaq,

Achchhe Charwāhe kī Taqwīyat Pāo

Īsā Masīh ne un se kahā, “Āo, nāshtā kar lo.” Kisi bhī shāgird ne sawāl karne kī jurrat na kī ki “Āp kaun haiñ?” Kyonki wuh to jānte the ki yih Ḳhudāwand hī hai. Phir Īsā Masīh ne roṭī aur machhlī khilāi.

Yih kitnī anokhī ziyāfat thī! Unhoñ ne kitnī bār apne āqā ke sāth khānā khāyā thā. Be-shak unheñ wuh khānā bhī yād ā rahā thā jab Īsā Masīh ne pāñch roṭiyon aur do machhliyon se pāñch hazār logoñ ko khānā khilāyā thā. Us waqt log josh meñ ākar use duniyā kā bādshāh banānā chāhte the lekin wuh chupke se wahāñ se khisak gayā thā. Ab bāt bilkul farq thī. Ab shāgirdon ke sāmne āsmān kā bādshāh khule taur se khaṛā thā—wuh jis ne farmāyā thā,

Main hī zindagī kī wuh roṭī hūn jo āsmān se utar āī hai. Jo is roṭī se khāe wuh abad tak zindā rahegā. (Yūhannā 6:51)

Apnī qurbānī se us ne insān ko yih zindagī baḳhsh dī thī—wuh abadī zindagī jo imāndār ke dil meñ hotī hai aur jo use Dariyā-e-maut ke pār achchhe charwāhe kī god meñ le jātī hai. Lekin Īsā Masīh ek aur bāt bhī dikhānā chāhtā thā. Yih samajhne ke lie āo, ham ek sawāl pūchheñ:

- *Kyā shāgirdon ke nāshte ke lie un kī machhliyan zarūrī thin?* Bilkul nahīn. Jab shāgird jhīl ke kināre par pahuñche to koyloñ par machhlī bhunī jā rahī thī aur sāth roṭī thī. Phir bhī us ne farmāyā ki pakṛī machhliyon meñ se kuchh khāne ke lie lāo. Wuh is se ek bāt dikhānā chāhtā thā.

► *Kyā bāt dikhānā chāhtā thā?*

Yih ki mujhe tumhārī k̄hidmat pasand hai. Main chāhtā hūn ki tum milkar merī k̄hātir mehnat-mashaqqat karo. Be-shak ab se tum machhlī nahīn pakroge. Ab se tum māhīgīr ke bajāe ādamgīr yānī logoṅ ko pakarne wāle hoge. Kis tarah? Unheṅ mere ghar wāle banane kī dāwat dene se. Ek aur sawāl ubhar ātā hai:

► *Īsā Masīh shāgirdoṅ ke sāth khāne kī rifāqat kyon rakhnā chāhtā thā?*

Wuh chāhtā thā ki shāgird us ke huzūr milkar khānā khāne kī ahmiyat samjheṅ.

► *Milkar us ke huzūr khānā khāne kī kyā ahmiyat hai?*

Us ke huzūr khānā khānā rifāqat kā sab se gahrā nishān hai.

► *Yih kyon sab se gahrā nishān hai?*

Islie ki yih us āk̄hiri khāne kī taraf ishārā hai jo Īsā Masīh ne shāgirdoṅ ke sāth khāyā. Us ke bāre meṅ likhā hai,

Īsā ne roṭī lekar [...] kahā, “Yih lo aur khāo. Yih merā badan hai.” Phir us ne mai kā pyālā [...] unheṅ dekar kahā, “Tum sab is meṅ se piyo. Yih merā k̄hūn hai, nae ahd kā wuh k̄hūn jo bahutoṅ ke lie bahāyā jātā hai tāki un ke gunāhoṅ ko māf kar diyā jāe.” (Mattī 26:26-29)

Āj tak us ke huzūr milkar khānā khāne se ham jo shāgird haiṅ is khāne kī yād karke wuh tāqat pāte haiṅ jo is duniyā meṅ qāym rahne ke lie darkār hai. Sāth sāth ham us din kī k̄hushī manāte haiṅ jab ham us ke sāth milkar us ke abadī ghar meṅ ziyāfat karenge.

► *Kyā āp achchhe charwāhe kī yih taqwiyyat pāte rahte haiṅ?*

Chauthā sabaq,

Achchhe Charwāhe kâ Pyār Qabūl Karo

Khānā khāne ke bād Īsā Masīh Patras se muḥhātīb huā, “Shamāūn, kyā tū in kī nisbat mujh se zyādā muhabbat kartā hai?”

► *Us ne yih kyon pūchhā?*

Salībī maut se pahle Īsā Masīh ne farmāyā thā ki āj rāt tum sab merī bābat bargashtā ho jāoge. Us waqt Patras ne etarāz kiya thā ki dūsre be-shak sab bargashtā ho jāen, lekin main kabhī nahīn hūngā. Matlab hai main dūsron se zyādā wafādār hūn. Phir bhī us ne bād mein tīn bār kahā thā ki main Īsā Masīh ko nahīn jāntā. Yahi wajah hai ki Īsā Masīh ne pūchhā ki kyā tū mujh se zyādā muhabbat kartā hai?

Dekho hamāre āqā kī narmī. Us ne jhīṛkī na dī. Is narm aur sādā sawāl se hī wuh Patras sahī paṭarī par lāyā.

► *Sahī paṭarī kyā thī?*

Yih ki apnī tāqat aur apnī hī wafādārī par faḥhr mat kar balki us kām par jo mainne tujh se muhabbat rakhne ke bāis kiya hai. Pahle merā yih pyār qabūl kar. Tab hī tū sahī pyār kar sakegā—mujhe bhī aur dūsron ko bhī. Āindā mat lalkārnā ki tū hī sab kuchh ṭhīk karegā. Āindā yih mān le ki tū apnī tāqat se kuchh nahīn kar saktā. Āindā fariyād kar ki ai Ḳhudāwand, merī madad kar tāki main tujhe pyār kar sakūn, tere pīchhe chal sakūn.

Lekin Īsā Masīh ko yih sārī bāteñ kahne kī zarūrat nahīn hai. Wuh bas yih pūchhtā hai ki kyā tū mujhe pyār kartā hai.

► *Wuh kyon sirf yih pūchhtā hai ki kyā tū mujhe pyār kartā hai?*

Jo Masīh kâ ghar wālā ban jātā hai us ke rishte kâ bandhan muhabbat hai. Masīh kâ pyār use mazbūt kar detā hai aur jawāb mein hī wuh use aur dūsron ko pyār kar saktā hai. Pāñchwāñ sabaq,

Achchhe Charwāhe kī Fitrat Apnāo

Patras ne jawāb diyā, “Jī Ḳhudāwand, āp to jānte haiñ ki main āp ko pyār kartā hūñ.”

Īsā Masīh bolā, “Phir mere leloñ ko charā.”

► *Yih lele kaun haiñ?*

Lele wuh sab haiñ jo achchhe charwāhe kī bheṛeñ haiñ.

► *Charāne kā kyā matlab hai?*

Jis tarah Īsā Masīh tamām bheṛoñ kā achchhā charwāhā hai usī tarah wuh chāhtā hai ki Patras chhoṭe paimāne par charwāhā ho. Wuh dūsroñ se achchhe charwāhe kāsā sulūk kare. Har shāgird ko achchhe charwāhe kī fitrat apnānī hai.

► *Achchhā charwāhā kyā kartā hai?*

Wuh apnī bheṛoñ kī dekh-bhāl kartā hai. Wuh har ek kī fikr kartā hai. Itnī fikr ki us ne apnī jān apnī bheṛoñ kī ḵhātir dī. Soch lo: Agar har shāgird chhoṭe paimāne par achchhe charwāhe kī fitrat apnāe to kitnā bhalā hogā. Misāl ke taur par agar māñ-bāp apne bachchoñ ke achchhe charwāhe hoñ to kyā ḵhūb. Lekin dhyān do: Jo bhī charwāhā ho wuh tab kāmyāb hogā jab wuh Īsā Masīh ko pyār karegā. Aur wuh tab Īsā Masīh ko ṭhīk tarah se pyār karegā jab us ne us kā pyār qabūl kiya hogā.

Tab Īsā Masīh ne ek aur martabā pūchhā, “Shamāūn, kyā tū mujh se muhabbat kartā hai?”

Us ne jawāb diyā, “Jī Ḳhudāwand, āp to jānte haiñ ki main āp ko pyār kartā hūñ.”

Īsā Masīh bolā, “Phir merī bheṛoñ kī gallābānī kar.” Tīsri bār us ne us se pūchhā, “Shamāūn, kyā tū mujhe pyār kartā hai?” Tīsri bār yih sawāl sunane se Patras ko baṛā dukh huā. Us ne kahā, “Ḳhudāwand, āp ko sab kuchh mālūm hai. Āp to jānte haiñ ki main āp ko pyār kartā hūñ.”

Īsā Masīh ne us se kahā, “Merī bheṛoñ ko charā.”

► *Us ne yih sawāl tīn bār kyon pūchhā?*

Patras ne tīn bār kahā thā ki main̄ Īsā Masīh ko nahīn jāntā. Isliē Īsā Masīh ne tīn bār yih sawāl pūchhā. Yih Īsā Masīh kā ham se sawāl bhī hai. Be-shak ham sab se bār bār ḡhalatīyān hotī rahtī haiñ. Be-shak ham apnī harkatoñ se kaī bār use dukh pahuñchāte haiñ. Lekin wuh hamen̄ jhiṛkī nahīn detā. Wuh bas yahī sawāl pūchhtā rahtā hai ki kyā tū mujhe pyār kartā hai? Us se muhabbat sab kuchh hai. Agar yih pyār na ho to sab kuchh bakwās hai, chāhe ham kitnā achchhā kām kyon na karen̄. Isliē lāzim hai ki ham apnī kamzorī ko mānkar us kā pyār qabūl karen̄ aur Patras ke sāth kaheñ ki ai Ḳhudāwand, tū to jāntā hai ki main̄ tujhe pyār kartā hūñ. Tab hī wuh hamen̄ achchhe charwāhe kī fitrat detā hai, wuh fitrat jo us kī madad ke baḡhair hamāre andar nahīn hotī. Tab hī wuh hamen̄ wuh barkat detā hai jo ham apne zor se pā nahīn sakte. Kaī bār us kī fitrat ko apnāne se bahut saḡht natīje nikal sakte haiñ.

Pyār Karne kā Ek Natījā

Īsā Masīh ne farmāyā, “Main̄ tujhe sach batātā hūñ ki jab tū jawān thā to tū ḡhud apnī kamr bāndhkar jahān jī chāhtā ḡhūmtā-phirtā thā. Lekin jab tū būṛhā hogā to tū apne hāthoñ ko āge baṛhāegā aur koī aur terī kamr bāndhkar tujhe le jāegā jahān terā dil nahīn karegā.” (Yih bāt is taraf ishārā thī ki Patras kis qism kī maut se Allāh ko jalāl degā.) Phir us ne use batāyā, “Mere pīchhe chal.”

► *Īsā Masīh yih kahne se kis taraf ishārā kar rahā thā?*

Bād meñ Patras shahīd ho jāegā. Qadīm tāriḡhī gawāh likhte haiñ ki kuchh sāl ke bād use salīb par chaṛhāyā gayā. Achchhe charwāhe ke qadamoñ meñ chalne se yahī natījā niklā.

► *Āḡhir meñ Masīh ne kyā hidāyat dī?*

Mere pīchhe chal. Yih sahī pyār hai. Jo Īsā Masīh ko pyār kartā hai wuh us ke pīchhe chaltā hai. Bheṛ apne

achchhe charwāhe kī āwāz sunkar us ke pīchhe chaltī hai.
 Use pūrā bharosā hai ki jahān charwāhā chaltā hai wahān
 main mahfūz hūn, chāhe yih rāstā salīb kā rāstā kyon na
 ho. Chhaṭā sabaq,

Āpasī Jalan Chhor Do

Patras ne muṛkar dekhā ki Yūhannā un ke pīchhe chal rahā hai. Us ne sawāl kiyā, “Ḳhudāwand, is ke sāth kyā hogā?”

► *Patras ne yih kyon pūchhā?*

Yūhannā, Patras kī tarah Īsā Masīh ke bahut qarīb thā. Patras chāhtā thā ki ab Īsā Masīh, Yūhannā ke mustaqbil ke bāre mein bhī kuchh batāe. Yānī kyā use bhī shahādat kā jalāl milegā?

Lekin Masīh ne aisā na kiyā. Us ne jawāb diyā, “Agar main chāhūn ki yih mere wāpas āne tak zindā rahe to tujhe kyā? Bas tū mere pīchhe chaltā rah.”

► *Kyā us ne Yūhannā ke bāre mein kuchh batāyā?*

Nahīn. Us ne kahā ki tujhe kyā? Matlab hai dūsron kī taraf mat dekhna ki un ke sāth kyā hogā. Apne āp par dhyān de. Mere pīchhe chaltā rah. Kitnī achchhī hidāyat! Ham sab hameshā is khatre mein hote hai ki apne āp kā muqābalā apne sāthiyon se karen. Is se ham mein ehsās-e-kamtari, hasad yā apne āp par faḡhr paidā hotā hai. Masīh bas ek hī chīz ham se chāhtā hai—yih ki ham use pyār karke us ke pīchhe chalein. Ki ham achchhe charwāhe kī āwāz sunkar pūre bharose ke sāth us ke qadamon mein chalein. Kuchh logoñ ne yih bāt sunkar ḡhalat natijā nikālā—yih ki Yūhannā nahīn maregā. Lekin Īsā Masīh ne yih bāt nahīn kī thī. Us ne sirf yih kahā thā, “Agar main chāhūn ki yih mere wāpas āne tak zindā rahe to tujhe kyā?”

Ab dekho ham insānon kī ḡhalat soch. Bād mein log andāzā lagāne lage ki Yūhannā, Masīh ke wāpas āne tak zindā rahegā. Un ko is par dhyān denā chāhie thā ki ham khud kis tarah use pyār karte haiñ, ham khud kis tarah

us ke pīchhe chalte haiñ. Masīh to yih kahne se is par zor de rahā thā ki Yūhannā kī fikr mat karnā balki apnī hī fikr kar ki kyā main achchhe charwāhe ko pyār kartā hūñ, kyā main us ke pīchhe chal rahā hūñ? Phir bhī un mein se kuchh is sāf bāt se fazūl natīje nikālne lage the. Ākhirī sabaq,

Achchhe Charwāhe kī Sachchāi Apnāo

Phir Yūhannā likhtā hai,

Yih wuh shāgird hai jis ne in bāton kī gawāhī dekar inhen qalamband kar diyā hai. Aur ham jānte haiñ ki us kī gawāhī sachchī hai.
(Yūhannā 21:24)

► *Yūhannā kis bāt par zor detā hai?*

Ek bār phir Yūhannā is par zor detā hai ki jo kuchh mainne sunāyā hai wuh mainne apnī āñkhoñ se dekhā hai. Is par aur zor dene ke lie wuh farmātā hai ki ham jānte haiñ ki us kī gawāhī sachchī hai. Jab wuh ‘ham’ kahtā hai to matlab yih hai ki yih na sirf merī gawāhī hai. Bahut-sāre logoñ ne is kī tasdīq kī hai. Agar main koī ghalat bāt qalamband kartā to wuh zarūr etarāz karte. Islie wuh is par zor detā hai ki **ham** jānte haiñ ki us kī gawāhī sachchī hai.

Yih bāt hamen ākhir mein yād dilātī hai ki jo achchhe charwāhe kī sachchāi shāgird hai us kī zindagī kī buniyād aur markaz sachchāi hai. Us kī zindagī mein jhūṭh ke lie koī jagah nahīñ hai.

► *Kyā āp kī zindagī is sachchāi par mabnī hai?*

Sachchāi hī hamāre kānon ko khol detī hai tāki ham achchhe charwāhe kī pukār sun sakeñ, us kī barkat aur taqwīyat pā sakeñ, us kī pyār qabūl karke us kī fitrat apnā sakeñ aur āpasī jalan ke bāis ḍūb na jāen. Āmīn.

Injil, Yūhannā 21

Jhīl Par

Is ke bād Īsā ek bār phir apne shāgirdoñ par zāhir huā jab wuh Tibariyās yānī Galīl kī jhīl par the. Yih yon huā. Kuchh shāgird Shamāūn Patras ke sāth jamā the, Tomā jo Jurwāñ kahlātā thā, Natanel jo Galīl ke Qānā se thā, Zabdī ke do beṭe aur mazīd do shāgird.

Shamāūn Patras ne kahā, “Main machhli pakarne jā rahā hūñ.”

Dūsroñ ne kahā, “Ham bhī sāth jāenge.” Chunāñche wuh nikalkar kashtī par sawār hue. Lekin us pūrī rāt ek bhī machhli hāth na āī. Subh-sawere Īsā jhīl ke kināre par ā kharā huā. Lekin shāgirdoñ ko mālūm nahīn thā ki wuh Īsā hī hai. Us ne un se pūchhā, “Bachcho, kyā tumheñ khāne ke lie kuchh mil gayā?”

Unhoñ ne jawāb diyā, “Nahīn.”

Us ne kahā, “Apnā jāl kashtī ke dāeñ hāth ḍālo, phir tum ko kuchh milegā.” Unhoñ ne aisā kiyā to machhliyon kī itnī baṛī tādād thī ki wuh jāl kashtī tak na lā sake.

Is par Ḳhudāwand ke pyāre shāgird ne Patras se kahā, “Yih to Ḳhudāwand hai.” Yih sunte hī ki Ḳhudāwand hai Shamāūn Patras apnī chādar oṛhkar pānī meñ kūd paṛā (Us ne chādar ko kām karne ke lie utār liyā thā.) Dūsre shāgird kashtī par sawār us ke pīchhe āe. Wuh kināre se zyādā dūr nahīn the, taqriban sau meter ke fāsle par the. Islie wuh machhliyon se bhare jāl ko pānī meñ khīnch khīnchkar ḡhushkī tak lāe. Jab wuh kashtī se utre to dekhā ki lakaṛī ke koyloñ kī āg par machhliyāñ bhunī jā rahī haiñ aur sāth roṭī bhī hai. Īsā ne un se kahā, “Un machhliyon meñ se kuchh le āo jo tum ne abhī pakṛī haiñ.”

Shamāūn Patras kashtī par gayā aur jāl ko ḡhushkī par ghasīṭ lāyā. Yih jāl 153 baṛī machhliyoṅ se bharā huā thā, to bhī wuh na phaṭā. Īsā ne un se kahā, “Āo, nāshtā kar lo.” Kisī bhī shāgird ne sawāl karne kī jurrat na kī ki “Āp kaun haiṅ?” Kyoṅki wuh to jānte the ki yih Ḳhudāwand hī hai. Phir Īsā āyā aur roṭī lekar unheṅ dī aur isī tarah machhlī bhī unheṅ khilāi.

Īsā ke jī uṭhne ke bād yih tīsri bār thī ki wuh apne shāgirdoṅ par zāhir huā.

Patras se Sawāl

Nāshte ke bād Īsā Shamāūn Patras se muḡhātib huā, “Yūhannā ke beṭe Shamāūn, kyā tū in kī nisbat mujh se zyādā muhabbat kartā hai?”

Us ne jawāb diyā, “Jī Ḳhudāwand, āp to jānte haiṅ ki main āp ko pyār kartā hūṅ.”

Īsā bolā, “Phir mere leloṅ ko charā.” Tab Īsā ne ek aur martabā pūchhā, “Shamāūn Yūhannā ke beṭe, kyā tū mujh se muhabbat kartā hai?”

Us ne jawāb diyā, “Jī Ḳhudāwand, āp to jānte haiṅ ki main āp ko pyār kartā hūṅ.”

Īsā bolā, “Phir merī bheṛoṅ kī gallābānī kar.” Tīsri bār Īsā ne us se pūchhā, “Shamāūn Yūhannā ke beṭe, kyā tū mujhe pyār kartā hai?”

Tīsri dafā yih sawāl sunane se Patras ko baṛā dukh huā. Us ne kahā, “Ḳhudāwand, āp ko sab kuchh mālūm hai. Āp to jānte haiṅ ki main āp ko pyār kartā hūṅ.”

Īsā ne us se kahā, “Merī bheṛoṅ ko charā.

Main tujhe sach batātā hūṅ ki jab tū jawān thā to tū ḡhud apnī kamr bāndhkar jahān jī chāhtā ghūmtā-phirtā thā. Lekin jab tū būṛhā hogā to tū apne hāthoṅ ko āge baṛhāegā aur koī aur terī kamr bāndhkar tujhe le jāegā jahān terā dil nahīn karegā.” (Īsā kī yih bāt is taraf ishārā

thī ki Patras kis qism kī maut se Allāh ko jalāl degā.) Phir us ne use batāyā, “Mere pīchhe chal.”

Dūsra Shāgird

Patras ne muṛkar dekhā ki jo shāgird Īsā ko pyārā thā wuh un ke pīchhe chal rahā hai. Yih wuhī shāgird thā jis ne shām ke khāne ke daurān Īsā kī taraf sar jhukākar pūchhā thā, “Ḳhudāwand, kaun āp ko dushman ke hawāle karegā?” Ab use dekhkar Patras ne sawāl kiyā, “Ḳhudāwand, is ke sāth kyā hogā?”

Īsā ne jawāb diyā, “Agar main chāhūn ki yih mere wāpas āne tak zindā rahe to tujhe kyā? Bas tū mere pīchhe chaltā rah.”

Natiye meñ bhāiyon meñ yih ḳhyāl phail gayā ki yih shāgird nahīn maregā. Lekin Īsā ne yih bāt nahīn kī thī. Us ne sirf yih kahā thā, “Agar main chāhūn ki yih mere wāpas āne tak zindā rahe to tujhe kyā?”

Yih wuh shāgird hai jis ne in bāton kī gawāhī dekar inheñ qalamband kar diyā hai. Aur ham jānte haiñ ki us kī gawāhī sachchī hai.

Ḳhulāsā

Īsā ne is ke alāwā bhī bahut kuchh kiyā. Agar us kā har kām qalamband kiyā jātā to mere ḳhyāl meñ pūrī duniyā meñ yih kitābeñ rakhne kī gunjāish na hotī.

Taswīri Huqūq

Special thanks to the creators of the images used at the beginning of each chapter (listed below according to each chapter):

1. A collage of u_bwnedbuxc1 <https://pixabay.com/photos/sunrise-world-earth-space-planet-8178734/>; Placidplace <https://pixabay.com/illustrations/crowd-people-silhouette-audience-7112474/>.
2. A collage of HUNGQUACH679PNG <https://pixabay.com/illustrations/bird-holy-spirit-cutout-peace-dove-7074455/>; Clker-Free-Vector-Images <https://pixabay.com/vectors/cattails-grass-lawn-nature-297283/>; R. Gunther <https://freebibleimages.org/illustrations/lj-jacob-isaac/>.
3. A collage including OpenClipart-Vectors <https://pixabay.com/images/id-2026191/>.
4. A collage of J. Kemp and R. Gunther <https://freebibleimages.org/illustrations/lj-jesus-wedding/>; OpenClipart-Vectors <https://pixabay.com/images/id-1293468/>.
5. A collage of Chakkree-Chantakad <https://pixabay.com/images/id-4821585/>; OpenClipart-Vectors <https://pixabay.com/images/id-1300109/>; aalmeidah <https://pixabay.com/images/id-3589838/>; R. Gunter <https://freebibleimages.org/illustrations/rg-king-jesus/>; J. Kemp/R. Gunter <https://freebibleimages.org/illustrations/lj-peter-lame-man/>.
6. A collage of BiancaVanDijk <https://pixabay.com/images/id-7318705/>; geralt <https://pixabay.com/images/id-7771227/>.
7. A collage of Clker-Free-Vector-Images <https://pixabay.com/images/id-297283/>; J. Kemp/R. Gunter <https://freebibleimages.org/illustrations/lj-washing-feet/>; K. Tuck [025-kt-cloud-backgrounds.jpg](https://media.freebibleimages.org/stories/FB_KT_Cloud_Backgrounds/) in https://media.freebibleimages.org/stories/FB_KT_Cloud_Backgrounds/.
8. A collage of I. & Sue Coate <https://freebibleimages.org/illustrations/jsc-buildings/>; R. Gunter <https://www.lambsongs.co.nz/BibleStoryBooks/DeborahAndBarrackb+w.pdf>; OpenClipart-Vectors <https://pixabay.com/images/id-1294868/>; Kievninay <https://pixabay.com/images/id-3778767/>; Clker-Free-Vector-Images <https://pixabay.com/images/id-30597/>; GDJ <https://pixabay.com/images/id-5354275/>.
9. A modified image of iessephoto <https://pixabay.com/illustrations/wheat-ears-nature-mature-dawn-3781755/>.
10. A collage of Katamaheen <https://pixabay.com/illustrations/grass-vegetation-green-easter-soil-7840326/>; R. Gunther <https://freebibleimages.org/illustrations/rg-lame-man/>.
11. Derived by permission from Bible Society Australia – The Wild Bible <https://freebibleimages.org/illustrations/wb-john-baptist/>.
12. A collage of Pexels <https://pixabay.com/photos/abstract-backdrop-background-1850416/>; Rev. H. Martin <https://freebibleimages.org/illustrations/hm-feeding-5000/>.
13. A collage of deeznutz1 <https://pixabay.com/vectors/tortilla-quesadilla-tacos-mexican-8147494/>; Ridderhof <https://pixabay.com/illustrations/background-grunge-vintage-paper-1774911/>.
14. A collage of 3209107 <https://pixabay.com/illustrations/vintage-old-used-paper-texture-1659117/>; Rev. H. Martin <https://freebibleimages.org/illustrations/hm-walking-water/>.
15. Derived from aalmeidah <https://pixabay.com/illustrations/nature-background-drawing-sketch-7055960/>.
16. A collage of OpenClipart-Vectors <https://pixabay.com/images/id-154418/>; bradholbrook71 <https://pixabay.com/images/id-1080252/>; geralt <https://pixabay.com/images/id-391658/>.
17. A collage of torstenbreswald <https://pixabay.com/vectors/chain-broken-chain-line-art-6202299/>; ractapopulous <https://pixabay.com/illustrations/background-scrapbooking-texture-2037172/>.
18. A collage of no-longer-here <https://pixabay.com/illustrations/man-male-youth-lad-boy-person-316883/>; Mohamed_hassan <https://pixabay.com/vectors/old-woman-senior-walking-cane-8433305/>; ditto <https://pixabay.com/vectors/silhouette-isolated-older-man-3060100/>; ditto <https://pixabay.com/vectors/silhouette-businessman-move-3115314/>; ditto <https://pixabay.com/vectors/silhouette-businessman-hurry-up-3196572/>; ditto <https://pixabay.com/vectors/silhouette-woman-shopping-bags-pose-4517528/>.

19. A collage of GDJ <https://pixabay.com/vectors/shepherd-herder-silhouette-boy-7128766/>; BedexpStock <https://pixabay.com/vectors/sheep-animal-standing-farm-lamb-2672678/>; kropekn_pl <https://pixabay.com/cs/illustrations/vzor-design-textura-vyplnit-barvy-707185/>.
20. A collage of R. Gunther <https://freebibleimages.org/illustrations/ls-cain-abel/>; geralt <https://pixabay.com/cs/illustrations/abstraktn%C3%AD-barvit-akvarel-1076264/>.
21. Derived from JooJoo41 <https://pixabay.com/illustrations/man-stairs-heaven-steps-clouds-5826096/>.
22. A collage of Clker-Free-Vector-Images <https://pixabay.com/vectors/flask-decanter-beaker-chemistry-30532/>; 499798 <https://pixabay.com/illustrations/smoke-colors-wallpaper-662747/>.
23. Includes OpenClipart-Vectors <https://pixabay.com/vectors/ground-nature-plant-spring-2022491/>.
24. Derived from waldryano <https://pixabay.com/illustrations/resilience-victory-force-1697546/>.
25. Derived from Bucarama-TLM <https://pixabay.com/illustrations/maundy-thursday-holy-thursday-7870823/>.
26. Derived from BilliTheCat <https://pixabay.com/vectors/mughal-scene-scenery-india-4676668/>.
27. Derived from ljcort <https://pixabay.com/illustrations/heaven-stairs-to-heaven-sky-faith-2138568/>.
28. Contains OpenClipart-Vectors <https://pixabay.com/vectors/pigeon-dove-peace-dove-148038/>.
29. A collage including Clker-Free-Vector-Images <https://pixabay.com/vectors/grape-purple-grapes-vines-vine-25323/>; ditto <https://pixabay.com/vectors/grapes-green-plants-vines-climbing-36209/>.
30. A collage including garzapaloelhermano <https://pixabay.com/illustrations/art-design-fire-dove-symbol-flame-7148539/>; Clker-Free-Vector-Images <https://pixabay.com/vectors/fire-flames-burn-heat-warm-297752/>; ditto <https://pixabay.com/vectors/fire-flame-red-heat-hot-305227/>; VOLLEX <https://pixabay.com/vectors/koster-flame-fire-1898042/>.
31. Derived from Clker-Free-Vector-Images <https://pixabay.com/vectors/balloon-green-shiny-helium-happy-25735/>; ditto <https://pixabay.com/vectors/balloon-birthday-balloon-25734/>; ditto <https://pixabay.com/vectors/balloon-birthday-balloon-25739/>; ditto <https://pixabay.com/vectors/fireworks-explosion-firecracker-40954/>; jean_victor_balun <https://openclipart.org/detail/16992/flatcake>; OpenClipart-Vectors <https://pixabay.com/vectors/banners-celebration-decoration-2026059/>; BarelyDevi <https://pixabay.com/illustrations/party-popper-popper-congratulations-5009414/>.
32. Derived from Clker-Free-Vector-Images <https://pixabay.com/illustrations/human-feet-footprint-pattern-feet-6300803/>; GeorgyGirl <https://pixabay.com/illustrations/texture-vintage-aged-paper-light-318903/>.
33. Derived from R. Gunther <https://www.freebibleimages.org/illustrations/ls-jesus-gethersemane/>.
34. Derived from R. Gunther <https://www.freebibleimages.org/illustrations/ls-passover/>.
35. Derived from J. Kemp/R. Gunther <https://www.freebibleimages.org/illustrations/ls-jesus-alive-1/>.
36. Derived from R. Gunther <https://www.freebibleimages.org/illustrations/rg-resurrection-galilee/>.